



BIBLIOTHECA S. J.

Maison Saint-Augustin

ENGHIEN

TH 365/3



A. P. A. B. I.

Wm. H. R. C. & Co.  
London, E. & W. I.  
Am. & E. I.

W. H. R. C. & Co.

Theophile Brachet de la Milletière

+ 1865

laïc, protestant converti

Hunter IV, 61

L A  
DOCTRINE  
CATHOLIQUE.

DE LA IVSTIFICATION DV  
fidele, & du vray merite que la grace de  
Dieu forme en luy.

Defenduë contre les raisons de M.  
Mestrezat.

Par THEOPHILE BRACHET *sieur de*  
*Milletiere.*

Pour la reünion du schisme en l'Eglise.



A PARIS,

Chez PIERRE ROCOLET, Imprimeur  
& Libraire du Roy, au Palais, aux  
Armes de la Ville,

---

M. DC. XXXIX.

L A

# DOCTRINE CATHOLIQUE

DE LA VERTU  
Noblesse de la nation par la grace de  
Dieu.

De la doctrine de la sainte Eglise  
par le P. de la Riviere  
Prêtre de la Compagnie de Jésus  
Paris chez la Citoyenne de la Harpe  
au Salon de la Bibliothèque Nationale



A PARIS

Chez P. de la Riviere, Libraire  
à la Bibliothèque Royale  
au Salon de la Citoyenne de la Harpe

M. D. C. C. X. X. I.



P R É F A C E,  
A T O U S C E V X Q U I  
*font profession de la religion Reformée  
en ce Royaume.*



ESSIEURS,

Quand ie propofay, au commen-  
ment, le deffein de quelques ouuer-  
tures pour nostre reünion avec les  
Catholiques, ie fçay que tous ceux  
de vous, qui en eurent cognoiffan-  
ce, s'en eftonnerent, & plufieurs en  
prirent fcandale. Mais ny l'efton-  
nement des vns, ny le fcandale des  
autres, ne me furprit point. Pour ce  
que i'en auoy preueu l'effect, com-

me i'en cognoissoy bien la cause.  
Et ie sçauoy que la cause de vo-  
stre estonnement & de vostre scan-  
dale estoit aussi vaine, que l'effect,  
s'en euanoüiroit facilement. Vne  
seule chose me surprit, & m'appor-  
ta de la tristesse. C'est le peu de cha-  
rité que monstrent ceux, qui d'a-  
bord en prirent cognoissance de  
cause avec autorité. Ou qui, de  
gayeté de cœur, en publierent  
leur sentiment. Ou ceux qui depuis  
ont pris la plume pour examiner  
mes escrits. Ce que nul d'eux n'a fait  
avec la naïueté & la simplicité, que  
la verité requiert en ceux, qui font  
profession de la suiure. Car les vns  
mesmes ny ont apporté que de l'ar-  
tifice, & les autres encore y ont ad-  
iousté la malignité. Mais i'espere,  
moyennant la grace de Dieu, que  
tous ces mauuais restes de l'Esprit  
humain seront gueris en eux, par les

mesmes raisons qui feront cesser l'estonnement & le scandale de tous les autres.

Les causes de vostre estonnement & de vostre scandale sont venues, en partie, de la chose mesme: en partie, de la consideration de ma procedure. De la chose mesme, pource que la plus part estiment que le dessein que ie propose est impossible. Et si quelques-vns iugent, qu'il se pourroit peut-estre trouuer des expediens de le rendre possible en soy: ils ne croyent pas qu'il y en ait de tels, qui puissent iamais trouuer lieu dans les affections & dans les interets de ceux, qui, de part & d'autre, semblent mieux aimer l'entretien du partage & de la diuision suruenüe, que quelque condition raisonnable qui blesse tant soit peu leurs intentions particulieres.

Au regard de la consideration de

ma procedure, ieſçay que vous vous  
eſtes eſtonnez , ou ſcandalifez,  
de ce qu'ayant eſté nourry dans la  
communion des Euangeliques, im-  
bu des ſentimens de la pieté, que  
donnent les institutions familiares  
que noſtre reformation a introdui-  
tes, & ayant rendu, en toute ma vie,  
de ſuffiſans teſmoignages de ſince-  
rité, d'affection, de reſolution, &  
de coſtance en la profeſſion que i'ay  
embrassée: i'aye fait voir, ſoudain,  
vn ſi grand changement de penſées  
& d'opinions , que de vous auoir  
propoſé, pour moyen de reünion,  
de receuoir les definitions reiettees  
par nos reformateurs en la doctrine  
des Catholiques, & de nous depar-  
tir de celles qu'ils leur ont oppoſées.  
Et deſquelles ſe ſont engendrées les  
controuerſes, qui cauſent notoire-  
ment la diuiſion. Ce qui ne vous a  
peu ſembler autre choſe, que de

vous proposer en effet de quitter  
nostre religion, pour embrasser la  
Catholique. Auquel cas , tout le  
monde iugera, sans doute, l'expé-  
dient de réunion aussi facile, pour sa  
conséquence: comme il peut paroi-  
stre absurde & odieux, pour son an-  
tecedent , au iugement de tous les  
Euangeliques. A qui ny les glaiues,  
ny les feux, ny aucunes sortes de sup-  
plices, ne seroient capables d'arra-  
cher, du cœur, l'amour qu'ils ont à  
la reformation par eux embrassée.  
De laquelle ils iugent, que le fruit  
s'en iroit esteint & aboli par le suc-  
cez de l'expedient que ie propose.

Sur tout cela, Messieurs, i'en-  
trepren icy de satisfaire aux raisons  
qui vous alienent de mon dessein.  
De faire cesser les preiugez qui  
preoccupent vos esprits. Et d'appai-  
ser toute l'emotion, qui, sur ce sujet,  
agite vos consciences. Par où i' espe-

re me faire reconnoistre , de vous  
tous, autant zelé à la gloire de Dieu  
& à l'edification de son Eglise , &  
autant affectonné à vostre salut &  
au repos de vos consciences : com-  
me ceux, qui se sont estonnez ou  
scandalisez de moy , m'ont estimé,  
au commencement, hardi & teme-  
raire. Ou , qui pis est, conuoiteux  
de la gloire & des interests du mon-  
de. Que Dieu m'a donné , par sa  
grace , le courage de fouler aux  
pieds. Et de les reputer pour fiente,  
pour l'excellence de la croix & de la  
gloire de son Fils, dont son esprit a  
planté la foy & l'esperance certaine  
en mon ame.

En respondant aux inconueniens,  
qui vous ont estonnez ou scandali-  
sez en ma procedure, & en les de-  
struisant, ie satisferay , par mesme  
moyen, aux pensées de ceux qui iu-  
gent, au regard de la chose mesme,

ma proposition impossible. Car si ie  
monstre, que l'esclaircissement de la  
verité (qui est la condition, sous la-  
quelle, dès l'entrée, ie me suis fait  
fort de vous faire consentir à mes  
ouuertures) nous oblige d'embras-  
ser les definitions des Catholiques,  
que nos reformateurs ont reietées,  
& sur lesquelles se sont formées les  
controuerfes qui nous diuisent: i'au-  
ray obtenu, à mesme temps, de faire  
voir à tous, que la reünion est tres-  
possible & tres-facile au regard de  
la chose mesme.

Considerât donc en ma propositiô,  
& en ma procedure, que, d'une part,  
ie demande que nous consentions  
aux maximes que nous auons reiet-  
tées en la doctrine des Catholiques.  
Et d'autre part, que ie promets de  
faire voir la demonstration de leur  
verité si euidente, qu'elle vous obli-  
gera tous à consentement; elle vous

assemblé fort estrange. Ce qui vient de deux preiugez dont vous auez l'esprit occupé. L'un est, que la reformation de l'Eglise, & la pureté du seruice de Dieu selon pieté & charité, depend des controuerses, que nos reformateurs ont establies sur les maximes qu'ils ont reiettees en la doctrine des Catholiques. Et par consequent, que d'y consentir, & de se reünir en ce regard avec les Catholiques, c'est perdre tout le fruit de la reformation souhaitable en l'Eglise. L'autre preiugé qui vous occupe l'entendement, vient de l'opinion, que nos reformateurs ont si heureusement frappé au but dans l'oeuvre de la reformation par eux entreprise, qu'ils n'ont rien mis en auant qui ne soit tres-veritable, & entierement conforme à l'Ecriture sainte. Et qu'ils n'ont rien condamné ny reietté dans la doctrine

des Catholiques , qui ne soit faux,  
& du tout contraire à ce que Dieu  
nous a enseigné dans sa parole. Ces  
deux preiugez sont tellement liez  
ensemble, & dependent de telle sor-  
te l'un de l'autre , en la place où ils  
sont assis dans vos consciences,  
qu'on n'en peut esbranler, ou enle-  
uer l'un, qu'on n'arrache l'autre par  
vne suite tres-necessaire.

Si ie vous fay donc voir , que nos  
reformateurs se sont mespris sur les  
maximes qu'ils ont reiettees dans la  
doctrine des Catholiques. Qu'ils  
ont condamné des definitions  
tres-veritables & entierement con-  
formes à l'Ecriture sainte. Qu'ils  
ont establi, au contraire, des maxi-  
mes fausses & repugnantes à l'Escri-  
ture, & autant nouuelles & inouïes  
auparauant eux , que celles qu'ils  
ont reiettees sont anciennes, & con-  
stamment retenues en l'Eglise de-

puis les Apostres, qui les y ont données. Je croy qu'il n'y aura nul de vous, qui, selon sa conscience, ne reconnoisse & ne m'accorde, que les controuerses establies sur le conflict de telles maximes, ne sont nullement ny le moyen, ny le sujet de la reformation de l'Eglise. Ce que vous aduoüerez tant plus aisément, qu'en reconnoissant la necessité de retourner au consentement des vraies maximes, mal reiettees de nous, en la doctrine des Catholiques, & en ce faisant de nous reünir à eux, & deuenir Catholiques comme eux : vous verrez, par mesme moyen, qu'en nous reünissant, & en deuenant Catholiques, nous ne perdrons nullement le fruit de la reformation, non moins necessaire que desirable. Selon qu'elle estoit aussi requise, avec grande instance, auant mesme que nos reformateurs

le fussent ingerez de la promou-  
voir. Car comme les causes de la re-  
formation (qui ne dependent nul-  
lement de nos controuerses) subsi-  
steront, ne plus ne moins, apres que  
la porte de la reünion sera ouuerte  
par l'extinction de nos controuer-  
ses: aussi ces mesmes causes de refor-  
mation produiront-elles lors plei-  
nement leur effet sans diuision, pour  
la pureté du seruice qui est deu à  
Dieu en esprit, par vraye pieté &  
charité, suiuant l'Euangile. Ce que  
vous verrez reüssir del'esclaircisse-  
ment que ie propose, pour mettre  
fin à nos controuerses, & pour vous  
obliger au consentement des ma-  
ximes par nous reiettées en la do-  
ctrine des Catholiques. Pource  
que la lumiere, par où s'en demon-  
stre la verité, est la seule qui peut  
produire l'effet de la reformation  
veritable. Comme ainsi soit que la

vraye reformation confifte, en la verité d'où depend l'œuvre du S. Esprit dans la conscience de tous ceux, qui embrassent, par vraye foy, la doctrine qu'il a laissée à l'Eglise. C'est à dire, au vif sentiment de la pieté & de la charité, de l'amour de Dieu & de la dilection fraternelle. Ce qui ne peut iamais auoir lieu, où l'ignorance des vrayes raisons de l'Evangile, nourrit, ou la superstition, ou la passion, dans l'esprit des hommes.

De la these ie vien à l'hypothese. Pour vous faire appercevoir clairement la mesprise de nos reformateur. La verité des definitions des Catholiques, par eux reiettees. La fausseté des maximes contraires par eux introduites. I'ay creu deuoir commencer à cet effet, par le Traicté de la controuersé la plus celebre, la premiere formée, & dont la matiere est la plus necessaire à

connoître à chaque fidele, pour  
l'instruction de son salut, & pour  
estre adressé au droit chemin de la  
vie Chrestienne. C'est la matiere de  
*la iustification du fidele*. Sur laquelle  
i'ay desia mis en lumiere diuers es-  
crits, occasionnez par la contradi-  
ction que quelques-vns de nos Pa-  
steurs ont voulu faire à celuy que ie  
presentay à tout leur Corps, assem-  
blé au dernier Synode National.  
Où, sans aucun examen iuridique &  
conuenable, soit à l'importance de  
la chose, soit au compte que les Pa-  
steurs de l'Eglise doiuent rendre de  
toutes leurs actions à Dieu, & aux  
troupeaux qu'ils conduisent : il in-  
teruint condamnation contre le li-  
ure & ma personne, sans l'auoir leu,  
& sans m'auoir oüy, & trois iours  
apres qu'il leur fut rendu. Qui  
est vne procedure que ie pourrois  
autant reprocher de nullité pour fa-

forme, que l'accuser d'iniustice pour le fonds. Mais j'espere, que ceux-là mesme, qui en ont rendu le iugement, reconnoistront y auoir esté surpris, tant par les propres preiugez qui les occupoient, que par le monopole de ceux qui furent auteurs d'une telle precipitation. Ce que j'atten d'eux, apres qu'ils auront examiné, avec plus de loisir, & plus meurement, ce mesme Traicté & les subsequens, & qu'ils les auront conferez avec les escrits de la contradiction qui m'y a esté faite. A laquelle (comme ils verront) j'ay fermé la bouche desormais, & fait tomber la plume par ma repliche.

Entre ceux qui m'ont contredit, Monsieur Daillé, qui auoit pris cette charge au commencement, s'estant tenu depuis en silence, a cédé, sur cette matiere, la Prouince à d'autres. Monsieur Testard Mi-  
nistre

nistre de Blois, par vn escrit priué,  
qu'il a fait imprimer depuis, me  
donna, entr'autres choses, son sen-  
timent, avec la defense qu'il esti-  
moit pouuoir estre opposée contre  
la mesprise dont i'arguë nos refor-  
mateurs sur cét article. Mais en luy  
voulant donner quelque appuy, il  
est tombé luy mesme en la necessité  
de reconnoistre veritable le fonde-  
ment de la doctrine des Catholi-  
ques. Car il m'accorde, *que Dieu*  
*remunerera les Fideles, & leur rendra la*  
*couronne, au dernier iour, en considera-*  
*tion de leur iustice inherente, de leur*  
*saincteté, & de leurs bonnes œuvres.* Ce  
qui est euidentement se departir du  
fondement de nos reformateurs,  
„ lesquels on defini, Que Dieu ne  
„ nous repute iustes, qu'à cause de  
„ la iustice de Christ, qui nous est  
„ imputée, non pour aucune iusti-  
„ ce inherente, ou saincteté qui

,, soit en nous. D'où il est clair, que,  
puis que Dieu nous remunere &  
nous couronne pour la mesme rai-  
son, pour laquelle il nous reputé iu-  
stes: il ne nous remunere, par conse-  
quent, ny ne nous couronne, selon  
leur hypothese, pour aucune iusti-  
ce ou saincteté qui soit en nous,  
mais pour la seule iustice de Christ  
imputé. C'est sur ce fondemēt aussi  
que nos reformateurs ont osté,  
à la iustice, à la saincteté, & aux  
bonnes œuvres des fideles, le nom  
& la qualité de merites. Je remon-  
stray là dessus à Monsieur Testard,  
par vne breue epistre, comme il s'en-  
gageoit au consentement où ie de-  
sirois l'amener. Il s'en est voulu de-  
fendre par vn escrit qu'il publia  
quelque temps apres. Je luy ay re-  
pliqué en luy remonstrant, par ce  
qu'il m'accorde, la necessité de son  
adherence au sentiment des Catho-

liques. Et de cette neceffité i'en ay bien voulu deferer le iugement à Monsieur du Moulin mefine, comme à celuy de qui l'autorité est principalement confiderée entre nos Pasteurs. Et tout ensemble aux Pasteurs de cette Eglise encore, par l'adueu & par l'ordre desquels l'escrit de Monsieur Testard auoit esté imprimé icy. Iusques à cette heure, ce que ie leur ay representé en ce mien escri, pour la confirmation de la verité Catholique, n'a receu d'eux tous aucun contredit.

En suite de cela, i'ay fait mon possible pour entrer, sur ce sujet, en quelque conference priuée & plus facile avec quelqu'un de ces Messieurs, afin de leur faire gouster & aduoüer la verité de mes esclarcissemens. Je l'ay recherchée par voye d'amy, avec M. Mestrezat, mais il n'a pasiugé à propos de me l'accor-

der. l'esperois , par ce moyen , que  
la suffisance de son sçauoir & de son  
bon iugement me donneroit , par  
l'issuë , tout ce que ie puis desirer  
que la verité obtienne dans sa con-  
science , & , par luy , dans la con-  
science de ceux à qui l'autorité de  
son ministere doit faire impression,  
pour venir avec moy au consente-  
ment de la verité Catholique sur  
cette matiere. Cette miene inten-  
tion m'a porté depuis à luy presen-  
ter vn amiable esclaircissement , sur  
l'occasion de ce qu'en vn de ses ser-  
mons sur l'Epistre aux Galates , il  
„ s'efforça de monstrier , que ceux qui  
„ defendent la raison du merite que  
„ la grace de Dieu forme dans les fi-  
„ deles , contredisent à la raison de la  
„ grace mesme. Mon but a esté de  
„ l'attirer à là conference où ie desi-  
rois entrer avec luy sur cette matie-  
re. Dans laquelle aussi finalement il

s'est engagé par la repliche qu'il a publiée.

Cependant Monsieur Amyraut, Ministre & Professeur en Theologie à Saumur, ayant entrepris la refutation de mon premier Traicté de la iustification, a publié, ce qu'il en a fait, successiuemēt en deux parties. L'vne sous le titre de la iustification, l'autre des merites. Sa premiere partie sortant en lumiere me trouua desia dans cēt exercice avec M. Mestrezat. Cette occupation m'occasionna de differer vne plus exacte responce à l'escrit de Monsieur Amyraut. Et de luy faire neantmoins cognoistre sur le champ, par vn discours sommaire, l'euidente mesprise de ses fondemens, aux deux principaux chefs de son liure. Dont l'vn contient l'estat de la question d'entre les parties: l'autre, l'estat de l'intention de l'Apostre S.

Paul, où il dispute de la iustification des fideles. Sur le premier, ie l'ay redargüé d'une contradiction euidente avec Messieurs, Mestrezat & Testard. Sur le second, ie luy ay fait voir, que les raisons par lesquelles il s'estoit efforcé de monstrier, que l'intention de l'Apostre s'accorde avec l'opinion des Euangeliques, sont du tout alienés du but de l'Apostre, & le iettent luy mesme en des maximes absurdes, & toutes contraires à l'Euangile. Dans la preface de son autre volume contre les merites, qu'il a depuis publié, il s'est efforcé de se couvrir de sa contradiction, & des absurditez que ie luy ay obiectées. Mais ie me promets que la conuiction qu'il a receüe de moy sur l'un & sur l'autre, aura fait maintenant l'effet, en sa bonne conscience & en son bon iugement, de changer toute affection de

replique en acquiescement. Pour  
venirenfin à vne confession inge-  
nuë dela verité. Afin d'entrer avec  
moy, dans le chemin que i'ouure,  
par la closture de cette controuerse,  
à la paix & à la reünion del'Eglise.

Mais comme i'auois attendu  
que le concert sur cette matiere  
avec Monsieur Mestrezat ( de qui  
la suffisance entre tous ceux de sa  
condition s'est assez recomman-  
dée par sa bouche & par sa plume)  
me donneroit le moyen que ie de-  
firois, pour tirer, vne fois pour tou-  
tes, hors de toute obscurité, la ve-  
rité que ie propose: c'est aussi, Mes-  
sieurs, le succez que i'en represen-  
te icy maintenant à vos iugemens  
& à vos consciences, par la lecture  
de la responce, où i'ay satisfait à son  
escrit. Sa procedure, & dans la ma-  
tiere, & avec moy, plus ingenuë  
& plus vuide; soit de déguisement

en la chose, soit de passion contre  
ma personne, m'a donné sujet de  
traicter avec luy reciproquement  
selon mon humeur. C'est à dire, en  
toute douceur & charité, & hors  
la necessité de defendre la verité &  
mon nom propre contre la fraude  
& la calomnie, côme i'ay esté con-  
traint de faire en d'autres escrits. Je  
n'ay eu autre chose à faire avec luy,  
que de mettre la verité dans son  
plein iour, & de la tirer hors de  
l'ombrage, que les raisons & les  
argumens, les passages & les auto-  
ritez, desquelles il couure son sen-  
timent, auoient espandu dans son  
esprit, comme en celuy de nos au-  
tres Docteurs. Ce qui les empes-  
che, iusques à present, de reconnoi-  
stre & de confesser la verité des de-  
finitions des Catholiques. Je n'ay  
obmis vne seule periode de tout  
son discours, à laquelle i'en'aye sa-

tisfait par ma responce. Pour esta-  
blir maintenant en vos consciences  
la persuasion de la verité que ie  
vous remonstre, ie ne vous deman-  
de quel'attention, que vostre edi-  
fication propre & vostre salut re-  
quierent de vous, à la lecture de cét  
escriit. Je suis tres-assuré que l'im-  
pression que vous en receurez, chā-  
gera vostre estonnement prece-  
dent en ioye, & vostre scandale en  
amour. Et que vous me sçaurez  
tous beacoup de gré de vous auoir  
fait voir, que la doctrine Catholi-  
que, au consentement de laquelle  
ie vous appelle en cette partie, est la  
vraye doctrine de l'Euangile, que  
les Apostres nous ont laissée dans  
leurs escriits, comme toute l'Eglise  
l'a constamment depuis enseignée.  
Que c'est l'vnique fondement, en  
l'ame fidele, de l'amour de Dieu,  
de la dilection fraternelle, de tou-

re pieté, iustice, saincteté, & bonnes œuures, de la paix de conscience, & de l'assurance du salut. Je suis tres-assuré, qu'autrement instruits que vous n'avez esté, iusques à cette heure, en cette doctrine, l'estonnement que vous auez eu de ma proposition, se tournera sur l'œuvre de nos reformateurs, qui ayent commis vne si grande mesprise en cette controuerse capitale. Et que tout ensemble le scandale que vous auez eu de mon dessein, comme ennemy de la reformation necessaire en l'Eglise, se changera en admiration du fruit aduantageux & salutaire qui en doit reüssir infailliblement, pour vne reformation veritable, consistante au sainct exercice du seruice de Dieu, selon pieté & charité, sans superstition, ny controuerse.

Pour aider au courage & à l'af-

fection, que vous deuez tous auoir pour vne si bonne œuvre, ie souhaite que Monsieur Mestrezat, à qui cét escript s'adresse, & Messieurs ses Collegues avec luy, soient interpellés, apres en auoir fait la lecture & l'examen prealable, d'en declarer publiquement leur sentiment. Je suis certain, que s'ils sont obligés de le faire par la voye d'une autorité suffisante pour exciter à cela le deuoir de leur conscience & de leur honneur: la verité obtiendra, de leur propre bouche, tout ce que ie desire pour vostre edification, & pour la iustification de mon entreprise. Car me persuadant fermement, qu'il n'y a aucuns preiugez dans leurs consciences, ny de crainte, ny d'affections particulieres, qui soient plus forts que le mouuement de l'esprit de Dieu: ie ne puis entrer en défiance, qu'ils veüillent déro-

ber la gloire qui doit estre donnée à la verité qu'ils auront connuë. Ques'ils prétendent quelque chose encore dans l'esclaircissement de la matiere, pour cause, ou pour pre-texte de refus à leur acquiescement, vne conference, réglée selon l'ordre necessaire, entr'eux & moy, en leuera facilement tout retardement. Ou si par auanture ils employent, pour exception, l'insuffisance de leur autorité particuliere à prononcer maintenant, en vne cause generale, dans la connoissance de laquelle le Synode National a desia cy-deuant engagé la siene: il suffira, comme ie pense, de leur remontrer, que par les fondemens propres de nostre reformation, la conscience de chaque Chrestien ne peut estre liée, ny par iugemens, ny par arrests, ny par Edits, ny par Decrets, ny par Conciles, qu'elle ne

soit tousiours libre à prononcer ses  
sentimens sur la verité qu'ils recon-  
noistront conforme à la parole de  
l'Euangile. Que si cela ( qui leur  
doit suffire, s'ils ne veulent estre  
contraires à eux mesmes ) ne leur  
suffit encore : il n'y auroit, en tout  
cas, autre retardement à l'achemi-  
nement d'une si bonne œuvre, que  
d'attendre l'assemblée d'un Syno-  
de, sous la permission qu'il plairoit  
au Roy d'en donner. Auquel Sy-  
node les Deputez, qu'on y conuo-  
queroit, ayans esté, auparauant que  
des'y rendre, deuëment informez,  
par l'inspection & par l'examen de  
mes escrits, des raisons par moy re-  
presentées, pour la confirmation  
de la verité Catholique ; seront  
obligez, selon le deuoir de leur  
conscience, & l'autorité de leur  
charge, de declarer la sincerité de  
leur sentiment, pour l'acquiesce-

ment que ie leur propose. De moy certes, j'ay vne confiance si grande en l'empire que l'amour de la verité obtient en la conscience de nos Pasteurs, que ie ne sçauois croire de ceux qui seroient assemblez pour cette fin, qu'ils ne preferassent les raisons de la gloire de Dieu, de l'edification des consciences, de la reünion & de la paix de l'Eglise, de l'effect d'une veritable & solide reformation, qui se presentent toutes ici deuant leurs yeux, à quelque autre consideration que se pourroit estre.

Vous me direz, peut-estre, que quand bien cette controuersé seroit terminée, & que nous aurions tous consenti en cét article, aux definitions des Catholiques, nous n'aurions pas pourtant obtenu la reünion. Puis qu'il en reste encore tant d'autres tres-importantes & tres-

capables d'entretenir la diuision.  
Ierespôn, que celuy qui a bien com-  
mencé, selon prouerbe, a fait la  
moitié de la besogne. Et qu'on ne  
doit pas estimer vn petit achemine-  
ment, de vous auoir desia fait faire  
cette grande partie du chemin. De  
vous auoir rendus Catholiques, en  
vn chef de si grande importance,  
où vous reconnoistrez que vous  
n'estiez pas Catholiques. Mais ce  
qui doit entrer en principale confi-  
deration, c'est que i'auray obtenu,  
par vostre iugement public ou par-  
ticulier, que les preiugez qui vous  
cabroient contre mon dessein, ne  
vous y pourront plus faire d'om-  
brage. Car vous aurez conneu d'ici,  
qu'il n'est pas vray, comme vous  
l'estimiez, que nos reformateurs  
n'ayent rien condamné, en la do-  
ctrine des Catholiques, qui ne soit  
faux & contraire à l'Escripture sain-

ête. Et qu'ils n'ayent rien mis en  
auant qui n'y soit conforme & ve-  
ritable. Et, par mesme moyen, vous  
aurez cōneu que la veritable refor-  
mation ne consiste point aux con-  
trouerſes qu'ils ont establies. Mais  
qu'au contraire elle depend de l'es-  
clairciſſemēt de la verité, qui ostela  
cause des controuerſes. Et qui con-  
firme & met au iour les vrayes rai-  
sons des definitions des Catholi-  
ques, que nous combattons par nos  
controuerſes. Desquelles raison se-  
claircies l'intelligence & la prati-  
que font l'effect de la reformation  
veritable en l'ame de tout Chre-  
stien Catholique.

C'est ce qui vous sera rédu euidēt  
par le ſuccez de l'esclairciſſemēt de  
cette controuerſe. Car comme ain-  
ſi ſoit que la vraye reformation  
conſiſte en l'effect que l'Euangile  
doit faire en nos conſciences, &  
qui

qui depend des moyens employez  
pour l'y promouuoir. Et que cét  
effect gist en ce que nous viuions  
en ce present siecle, sobrement, iu-  
stement, & religieusement, sui-  
uant la grace de nostre Seigneur  
Iesus-Christ. Vous verrez claire-  
ment, que le chemin à cette vie  
Chrestienne & sainte, ne nous est  
ouuert par autre doctrine, que par  
celle que contiennent les defini-  
tions Catholiques, dont ie vous  
remontre la verité sur cette ma-  
tiere. C'est à scauoir celle qui en-  
seigne, que les fideles sont iustifiez  
formellement par la seule iustice  
inherente, & par la vraye sainte-  
té que l'Esprit de Iesus-Christ for-  
me en eux. Et qu'au dernier iour  
Dieu les couronnera de la gloire &  
del'immortalité promise, en con-  
sideration de la iustice, de la sain-  
cteté, & des bonnes œuures que

son esprit a formées en eux par la grace qu'ils ont receuë de la remission de leurs pechez en la mort de Christ. Non pour estre reputes iustes, ne l'estans pas, mais pour d'iniustes estre rendus iustes, & dignes du Royaume qui leur a esté préparé dès la fondation du monde, & pour lequel ils auront gardé & accompli les œuvres de Christ sous sa croix ici bas en patience & en charité. Et par mesme moyen vous connoistrez, que la doctrine Catholique, qui attribuë à la iustice, à la sainteté, & aux bonnes œuvres des fideles, la dignité & le merite de la gloire promise : comme à la seule grace de Dieu par Iesus-Christ, la cause de cette dignité & de ce merite : est le fondement de la pieté & de la charité, de l'amour de Dieu & de la dilection fraternelle. En quoy consiste la seule fin

où la reformation veritable doit  
tendre.

Vos consciences estans donc  
ainfi pleinement satisfaites sur ce  
sujet, vous recognoistrez que i'ay  
grande raison quand ie vous re-  
monstre, que nos Reformateurs  
estans venus avec celoüable dessein  
de reformer l'Eglise, & de repur-  
ger les peuples Chrestiens de toute  
ignorance, de toute superstition, &  
de tout vice. C'est à dire, d'arra-  
cher du champ du Seigneur toute  
l'yuroye de l'homme ennemy. Leur  
trauail n'a pas deu s'employer à  
combattre, comme ils ont fait, les  
maximes de la saine doctrine bien  
establies & bien definies. Ce qui n'a  
esté autre chose, qu'en voulant ar-  
racher l'yuroye, arracher la bonne  
semence. Mais leur soin deuoit  
estre, au contraire, de conseruer la  
verité des definitions qu'ils ont

combatuës en la doctrine des Catholiques. De la mettre en veuë. De la prescher soigneusement. De la représenter incessamment. D'en démonstrer les vrayes raisons par les causes que Iesus - Christ & ses Apostres nous en ont si familièrement exposées en l'Euangile. Car, en ce faisant, ils auroient introduit la vraye & seule reformation legitime. Ils auroient fait cheminer les peuples en la voye de la verité, qui est sans controuerse. Ils les auroient repurgez de toute ignorance de leur salut. Ils les auroient gueris de toute superstition & de tout vice. Ainsi l'œuure d'une veritable reformation en l'Eglise se seroit faite indubitablement dans l'vnion, sans schisme ny diuision aucune. Pour ce qu'elle n'auroit peu receuoir aucune opposition ny contradiction par ceux ausquels il estoit necessai-

re de se conseruer le nom & l'aucto-  
rité de l'Eglise Catholique. Car  
ceux-là perdroient manifestement  
ce beau tiltre, qui reietteroient tout  
ouuertemēt la fin, à laquelle la foy  
Catholique amene les fideles, par  
les raisons propres des definitions  
de la doctrine qui a esté constam-  
ment retenuë en toute l'Eglise. Et  
certes les Catholiques ont eu gran-  
de raison de remonstrier à nos refor-  
mateurs, quand ils sont venus, que  
s'ils vouloient entreprendre de re-  
former l'Eglise, ils se deuoient arre-  
ster à redresser les mœurs corrópuës  
particulieres & publiques, & à corri-  
ger les abus, qui s'introduisent infé-  
siblement en l'exercice de la Religio  
contre la pratique de la vraye pieté,  
& de la vraye charité, par l'ignorance  
des raisons de la vraye doctrine  
Catholique. Car, à dire le vray, la  
conscience de tous les Chrestiens,

consent en ceste confession, & en ce regret, que la pieté & la charité des premiers siècles de l'Eglise est merueilleusement descheute. Mais en considerant comme il faut la cause de ceste decadence, nous trouuerons quelle n'est nullement arriuée de ce que les maximes de la doctrine de la verité, qui doit conduire & adresser seurement les fideles en cette voye, ayent esté changées en l'Eglise par quelques definitions contraires. La cause de tout le mal n'est venuë sinon de ce que les definitions de la saine doctrine, qui ont esté bien & deuëment retenues dans l'Eglise Catholique, n'ont pas esté expliquées au peuple avec le soin qu'il appartient. Et que les causes & les raisons leur en ont esté, ou peu, ou point, données à cognoistre par ceux qui ont eu la conduite des

troupeaux. Lesquels, aux siècles qui auoient précédé la venue de nos reformateurs, auoient esté peu soigneux eux-mêmes de bien estudier & de bien apprendre les vraies raisons de toutes les definitions Catholiques, comme elles nous sont déclarées dans les escrits des Apostres & de tous les Peres qui les ont fuiuis. Et qui pis est, encore moins soigneux de les pratiquer en l'exercice de leur vie & de leurs mœurs, pour estre patrons & exemples des troupeaux qui leur sont commis. Ainsi que Sainct Pierre, le Coryphée de ceste sacrée troupe, leur recommande.

Attachans donc vostre esprit à cette consideration, vous comprendrez que les raisons de nostre reünion avec les Catholiques, dont ie vous remonstre la necessité, ne nous feront nullement perdre

le fruit de la reformation qui doit  
estre requise & procurée. Mais, au  
contraire, que c'est le seul moyen  
necessaire de la promouuoir. Car  
la seule chose qui peut estre appel-  
lée parmy nous l'œuvre de la refor-  
mation. Ce qui seul nous adresse  
en la voye de pieté & de charité. Et  
dont le fruit auroit esté beaucoup  
plus grand, si la chaleur des contro-  
uerses n'en auoit asseché, & comme  
hauï toute la vertu. C'est que nos  
reformateurs ont tres-bien & tres-  
salutairement maintenu à ce liure  
diuin & celeste, que nous appellons  
l'Escriture sainte, l'auctorité abso-  
luë, qu'il doit obtenir en l'Eglise,  
& l'vſage familier qu'il doit auoir  
en la main des peuples. Comme à  
l'opposite, les Docteurs Catholi-  
ques ne se sont pas fait moins de  
prejudice, en donnant tant d'auan-  
tage au parti contraire, que de luy

abandonner, par maniere de dire, le liure de l'Eſcriture ſaincte, lors qu'il eſt queſtion de la deciſion des controuerſes. Juſques-là qu'on en eſt venu à le decréditer en quelque forte, parmy les peuples, en les degouſtant de ſa lecture, en la leur rendant ſuſpecte comme dangereuſe d'engendrer des ſentimens heretiques. Et meſme, à cét effet, l'interdiſant. Qui a eſté vne pratique merueilleuſement contraire à toute l'ancienne Eglife. Et autant efficace à fomentér la diuiſion du parti ſeparé, & à luy donner auctoriété : que la procedure contraire, & l'vſage familier de ce liure diuin entre les Catholiques, auroit eu d'effect à reſtablir l'vnion, par la manutention & la confirmation de la verité de leurs dogmes & de leurs definitions conteſtées, & par la refutation des contraires. De-

quoy quelques Docteurs de ce siècle, s'estans bien apperceus ont introduit vne methode de disputer contre nos Docteurs, en les prouoquant de faire leurs preuues par des textes formels de l'Escripture, qui contiennent précisément & clairement les definitions de nos articles de croyance, opposez à ceux que nous auons reiettez en la doctrine des Catholiques. Qui est certes vne maniere de proceder plus iudicieuse, que celle de ceux, qui, semblans redouter l'Escripture sainte, se sont iettez, pour la defense de la doctrine Catholique, ou pour la refutation des maximes de leurs aduersaires, dans le seul rempart de l'auctorité des Peres & de la tradition. Or toutesfois, pour ce que la seule auctorité en la religion n'est pas celle qui arreste les hommes au vray amour de la pieté qu'ils ont

embrassée : mais bien principalement la cognoissance qui leur en imprime le sentiment dans la conscience : cette maniere de methode, reduite à la seule necessité , par laquelle elle contraint nos Docteurs à demonstrier leurs maximes par textes formels de l'Ecriture , n'est point seule capable de faire l'effet pour la reünion, si elle n'est conjointe à l'instruction des raisons, qui se recueillent de l'Ecriture pour la confirmation de la doctrine des Catholiques. D'autant que ceux de nostre communion adherent à l'amour de la religion que nous embrassons, beaucoup plus par le sentiment de pieté, que nous a donnée la cognoissance des raisons puisées de l'Ecriture que nous lisons tous familièrement ; que par l'auctorité d'aucunes decisions formelles qui soient contenuës en nos confes-

sions où en nos catechismes. C'est pourquoy nul de nous ne peut estre induit à se departir consciencieusement d'aucune doctrine qu'il ait imbuë, que par vn raisonnement esclairci par des demonstrations tirées de la mesme Escriture sainte. Pour cette cause, si on veut asseoir vn bon fondement de reynion, sur le consentement de la verité Catholique, il est necessaire d'establir l'auctorité que l'Escriture sainte doit auoir en l'Eglise, & l'usage commun & familier qui en doit estre recommandé à tous les fideles. Or, en ce faisant, c'est donner lieu, par mesme moyen, aux causes de la reformation, qui est seule legitime & souhaitable, pour redresser la forme de l'Eglise en pieté & en charité selon la face de la pureté dont elle reluisoit aux premiers siecles.

Et certainement, ie puis dire icy,

que si nos controuerses n'eussent point parsemé de leurs espines le champ de la reformation, nous y aurions veu germer tant de fleurs & tant de fruiçts, de pieté & de charité, qui auroient rauï de telle sorte toute la Chrestienté en l'amour & en l'administration de son œuvre, qu'elle se feroit veüe toute vnanimement reformée par le propre effect de la doctrine Catholique. C'est la voye laquelle ie vous propose auïourd'huy; Et par laquelle i'ay entrepris (par la conduite de l'Esprit de Dieu, qui seul m'a mis au cœur ce dessein, & en l'esprit les raisons del'executer) de vous ramener tous au giron de l'Eglise Catholique, ioyeux & contens d'y rentrer avec l'effect certain de la reformation, à laquelle tous Chrestiens se doiuent necessairement sousmettre. Car en nous reünissant de ce-

te forte aux Catholiques , par le  
consentement des maximes que  
nous auons reiettées en leur doctri-  
ne , avec l'esclaircissement de leur  
verité , qui resulte de l'Escripture , &  
de la Tradition Apostolique , vous  
verrez l'effect de la reformation  
dont nos reformateurs n'ont peu  
venir à bout , pource qu'ils y ont  
tourné le dos par leurs controuer-  
ses. Vous le verrez par l'esclaircif-  
sement que ie vous presente icy , sur  
la doctrine de la iustification & des  
merites du fidele. En laquelle nos  
reformateurs ont introduit ces ma-  
ximes contraires à la doctrine des  
Catholiques , & toutes aussi alie-  
nés des enseignemens de l'Escri-  
ture , qu'éloignées du sentiment de  
toute l'antiquité , & de la Tradi-  
„ tion de l'Eglise. Que toutes les  
„ œuures des fideles sont souillées,  
„ pleines de defauts & d'imperfe-

ctions, & toutes meritan-  
tes plus punition que recompense.  
Que pour cette cause Dieu ne repu-  
te point le fidele iuste pour aucune  
iustice & sainteté inherente qui  
soit en luy. Que le fidele ne pou-  
uant estre parfaitement iuste en  
foy-mesme, il faut qu'il soit cou-  
uert de la iustice de Christ imputée,  
laquelle couurant tous ses defauts  
le fait reputer iuste, encore qu'il ne  
le soit pas. Qu'afin que la iustice  
de Christ nous soit imputée, il suf-  
fit de l'embrasser par foy, c'est à di-  
re, de croire qu'il nous a acquis la  
remission de nos pechez par son  
Sang. Que, pour ce regard, le  
moins ny le plus de sainteté n'em-  
pesche ny ne fait que la iustice de  
Christ soit plus ou moins imputée  
au fidele. Qu'il n'y a que le seul  
merite de Iesus-Christ, que Dieu  
considere pour rendre au fidele la

„ couronne promise de gloire im-  
„ mortelle. Que le fidele ne peut  
„ rien meriter enuers Dieu. Que d'at-  
„ tribuer le nom de merites, aux bon-  
„ nes œuures que fait le fidele en cet-  
„ te vie, est abolir la grace de Iesus-  
„ Christ. Que quoy que les œuures  
„ du fidele procedent du Sainct Es-  
„ prit que Dieu luy a donné, elles ne  
„ peuuent estre appellées merites,  
„ pour ce que par le Sainct Esprit dô-  
„ né aux fideles, ils ne peuuent neant-  
„ moins accomplir les commande-  
„ mens de Dieu, ny cheminer en  
„ toutes les œuures qui luy sont  
„ agreables. Or comme l'effect de  
la vraye reformation, & de la vraye  
pureté de l'Eglise, consiste à faire  
cheminer les fideles en toutes les  
œuures qui sont agreablès à Dieu  
selon pieté & charité : il ne se faut  
pas estonner si nos reformateurs  
n'ont point atteint le but de la

vraye

vraye reformation en introduisant  
de telles maximes, qui destournent  
nécessairement l'efficace & l'effect  
de l'Esprit de Iesus-Christ en l'ame  
des fideles. Car si la lumiere de sa  
verité, laquelle est aux raisons des  
maximes de la doctrine des Catho-  
liques opposées à celles-cy, vous  
estoit naïfvement représentée, el-  
le accompliroit ce qu'ils vous font  
croire ne pouuoir estre accompli.  
Ce n'est pas merueille, si, en pres-  
chant ce qu'ils preschent sur ce su-  
jet, leurs exhortations à sainteté  
sont moins fructueuses, qu'ils ne  
desirent. Et si leurs plaintes fre-  
quentes, en sont plus veritables  
qu'ils ne voudroient. Si nostre sain-  
cteté est si imparfaicte, nos Do-  
cteurs s'en doiuent prendre premie-  
rement à l'opinion qu'ils nous don-  
nent quelle ne scauroit estre parfai-  
te. Pourquoi se dçcoiuent-ils

ainſi eux-mêmes? La vertu ſancti-  
fiante, qui viuifie l'ame, n'y entre  
que par la parole de l'Euangile, en  
laquelle le ſainct Eſprit, qui en eſt  
l'auteur, l'a inferée. Autant qu'on  
deroge, par des conceptions eſtran-  
geres du diſcours humain, à la naï-  
ueté & à la ſincerité de cette parole:  
autant en encrue-t'on la vertu, au-  
tant en empêche-t'on l'effect, en  
l'ame de ceux à qui on la preſche.  
Il eſt neceſſaire que tout ce qui  
manque de la verité & de la ſimpli-  
cité de l'Euangile, en la doctrine  
qui eſt annoncée au peuple, ſe veri-  
fie & ſ'apperçoie par l'imperfe-  
ction de ſaincteté en la vie & aux  
mœurs de ceux qui en reçoient les  
enſeignemens. Ce n'eſt pas que  
l'indispoſition de noſtre nature,  
& le vice de corruption, qui eſt  
en nos entrailles, ſoit tel, que la  
bonne & la ſincere paſture ſoit

toufiours capable de le guerir. Cela n'arriue, ny a tous, ny tout en vn coup à ceux qui gueriffent. Car outre l'efficace de cette diuine vertu, qui est en la parole de l'Euangile, il faut que le doigt de Dieu interuienne à manier le fujet, où elle doit operer. Il faut que le Pere nous tire, afin que nous allions à son Fils. Et pourtant celuy qui plante, & celuy qui arrose, ceux qui portent cette semence diuine, & cette rosee celeste, en des vaisseaux de terre, ne font rien, mais Dieu qui donne l'accroissement. Mais tant y a que là où la doctrine de l'Euangile est meflangée des penſees, & des imaginations du ſens charnel de ceux qui l'adminiſtrent: cette mixtion terreſtre, diminuant d'autant la vertu de l'Eſprit d'en-haut, foment à proportion noſtre vice naturel qui luy eſt homogene.

Retarde d'autant l'effect de nostre regeneration spirituelle, & de nostre sanctification. Cause & entretient la debilité de nostre nouuel homme. Tout de mesme qu'un aliment corrompu nourrit & entretient le mauuais estat de santé en un homme indisposé & cacochyme. Tel est l'effect de toutes les maximes estrangeres, que nos reformateurs ont introduites par leurs controuerses en la doctrine Catholique. Car au lieu de la reformation qu'ils s'estoient proposée, elles en ont restraint & retardé l'effect qui s'en seroit ensuiuy par la seule lumiere de l'Escripture, s'ils l'eussent employée à confirmer, en l'Esprit des peuples, les vrayes raisons des maximes & definitions Catholiques, qu'ils ont reiectées.

Ainsi vous aduouerez, par cette experience, que l'unique moyen

de paruenir au but d'vne reformation desirée en toute l'Eglise, c'est d'abolir les controuerses par l'esclaircissement des vrayes raisons des definitions des Catholiques, que nos reformateurs ont debattuës & reiettees, pource qu'ils ne les ont pas entenduës. Et que, par ce moyen, puis que nous paruiendrons, d'vne part, à la reünion que les Catholiques demandent de nous: & d'autre-part, à la reformation veritable que nous auons à requérir d'eux: tout le monde reconnoistra, que le dessein que ie propose est autant possible, que l'effect en est souhaitable. Dieu veuille, par sa grace, en imprimer le desir, & en exciter les mouuemens au cœur de tous ceux qui doiuent regarder, avec regret, cette face lamentable de la Chrestienté, diuisée & deschirée par elle mesme

detant de passions & de haines, si  
eloignées de la charité qui doit  
estre en ceux qui portent le nom de  
baptisez au sang du Seigneur Iesus.  
Dieu veuille, par sa grace, émou-  
voir à ce mesme dessein, le courage  
& l'affection necessaire dans la vo-  
lonté de tous ceux qui ont l'autorité  
pour l'execution d'une œuvre si iu-  
ste & si salutaire. Afin qu'ils y met-  
tent la main à bon escient, & selon  
la puissance & la vocation que Dieu  
leur en a donnée. Dieu veuille, par  
sa grace, illuminer l'entendement,  
& adresser, à cette pensée & à cette  
meditation, l'esprit de tous ceux  
qu'il a appelez à l'estude de sa con-  
noissance, pour me seconder, ou,  
pour mieux dire, pour me deuan-  
cer en vn dessein si legitime, & dont  
l'effect est si desirable. Pour l'ac-  
complissement duquel, en ce qui  
me touche, ie cōtinuërāy, moyen-

nant cette meſme grace de Dieu, de  
faire voir, ſur toutes nos autres con-  
trouerſes, que les definitions des  
Catholiques, que nos reformateurs  
ont reiettees, ſont tres-veritables.  
Conformes à l'Eſcriture ſaincte, au-  
tant que certifiées par les teſmoi-  
gnages de la Tradition vnanime de  
l'antiquité. Neceſſaires pour l'en-  
retien de la pieté & de la charité  
Chreſtienne. Et, par conſequent,  
que de l'eſclairciſſement des raiſons  
dont elles dependent, reſulte l'ef-  
fect de la reformation qu'on doit  
deſirer & procurer pour l'entretien  
du pur ſeruice de Dieu en eſprit &  
verité ſelon l'Euangile. Ioignez,  
ie vous prie, Meſſieurs, en ceci, vos  
vœux & vos prieres aux miennes  
enuers Dieu, à ce qu'il me donne,  
par l'addreſſe de ſon ſainct eſprit,  
d'y continuer à ſa gloire, pour vo-  
ſtre edification & ſalut, & pour la

paix & la pureté de son Eglise.  
C'est ce que ie demande de vostre  
charité, avec la mesme affection  
dont ie me professe

MESSIEURS,

*A Paris, ce 10. Mars*

1639.

Vostre tres-humble & tres-obeissant Frere,  
& seruiteur en nostre Seigneur IESUS-  
CHRIST,

LAMILLETIERE.



## TABLE DES CHAPITRES contenus en ce liure.

**D**E l'opinion de Saint Augustin touchant les  
merites du fidele. Et de la signification du  
mot de merise en Latin & en François, selon le  
sens des Catholiques. Chap. i. page 7.

Que les merites, œuvres de la grace, ne con-  
treuenient point à la raison de la grace, en la  
cause du salut. Chap. ii. p. 30

Des causes du salut en Iesus-Christ. Où est  
expliquée la vraye raison de la Iustice imputée,  
& de la iustice inherente. Chap. iii. p. 52

Que les termes de remission des pechez, d'ab-  
solutiō, & de redemption, signifient l'operation de  
Dieu, par laquelle les fideles son regenerez, ainsi  
que les Catholiques les prennent. Chap. iv. p. 115

Que par le tesmoignage des Apostres, & selon  
l'analogie de leur doctrine, la remission des pe-  
chez se prend pour l'operation de Dieu, qui nous  
mortifie à peché, afin que nous soyons vivifiez à  
Iustice. Chap. v. p. 186

De la raison des merites, selon la Iustice de  
Dieu, en la remuneration. Chap. vi. p. 253

Consideration des tesmoignages des Anciens,  
pour recognoistre leur sentiment touchant les  
vrays merites du fidele. Chap. vii. p. 312

De la perfection de la Iustice, & de la sain-

teté des fideles, qui les rend irreprehensibles au iugement de Dieu pour recenoir la courone de leur merite, œuvre de la grace de Dieu en eux.

Chap.viii page 552

Inconuenient de la doctrine qui rend la Iustice & la sainteté des fideles imparfaicte en ceste vie.

Chap.ix.p.558

Obiections, contre l'imperfection de la Iustice des fideles, maintenues inuisibles. Chap.x. page 586

Refutation des obiections contre la parfaicte Iustice & sainteté des fideles en ceste vie. Où est aussi destruit le fondement, sur lequel la necessité de leur imperfection est appuyée. Chap.xi. page 643

Conference des paroles de S. Jean I. Ep. c. i. vers. 6. & c. 3. vers. 6. Où est expliquée la raison de la parfaicte Iustice qui rend le fidele irreprehensible deuant Dieu. Chap.xii.p.723

De la doctrine de Saint Augustin touchant la perfection de la sainteté des fideles en ceste vie.

Chap.xiii.p.788

Response aux auctoritez tirées des escrits de de quelques Docteurs Catholiques. Chap.xiv. page

---

## PASSAGES NOTABLES DE l'Ecriture sainte expliqués en ce Liure.

**E**Xod. Aaron 28 portoit l'iniquité des saintes offrandes des enfans d'Israël. page 664

Pseau. 32. & Rom. 4. Bien-heureux sont ceux

desquels les iniquitez sont remises, & desquels les pechez sont couverts. Bien-heureux est l'homme à qui le Seigneur n'aura point imputé le peché.

pag 327

*Pf. 130.* N'entre point en iugement avec ton seruiteur. Car nul viuant ne sera iustificié en ta presence.

pag. 320. & 773

*Pseau. 51.* Rend moy la lieffe de ton salut, & que ton esprit liberal me soustienne.

pag. 132

*Malach. 3.* Ils seront miens lors que ie mettray à part mes plus precieux ioyaux, & ie leur pardonneray comme chacun pardonne à son fils qui le sert.

pag 304

*Luc. 17.* Quand vous auez fait toutes les choses qui vous sont commandées d'estre faiçtes, dites, nous sommes seruiteurs inutiles.

pag. 420

*Luc. 15.* Parabole de l'enfant prodigue.

pag. 96

*Luc. 18.* Parabole du Pharisien & du Pea-ger.

pag. 335

*Rom. 1.* Iesus-Christ le Fils de Dieu, qui a esté fait de la semence de David selon la chair, & a esté déclaré Fils de Dieu en puissance selon l'esprit de sanctification par la resurrection des morts.

pag. 444

*Rom. 2.* le iugement de Dieu est selon verité enuers tous.

pag. 705

*Rom. 4.* David declare la beatitude de l'homme à qui Dieu impute iustice sans œures.

pag. 160

*Rom. 4.* A celuy qui n'œuure point, ains croit en celuy qui iustifie le meschant, sa foy luy est alloüée à Iustice.

pag. 164

*Rom. 4.* A celuy qui œuure le loyer ne luy est

point reputé pour grace ; mais pour chose deüee.  
page 280

Rom. 5. Comme par la desobeyssance d'un seul homme plusieurs ont esté rendus pecheurs, ainsi par l'obeissance d'un seul plusieurs seront rendus iustes.  
pag. 693

Rom. 6. Les gages du peché c'est la mort; mais le don de Dieu c'est la vie eternelle.  
pag. 307

Rom. 7. Depuis le premier verset iusques au septiesme.  
pag. 331

Rom. 7. Depuis le verset quinziesme iusques au 23.  
pag. 657

Rom. 11. Si c'est par grace ce n'est plus par œuvres, autrement grace n'est plus grace.  
page 40

1. Cor. 3. Je vous ay donné du laiët à boire.  
pag. 638

2. Cor. 5. Dieu a fait celuy qui na point cognu peché estre peché pour nous, afin que nous fussions Iustice de Dieu en luy.  
pag. 174

2. Cor. 12. Il ma esté donné une croix en ma chair, un Ange de Satan pour me donner des souflet.  
pag. 817

Galat. 5. La chair conuoite contre l'esprit, & l'Esprit contre la chair, afin que vous ne faciez les choses que vous voudriez.  
pag. 656

Ephes. 1. Nous auons en Christ redemption par son sang, la remission des pechez, selon les richesses de sa grace, laquelle il a fait abonder en nous en toute sagesse & intelligence.  
pag. 187

Ephes. 2. Vous estes sauez par grace par la foy. Cela non point de vous, c'est don de Dieu. Non point par œuvres, afin que nul ne se glorifie.

Car nous sommes l'ouvrage d'iceluy, estans creéz à bonnes œuvres que Dieu a préparées, afin que cheminions en icelles.

pag. 477

Ephes. 4. Jusqu'à ce que nous paruenions tous en homme parfait, à la mesure de la parfaicte stature de Christ.

pag. 634

Colos. 1. Auquel nous auons redemption par son Sang, remission des pechez.

pag. 100

Colos. 2. Et vous estans morts en vos fautes & pechez, & par le prepuce de vostre chair, il vous a viuifiéz avec luy, vous ayant pardonné tous vos pechez, Ayant effacé l'obligation escrite à la main contre nous en ordonnances, qui nous estoit contraire, & laquelle il a ostée du milieu de nous, l'ayant fichée à la Croix. Estant depouillé nud, il a mené publiquement en monstre les principantez & puissances, triomphant d'elles en icelle.

pag. 191. 241

1. Tim. 1. Le Seigneur doint à Onesiphore de trouuer misericorde vers le Seigneur en ceste iournée-là.

pag. 299

1. Ti. 2. Il y a un seul Dieu & un seul moyenneur entre Dieu & les hommes, à sçauoir Iesus-Christ homme.

pag. 448

2. Tim. 4. La couronne de Iustice m'est reseruée, laquelle me rendra, en ceste iournée-là, le Seigneur, le iuste iuge.

pag. 389

Hebr. 5. Vous estes deuenus tels, que vous auez encore besoin de lait, & non point de viande solide.

pag. 637

Hebr. 9. Le sang des taureaux & des boucs, & la cendre de la genice, dont on fait aspersions, sanctifie les souillees quant à la chair.

pag. 214

*Heb. 10 Nous auons liberté d'entrer és lieux  
saincts par le Sang de Iesus.* pag. 498

*1 Pier. 1. Pierre Apostre de Iesus-Christ aux  
Eleus disperseZ çà & là hors leurs maisons, de  
Pont, de Galatie, de Cappadoce, d'Asie, & de By-  
thynie, selon la determination de Dieu le Pere,  
en sanctification d'esprit, pour l'obeyssance &  
la spersion du Sang de Christ.* pag 156

*1. Ep. S. Iean 1. Si nous disons que nous n'a-  
uons point de peché, &c.* pag. 329. & 340. &  
724

*1. Ep. Ieh. 1. Le Sang de Iesus - Christ nous  
nettoye de tout peché.* pag. 671

*1. Ep. Ieh. 3. Quiconque demeure en luy ne  
peche point. Quiconque est né de Dieu ne fait  
point de peché.* pag. 724

*Apocal. 3. Ils chemineront en vestemens blancs  
auec l'Agneau, car ils en sont dignes.* page  
370

*Responce aux obiectionstirées des auctoritez de  
quelques Docteurs modernes Catholiques.*  
Chap. xiv. p. 892


---

**F A V T E S S V R V E N V E S E N**  
*l'impression, dont quelques vnes sont impor-  
tantes, pour les supplemens, & aux  
mots Grecs & Hebreux.*

**P**Age 39. l. 21. Sa leur. Pag. 54. l. 1. on. ne. p.  
65. l. 1. SuppléeZ timent? & leur imputer le  
contraire p. 68. l. 9. audeuant. deuant p. 76. l. 13.  
à Christ. au Sang de Christ. pa. 77. l. 8. faite.

faite nostre. pag. 91. l. 1. proposez proposiez.  
p. 99. l. 2. le. la. p. 103. l. 13. arche. arrhe. p. 107.  
l. 19. és. & p. 108. l. 12. *Suppleez apres condi-*  
*tion, entre les obiects pour lesquels Christ est*  
*mort, & p. 108. l. 23. par. pour. p. 112. l. 19. en-*  
*trez. entez. p. 115. au tiltre du chapitre. l. 7. le.*  
*les. p. 117. l. 11. 12. immediatement. mediate-*  
*ment. p. 156. l. 9. ces. ses. p. 195. l. 6. cet. p. 193. l.*  
*25. les. vous. car. page 220. l. 24. Suppleez*  
*apres charité, & entre la loy des commande-*  
*mens singuliers. pag. 225. l. 1. suppleez apres*  
*l'homme, sous la loy. page 240. l. 2. effacez*  
*de. page 242. l. 16. l'auctorité. d'auctorité.*  
*p. 308. l. 21. aliené. aliene. pa. 372. l. 4. ce que.*  
*Quand p. 386. l. 13. auons. aurons. p. 388. l. 5.*  
*πολύτεια. πολίτευμα. p. 388. l. 13. mais. mais nous.*  
*pag. 390. l. 23. 24. & pag. 391. l. 2. Escrinez ain-*  
*si ces mots Hebreux. קדץ. קדץ. קדץ. page 394.*  
*l. 3. Est que. Or pag. 404. l. 1. Il dit. Il est*  
*dit. pag. 413. l. 27. basty ont basty. pag.*  
*418. l. 5. deuons. deuez. pag. 491. l. 21. soin.*  
*sein. p. 466. l. 9. les humbles. les plus humbles.*  
*pag. 480. l. 1. bonnes. ces bonnes. p. 537. l. 26.*  
*le. la. pag. 578. l. 5. estoit. restoit. p. 578. l. 26.*  
*auoüiez auoüerez. pa. 596. l. 9. imprehenfible.*  
*irreprehenfible. pag. 598. l. 15. est plus. est le*  
*plus. pag. 603 l. 8. pertes. routes. pag. 604. l. 7.*  
*lisez, παρ' ὃ γέγραπται. pag. 668. l. 18. qui. que.*  
*pag. 670. l. 10. c'est. ce. l. 26. 27. lisez, capa-*  
*ble de corrompre l'vsage de la vraye iusti-*  
*ce qui doit. pag. 671. l. 27. comme. commé.*  
*p. 694. l. 5. qui. que. pa. 695. l. 2. i, il. p. 699. l. 2.*  
*l'homme. homme. p. 707. corrigez au chiffre*

*des pages, au lieu de 776. iusques à 782. 707. à*  
 722. pag. 713. l. 16. Esprit. l'esprit. p. 716. l. 6.  
 alienés. alienes. l. 21. donne donnez. pa. 780. l.  
 7. encore. encore faux. pag. 782. l. 14. auoit.  
 auroit p. 728. l. 24. ne munissons. ne nous mu-  
 nissons. pag. 769. & 770. *corrigez par ce nom-*  
*bre le chiffre des pages.* pag. 768. l. 12. la. fa. p.  
 pag. 771. l. 2. faite. prise. p. 800. & 801. *corri-*  
*gez par ce nombre le chiffre des pages,* pag. 801.  
 l. 13. qui. qu'il. l. 16. qui, qu'ils. p. 803. l. 25. vio-  
 lenté. velleité. p. 810. l. 17. troisiéme, quatries-  
 me. p. 813. *effacez,* si. p. 814. l. 4. il fut. il se fut. p.  
 825. l. 10. demeurons. demeurérons. l. 21. la, le.  
 l. 26. l'y. s'y. pag. 827. *escrivez* σχολοπιζεν, αἰα-  
 σχολοπιζεν. l. 24. χαλκούς. p. 829. l. 26. estoient.  
 estoit. p. 834. *corrigez par ce nombre le chiffre*  
*iusques à 841.*



D E F E N S E

DES VRAIS MERITES  
du Fidele, qui sont œuures  
de la grace de Dieu en luy.

*Adressée par le Sr de la Mille-  
tiere à Mr Mestrezat.*



ONSIEVR,

Quelque motif qui vous  
ait induit à me respondre, ie  
me sen vostre obligé du soin  
que vous en auez pris. Puis que, pour  
ce regard, vous auez satisfait au desir  
que i'en auois. Et que, par ce moyen, nous  
entrons en la conference que i'auois re-  
quise de vous, de laquelle ie me promets  
vn succez tres-assuré, pour l'auance-  
ment du bon œuvre, auquel Dieu m'a  
fait la grace de me dedier. Car si tout le  
monde void, par ce qui reussira de nostre

concert; que cette controuerse, estimée vne des causes principales de la diuision, qui s'est formée entre nos reformateurs & les Catholiques, n'a eu autre fondement que leur mal-entendu de la doctrine des Catholiques en cette matiere: il apparoiſtra que les raisons, que ie propose pour la reünion, sont tres-bien fondées & indubitables. Vous me dites, à l'entrée, que vous ne me respondes pas par l'esperance de me ramener à la doctrine, en laquelle ie remonstre que nos Docteurs se sont mespris, en formant cette controuerse. En quoy certes j'auoüe tres volontiers, que vous auez autant de raison de le croire ainsi, que i'espere que vous recognoistrez vous mesmes que i'autois de tort, si vous m'y rameniez par les moyens par où vous taschez de vous defendre, ou de me reprendre. Je ne diray pas la mesme chose de l'esperance que i'ay de vous. Car i'ay vne telle cōfiance en la verité que ie propose, que ie suis persuadé que par cét heureux & amiable concert entre nous, elle amenera en fin vostre entendement captif à son obeïſſance. Dequoy deux choses principalement me donnent cette ferme

persuasion. L'une est la bonne conscience qui est en vous, qui ne permettra point que vous resistiez à la verité que vous aimez. L'autre est le peu d'esloignement, ou le leger ombrage, à mieux dire, qui vous fait paroistre esloigné de moy en cette dispute. Car vous ne me contestez plus, que la iustice inherente du fidele n'ait telle part entre les raisons de nostre salut, que la couronne & le Royaume ne soient donnez pour recompense à la iustice, à la sainteté & aux bonnes œuures des fideles. Mais vous voulez que, nonobstant cela, nostre recompense soit gratuite. C'est ce que ie veux bien aussi avec vous, & tous les Catholiques l'enseignent de mesme, & disent expressement, *qu'elle est tellement loyer, qu'elle est plus grace que loyer.* Or comme vous accordez que la couronne est recompense, & recompense de grace : ie veux aussi que la iustice soit merite, & merite de grace. Merite que la seule grace de Iesus Christ a mis au fidele. Sur quoy finalement vostre contestation se trouue si foible, que vous ne disputez plus en effet de la chose, mais seulement du terme. Et quand vous dites que vous estes

d'accord avec saint Augustin en la chose, & que vous ne differez avec luy que du terme, vous conuenez par mesme moyen, avec les Catholiques, qui n'enseignent, ny pour le terme ny pour la chose, que la doctrine de S. Augustin. Or il me sera fort aisé de vous oster tout le scrupule qui vous reste touchant le terme de merites, & de vous donner encore, pour ce regard, vn mesme cœur & vne mesme langue avec S. Augustin & les Catholiques. Les deux autres chefs, sur lesquels vous avez aussi attaché vostre contestation avec moy, sont encore plus aisez à pacifier entre nous. Car ce que vous m'objectez, que i'ay ecclipsé, de la premiere partie du salut, l'imputation de l'obeissance de Iesus Christ, & la remission des pechez, n'a peu proceder que d'inaduertance. Veu que vous ne dites rien, pour ce regard, que ie ne die avec vous, & qui ne soit compris en termes tres expres, en l'escriit contre lequel vous escriuez. Côme aussi, en cela, il n'y a nulle cōtrouersie entre les Catholiques & nous. Car encore que l'imputation de l'obeissance de Iesus Christ, ou le pardon, qu'en consequence Dieu nous donne de nos

pechez, ne soit pas appelé par les Catho-  
liques nostre iustification (comme ont  
fait nos reformateurs par vne insigne  
mesprise) les Catholiques attribuent  
neantmoins, à cette grace acquise par le  
merite de Iesus Christ, la cause du don  
de la foy, & la preparation à nostre iustifi-  
cation. Et tant s'en faut qu'eux & moy  
ecclipsions l'obeissance & le merite de  
Iesus Christ de la premiere partie du sa-  
lut, que nous en faisons tout le frontispi-  
ce, ou si vous voulez, le fondement de ce  
chef-d'œuvre. Car sans cela aussi le salut,  
qui gist en la communication du bien  
immuable, ne pourroit estre appelé ny  
salut ny grace. Dont i'ay suffisamment ex-  
pliqué les raisons au traitté de cette con-  
trouuerse avec M<sup>r</sup> Testard. Pour le troisiè-  
me chef sur lequel il semble que vous in-  
sistiez principalement, qui regarde la  
perfection de la vie Chrestienne, & de la  
iustice & sainteté des fideles en cette  
vie: tout ce que vous debattez sur ce sujet  
ne procede que de la mesprise que vous  
cōmettez en la distinction qu'il faut faire  
entre l'estat des fideles sous la loy, & entre  
l'estat des fideles sous la grace. Ce qu'ayāt  
mieux compris que vous n'auiez fait ius-

ques à cette heure (cōme ie vous l'ay remonstré au mesme traitté) i'espere que vous viendrez, cōme on dit, de pieds & de mains, & avec satisfaction, à la reconnaissance de la verité, que ie vous en presente. Or cōbien que ce demeslement qui nous reste soit tres leger, neantmoins pour l'honneur que ie veux rēdre à tout ce qui vient de vous, ie fay estat de respondre tres exactemēt à tout vostre discours. Auquel i'aurois desiré, que, pour demeurer aux termes d'un vray esclaireissement, il vous eut plu suiure l'ordre de mon escrit. Car par le changemēt que vous en auez fait, le lecteur ne void plus le fil de nostre dispute, ny le vray estat de la question que nous traittons, ny la force des raisons par lesquelles i'en ay esclairci la verité. C'est pourquoy ie rameneray la dispute à la premiere methode de mon esclaireissement. Sur chaque chef duquel i'examineray soigneusement les raisons par lesquelles vous taschez de vous defendre des miēnes, & de les cōbattre. Par où i'espere que vous & tous ceux qui vous ressemblent consentirez en fin, sans contredit, à la verité que ie propose pour nostre reünion sur ce chef avec les Catholiques.

7

---

C H A P. I.

*De l'opinion de S. Augustin touchant les Merites du fidele. Et de la signification du mot de Merite en latin & en françois selon le sens des Catholiques.*

**L'**Amiable esclarcissement que ie vous ay adressé, contient cinq chefs. Le premier, iusques à la page 9. comprend la solution de l'objection que vous auiez faite contre les vrais merites du fidele, qui sont les dons & l'œuure de la grace de Dieu en luy, & desquels vous me qualifiastes *Defenseur moderne*. I'ay respondu, contre cette qualité, & vous ay remonstré, que ie defendois la mesme doctrine que toute l'Eglise auoit enseignée & maintenue par la bouche de Sainct Augustin, qui crie, *Que la couronne est rendue aux merites du fidele, & que ses merites sont*

*don de Dieu.* Et sur la raison que vous inferiez contre les merites de grace, que vous repetez encores en vostre discours page 4. où vous concluez, *Qu'il faut que ceux qui attribuent le merite à la grace, aduoient neantmoins, qu'en voulant que les hommes soient immediatement sauuez par leurs merites, ils rendent la grace seulement cause esloignée du salut, & le merite cause prochaine.* J'ay respondu que ces termes, *immediatement sauuez* estoient cause de la mesprise que vous commettiez par vn sophisme dont vous ne vous apperceuiez pas. Et que toute l'obiection se resoluoit, en distinguant les deux parties du salut que nous obtenons en la Communion de I. Christ. Pource que la premiere partie du salut, qui est la justice & la saincteté, est le merite mesme du fidele, & la dignité à laquelle est rendue la vie & la gloire eternelle, qui est la seconde partie du Salut. Et que, par ce moyen, le merite estant le Salut mesme, & la grace estant cause immediate du merite, elle est aussi necessairement cause immediate du Salut. Car la seconde partie estant vne continuation necessai-

re de la premiere, on ne peut separer l'une d'auec l'autre, pour faire la grace cause esloignee du Salut au regard de la seconde partie. Veu que la seconde partie, qui consiste en la gloire & en la couronne celeste, est elle-mesme recompense de grace, pource qu'elle est rendue au merite qui ne prouient que de la grace. Et que l'acquisition de l'un & de l'autre n'a autre cause que l'amour gratuit, que Dieu nous porte en Iesus Christ son Fils bien-aimé nostre Seigneur, Par lequel, son bon plaisir a esté, de nous communiquer le bien immuable. Ces choses ainsi esclaircies ne pouuoient certainement receuoir de difficulté ny de contredit. Et de faict vous n'y en auez apporté aucun, qui concerne précisément l'estat de nostre question.

Sur le suiet des merites du fidele, que ie defen selon l'intention de Sainct Augustin, & des Catholiques, quoy que vous disiez que vous ne differez point avec Sainct Augustin en la chose, mais seulement au terme : vous vous estes neantmoins abstenu d'alleguer vn seul lieu de Sainct Augustin, où il face mention des merites, & où nous pussions

confronter son intention, ou à la vostre, ou à la miene. Vous n'avez pas mesmes fait mention des paroles que i'auois rapportees de luy ( qui sont tirees de l'examen des Actes de Pelagius en Palestine) pour vous représenter la conformité de mon sentiment avec le sien. A quoy il me semble que vous deuiez respondre, ou auouer, que si vous estes d'accord avec luy, vous consentez aussi avec moy; & que si vous debitez avec moy, vous differez aussi d'avec luy, soit en la chose, soit au terme. Vous aurez veu, par les autres lieux que ie vous ay representez de Saint Augustin, dans le jugement de l'adherence de Monsieur Testard, que l'intention de ce grand Docteur, & pour la chose & pour le terme, ne differe en rien de ce que les Catholiques en enseignent, & moy avec eux. Je ne repeteray rien des endroits que i'ay alleguez en ce lieu-là. Mais j'y en adjousteray encore icy quelques autres pour vostre satisfaction plus entiere. Au liure 14. de la Trinité chap. 15. *Qu'est-ce qui auroit rendu [ l'ame ] miserable sous vn Seigneur tout-puissant & tout bon, si ce n'est son péché? Et qu'est-ce qui la fera heureuse sinon*

son merite & la recompense de son Sei-  
 gneur ? Mais son merite est aussi grace de  
 celuy de qui sa beatitude est la recompense.  
 Vous voyez ici la raison du merite, esta-  
 blie par l'opposition & par le rapport à la  
 recompense. Commela beatitude estant  
 relatiue à la saincteté qui est en la volon-  
 té du fidele. Car c'est pour cette raison  
 que le merite est appellé Merite, ainsi  
 que luy-mesme l'enseigne au 1. Liure du  
 Franc-arbitre chap. 14. Nous auions dit,  
 & nous estions d'accord, que les hommes me-  
 ritent la vie bi. n heureuse par la volonté,  
 & la vie miserable aussi par la volonté. Et  
 qu'ils la meritent de telle sorte qu'ils la reçoï-  
 uent. Et vn peu apres. C'est pourquoy il ne  
 faut point s'estonner, que les miserables hom-  
 mes n'obtiennent point ce qu'ils veulent, c'est  
 à dire, la vie bien-heureuse. Car ils ne veu-  
 lent pas de mesme ce qu'elle accompagne, &  
 sans quoy personne n'en est digne & ne l'ob-  
 tient, à sçauoir la bonne vie. Car cette loy  
 eternelle (à la consideration de laquelle il est  
 temps que nous retournions) a decerné par  
 vne fermeté immuable, que le merite soit en  
 la volonté, & que le prix & le supplice soit  
 en la beatitude & en la misere. Mais d'au-  
 tant que Sainct Augustin auoit escrit ces

liures auant que l'heresie de Pelagius se  
 fust leuee, & auant qu'il eust traitté de  
 la grace de Dieu & de son efficace en la  
 volonté de l'homme : afin que personne  
 ne pût croire que les paroles cy rappor-  
 tées fussent contraires à la doctrine de la  
 grace, & qu'elles fauorisassent l'heresie  
 Pelagienne : luy-mesme les recite au chap.  
 9. du liure 1. de ses Retractations, où il  
 maintient qu'elles ne la fauorisent en  
 rien. Car aussi ce que le merite consi-  
 ste en la volonté n'empesche point la di-  
 stinction des bons & des mauuais meri-  
 tes. Pource que les bons sont en la vo-  
 lonté que la grace a sanctifiée, & les mau-  
 uais en la volonté vicieuse & corrompue  
 de sa nature. Tellement que les bons  
 merites sont dons de Dieu, & les mau-  
 uais, l'homme les a de soi-mesme. C'est ainsi  
 que ce Saint Docteur s'en explique bien  
 au long en infinis endroits de ses œu-  
 ures. Au liure de la grace & du Franc-  
 arbitre à Valentin, *Quand les Pelagiens*  
*disent, que la seule grace, qui n'est point don-*  
*née selon nos merites, est celle par laquelle les*  
*pecheurs sont remis à l'homme; mais que celle*  
*qui est rendue à la fin, c'est à dire la vie eter-*  
*nelle, est rendue à nos merites precedens :* R

leur faut respondre, que s'ils entendent nos  
 merites de telle sorte qu'ils les recognoissent  
 aussi estre dons de Dieu, cette opinion ne doit  
 point estre reiettee. Mais pource qu'ils cele-  
 brent de telle façon les merites humains, qu'ils  
 disent que l'homme les a de soy mesme, l'A-  
 postre leur respond tres bien, Qui est-ce qui te  
 discerne? Qu'as tu que tu n'ayes receu, & si  
 tu l'as receu pourquoy t'en glorifies tu, comme  
 si tu ne l'auois point receu? A celuy qui a telle  
 pensee on luy peut dire tres veritablement,  
 Dieu couronne ses dons, & non pas tes meri-  
 tes, si tu as tes merites de par toy mesme, &  
 non pas de par luy. Car s'ils sont tels ils sont  
 mauuais. Pource qu'ils sont mauuais Dieu  
 ne les couronne point. Que s'ils sont bons  
 ils sont dons de Dieu, pource qu'ainsi que dit  
 l'Apostre S. Iacques, Toute bonne donation  
 & tout don parfait est d'en haut descendans  
 du Pere des lumieres. D'où aussi S. Iehan  
 le Precursseur du Seigneur dit, L'homme ne  
 peut rien receuoir s'il ne luy est donne du ciel.  
 Du ciel en effect, d'où aussi le S. Esprit est ve-  
 nu, quand Iesus est monte en haut, & qu'il a  
 mené captiue la captiuité, & a donne dons  
 aux hommes. Si donc tes merites sont dons  
 de Dieu, Dieu ne couronne pas les tiens com-  
 me tes merites, mais comme ses dons. Par-

*tant consideron les merites mesmes de l'A-*  
*postre S. Paul, ausquels il dit que Dieu iuste*  
*Jugerendra la couronne. Et voyon si ce sont*  
*ses merites comme de luy mesme, c'est à dire,*  
*acquis par soy mesme, ou s'ils sont dons de*  
*Dieu. A cette fin il remonstre en suite,*  
 comme le combat, la course & la foy de  
 l'Apostre ont esté tous effects de la grace  
 de Dieu en luy. Et c'est la seule differen-  
 ce qui doit estre obseruee entre les meri-  
 tes du fidele, & les merites du iusticiaire.  
 Car pource que celui-ci a ses merites  
 (tels qu'il les presume) de foy mesme, il  
 en est superbe & orgueilleux. Mais le  
 fidele, qui a ses merites de la grace de  
 Dieu operante en luy, est d'autant plus  
 humble que plus ses merites sont grands.  
 Car au reste la raison formelle du merite,  
 entant que merite, est par tout sembla-  
 ble, consistant en ce que l'acte de la vo-  
 lonté, qui est appellé merite, est la con-  
 dition qui rend l'homme capable & di-  
 gne d'obtenir le prix que la promesse de  
 Dieu a proposé, soit en la Loy soit en  
 l'Euangile. Mais en la Loy la recom-  
 pense donnée est purement loyer, à cau-  
 se, non de la forme du merite, mais de  
 son origine. Car les œuvres de la Loy

procedent des seules forces de la nature. Mais, en l'Euangile, la recompense donnée est plus grace que loyer, pource que le merite à qui elle est donnée est l'œuvre de la grace en la volonté. C'est ce que Saint Augustin enseigne bien au long en l'Epistre 105. à Sixte Prestre Romain, qui depuis fut Pape. *Quel est le merite de l'homme deuant la grace par lequel il reçoive la grace, veu que rien que la grace ne fait tout bon merite en nous. Et quand Dieu couronne nos merites, il ne couronne autre chose que ses dons. Car comme au commencement de la foy nous auons obtenu misericorde, non pource que nous estions fideles, mais afin que nous le fussons: ainsi en la fin (ce qui sera en la vie eternelle) il nous couronnera en compassion & en misericorde. Ce n'est donc pas en vain qu'on chante à Dieu: Et ta misericorde me preuiendra, & sa misericorde fera apres moy. D'où aussi la vie eternelle mesme, qu'en la fin on aura sans fin, est pour cette cause rendue aux merites precedens. Toutesfois pource que ces mesmes merites, auxquels elle est rendue, ne sont pas acquis de nous, par nostre suffisance, mais sont faits en nous par la grace, elle est aussi elle mesme appelée grace, non pour*

*autre cause que pource qu'elle est donnee gratuitement. Non pas pource qu'elle ne soit donnee aux merites, mais pource que les merites, auxquels elle est donnee, sont aussi donnez. Je ne pense pas, qu'ayant confronté, à cette doctrine de Saint Augustin, celle que ie defen selon le sentiment des Catholiques, vous n'auoüiez qu'un œuf (selon le prouerbe) n'est pas plus semblable à un autre. Si vostre sentiment est donc celuy de Saint Augustin, il n'y a plus lieu de controuetse entre vous & les Catholiques.*

*Mais vous me pardonnerez si ie vous di que vous n'avez point assez attentivement considéré, ny la doctrine de S. Augustin, ny le sens que les Catholiques donnent au terme de merites, quand vous dittes pag. 23. que vous estes d'accord avec S. Augustin en la chose, & que vous ne differez que du terme. Et quand pour vous en explicquer pag. 25. 26. 27. 28. vous entrez ainsi en l'explication du mot de Merite. Le mot meriter, dites-vous, se prenant en latin pour le mot d'obtenir & de recevoir, les Peres Latins ont employé le mot de merite pour tout œuvre qui obtient quelque chose, ou pour tout œuvre agreable*

agréable à celui à qui on la fait. Si vous consentez & acquiescez à cette raison du *Merite*, vous estes Catholique comme les Catholiques mesmes, Car ils n'entendent, par *Merite*, autre chose qu'un œuvre agréable à celui à qui on la fait, & pour laquelle celui qui la fait estât agréable, obtient quelque chose de celui à qui elle plaist. C'est la definition que j'ay donnée au nom de merite, au Jugement de Monsieur Testard page 17. sur la distinction qu'il faisoit, comme vous, entre les merites en latin & les merites en françois. J'ay dit, *Que meriter, soit en latin soit en françois, n'est defini autrement par les Catholiques, que rendre à quelqu'un un deuoir agréable qui oblige l'affection de celui qui le reçoit à un amour & à une reconnaissance reciproque.* Vous reconnoissez que c'est la definition de Bellarmin, & vous la rapportez en la page 26. Car ce sont aussi ses propres mots liur. 5. de la Justification ch. 2. *Nous disons tres-proprement en latin* (ce qu'il dit en latin n'est pas pour opposer le terme au françois, mais à l'equiualence du grec, qui signifie chose agréable) *que quelqu'un merite envers un autre, & qu'il se l'oblige, quand il fait*

quelque chose qui luy plaist ou qui le delecte. Vous reconnoissez aussi que la definition, que S. Augustin donne au mot de *Merite*, reuient au mesme sens, par le jugement & par le rapport du mesme Bellarmin de grat. & lib. arb. cap. 14. S. Augustin, dit il, a de costume d'appeller *Merite*, tout bon acte, pour raison duquel nous receuons quelque chose. Il me semble qu'au lieu de disputer avec les Catholiques sur le mot de *Merite*, cette declaration vous deueroit suffire. Et que vous ne pouuez refuser honnestement determiner cette cōtrouerse, par le sens & par la definition que S. Augustin luy donne, & en laquelle vous conuenez mesme avec Bellarmin. Or afin que quelqu'un ne die, que les Catholiques entendent quelque autre chose par meriter, ie vous prie de considerer, que soit en latin, soit en françois, on ne peut par le mot de meriter, entendre autre chose que ce que contient la definition que vous mesmes en donnez, au sens auquel vous dittes que Sainct Augustin & les autres Peres l'ont pris. Les Romains ont dit, *Bene mereri de aliquo*, pour signifier, *Faire chose agreable à quelqu'un*. Quand ils ont dit, *Optime de*

me meritus es, nous traduirions, Vous m'a-  
 uez fait chose tres agreable, ou bien, vous  
 m'avez fait tres grand plaisir, ou comme  
 nous parlons ordinairement en françois,  
 Vous m'avez extremement obligé. Et quand  
 ils disent, *Maxima sunt tua erga me me-  
 rita*, c'est ce que nous dirions, Le plaisir  
 que vous m'avez fait est tres grand, ou autre-  
 ment, Je vous ay de tres grandes obligations.  
 D'autant que l'œuvre, le deuoir, le serui-  
 ce rendu est si agreable, qu'il oblige l'affec-  
 tion de celuy qui le reçoit à vn amour  
 reciproque. C'est ce que nous entendons  
 en françois, en ce suiet, par le terme d'*obli-  
 ger*, qui signifie lier l'affection d'un autre  
 à soy: mais non pas le lier corps & biens,  
 bon gré mal gré qu'il en ait, selon le stile  
 des obligations de Notaires. Quiconque  
 donc fait quelque chose, enuers quel-  
 qu'un, digne de son affection, merite en-  
 uers luy. C'est la signification du mot  
 de merite. Quiconque parle ainsi en  
 latin & en françois, & en toute autre lan-  
 gue, qui a deriué, du latin, l'usage de ce  
 terme, parle proprement & bien. Quant  
 à ce que vous dites que meriter se prend  
 aussi pour *obtenir*, vous dittes encores  
 vray. Mais vous ne pouuiez rien dire

qui soit plus à l'aduantage des Catholiques. Car ce que *meriter* signifie *obtenir*, il le signifie *ex consequenti*. C'est pource qu'il est consequent, par raison, & aussi par experience, que celuy qui a fait chose agreable obtienne la recompense de ce qu'il a fait. Or rien ne confirme dauantage la raison formelle du merite, qui consiste au rapport & en la relation de l'œuvre à la recompense, que la consequence pour laquelle, selon cet vsage, *meriter* signifie *obtenir*. Car vous voyez, par là, que le nom de merite emporte dignité au regard de l'œuvre, & obligation, au regard de celuy pour qui l'œuvre est fait, de le recognoistre. C'est la raison pour laquelle *Meriter* a esté employé pour *obtenir*. Et c'est cependant tout ce que vous combattez au nom de merite, au regard de sa raison formelle. Vous n'auiez donc point besoin, pour faire foy que *meriter* signifie *obtenir*, de rapporter, ny l'autorité de Saint Ambroise, ny l'autorité de Saint Augustin. N'ayez pas peur que ny moy, ny aucun Catholique vous le nyions. Vous ne nous pouuiez donner, en ce suiet, vn plus grand aduantage. Pour le passage

d'Ammian Marcelin, excusez moy si ie vous di, que vous n'en auez pas bien pris le sens. Car en ces mots, *quamobrem id non meruerim*, *meriter* ne signifie pas obtenir, mais seulement estre digne. Car c'est en cela que gist la gentillesse de la response de Caton qui dit, *qu'il aime mieux que les gens de bien cherchent la raison pourquoy il n'a point merité de statues, que d'aller chuchetans la cause pourquoy il les auroit obtenues ; ce qui luy auroit esté bien plus facheux*. Il vouloit, par là, donner à entendre, que les statues n'estoient pas la recompense de la vertu, mais de la vanité des hommes. Qu'elles estoient donnees à la vanité de ceux qui les obtenoient, mais non à la vertu. Ainsi les hommes vains les meritoient & en estoient dignes. Mais les vertueux ne logeoient pas là le prix & la recompense de leur vertu. C'est pourquoy Caton vouloit que les gens de bien cherchassent la raison pourquoy il ne les auoit pas meritées. Et qu'ils cogneussent par là, qu'il n'auoit pas esté homme de vanité, mais de vertu solide. Car ce luy auroit esté chose plus griefue, si les ayant obtenues ou impetrees, on eust esté chucheter de luy.

qu'il estoit fait comme vn autre homme. *Mereri* ne signifie donc pas en son discours *obtenir*, qui est le consequent, mais simplement *meriter*, qui est l'antecedent. Et de faict vous voyez qu'en la suite de ses paroles *mereri* est opposé à *impetrare*. Ce qui deuoit suffire pour vous faire iuger qu'il ne signifie pas en celieu cy *obtenir*. Ces choses, à la verité, ne font ny pour ny contre ce que nous traittons ensemble, & ne sont point de Theologie, mais elle sont pourtant du sçauoir des honnestes gens.

Voyon maintenant ce que vous dittes pour la difference que vous pretendez estre entre la signification du nom de merite en latin, & de merite en françois. Car apres la definition de merite en latin pour chose agreable & pour laquelle on obtient le reciproque, vous adioustez : Or en françois nous ne parlons pas ainsi : car quand vn seruiteur fait quelque chose qui plaist à son maistre, ou le fils quelque chose laquelle aggré à son pere, ce seroit fort improprement que nous dirions, que le seruiteur merite enuers son maistre, ou l'enfant enuers son pere. Dittes moy, s'il vous plaist, parlez vous de l'usage

actuel de ce terme, ou de la raison de son  
 vsage? Voulez vous dire qu'on n'en vse  
 point ainsi en France, ou que ceux qui en  
 vsent ainsi le font mal à propos & par-  
 lent mauuais françois? Si vous entendez  
 que ce terme, au sens que vous dittes, ne  
 soit point en vsage en France, certes tous  
 les François demanderont d'où vous  
 estes, & où vous demeurez, que vous  
 ne sçachiez pas l'vsage d'un terme le  
 plus commun qui soit en la bouche de  
 tous nos François, à qui rien n'est plus  
 familier, en toutes conditions, qu'en  
 parlant de quelque honneste homme,  
 qui rend bien tous les deuoirs aus-  
 quels il est obligé en sa condition,  
 de dire que c'est vn homme de merite,  
 vn homme qui merite beaucoup, c'est  
 à dire, vn homme qui est digne que cha-  
 cun l'aime. Ce qui ne se dit pas moins  
 d'un seruiteur que d'un autre, s'il est hon-  
 neste homme, s'il sert bien son maistre,  
 s'il est fidele, affectionné, diligent. Et  
 nul ne fera difficulté de dire de ce ser-  
 uiteur à son maistre, qu'il a en luy vn  
 homme de merite, & qui merite d'estre  
 aimé, recognu, recompensé de luy, pour-  
 ce qu'il luy rend bon & agreable seruice;

On n'en dira pas moins d'un enfant enuers son pere, & de tous autres, en quelque qualité relative qu'on les considere. Il n'y a celuy qui ne sçache, que tel est l'usage ordinaire de nostre langue. Mais si vous voulez reprendre la raison de ce langage en ceux qui en vsent ainsi; & les accuser de parler mal françois, demandôs en si vous voulez à l'Academie. Je m'en rapporteray volontiers à elle. Le Secretaire est de vostre cognoissance & de vos amis. Il nous fera aisémēt obtenir le resultat de la consultation ou du iugement de cette diserte Societé. Et ie m'assure qu'elle ne fera pas si longue à décider nostre different, que celuy de ces gentils esprits du siecle, jaloux de la gloire les vns des autres, pour lesquels elle a nagueres exercé son stile & son jugement sur leurs escritures. Mais peut-estre n'aurons-nous que faire, ny de juges ny de tēmoins, si nous nous voulons bien entendre. Je voy, si ie ne me trompe, ce qui vous fait ombrage. C'est peu de chose à mon aduis. Il n'est rien plus facile que de le leuer. Vous estimez que ce seroit parler fort improprement de dire que le seruiteur merite enuers son maistre, ou

l'enfant enuers son pere. Non certes im-  
 proprement pour le langage, car la Gram-  
 maire n'y est point blessée. Mais tres-  
 inciuilement pour les mœurs, si cela se  
 dit par arrogance, ou par reproche, sans  
 occasion de necessité. Ce qui offenseroit  
 bien fort la Philosophie & la regle de la  
 vie ciuile. Alleguer son mérite, c'est de-  
 mander sa recompense & la recognois-  
 sance deuë. La demander à qui a bonne  
 volonté de la rendre, à qui est iuste &  
 enclin à la recognoissance du deuoir  
 & du seruice qu'il a receu, c'est dou-  
 ter de sa bonté & de son equité, c'est  
 luy faire iniure. Pour cette raison c'est  
 traicter fort inciuilement avec luy que  
 de luy alleguer son merite. Soit le ser-  
 uiteur enuers son maistre, soit l'enfant  
 enuers son pere, soit le suiet enuers son  
 Prince. Mais comme le Maistre, le Pere,  
 & le Roy sont bons, equitables & reco-  
 gnoissans, autant qu'ils seront enclins &  
 touchez du ressentiment du seruice, de  
 l'obeïssance, & de la fidelité qu'ils es-  
 prouuent en ceux qui leur sont assujettis:  
 autant seront-ils prompts eux-mesmes à  
 publier ou à louer le merite de leurs ser-  
 uiteurs, de leurs enfans, & de leurs su-

jets. Ceterme, qui auroit eu mauuaife grace en la bouche de l'inferieur, aura de la gloire en celle du superieur. Et c'est ainfi premieremēt que le terme de merite a son vſage legitime & neceſſaire. Puis apres il eſt libre & juſte en la bouche meſme du ſeruiteur, de l'enfant, & du ſujet, ſi ceux à qui ils ſont ſouſmis vſent, ſans cauſe, en leur endroiēt, de l'excez de quelque faſcheuſe humeur. Car, en ce cas, les ſujets, les ſeruiteurs, & les enfans eſtans demeurez ſeruiables, obeïſſans, & fideles à leurs Princes, Maiſtres, & Peres, leur peuuent dire, nous ne meritions pas ce traitement, nous meritions de receuoir de vous autre gratituede & recognoiſſance. Ils peuuent fort ingenuēment, en ce cas, alleguer leurs merites. Ainſi vous voyez, que comme il y a merite en effect en ceux qui font choſe agreable & digne de recompence : auſſi leur en peut on rendre la loüange, voire eux meſmes en representer la verité, ſous le terme de *merite*, ſelon les diuerſes occurrences, ſans offenſer non plus la regle de la vie, que la loy du langage.

Mais vous inſiſtez encore ſur la diffe

rence du terme de merite en latin, & du  
 mesme terme en françois, & vous l'ap-  
 puyez de la version des Docteurs de  
 Louvain. *Et de faict, dites vous, le vieil*  
*Interprete Latin, dont l'Eglise Romaine a*  
*canonisé la version, traduit par meriter ce*  
*qui signifie seulement faire chose agreable.*  
*Heb. 13. Dieu prend plaisir à tels sacrifices,*  
*& traduit, on merite enuers Dieu par tels*  
*sacrifices. Si cette traduction est bonne en*  
*latin, elle ne vaut rien en françois. Aussi*  
*les Docteurs de Louvain en la version fran-*  
*çoise ont traduit, Dieu prend plaisir à tels sa-*  
*crifices.* Voyez que c'est que de raisonner  
 avec preoccupatiō d'esprit. Vous deuez  
 auoir recueilli de là, que les Catholi-  
 ques, par le terme de merite attribué  
 aux bonnes œuures, n'entendent autre  
 chose qu'un œuure à laquelle Dieu préd  
 plaisir, & qui luy est agreable. Car c'est  
 la preuue & l'induction directe & naïue,  
 qui se recueille de l'obseruation que  
 vous faites de la traduction des Docteurs  
 de Louvain. Ce que vous auez enco-  
 re deu apprendre du Cardinal Bellarmin,  
 lequel, pour prouuer le terme de merite  
 par l'Escriture, employe ce mesme lieu-  
 ci du 13. aux Hebreux, où il remarque,

que le terme *ἐὐαγεῖσθαι* a esté traduit par le vieil interprete par *promeretur*, vsant d'un verbe deponent en signification passive. Par où il argumente, que la chose que les Catholiques entendent par merite, est en l'Escripture en terme equiualent au langage grec dont les Apostres ont vsé. Direz vous que le Cardinal Bellarmin, parlant des merites en latin, qui est la langue en laquelle il escrit, n'ait pas entendu la mesme chose que s'il auoit escrit en françois? Et puis qu'en ce lieu du 13. des Hebreux, il approuue la version du verbe *ἐὐαγεῖσθαι* par le mot de meriter, voire qu'il en prouue l'usage legitime de ce dernier terme, direz vous qu'autre ait esté le sentiment des Docteurs de Louvain que de luy? Et finalement pouuez vous reuoquer en doute, que les Catholiques parlans de merite, soit en latin, soit en françois, n'ayent l'idée d'une mesme chose en l'esprit? Pourquoi donc (direz vous) les Docteurs de Louvain n'ont ils traduit *ἐὐαγεῖσθαι* par meriter, comme a fait le vieil Interprete latin, mais par *prendre plaisir*? Il est bien aisé de vous satisfaire. Le terme grec dont l'Apostre vse est

passif, & signifie l'affection qui est en Dieu (car il faut que nous parlions ainsi en begayant) lors qu'il a esgard aux sacrifices qui luy sont offerts, & non pas actiuellement l'action procedante du deuoir de celuy qui les offre. Or le vieil Interprete Latin, suiuant la mesme analogie, a voulu approprier le terme latin *promeretur*, pour l'interpretation du terme grec *ἐυαρεσέται*, & a donné, pour cet effect, vne signification passiuë à vn verbe deponent qui a la signification actiue. Comme qui diroit, *Dieu est merité par tels sacrifices*. Mais pource que cette phrase, *Dieu est merité*, est inusitée en nostre langue, & que la regle de nostre parler ne la souffre pas, les Docteurs de Louuain ont voulu, avec raison, euitier de tomber en la mesme impropriété de Grammaire qu'auoit fait en latin le vieil Interprete. C'est pourquoy pour retenir l'energie du terme grec, & pour représenter, selon qu'il le porte, l'affection designée en Dieu ayant esgard aux sacrifices qui luy sont offerts, ils ont traduit, *Dieu prend plaisir à tels sacrifices*. La raison de leur traduction ainsi explicquée, vous n'en pouuez vous

recueillir autre chose ( comme ie vous ay dit ) sinon que les Catholiques ne prennent le nom de merite que pour vne œuvre agreable à Dieu. Mais ie traiteray cy apres avec vous plus ample-ment de la raison mesme des merites.

## CHAP. II.

*Que les merites œuvres de la grace ne contreuient point à la raison de la grace en la cause du salut.*

**S**Ur ce que vous argumentiez, que celuy qui attribue la communication du salut aux merites du fidele, encore qu'il recognoisse ce merite œuvre de la grace, fait neantmoins la grace cause esloignée du salut, & le merite cause prochaine: ie vous auois respondu que vostre raisonnement estoit vn pur sophisme, par lequel vous confondiez les parties du salut, & dissimuliez, que le merite en est la premiere. Dautant que si quelqu'un a de bons merites, œuvres de la grace en

luy, c'est à dire la iustice & la saincteté, celuy-là a desia le salut. Car il est sauué de ce present siecle mauuais, & de la nation peruerse & tortuë. Ce merite donc estant l'effet immediat de la grace, il s'en-suit que la grace est tousiours cause prochaine du salut, puis qu'elle est cause prochaine du merite. A cela que me dites vous? Vous me respondes page 5. *que vous trouuez qu'en voulant refuser vostre obseruation ie la confirme.* Et moy ie vous respon, que ie me trompe si ce que vous dites part bien auant de vostre cœur. Comment vous semblet'il donc que ie confirme vostre obseruation au lieu de la refuter? Pour ce que ie maintien, que des deux parties du salut, la derniere, qui est celle que vous regardiez, est donnée au merite. Mais vous sçauiez que ce n'est là nullement ma response à vostre argument. Car pour resoudre, comment la grace est cause immediate du salut, ie ne respon pas que la seconde partie du salut, qui est la gloire, soit donnée au merite de la iustice & de la saincteté. Ce ne seroit rien dire à propos. Mais ie respon, que la premiere partie du salut, qui est la iustice & la saincteté, est l'œuvre immediate de la grace.

32  
Et par consequent, que la grace est la cause  
se prochaine du salut, contre ce que vous  
concluiez. Est ce là confirmer vostre  
observation? Si ainsi est, comment appel-  
lerez vous ce qui la renuerse? Mais si ie  
sçay que c'est que de disputer, vous ne  
pouuez faire aucune instance, contre la  
distinction par laquelle i'ay mis vostre  
argument en pieces, qu'en deux manie-  
res. Car il faut, ou que vous faciez voir  
qu'elle est nulle, & que les deux parties,  
esquelles ie diuise le salut, n'en sont pas  
les parties. (Or c'est ce que vous ne faites  
nyne pourriez faire, veu que cette di-  
uision des parties du salut est tres-verita-  
ble, & vous ne la pouuez reuoquer en  
doute.) Oubien il faut que vous mon-  
striez que selon mon hypothese, la pre-  
miere partie du salut (que ie di estre la  
iustice & la saincteté) n'est point l'œuvre  
immediate de la grace en nostre volonté.  
Mais vous reconnoissez, en vostre propre  
obiection, que ceux contre qui vous dis-  
putez, font le merite œuvre de la grace.  
Ma distinction subsistât dōc en ces deux  
façons, vous ne pouuez conclurre contre  
moy, que ie face la grace cause esloignée  
du salut. Dire apres cela que vous re-  
gardez

gardez la derniere partie du salut, c'est  
 dire que vous regardez ce qu'il ne faut  
 pas regarder en nostre question. Car c'est  
 persister en vn sophisme dont l'illusion  
 est manifeste. C'est tout de mesme que si  
 quelqu'un vouloit inferer qu'une maison  
 ne seroit pas bastie en terre, pource que  
 des deux parties de la maison, dont l'une  
 est le fondement, l'autre l'edifice basti  
 dessus, il n'y a que le fondement qui tou-  
 che la terre. En conscience qui vous di-  
 roit que la maison est bastie en terre, puis  
 que le fondement, qui est sa premiere  
 partie est en terre, repartiriez vous que  
 quand vous soustenez le contraire, vous  
 ne regardez qu'à la seconde partie? Voyez  
 vous point que ny en la maison, ny en  
 la raison de nostre salut, on ne peut  
 considerer la seconde partie sans la pre-  
 miere? Il n'est pas moins esloigné de la  
 raison, de la sagesse, bonté & verité de  
 Dieu, que l'homme soit rendu partici-  
 pant de la vie & de la gloire eternelle, sans  
 estre rendu premierement iuste & saint,  
 qu'il est impossible à vn architecte de  
 suspendre en l'air l'edifice d'une maison,  
 s'il n'en pose premierement le fondement  
 en terre. Tout ainsi donc que celuy qui

dit que le fondement de la maison est en terre, dit, par mesme raison que la maison est bastie en terre, & non en l'air : Et qui diroit, à cause de la partie de la maison esleuée en l'air, que la maison n'est point bastie en terre, seroit vn pur sophiste : de mesme celuy qui dit que la premiere partie du salut est l'œuvre de la grace, dit, par mesme raison, que le salut a la grace pour sa cause prochaine. Et quiconque dit, à cause de la seconde partie du salut qui est communiquée au merite de la premiere, que la grace n'est point cause prochaine du salut, est vn pur sophiste. Si vous trouuez que ma distinction confirme ainsi vostre obseruation, vous estes bien heureux. Car de cette belle humeur on vous pourroit oster tout vostre bien, que vous croiriez qu'on vous auroit fait riche.

Mais voyon encor que c'est qui vous flatte si doucement en cette opinion.  
*„ C'est, dites vous, ce que j'ay escrit, qu'en*  
*„ la communication de la seconde partie*  
*„ du salut, il faut qu'il y ait vne condition*  
*„ en nous qui nous rende capables de la*  
*„ posseder, il faut que nous la meritions.*  
*A quoy vous adjoustez, que ces derniers*

termes il faut que **NOUS LA MERI-**  
**TIONS** iustificient vostre discours, & sont  
ceux que vous blasmez. Vous me ferez  
comprendre comment c'est qu'ils iusti-  
fient vostre discours, quand il vous plaira  
m'en apporter quelque raison. Cessant  
cela, vous me dispenserez de le croire.  
Pour la raison de vostre blafme elle me  
semble plus propre pour m'en deschar-  
ger, que pour m'en declarer coupable,  
puis que vous confessez, que vous reco-  
gnoissez bien qu'il faut en celuy, à qui Dieu  
donne la vie & la gloire, vne condition qui  
le rende capable de la recevoir, & reconnos-  
sez pour cette condition outre la foy la iu-  
stice & la saincteté: mais nous ne voulons  
pas, dites vous, que cette saincteté tienne  
lieu de merite. Je sçay bien que vous  
ne le voulez pas; mais ie n'ay pas encore  
compris pour quelle cause vostre volon-  
té me doit estre raison. Pourquoi ne  
voulez vous pas que la saincteté soit me-  
rite, puis que vous voulez qu'elle soit  
vne condition qui rende le fidele capa-  
ble de recevoir la gloire? Car le merite  
bon ou mauuais n'est autre chose en l'œu-  
re de quelqu'un, qu'une condition qui  
le rende digne & capable, ou incapable &

indigne, de receuoir le bien promis. La souillure rend l'homme incapable de voir Dieu, que nul ne verra sans la sainteté. Et pourtant celuy qui est souillé de son vice, de son injustice, & de sa rebellion, merite d'estre priué de la beatitude & de la gloire de Dieu. Vous voyez par là, que la condition, qui rend l'homme incapable de la gloire, n'est autre chose que son mauuais merite, & que son mauuais merite n'est autre chose que son incapacité. Or comme la raison des contraires est pareille, la sainteté que vous recognoissez estre vne condition, qui rend l'homme capable de la gloire, est par consequent de necessité vn bon merite au fidele. Et soit que vous le vouliez ou ne le vouliez pas, cette verité subsistera immuable & inuincible, & se manifestera au dernier iour (comme l'Apostre en parle Romains 1. 5. 6.) *en la declaration du iuste iugement de Dieu, qui rendra à chacun selon ses œuvres. A ceux qui avec patience à bien faire cherchent gloire, honneur, & immortalité la vie eternelle. Mais à ceux qui sont contentieux, & qui se rebellent contre la verité, & obeïssent à injustice, sera indignation & ire. Tribulation & an-*

goisse sur toute ame d'homme faisant mal, du  
 Juif premierement, puis aussi du Grec. Mais  
 gloire, honneur & paix à un chacun qui  
 fait bien, au Juif premierement, puis aussi  
 au Grec. Ces conditions, que l'Apostre  
 oppose en ceux qui cōparoistront au ju-  
 gement de Dieu, sont celles qui les ren-  
 dent capables ou incapables d'obtenir la  
 gloire de Dieu au dernier iour. Ce sont  
 celles que les Catholiques appellent bons  
 & mauuais merites, à cause de leur raison  
 formelle, qui consiste en la capacité ou  
 en l'incapacité mesme qu'elles mettent  
 en l'homme. Pourquoy ne le voulez vous  
 pas? ou, pour mieux dire, pourquoy le  
 voulez vous, & ne le voulez vous pas tout  
 ensemble? Pourquoy accordez vous, que  
 c'est vne condition qui rend l'homme  
 capable ou incapable? Et pourquoy ne  
 voulez pas qu'elle soit dite bon ou mau-  
 uais merite?

Vostre troisieme instance est (page 7.)  
*Que puis que ie di, que ce merite prouient  
 de la grace, vous respondex, que c'est d'où  
 vous inferez qu'il n'est pas la grace. Car il  
 n'est pas ce d'où il prouient.* Vous com-  
 mettez icy deux insignes fautes, l'une  
 contre la regle de la dispute, l'autre con-

tre la verité. Contre la regle de la dispute, car vous changez l'estat de la question que vous auiez posé vous mesme. Vous regardiez, disiez vous, à la seconde partie du salut, concludant contre ceux avec qui vous disputez, qu'ils n'en donnent pas la cause à la grace. Et maintenant vous argumentez que la premiere partie du salut (que ie di estre l'œuvre de la grace) n'est pas la grace, pource qu'elle prouient de la grace. Ainsi vous disputez à present contre la these dont nous estions d'accord, & sur laquelle il n'y auoit point debat entre nous. Mais vous disputez manifestement contre la verité. Et ie ne puis croire que vous ayez bien pensé à ce que vous dites, quand vous recueillez, que l'œuvre qui prouient de la grace n'est pas la grace. Est ce contre moy, ou contre l'Euangile que vous avez entrepris de combattre? Quoy? La foy n'est pas vne grace de Dieu, pource qu'elle prouient de la grace? La repentance n'est pas vne grace de Dieu, pource qu'elle prouient de la grace? L'humilité, la patience, l'esperance, la charité, toutes les vertus chrestiennes ne sont pas graces de Dieu, pource qu'elles prouiennent de la

grace ? Je vous prie reuez à vous.  
 Qu'auiez-vous en l'esprit quand vous di-  
 siez en l'argument mesme, par où vous  
 entrepristes en vostre Presche d'attaquer  
 ma doctrine, & que vous repetez page  
 4. *Que l'Euangile nous apprend à recognoi-*  
*stre grace sur grace, & tousiours grace ?* Ne  
 vouliez vous pas dire, que la gloire doit  
 estre aussi reputée grace, comme la justi-  
 ce & la sainteté qu'elle couronne est  
 premierement grace, & ainsi grace sur  
 grace ? Pourquoi vous en dédittez vous  
 maintenant ? Cette inconstance doit  
 estre vn argument certain à vostre con-  
 science, que la cause que vous voulez de-  
 fendre est mal fondée. Mais comment  
 vostre meditation vous a-t'elle si mal ser-  
 ui, que de vous faire recueillir que ce  
 qui prouient de la grace n'est pas la gra-  
 ce ? Ignorez vous que les actions qui se  
 transmettent en quelque suiet, retiennent  
 tousiours le mesme nom de la cause,  
 cōme elles en reçoiiēt la nature ? La cha-  
 leur qui a passé dans le fer ne retient-elle  
 pas le nom de la chaleur du feu, qui par  
 son action eschauffe le fer ? Argumente-  
 rez vous que cette chaleur n'est pas cha-  
 leur, pource qu'elle prouient de la cha-

leur, cōme vous inferez que l'œuvre de la grace n'est pas grace pource qu'elle prouient de la grace? Et si vostre raisonnement vous plaist, vous plaist-il aussi que nous effacions de l'Euangile toutes ces paroles, *Dieu est puissant de faire abonder toute grace en vous, afin qu'ayans toujours toute suffisance en toute chose vous soyez abondans en toute bonne œuvre.* 2. Cor. 9.8. Ne neglige point la grace qui est en toy, qui t'a esté donnée pour estre Prophete, (car c'est ainsi qu'il faut traduire) avec l'imposition des mains du Presbytere. 1. Tim. 4.14. Rallume la grace de Dieu qui est en toy. 2. Tim. 1. 6. Que chacun selon qu'il a receu la grace l'administre enuers les autres, comme bons dispensateurs de la grace de Dieu. 1. Pierre 4.10. Et grande grace estoit sur tous les fideles. Actes 4.33. Nous auons tous receu de la plenitude d'iceluy grace pour grace, Jean 1. 16. Et infinis autres lieux semblables.

Vostre quatriesme instance est (pag. 7.) *Que vous remontez au dire de l'Apostre Rom. 11. lequel oppose l'œuvre (entanz que meritoire) à la grace. Si c'est par grace ce n'est plus par œuvre : autrement grace n'est plus grace.* Vous montez où l'Apostre ne vous conduit pas, & vostre pen-

see s'esloigne bien loin de la sienne. Ces paroles, *entant qu'on la pretend meritoire*, sont de vous & non del' Apostre. Et c'est vne manifeste petition de principe. Car vous presupposez ce que vous deuriez prouuer. L'œuure dôt parer l'Apostre est l'œuure du franc-arbitre, qui est l'œuure des justiciars. C'est celle que l'Apostre oppose à la grace. C'est ce que vous deuez recognoistre par toute la dispute. Car il traite de la justification, & non pas de la glorification. C'est à dire de la premiere partie du salut, non pas de la seconde. Il dispute contre ceux qui vouloient mesler la loy avec l'Euangile, comme faisoient les faux Apostres. Or presumans estre justifiez par les œuures de la loy, ils destruisoient par ce moyen la raison de la grace de Iesus Christ. Car la raison d'estre iustifié par les œuures de la loy, est directemēt opposee à la raison d'estre iustifié par la grace. Pource que la iustification par la loy depend de la raison d'obtenir la iustice de l'homme par les œuures de son franc-arbitre, qui est meu par la fin des promesses charnelles de la loy. La iustification par la foy depend de la maniere d'obtenir la iusti-

ce de Dieu par la grace de Iesus Christ en la mortification du vieil homme, & en la viuification du nouveau, de qui les affections sont eleuees de la terre vers le ciel, par l'esperance des promesses spirituelles del'Euangile. L'Apostre oppose donc à la grace les œuvres du franc-arbitre de l'homme charnel, qui obtemperere aux commandemens singuliers & externes de la loy, suiuant l'appetit des promesses charnelles. Et telles sont toutes les œuvres des iusticiaires qui se pretendent iustes par eux mesmes. Ainsi la iustice des œuvres est incompatible avec la iustice de la grace. La raison de l'incompatibilité, est, que celuy qui cherche la iustice des œuvres se presume iuste de par soy-mesme, par sa propre nature, & pense preuenir Dieu par sa propre iustice, & luy donner le premier. Celuy au contraire qui cherche la iustice de la foy, la iustice qui est par la grace, recognoist qu'il est miserable pecheur & perdu, qu'il n'y a aucun biē en lui, & qu'il n'y en peut auoir que ce ne soit par la vertu de la grace qui le preuienne, & qui le viuifie de la mort, en laquelle il est naturellement. Pour cette cause l'Apostre

conclud, que si c'est par grace ce n'est point par œuvre, autrement grace n'est plus grace. Ce qui n'a rien de commun ny qui conuiene avec l'opinion de ceux qui veulent exclurre de la cause formelle de nostre iustification les effets de la grace de Iesus Christ au fidele, par où il est rendu effectiuement iuste, sainct, & irreprehensible deuant Dieu en charité.

Vostre cinquiesme instance est en la page 20. & 21. où vous dittes, *que la raison de la grace destruit la raison du merite, pource que ce qui merite enuers quelqu'un ne doit pas estre son bien faict enuers celuy qui est dit meriter. Et pourtant s'il y auoit quelques bonnes œuvres des hommes qui peussent meriter enuers Dieu (ce que vous dites que vous ne pësez pas) il faudroit que ce fussent des œuvres qui prouinssent des forces naturelles de l'homme, & non de celles qu'il ait receuës de la grace.* Si ie ne vous cognoissoy meilleur Theologien & micux raisonnant, que vous n'avez voulu paroistre en ce discours, ie ne vous iugeroy nullement par là ce que ie vous estime. Escoutez vous vous mesmes, & vous souuenez de la definition que vous donnez par tout au merite. Vous dittes, *Que*

*c'est une œuvre agreable à laquelle est due  
la recompense parrigueur de justice selon la  
condignité de l'œuvre.* Par cette definition  
plus l'œuvre est excellente, plus elle est  
meritoire; & plus elle est meritoire, plus  
elle est excellēte. Cela est sans contredit.  
Dittes donc, croyez vous que les œu-  
res qui procederoient des forces natu-  
relles de l'homme (posé qu'il n'eust  
point transgressé le commandement qui  
luy a esté dōné) fussent plus excellentes  
que celles de la grace? Pensez vous que  
les œuvres procedantes de la loy du cō-  
mandement charnel, fussent plus excel-  
lentes que les œuvres qui procedent de  
la loy de l'Esprit de vie qui est en Iesus  
Christ? Si vous l'estimez ainsi vous n'en-  
tendez gueres la difference de la raison  
des vnes, d'avec la raison des autres. Les  
œuvres qui auroient procedé des forces  
naturelles, n'auroient eu en l'homme  
pour leur principe que l'amour de soy-  
mesme & de sa chair, pource que le  
franc-arbitre naturel qui les auroit pro-  
duites, n'auroit receu son mouuement  
que de l'esperance des promesses char-  
nelles de la vie presente. Telles auroient  
esté toutes les meilleures œuvres, que

l'homme, en estat d'integrité, auroit fait es par ses forces naturelles. Si vous vous en imaginez quelqu'autre chose, vous estes fort esloigné de la verité. Et faut que vous ayez peu medité cette leçon, comme il est arriué à la plus part de nos Theologiens. Mais pour le mieux entendre, considerez quel commandement Dieu donna à l'homme incontinent apres sa creation, & dans le Paradis terrestre.

*Quant à l'Arbre de science de bien & de mal tu n'en mangeras point: car dès le iour que tu mangeras d'iceluy tu mourras de mort, Gen.*

2. 17. C'est vn commandement prohibitif avec menace. La matiere & la forme du commandement vous doit faire iuger quelle estoit la vaillance de l'homme, & quelles sont ses forces naturelles dont vous parlez. Sur tout quand vous voyez que la premiere tentation luy a fait transgresser le commandement. Dieu ne dit pas lors à l'homme, *Tu m'aimeras de tout ton cœur, de toute ta force, & de toute ta puissance,* Qui est vn commandement qui emporte de necessité l'obligation de renoncer entierement à soy-mesme, d'abandonner l'amour de soy-mesme, de se hayr soy-mesme, pour aimer Dieu plus

que soy-mesme. Car c'est là l'aimer de tout nostre cœur. Dieu n'en demanda pas tant au premier homme pour sa premiere espreuue. Il cognoissoit bien sa portée. Il sçauoit bien la vaillance de ses forces naturelles, à l'effect desquelles vous voulez que doïue estre seulement attribué le merite. Il ne luy demanda pour tout, sinon qu'au milieu de l'abondance de tant de fruiçts agreables & delicieux, dont il auoit le libre vsage pour l'entretien de sa vie, il s'abstint de manger d'un seul entre tous, & qu'il fist cette force à son appetit naturel, que de le contenir, en ce regard, pour la reuerence & la sousmission qu'il deuoit à la volonté de son Createur. Et pource que Dieu cognoissoit bien de quoy estoit fait l'homme qu'il auoit créé, pource qu'il sçauoit bien qu'il estoit terre & fange, chair & sang, & que son franc-arbitre naturel n'auoit autre mouuement que celui de l'appetit & du desir de sa chair, il adiousta au commandement la menace de mort. Afin que par la vehemence du desir de la conseruation de sa chair, & par la crainte de sa destruction, il fust incité à l'obeïssance, & retenu dans

les termes de l'obseruation du commandement. Certes l'homme, par l'obeïssance au commandement receu, auroit conserué cette vie animale, & auroit iouy continuellement de tous les biens que Dieu luy auoit élargis en la terre pour la felicité de sa vie. Telle auroit esté la recompense du merite de cette obeïssance. Mais pour amener l'homme à l'obeïssance du grand commandement, d'aimer Dieu de tout son cœur, il falloit luy proposer la fin d'une felicité plus grande que celle de cette vie animale & terrestre; Il falloit que l'homme y fust amené par la communion avec le Fils eternal de Dieu, qui seule en estoit le moyen. Et si l'homme eust obey au commandement singulier qui luy auoit esté donné: s'il eust contenu son propre desir dans la soumission à la volonté de Dieu, ce luy eut esté vn acheminement en la voye de paruenir à l'obeïssance du grand commandement, d'aimer Dieu plus que soy, par le renoncement de soy mesme. Mais ce que l'homme n'a peu selon la loy du commandement charnel, Dieu l'a fait en luy par la loy de l'Esprit de

40  
vie qui est en Iesus Christ. Considérez  
donc, ie vous prie, qu'en toutes les œu-  
res de la loy, qui consistent en l'execu-  
tion des commandemens singuliers,  
l'hōme n'a besoin, pour les accomplir,  
que des forces naturelles de son franc-  
arbitre, meu par la seule affection qu'il  
porte à soy-mesme & à sa propre chair.  
Le Sainct Esprit n'intervient point en  
l'homme pour produire en luy de telles  
œuvres, ou pour accomplir cette obeis-  
sance. Et pourtant telles œuvres ne  
sont point dites, ny l'œuvre, ny le bien-  
faict de Dieu en l'homme. Mais, ie  
vous prie, direz vous pour cette raison  
que telles œuvres soient plus excellen-  
tes & plus agreables, pour conclurre,  
comme vous faites, qu'elles en doivent  
plustost avoir le nom de merite? N'ayez  
point de desplaisir que ie vous appren-  
ne, que ces œuvres produites par les  
forces naturelles de l'homme, sont le  
merite des serfs: & non le merite des  
enfants. Ausquelles aussi n'a esté pro-  
mise, par la loy ( dont elles sont pro-  
prement appellees les œuvres ) autre  
recompense que la benediction de la  
terre, & le loyer des serfs; non la bene-  
diction

diction de l'heritage celeste, les biens qui sont hors l'heritage du Fils de Dieu, mais non l'heritage mesme. La portion d'Ismaël, non la portion d'Isaac. Mais les œuvres que l'Esprit de Dieu produit en nous, sont les merites des enfans. Pour lesquelles il faut, que le franc-arbitre du fidele soit premierement abbattu sous l'obeïssance de la Croix de Christ, & puis releué par l'esperance des biens celestes qui nous sont promis en sa gloire. D'où vient que le fidele, en faisant telles œuvres, aime Dieu plus que soy-mesme. Et pourtant ce sont les seules œuvres vraiment bonnes, vraiment excellētes, vraiment agreables à Dieu, vraiment dignes, vraiment merites. Tout au contraire de ce que vous vous estes imaginé.

Trouuez bon encore, que ie vous remonstre ce qui vous deçoit, quand vous dittes, *Que c. qui merite enuers quelqu'un ne doit pas estre son bien-faict enuers nous, mais le nostre enuers luy.* Cela est vray d'un homme enuers l'autre, pource que la raison du merite, est, en ce que la chose qui est dite merite, est agreable & delecte celuy de qui l'affection s'encline

reciproquement vers celuy qui la fait. Or, entre les hommes, tous estans finis, & ayans tous, pour cette raison, besoin les vns des autres, ce qui les delecte principalement est ce qui subuient en quelque partie que ce soit, au besoin qu'ils ont, c'est à dire, ce qui peut aider ou accomplir leur felicité. Pour cette cause le merite d'un homme enuers l'autre, ne peut estre formellement le bien-faiët que celuy qui merite a receu de celuy enuers lequel il merite. C'est seulement, comme vous dittes, le bien-faiët, de celuy ci enuers l'autre. Mais la chose, au regard de Dieu, va tout autrement. Car ce que Dieu trouue en l'homme qui le delecte & qu'il a agreable, n'est pas quelque vtilité qui luy en reuienne. Dieu n'a que faire de nous, ny de ce qui vient de nous. Dieu ne se delecte que de soy mesme & de ses œuures. Et pourtant Dieu ne peut rien auoir agreable en l'homme que ce qu'il y a mis. Et ce que Dieu y a de plus agreable, c'est ce qui tient le plus de sa nature. Ainsi le merite de l'homme enuers Dieu, ne peut estre autre chose que le benefice de Dieu en l'homme, tout au contraire de ce que

Vous raisonnez.

En fin, ce qui me fait iuger que vous auez digeré tout ce discours avec moins d'attention, qu'on ne doit faire vne matiere si graue & si importante, c'est que vous ne vous apperceuez pas, qu'en disant que celuy, qui a receu de Dieu tout le bien qu'il a, ne peut estre estimé meriter enuers Dieu, vous renuersez tout le fondement de nostre salut. Car par ce moyen vous niez absolument le merite de Iesus Christ. Vous sçauiez que Iesus Christ homme, Mediateur de Dieu & des hōmes, qui a obei au Pere en toutes choses, & qui a merité, par son obeyssance, pour soy & pour nous, la gloire qu'il possede, a receu du Pere prealablement l'Esprit sans mesure, & que Dieu l'a oint d'huile de lieffe par dessus ses compagnons. Direz vous donc, pour ce qu'il est issu du Pere plein de grace & de verité, qu'il n'a point merité enuers lui? Abolirez vous aussi son merite? Dites tant qu'il vous plaira, qu'il a merité comme Mediateur & non comme Fils ( ce que j'examineray cy-apres en son rang ) vous ne pouuez non plus nier qu'il n'ait receu du Pere la charge de Mediateur. Et quād

mesmes vous remonteriez iusques à la consideration de sa nature diuine, vous trouuerez tousiours que le Pere luy a cōmuniqué, de toute eternité, son essence. Ainsi, de quelque costé que vous vous tourniez, vous voyez que vostre conclusion ancantit le merite de Iesus Christ. Ce que ie sçay tres-bien que vous aurez le premier en detestation, & par consequent le principe d'où sourd vne consequence si ennemie du Christianisme, lequel est aboli, si la raison du merite est abolic, comme le defendent les Catholiques, & moy avec eux.

---

### CHAP. III.

*Des causes du salut en Iesus Christ : où est expliquée la vraye raison de la justice imputée & de la justice inherente.*

**S**VR le suiet de la distinction que que i'ay faite des deux parties du

salut que nous obtenons en Iesus Christ, par où i'ay leué l'ambiguité sur laquelle estoit appuyé tout vostre sophisme contre les merites de grace, qui sont l'œuvre de l'Esprit de Dieu en l'ame du fidele: vous avez pris occasion d'examiner ce que i'en di, & vous taschez d'y reprendre quelque chose, comme contraire à la verité. C'est ce que vous faites au troisieme poinct de vostre traité, depuis la page 35. iusques à la 44. Pour vous satisfaire pleinement sur cela, ie n'obmettray aucune de vos paroles, & respondray exactement à tout ce que vous y dittes, esperant vous faire mieux entendre, que vous n'avez fait iusques à cette heure, les causes de nostre salut en Iesus Christ, & vous esclarcir, par ce moyen, l'espaisseur des nūages qui vous font encore combattre la verité en cette questiō. En laquelle ayāt desia obtenu de l'ingenuïté de vostre consciēce, que vous reconnoissez la iustice inherēte du fidele pour vne condition necessaire, à laquelle Dieu aura égard en la derniere iournée, pour rendre la couronne aux fideles: ie me promets aussi de vous faire cōprendre, que par l'imputation de la iustice

de Christ ( que vous voulez defendre coniointement ) ne doit entendre que le seul acte de l'entendement de Dieu ( pour parler avec vous ) par lequel ayant esgard à l'obeïssance de son Fils, il nous pardonne gratuitement tous nos pechez. Mais non vn acte de l'entendement de Dieu, par lequel il nous repute justes encore que nous ne le soyons pas. Qui est la grande mesprise qu'ont commise en cette question nos premiers reformateurs, de l'erreur desquels i'ay entrepris de vous retirer & tous les nostres. Car encore que l'Escripture n'vse iamais de cette façon de parler, & que les Apostres ne dient, en nulle part, que la Iustice de Christ nous soit imputée : neantmoins il n'y aura nul inconuenient d'entendre, sous ces termes, ce que les Apostres ont dit, quand ils parlent de la remission des pechez qui nous est donnée à cause de Iesus Christ. Et ainsi d'accommoder cette imputation de l'obeïssance de Iesus Christ, à leur intention, pour ne nous arrester à disputer vainement des paroles & des syllabes.

Vous me reprenez donc premiere-  
ment page 35. de ce qu'entre les parties des

salut ie mets, pour la premiere, la iustice inherente, c'est à dire le renouvellement de nos ames en sainteté & en vertu Chrestiennes. A quoy vous opposez l'opinion de nos Eglises disant, Et nous, nous n'en faisons que la seconde, constituans la premiere en la remission de nos pechez par l'imputation de l'obeissance de Iesus Christ. Et là dessus vous adjoustez, que vous avez desia remarqué auparauant, que l'ecclipsé du salut l'imputation de l'obeissance de Iesus Christ. Je ne veux nullement croire, que vous ayez escrit cecy à dessein de me rendre odieux par le deguifement de la verité de mes escrits; mais ie m'estonne fort, que les voulant combattre, vous les ayez leus avec si peu d'attention, que vous m'imputiez tout le contraire de ce que vous auiez deuant les yeux, en celuy que ie vous ay adressé, & que vous vouliez refuter. Il est vray, que vous auiez remarqué auparauant, en la page 6. & 7. que l'ecclipsé, comme vous presumez, de la premiere partie du salut, l'imputation de l'obeissance de Iesus Christ. Mais vous mesmes, en la mesme page 6. transcriuant mes paroles, avez effacé de vos propres mains le crime que vous m'im-

posez. Voicy mes paroles transcrites par vous mesmes de la page 18. de mon Amiable esclarcissement. Car pour nous rendre participans de la redemption du peché, & pour nous communiquer la iustice & la sainteté par le renouvellement du S. Esprit par la foy, Dieu n'est men d'autre consideration que du MERITE DE L'OBEISSANCE de son Fils, qui nous en a acquis la grace. Quelle guerre auiez vous iurée contre vous mesmes, en me la faisant, que de m'imputer tout le contraire de ce que vostre propre plume depose pour ma iustification? Dites vous, que celuy là ecclipsé, du salut, le merite de l'obeissance de Christ, qui escrit si expressément, que Dieu n'est men d'autre consideration que de l'obeissance de son Fils, pour nous rendre participans de la redemption du peché, & pour nous communiquer la iustice & la sainteté par le renouvellement du S. Esprit. Et qui adjouste, que le merite de cette obeissance nous en a acquis la grace. Je constituë (il est vray) la premiere partie du salut en la redemption du peché & en la communication de la iustice & de la sainteté, par le renouvellement du saint Esprit. Mais ie n'eccli-

pſe pas pourtant, du ſalut, l'imputation de  
 l'obeiſſance de Chriſt, puis que ie ſay le  
 merite de cette obeiſſance, la cauſe qui  
 nous a acquis la grace de ce benefice, &  
 qui ſeule meut Dieu à nous le commu-  
 niquer. Vous ne pouviez pas m'accuſer  
 de choſe plus eſloignée de mon ſenti-  
 ment, & dont ie peuiſſe me iuſtifier plus  
 aiſément, puis que vous meſmes eſtes le  
 Greſſier du regiſtre où ie compulſe la ve-  
 rité de ma deſenſe. Comment derechef  
 dites vous, que l'eccliſe, des cauſes du  
 ſalut, la remiſſion des pechez, que l'obeiſ-  
 ſance & la mort de Chriſt nous a acquiſe?  
 Vous qui liſiez encore, en la page 12. de  
 mon eſcrit, contre lequel vous preniez  
 la plume, que ie di en termes expres, que  
*Chriſt, pour nous racheter & pour nous de-  
 liurer de la ſeruitude du peché & de la ma-  
 lediſtion de la loy, a porté ces peines en  
 noſtre place comme noſtre pleige, afin de  
 nous obtenir pardon de nos tranſgreſſions,  
 & pour nous acquerir la benediſtion du  
 Pere celeſte.* Voyez vous pas, qu'entre  
 les cauſes de noſtre ſalut, la remiſſion des  
 pechez, ou le pardon de nos tranſgreſſions,  
 que le merite de l'obeiſſance du Fils nous  
 a acquis, marche, ſelon moy, deuant la

communication du fruit de Justice & de sainteté, comme la cause qui nous a ouvert la porte à la benediction du Pere celeste, lequel nous cōmunique le benefice où ie cōstituē la premiere partie du salut, qui est formé en nous par le renouvellemēt du S. Esprit en iustice & vraye sainteté. Tellement que si vous voulez m'estre aussi equitable que ie vous le suis, vous aduoüerez qu'il n'y a pour ce regard ny raison ny sujet de controuerse entre vous & moy, ny avec les Catholiques, sinon qu'autant que vous vous embrouillez vous mesmes en la cognoissance de ce poinct, quand vous dites, que vous faites la remission des pechez par l'imputation de la Justice de Iesus Christ, la premiere partie du salut, & nostre renouvellement en iustice & sainteté, la seconde. Souuenez vous du sujet de la question que nous traittons, & repassez les yeux sur l'argument par lequel vous mesmes en avez donné l'occasion. Vous y concluiez, que par ma doctrine des vrais merites du fidele, ie faisois la grace seulement cause esloignée du salut, & le merite cause prochaine. Où, par le salut, vous entendez (ainsi que vous le declarez vous mes-

mes) la gloire qui sera accomplie au fidele au dernier iour. Et partant, en cette question, par le salut est entendu le benefice de la grace de Dieu, entant qu'il est formé, & qu'il s'accomplit au fidele, en l'estat de son entier renouvellement. C'est le salut que i'ay distingué en deux parties. L'une de la iustice & saincteté. L'autre de la vie & gloire eternelle. Celle-là, la premiere: celle-cy, la seconde. En ce sens, le salut comprend tout l'œuure formel que l'Esprit de Dieu accomplit en ses eleus, pour les rendre conformes à son Fils. Il ne s'agit pas, en ce regard, ny de la cause efficiente, ny de la cause meritoire du salut. Nous n'en considerons icy que la formelle. C'est à dire, ce qui est produit & accompli en nos personnes, pour nous rendre, au lieu de pecheurs & miserables, iustes & eternellement heureux. Car ceux qui sont tels sont sauuez & ont obtenu salut. Premierement, par la iustice & saincteté, par où ils sont sauuez de ce present siecle mauuais, & retirés des pieges du diable. Secondement par la vie & gloire eternelle, par où ils sont sauuez de toute misere & de la mort, qui est le dernier ennemi à vaincre. Tel estant

le sujet de nostre discours, voyez vous pas combien vous l'embrouillez, quand vous faites la communication de iustice par le renouvellement du saint Esprit, la seconde partie du salut, & la remission des pechez la premiere. Car la remission des pechez & le pardon que Dieu nous en fait à cause de l'obeissance de son Fils, par vn acte de son intelligence, lequel consiste seulement en ce qu'il estime & reputé de nous (comme vous parlez page 40.) n'est pas vne partie de nostre salut considéré formellement accompli en nous. Car le salut formellement accompli en nous, n'est pas vn acte de l'intelligence de Dieu, c'est vn effet de sa puissance & de sa vertu. Le salut formellement accompli en nous ne consiste pas simplement en ce que Dieu estime & reputé de nous. Mais c'est l'operation de son Esprit en nos ames & en nos corps, deliurez du joug de la puissance du diable & de la mort. C'est donc chose tout à fait hors de nostre propos de dire, qu'entre les parties du salut ainsi considéré, la premiere soit la remission des pechez, que vous definissez vn acte de l'intelligence de Dieu, qui ne met rien

cependant en nous de réel.

Considerez encore ce que vous mesmes avez escrit. Car ie vous veux instruire de la verité, par l'induction que ie feray de vos propres paroles. Les voicy comme vous les avez couchées en la page 40. *Le pardon que Dieu nous fait, bien qu'il soit suivi de ses bons effets & de l'operation de son Esprit en nos ames, n'est pas pourtant cette operation là formellement, mais c'est un acte de son intelligence, lequel consiste simplement en ce qu'il estime & repete de nous.* Vous distinguez formellement le pardon, ou la remission des pechez, d'auec l'operation de l'Esprit de Dieu en nous. Cela va bien. Or toute nostre question estoit de l'operation del'Esprit de Dieu en nous, l'une au regard de la iustice qu'il y forme, l'autre de la gloire dont il nous couronnera au dernier iour. Car la question est entre nous de sçauoir, si celuy qui attribuë la iustice du fidele (que ie di estre son merite) à l'operation del'Esprit de grace, fait, par ce moyen, la grace cause esloignée du salut. Pour vous monstrier que non, & pour vous redresser de la mesprise que vous commettiez en ce sujet, ie vous ay remonstré, que

l'œuvre de Dieu en nous, tant au regard de la iustice que son Esprit y opere, qu'au regard de la gloire, fait les deux parties du salut qui est accompli en nous, & que celle-là en est la premiere partie, celle-cy en est la seconde. Voyez vous donc pas, puis qu'il s'agissoit de distinguer les parties de cette operation de Dieu ( dont l'œuvre est le salut accompli en nous, & que vous dittes vous-mesmes estre formellement distincte du pardon & de la remission des pechez ) combien i'aurois esté absurde & impertinent disputeur, si i'aurois fait ce que vous m'imputez à crime de n'auroir pas fait? Si i'aurois mis entre les parties du salut, qui depend de l'operation de Dieu en nous, la remission des pechez, que vous dites vous mesmes en estre formellement distincte, & estre vnacte de l'intelligence de Dieu, & non vn œuvre de sa vertu. Car, en ce faisant, i'aurois manifestement confondu des choses qui sont sous diuers genres, dont l'une appartient au genre de la cause meritoire du salut, l'autre au genre de la cause formelle. Ainsi vous recognoistrez, comme i'estime, que la reprehension que vous me faites

ne vient pas d'aucune cause que ie vous en aye donnée, mais par la seule faute que vous commettez en la consideration de ce que ie dy, & de ce que vous dites vous mesmes.

Cependant n'estimez pas, que ny moy, ny les Catholiques, ecclipsions du salut la remission des pechez, & le pardon que Dieu en fait aux hommes pour la seule consideration du merite de l'obeïssance de son Fils. Les tesmoignages de mon sentiment en sont exprez, aux lieux que i'en vien de rapporter de l'escriit propre contre lequel vous m'avez adressé vostre discours. Tout mon premier traité de la iustification en est plein, & celuy que ie vous ay adressé & à Messieurs vos collegues sur l'adherence de Monsieur Testard au sentiment des Catholiques en cette question. Et quant aux Catholiques, auxquels vous imputez la mesme chose, ou ils diront, que vous n'avez iamais leu ny le Concile de Trente, ny les escrits de leurs Docteurs, ou ils se plaindront de calomnie. N'avez-vous pas leu au chapitre 7. de la session 6. du Concile de Trente, *Que la iustification n'est pas la seule remission des pechez, mais*

*aussi la sanctification & le renouvellement  
 de l'homme interieur. Par où vous voyez,  
 qu'ils font l'une notoirement differente  
 de l'autre, & que pour establir l'une ils  
 n'ostent pas l'autre. N'avez-vous pas leu  
 encore, au chapitre precedent du mesme  
 Concile, où ils traittent du moyen de la  
 preparation à la iustification, qu'ils di-  
 sent, *que nous sommes disposez à la iustifica-  
 tion, lors que par la foy entendans que nous  
 sommes pecheurs, & par l'apprehension de la  
 Justice diuine, nous retournans vers la consi-  
 deration de la misericorde de Dieu, nous con-  
 ceuons l'assurance que Dieu nous sera propi-  
 ce à cause de Iesus Christ. Selon ce qui nous  
 est dit, Pren courage, mon fils, tes pechez te  
 sont pardonnez.* Direz-vous que ce soit  
 là ecclipser des causes & des raisons du  
 salut la remission des pechez, laquelle est  
 offerte de Dieu prealablement au pe-  
 cheur en consideration de l'obeissance  
 de son Fils. Certes toute vostre forme  
 de dispute monstre trop ouuertement,  
 que vous ne combattez la doctrine des  
 Catholiques que par faute de la bien en-  
 tendre. Car ie ne veux pas croire, que,  
 si vous l'entendiez, vous en voulussiez  
 ainsi desguiser ou calomnier la vray sen-  
 timent;*

traire de ce qu'ils enseignent.

Après vous auoir ainsi redressé sur l'omission dont vous me repreniez sans sujet, vous apperceurez qu'aux paroles que vous rapportez page 36. de la 6. de mon escrit, où i'ay dit, *que la premiere partie du salut consiste en la redemption du peché par la regeneration, par la communication de justice & de sainteté, par la conformité du nouuel homme créé à l'image de Iesus Christ*, vous déguisez en effect mon intention. Et vous m'imputez vn sentiment tout contraire à celuy que i'ay declaré en tous mes escrits, quand vous adjoustez, *que i'explique ainsi ce que j'enten par la redemption du peché, afin qu'on ne la rapporte à autre chose*. Vous ne pouuez ignorer qu'en toute l'Escripture, la redemption du peché se prend doublement, ou pour la cause que Christ en a establie, selon le decret & le bon plaisir du Pere, par sa mort: ou pour l'effect qui en est accompli en nous, comme ie le traiteray plus amplement cy-apres. Quand nous parlons du salut selon qu'il est considéré formellement accompli en nous, alors nous entendons, par la redemption du peché, nostre deliurance actuel-

le de l'empire du peché, qui regnoit en nous. C'est ainsi que ie pren la redemption du peché aux paroles que vous rap-  
portez. Et c'est ainsi que ie la deuois prendre pour le sujet que ie traittois. Mais quand vous dites que ie l'explique ainsi, afin qu'on ne la rapporte à autre chose. si vous entendiez que i'aye voulu nier, par là, ou que la cause mesme de nostre redemption du peché, ait esté établie par la mort de Christ : ou que ie veuille nier que Christ nous a obtenu la remission de nos pechez & la faueur de Dieu : ou que Dieu nous absolve gratuitement de la coulpe pour l'amour de son Fils, afin qu'il nous deslie des cordaux du peché dont le diable nous tenoit enlancez par les desirs de ce monde, qui auoient vigueur en nos membres : ce seroit me faire le plus insigne tort, & calomnier ma doctrine le plus injustement qu'on sçauroit dire.

Mais puis qu'il vous a plu prendre la peine de me faire ensuite vne leçon, touchant la raison par laquelle nous sommes rachetez par le Sang de Christ, & sanctifiez par son Esprit : vous ne trouuerez pas mauvais, que porté de non moindre

affection en vostre endroit, ie tasche de vous rendre la pareille, & de vous expliquer, sur ce suiet, la doctrine del'Euangile touchant les causes de nostre salut en Iesus Christ, comme Dieu m'a fait la grace de la comprendre dans les escrits des Apostres. Vous me remonstrez, *que comme il y a deux choses en Iesus Christ tres distinctes, à sçauoir son Sang & son Esprit: aussi considerons-nous en la communication de ces deux choses deux benefices differens, bien qu'inséparablement conioints. L'un qui est la remission de nos pechez par l'imputation de son Sang, & l'autre la regeneration par le don de l'Esprit.* Vous dites tres bien que le Sang & l'Esprit de Christ sont choses tres distinctes. Et que la communication que nous auons à l'un & à l'autre, doit estre consideré tres distinctement. Mais certes leur distinction & leur ordre a esté fort mal obseruée par tous nos gens, & par vous mesmes en vostre traitté de la Communion à Iesus Christ sur la matiere du Sainct Sacrement del'Eucharistie, Car vous y confondez & renuersez tout ce bel ordre, & la distinction de la communion au Sang & à l'Esprit de Christ, quand vous

enseignez que , par la participation  
 qu'ont les fideles à l'Esprit de Christ , ils  
 participent à son Corps & à son Sang.  
 Car vous voulez , par ce moyen, que la  
 communication à l'Esprit soit cause de  
 la communication au Sang ; au lieu que  
 selon la distinction & l'ordre que vous  
 mesme representez maintenant, la com-  
 munication au Sang va au deuant la com-  
 munication à l'Esprit. Par où s'il vous  
 plaist, vous considererez que si vous per-  
 sistez en cette verité, tout vostre traitté  
 du Sacrement s'en va par terre. Et iamais  
 vous ne le releuerez. Mais n'en ayez  
 point de regret. Car ie vous feray voir  
 à plein , Dieu aydant , la verité de la do-  
 ctrine de ce grand mystere, conforme-  
 ment aux hypotheses des Catholiques,  
 où vous prendrez vous mesmes plaisir  
 de voir euanoüir tous les nuages qui  
 vous l'ont couuerte iusques à present.  
 Vous dites bien aussi que la communica-  
 tion de ces deux choses nous apporte  
 deux benefices differés , bien qu'insépa-  
 rablement conioints. Mais ce que vous  
 omettez à obseruer est , que la commu-  
 nication de ces deux choses est aussi reel-  
 le & actuelle en l'une qu'en l'autre. Et

que nous ne communiquons pas plus reellement & actuellement à l'Esprit de Christ, que nous communiquons reellement & actuellement à son Sang. Voire que nul ne communique reellement & actuellement à son Esprit, qui n'a premierement communiqué reellement & actuellement à son Sang. Afin que vous ne pensiez pas, que la communication que nous auons au Sang de Christ soit seulement par imputation, comme tout le tissu de vostre discours suiuant le veut faire croire. Souuenez vous que Iesus Christ nous a commandé de boire son Sang. Or le boire emporte vne communication réelle & actuelle, non seulement imputatiue, n'en desplaise à tous nos Reformateurs. Et ie ne pense pas que Zvvingle eust iamais pû persuader à toute la Suisse, qu'on puisse boire veritablement, reellement, & actuellement, par imputation.

*Vous adioustez, que ces deux choses de Iesus Christ furent representées par ce qui sortit de son costé, à sçauoir sang & eau. Le sang est l'obeissance qu'il a rendue à Dieu son Pere iusqu'à la mort de la Croix: & l'eau est la vertu de son Esprit regene-*

*rant & vivifiant.* Est-ce vous qui le dites, ou si quelqu'un des Apostres nous a donné cette explication du Mystere du Sang & de l'Eau qui sortit du costé de Iesus Christ en la Croix ? Si les Apostres l'ont dit, citez le lieu. Si c'est vostre meditation & le sens de vostre pensée, permettez moy de vous en demander raison. Vous avez dit aux paroles précédentes, qu'il y a deux choses en Iesus Christ, son Sang & son Esprit ; Que toutes les deux nous sont communiquées, & que par la communication des deux nous receuons deux benefices differens, la remission des pechez, & la regeneration. Comment dites vous maintenant que ces deux choses, le Sang & l'Esprit, nous sont représentées par le Sang & l'Eau qui sortit du costé de Christ ? Voulez vous donc que le Sang de Christ soit représenté par le Sang de Christ ? Que la chose qui represente soit aussi la représentée ? Si cela est, pourquoy faites vous tant de controuerse aux Catholiques cōtre la presence réelle du Sang de Christ au Sacrement, sous ombre que nostre Seigneur a dit, *Faites ceci en memoire de moy, & son Apostre, toutes fois & quan-*

tes que vous en boirez vous annoncerez la mort du Seigneur? Pourquoy argumenteriez vous de là, contre la presence du Sang de Christ en l'Eucharistie, en inferant qu'une chose presente ne peut estre la representation ou le memorial de soy-mesme, puis que vous nous dites icy expressément, que le Sang espandu par Iesus Christ en la Croix, est représenté par le Sang de son costé en la Croix? Si vous dites icy verité, vous disputez là sans raison contre la presence du Sang de Christ en l'Eucharistie, qui represente le Sang de Christ en la Croix. Choisissez duquel vous aimez mieux vous desdire. Apres, dites moy, sur quoy fondez vous que le Sang soit l'obeissance qu'il a renduë à son Pere en la Croix, & l'Eau la vertu de son Esprit regenerant & viuifiant? Les Anciens qui ont rapporté la raison du Sang & de l'eau sortie du costé de Iesus Christ en la Croix, à l'analogie des causes de nostre salut, ont dit que cette Eau & ce Sang sont les Sacremens de l'Eglise, le Baptisme & l'Eucharistie. Chrysostome sur celieu. *il en sortit eau & sang. Les sources mesmes en sont sorties, non sans raison & à l'auenture. Mais c'est pource*

que l'Eglise est compoſee de tous les deux. Et ceux qui ſont paruenus à la participation des Myſteres ſçauent qu'ils ſont regenez par l'eau, & qu'ils ſont nourris du ſang & de la chair. Car c'eſt d'ici que les Sacrements ont pris leur origine. Afin que lors que tu t'approches du Calice digne de veneration & de tremblement, tu t'en approches ainſi comme ſi tu beuſois de ſon coſté meſme. Sainct Auguſtin a peu près de meſme. L'Euaſiſte a pris ga de au mot dont il a vſé, en ne diſant pas qu'il luy a frappé ou bleſſé le coſté, ou choſe ſemblable, mais qu'il luy a ouuert, afin qu'en quelque ſorte de là fuſt ouuerte la porte de la vie, d'où les Sacrements de l'Eglise ont découlé, ſans leſquels on n'entre point en la vie, qui eſt la vraye vie. Ce Sang a eſté reſpandu en remiſſion des pechez. Cette eau eſt mixtionnée dans la coupe ſalutaire. Elle nous donne tout enſemble & le laucement & le breuuage. Vous voyez que ny l'un ny l'autre ne prend l'eau pour autre choſe que pour l'eau du Baptême, ou pour l'eau qui eſt mixtionnée dans le Calice de l'Euchariftie, ſelon que cette eau a ſa vertu en l'un & en l'autre Sacrement, pour contribuer à l'effect de la regeneration & de la ſanctification du fidele, ſelon la rai-

son du Myſtere à la fin duquel elle eſt  
 conſacrée. Mais que par l'eau, qui ſortit  
 du coſté de noſtre Seigneur en la Croix,  
 ſoit entendu ſon Eſprit, ie ne croy pas  
 que vous trouuiez aucun Docteur de l'E-  
 glife qui l'ait dit. Et certainement quoy  
 que vous le diez fort abſolument, &  
 comme ſi on n'en deuoit faire aucune  
 doute, ie ne voy pas qu'il y ait aucune  
 raiſon de le dire ny de le croire ainſi. Car  
 c'eſt choſe tout à fait contraire à l'anal-  
 gie des raiſons de noſtre ſalut. C'en'eſt  
 pas du coſté percé de Chriſt que nous  
 vient l'Eſprit de conſolation qui nous  
 ſanctifie. De Ieſus Chriſt crucifié, na-  
 uré pour nos forſaiets, vient bien noſtre  
 abſolution. Ce Sang & cette Eau, qui  
 ſont ſortis de ſon coſté, ont eſteint pour  
 nous l'ire du Pere. De là vient que nulle  
 tribulation, nulle angoiſſe, non les plus  
 grieues & les plus ſanglantes, ne ſont plus  
 effets, enuers les fideles, du courroux de  
 Dieu, mais de ſa grande miſericorde &  
 de ſon amour paternel, pour faire mou-  
 rir en nous le peché, & pour l'eſpreuue  
 de noſtre foy, afin qu'elle ſoit eſpurée  
 comme l'or. Tel eſt l'vſage du Sang &  
de l'Eau, dans laquelle nous ſommes

plongez au Baptême. Tel est l'usage & l'effect du Sang & de l'Eau, que nous buvons au Calice de l'Eucharistie. Mais quant à l'Esprit de Iesus Christ, puis qu'il est donné, afin que, par la consolation de l'esperance de la vie & de la gloire éternelle, ceux qui sont morts à peché & à ce present monde par la communion des souffrances de Iesus Christ, soient ensemble viuifiez & resuscitez en nouveauté de vie : vous voyez que cét Esprit n'est pas immédiatement sorti de l'ignominie de sa Croix en laquelle son costé a esté percé apres sa mort, mais de la gloire en laquelle il a esté élevé, apres qu'estant resuscité il a percé les Cieux pour s'asseoir à la dextre du Pere. Car l'Esprit ne nous est donné qu'en consequence de ce que Iesus est glorifié. Par où vous entendez, qu'en expliquant l'eau, qui est sortie de son costé en la Croix, pour son Esprit, vous cōfondés toute l'économie de nostre salut, & son analogie. Je vous demâde encore, pourquoy dites vous que le Sang est l'obeissance qu'il a rendue, & l'eau est la vertu de son Esprit? Si vous disiez que le Sang est sa souffrances, vous diriez bien. Mais en opposant

le Sang à l'Esprit, dire que le Sang est son obeissance, c'est separer son obeissance de son Esprit. Chose totalement absurde & entierement contraire à la raison de l'obeissance du Seigneur. Car l'Ecriture nous representant l'obeissance que Iesus Christ a renduë au Pere en la Croix, nous dit *qu'il s'est offert par l'Esprit eternal.* Et le mesme Apostre nous enseigne, Hebr. 12. 2. *que Iesus, Chef & consommateur de la foy, pour la joye qui luy estoit proposee, a souffert la Croix, ayant mesprisé la honte, & s'est assis à la dextre du Throne de Dieu.* Qu'est-ce qui formoit en Iesus Christ homme Mediateur de Dieu & des hommes, chef & consommateur de la foy, l'assurance de cette ioye, sinon l'Esprit eternal dont le Pere l'auoit rempli sans mesure, & lequel a residé en luy corporellement par l'vnion de sa nature humaine à la diuine en vne mesme personne? Cét Esprit eternal ne peut donc estre separé de la consideration de l'obeissance de Christ. Et quiconque dit son obeissance, entend de necessité son Esprit, comme estant la forme de cette obeissance: tout ainsi que celuy qui considere la matiere de cette obeissance en sa

- Croix, entend de necessité son Sang.
- Ainsi son Sang & son Esprit doiuent estre considerez, en l'accomplissement de l'obeissance qu'il a renduë à Dieu son Pere, comme ses deux parties integrantes. Car l'effusion du Sang, c'est à dire la souffrance & la mort, en est la cause materielle: & l'action de l'Esprit agissant en luy, c'est à dire l'amour qu'il a eu pour nous, suiuant la volonté du Pere, en est la cause formelle.

Par faute d'auoir considéré le benefice de nostre cōmunion à Iesus Christ pour vne chose aussi reelle & inherente en nous que le benefice de la communion à son Esprit. L'antithese que vous continuez en la suite de vostre discours entre le Sang & l'Esprit de Christ, iusques à la page 39. est toute bastie sur des raisons qui n'ont nul fondement en l'analogie de l'Euangile. Pource que vous les appuyez sur l'hypothese de nos Reformateurs, qui n'ont considéré le benefice de nostre communion à la mort de Christ, que pour l'imputation par laquelle Dieu accepte (pour nous pardonner nos pechez) la peine que Iesus Christ a soufferte comme nostre pleige. C'est le grand manque;

ment qu'ils ont commis en l'explication des causes de nostre salut. Et comme vous les suiuez en cela, vous bronchez en toutes vos antitheses, & en toutes les parties du raisonnement que vous faites sur ce sujet. Vous deuiez considerer que le Sang & la mort de Christ n'est pas seulement faite par imputation, mais aussi principalement par communication réelle & inherente. De quoy vous ne touchez vn seul mot. Et cependant la communication de l'Esprit de Christ, qui est la partie correlatiue de vostre antithese ne peut auoir lieu qu'en ceux qui cōmuniquent reellement & par vne participation actuelle à la Chair & au Sang de Christ: car il faut participer actuellement aux souffrances du Seigneur, pour auoir part à la vertu de sa resurrection. C'est la partie del Euāgile dōt la raison est la plus necessaire à cognoistre, pour entendre lesçauoir d'vn seul Iesus Christ & iceluy crucifié. C'est ce que vous omettez & dont vous ne faites pas la moindre mention en tout ce discours, où vous prenez à tâche de faire entendre la raison du benefice de Iesus Christ. Sçachez donc que pour receuoir le don del'Esprit de

de Christ, il ne suffit pas de croire qu'il est mort pour nous, mais il faut qu'en croyant qu'il est mort pour nous, nous croyiõs ensemble qu'il nous faut mourir avec luy. Et il faut que nous y mourions en effect, si nous voulons auoir part à la vie que son Esprit nous donne. Faute d'auoir ainsi compris l'analogie de l'Euan-gile, vous vous mesprenez en toutes les parties de vostre raisonnement, comme vous le recognoistrez par l'examen que i'en vay faire.

*Le sang, dittes vous, concerne ce que Iesus Christ a fait & souffert en nostre place comme nostre pleige: l'Esprit ce qu'il es-pand en nous comme nostre chef, car l'esprit s'essand du chef sur les membres. Vous opposez mal la qualité de pleige & de chef, comme si Iesus Christ entant qu'il est nostre pleige, & qu'il a souffert pour nous, n'estoit pas aussi nostre chef. Ignorez-vous qu'il a souffert afin que nous souffrions avec luy? Si vn est mort, dit l'Apostre, tous aussi sont morts. Ignorez-vous, qu'il a souffert pour nous, nous laissant vn patron, afin que nous ensui- uions ses traces? 1. Pier. 2. 21. Afin qu'e- stans morts à peché par la communion*

de sa mort, nous viuions à iustice parla participation de son Esprit. Vous vous abusez fort si vous ne considerez pas que nous sommes rendus formellement membres de Christ nostre chef, pour deux raisons; l'vne, que par la participation de son corps nous communiquons à l'estat de mort & d'aneantissement, auquel il s'est abbaissé pour nous ici bas. L'autre, que par la participation de son Esprit, nous communiquons à l'estat de vie, de laquelle il vit là-haut, où il a esté exalté à la dextre du Pere. Ainsi vous faictes tres-mal vostre opposition, quand vous restreignez à l'Esprit ce qu'il est espandu du chef sur les membres. Car selon l'ordre de priorité, qu'on appelle de nature, les fideles sont faicts membres de Christ par la communion de ses afflictions & de ses souffrances, & de son aneantissement, auparauant que l'autre partie formelle qui les rend aussi ses membres, sçauoir l'effusion de son Esprit leur soit communiquée. Car l'Esprit de Christ ne vivifie que les membres. La consolation ne peut estre donnée qu'à ceux que l'affliction aneantit. Reconnoissez donc, que le Sang de

Christ, concerne (pour parler avec vous) nonseulement l'imputation de la souffrance de Christ ( qui est tout ce que nos reformateurs ont considéré quand l'Ecriture nous parle de la participation au Sang de Christ, qui nous laue, & nous purge de nos pechez. ) Mais, en suite, & principalement, la réelle communication d'iceluy, par laquelle, en effect, nous mourons avec Christ, & sommes ensevelis en sa mort, en toute la condition de vie que nous auons à viure ici bas, depuis que nous sommes appelez à la foi. Qui n'entend ces deux parties relatives de nostre conformité à Iesus Christ nostre chef (comme ainsi soit que les relatifs se définissent & s'expliquent tousiours l'un par l'autre) ne sçait pas mesme que c'est que l'effusion de l'Esprit de Iesus Christ en l'ame fidele. Et n'a nullement bien compris la voye & la maniere de nostre sanctification.

Vous mesme, observant ce que ie vous remonstre, corrigerez maintenant aisément le defect que vous auez commis en tout vostre discours suiuant, quand vous continuez à dire, *Ci qu'il a fait & souffert en nostre place doit estre fait nostre*

par imputation: car c'est ainsi qu'est attribué ce qu'un pleige a faict pour celuy qu'il a pleigé: Mais quant au Saint Esprit il doit estre faict nostre par une reelle communication & operation d'iceluy en nos ames, ainsi que reellement l'Esprit s'espend du chef sur les membres du corps humain. Vous entendez maintenant que vous vous estes mespris, quand vous n'avez pas consideré, que la souffrance de Christ doit estre aussi faite nostre par communication reelle. Voire que l'Esprit de Christ ne nous est point reellement communiqué, que sa souffrance prealablement ne nous soit reellement communiqee.

Ce premier manquement est ce qui fait que vostre conclusion suiuite cloche de tous costez, quand vous recueillez, que l'obeissance de Christ estant chose passée, qu'il a rendue a Dieu lors qu'il estoit au monde; mais son Esprit estant chose presente & residente en luy: il faut que la chose passée soit nostre seulement par imputation: & que celle qui est residente en luy découle reellement en nous. Croyez vous auoir trouué quelque grande subtilité Theologique? Rien moins. Voyez en la foiblesse. Si vostre antecedent est vray, la

resurrection de Christ qui a suiuy sa  
 mort de trois iours, & qui ( à trois iours  
 prés) est d'aussi long temps passée, ne  
 deuroit estre nostre seulement que par  
 imputation, & non par communication  
 réelle. Que deuiendrions-nous par vo-  
 stre maxime? Vous aboliriez la verita-  
 ble resurrection de nos corps. Nous ne  
 resusciterions que par imputation, en si-  
 gne & en figure. Comme vous voulez  
 aussi qu'au Sacrement nous participions  
 au Corps & au Sang de Christ en signe &  
 en figure. Mais ne pensiez-vous point,  
 quand vous parliez ainsi, comment s'ac-  
 corderoit ce que vous appelez la mort  
 ou l'oblation de Christ, *une chose passée*,  
 avec ce que l'Apostre aux Hebreux l'ap-  
 pelle *continuë*, quand il dit, *que par l'obla-*  
*tion de son Corps une seule fois faite il a per-*  
*fectionné τετελείωκε continuellement, εις το*  
*διηκès ceux qui sont sanctifiez*. Comment  
 est-ce que cette oblation du Corps de  
 Christ perfectionne continuellement les  
 fideles à sainteté, si elle n'est continuel-  
 lement presente pour leur estre, non im-  
 putée seulement, mais appliquee & com-  
 muniquée réellement? Ouurez les yeux  
 & considerez ce que toute l'Eglise vous

crie d'une bouche, que Dieu nous rend  
 toujours present le Corps de son Fils icy  
 bas, afin que nous y participions pour  
 participer à son Esprit. Mais dites moy  
 encore, rendriez-vous bien raison de ce  
 que vous dites, à qui vous demanderoit  
 pourquoy vous concluez, *que son Esprit*  
*découle reellement en nous, pource qu'il est*  
*present & resident en luy?* Je ne vous de-  
 mande pas seulement si vous trouueriez  
 quelque façon de parler de l'Apostre,  
 quelque analogie de l'Euangile, qui con-  
 firmast vostre pensée. Cette condition  
 vous seroit trop griefue. Je sçay que  
 vous estes le premier qui ayez iamais  
 parlé ainsi. Je vous demande seulement  
 que vous en faciez comprendre à quel-  
 qu'un le sens & la raison. L'argument  
 par lequel vous tirez cette conséquence  
 doit auoir cette premiere proposition,  
*Tout, ce qui est present & resident en Christ*  
*découle en nous reellement.* Si elle est vraye,  
 son ame decoule aussi en nous reellemēt;  
 car elle est presente & residente en luy.  
 Et ie diray mesme le semblable de son  
 Corps, tel qu'il est là haut au ciel, car il  
 est aussi present & resident en luy. Car  
 toute l'humanité de Christ reside, com-

me vous sçauiez, hypotastiquement en sa nature diuine. Vous fournissez ainsi par vostre maxime, & par ces consequences, le plus fort argument aux vbiquitaires dont ils se soient iamais aduisez.

Vous vous appuyez de ce que le Cardinal Bellarmin dit, touchant l'imputation qui est faite du peché d'Adam à tous ses descendans. Lequel il dit nous estre communiqué en la maniere qu'une chose passée peut estre communiquée. En cela vous trouuez qu'il dit fort bien. Mais il dit encore mieux beaucoup d'autres choses que vous ne trouuez pas bonnes. Cela arriue à tous ceux qui seruent, plus que de raison, à leurs opinions. Tout ce qui les fauorise leur semble bon. Tout ce qui les contrarie, mauuais. Mais il faut juger de tout par la raison, non par nostre passion. Cependant le sens du Cardinal Bellarmin, au terme d'imputation, n'est nullement le vostre. Car par l'imputation de l'obeyssance de Christ, vous entendez & le definissez expressement vn acte de l'intelligence de Dieu, par lequel il nous repute justes à cause de l'obeyssance de Christ, encore que nous ne le soyons pas en nous mesmes, ains au

contraire, pecheurs & injustes actuellement. Telle, selon vostre sens, est l'imputation. Mais ny le Cardinal Bellarmin ny aucun Catholique, n'a iamais dit, ni creu, que l'imputation du peché d'Adam fust vn acte de l'intelligence de Dieu, par lequel il nous reputé pecheurs & injustes à cause de la desobeissance d'Adam, encore que nous ne le soyons pas en nous-mesmes, ains au contraire justes & saints actuellement. Telle imputation est autant éloignée du sens des Catholiques, que de la bonté & de la sagesse de Dieu. Le peché d'Adam est voirement imputé à toute sa race en la maniere qu'une action passée peut estre communiquée; c'est à sçauoir par la consequence de son acte qui redonde sur ceux qui ont vne necessaire communion avec l'auteur d'iceluy. Or quelle est la consequence de l'acte du peché d'Adam? c'est la peine & la malediction qu'il en a encouruë par la raison de la iustice de Dieu. Dieu auoit donné à Adam au Iardin d'Eden, l'arbre de vie, & la prosperité & la fertilité de toutes choses, pour la perpetuité & l'aise entiere de sa vie. Adam ayant transgressé le commandement de Dieu, Dieu

l'a chassé du Jardin d'Eden, & luy a osté ces deux benefices, d'où il a esté assuietti à la mort, & à la misere de diuers travaux & de diuers tourmens. Ce qu'il auoit pour luy & pour sa race, il l'a perdu pour luy & pour sa race. Comme il a esté maudit à cause de son peché, toute sa race a esté maudite à cause du mesme peché. Cette loy de Dieu qui est la loy de verité & de justice, comme elle est naturelle & necessaire, s'exerce aussi par tout en la société des hommes, par les loix qui la regissent. D'un criminel, de qui les biens, les honneurs & les dignitez qu'il possède en la Republique par le benefice du Prince, sont confisquez à cause de son forfait, les descédans les perdent. Le peché de leur pere leur est imputé comme à nous tous le peché d'Adam. Il nous est imputé par la consequence de l'acte qui a fait perdre à Adam, & à nous par consequent, les biens que Dieu luy auoit donnez. Voila ce qu'il y a d'imputation du peché d'Adam sur nous tous. Mais outrel'imputation du delict, il y a encore la propagation du vice, qui s'appelle en tous les hommes le peché originel, & qui est rendu necessaire en tous à

cause de l'imputation. Car pource que la mort est venuë au monde sur tous hommes par le peché du premier homme, pour cette cause tous les hommes ont esté rendus pecheurs, comme l'enseigne l'Apostre Rom. 5.12. ainsi que ie l'ay expliqué ailleurs. Or ce n'est nullement ainsi que vous vous figurez, *que l'obeïssance du second Adam estant chose passée il y a seize cens ans, nous est communiquée par imputation.* Mais si vous comprenez comment en effect la raison de l'une est pareille à la raison de l'autre (ainsi que l'Apostre le dispute en toute la suite du passage allegué) & que de l'imputation de l'obeïssance de Christ vient aussi la propagation de la iustice inherente en nous: vous recognoistrez & confesserez que la raison de nostre justification, est cette justice inherente. Sur quoy vous devez encore estre redressé en vos paroles qui suiuent, *Et quant à son Esprit il se deriue en nous par la regeneration, ainsi que la corruption habituelle d'Adam se deriue en nous par la generation naturelle.* Si vous attribuez la corruption habituelle, qui deriue en nous d'Adam, à la seule generation naturelle, vous vous enferrez en

toutes les difficultez qui ont rendu si espineuse la doctrine du peché Originel, qui de soy est vne chose aussi facile à expliquer, comme la verité en est necessaire. L'acte de la generation naturelle ne produiroit de soy, en l'enfant engendré, que la disposition à la corruption habituelle; mais pource que, par l'imputation du peché d'Adam, tous les hommes sont engendrez & naissent dans le sentiment de la misere & de la mort, de là vient que leur estat n'est pas vne simple disposition à la corruption, mais la corruption mesme habituelle & necessaire, dont tous les actes, quand l'homme vient en aage de les produire, sont fruiets de mort, & toutes actions du vicieux amour de soy-mesme, qui est inimitié contre Dieu. C'est l'estat de tout homme iusques à ce qu'il soit viuifié par la grace de Iesus Christ.

Vous errez encore quand vous dites; *Que l'Esprit de Christ se deriue en nous par la regeneration, ainsi que la corruption habituelle d'Adam se deriue en nous par la generation naturelle.* Car, comme dit l'Apostre au lieu allegué, il n'en prend pas du don comme de l'offense. Car l'offense du pre-

m̄ier homme a fait voirement deriuer la  
 corruption sur nous tous ; toutesfois  
 quand Adam n'auroit point peché auant  
 que d'auoir engendré des enfans, les en-  
 fans n'auroient pas esté moins capables  
 de se corrompre, que luy-mesme l'a esté.  
 Et ainsi leur corruption aduenant, elle  
 n'auroit rien deu à la generation d'A-  
 dam. Mais nul homme ne peut auoir le  
 don de Iustice en soy que par la genera-  
 tion qu'il a de Christ, & pource qu'il est  
 engendré de luy. Et derechef, quand  
 vous dites que l'Esprit de Christ se deri-  
 ue en nous par regeneration, en faisant  
 opposition à ce que son Sang nous est  
 communiqué par imputation, vous er-  
 rez : car nostre regeneration en Christ  
 consiste de deux parties, de la communi-  
 cation actuelle de son Sang, & de la com-  
 munication actuelle de son Esprit. L'une  
 est la matiere, l'autre est la forme de no-  
 stre nouvelle naissance. Il faut que, par  
 la mortification de Christ, nostre vieil  
 homme soit destruit, afin que son Esprit  
 nous viuifie. Car tout de mesme qu'ès  
 causes naturelles, la forme n'entre jamais  
 en la matiere, que celle ci ne soit preala-  
 blement disposée. Ainsi en l'estat de gra

ce, l'Esprit du Seigneur Iesus n'est donné qu'à ceux que sa mortification a preparé. Et tout ainsi que la matiere du corps animé n'est viuifiée que lors qu'il a receu sa forme, & non par les dispositions à la receuoir : ainsi est il du fidele. L'humiliation à laquelle il est préparé de la main de Dieu à receuoir par l'Esprit de Christ, la foy, & la charité, n'est point vn acte de vie sprituelle, iusques à ce qu'il ait receu actuellement l'Esprit du Seigneur. Par lequel aussi s'accomplit en suite de plus en plus l'effect de la mortification salutaire. Selon que nous dit l'Apostre, *Si par l'Esprit vous mortifiez les faicts du corps, vous viurez.*

Vous continuez vne semblable mesprise en toute la suite des antitheses que vous auez multipliées, par vne repetition qui n'adiouste rien aux precedentes. Tellement que vous exprimez vne mesme faute en diuers termes. Vous dites, *que l'une de ces choses, à sçauoir l'obeyssance estant satisfaction, nous est imputée en remission des pechez, absolution ou justification: L'autre nous est donnée en renouvellement de nos ames, & production de l'image de Dieu en nous.* Je m'estonne qu'en disputant

avec moy, vous me proposez ce qui est  
 en debat entre nous, comme des defini-  
 tions & des resolutions indubitables,  
 sans y apporter aucune preuue ny confir-  
 mation de vostre dire. Vous deuriez  
 prouuer, que l'obeissance de Iesus Christ  
 nous est imputée en justification, non  
 pas le decider comme vous faites. Ce  
 que Iesus Christ a satisfait à Dieu pour  
 nous par son obeissance, est bien la cause  
 pour laquelle Dieu est appaisé enuers les  
 hommes pecheurs, & que nonobstant  
 leur peché il les aime à cause de son Fils  
 qui s'est entremis entre nous & Dieu,  
 afin que sa misericorde fist paruenir sa  
 grace & sa benediction vers les pecheurs,  
 lesquels il appelle à repentance. Mais  
 comme Iesus Christ est mort pour tous  
 les hommes pecheurs (ainsi que vous le  
 recognoissez) & qu'il a satisfait pour tous  
 les hommes pecheurs, il a aussi par mes-  
 me raison, appaisé Dieu enuers tous les  
 hommes pecheurs, vers tous lesquels  
 Dieu, à cause de luy, vse de misericorde,  
 pour les appeller à repentance. Vous ne  
 pouuez pas nier cette verité, puis que  
 vous estes d'accord que Christ est mort  
 pour tous les hommes pecheurs, & qu'il a

fatisfait, par son obeiffance, pour tous les  
 hommes pecheurs. Voyez maintenant  
 vofre paralogifme. Direz vous que l'o-  
 beiffance de Iefus Christ, qui est la fatis-  
 faction pour tous les hommes pecheurs,  
 foit imputée en iuftification à tous les  
 hommes pecheurs ? Direz vous que tous  
 les hommes pecheurs foient iuftifiez ?  
 L'abfurdité & la fauffeté en est cui-  
 dente. Reconnoiffez donc, qu'entre  
 l'effect de la fatisfaction de Iefus Christ  
 relatif à Dieu, & par lequel Dieu  
 est appaifé enuers les pecheurs pour  
 leur faire pardon & misericorde (ce  
 qui a lieu enuers tous les hommes pe-  
 cheurs pour lesquels auffi Iefus Christ  
 est mort) & entre la iuftification du pe-  
 cheur, il faut de neceffité qu'interuien-  
 ne l'effect de la vocation de Dieu, qui,  
 par fa grace amene le pecheur à la foy, à  
 la repentance, & à l'amour de Dieu & du  
 prochain. Autrement, fi vous voules que  
 la iuftification fuiue immédiatement la  
 fatisfaction que Iefus Christ a rendue au  
 Pere pour nous par son obeyffance (ainfi  
 que vofre antithese le definit) il faut  
 que vous tombiez en cette abfurdité,  
 que tous les hommes vniuerfellement

font iustifiez, voire iustifiez auparauant que la vocation de la grace de Dieu ait produit aucun effect en eux. Je vous prie de considerer ceci attentiuement. Car c'est l'endroit par où il faut, de necessité, que vous sortiez de cette opinion que nos reformateurs ont introduitte, prenans l'acte de l'intelligence de Dieu qui pardonne & remet les pechez au pecheur à cause de la satisfaction de Iesus Christ, pour nostre iustification, laquelle ils font ainsi consister en la seule remissiō des pechez. Vous voyez aussi que le renouvellemēt de nos ames, par l'efficace de l'Esprit de Christ, qui produict son image en nous, n'est pas vn œeuure qui suiue immediatement l'imputation de la satisfaction de Christ que vous definissez vn acte de l'intelligence de Dieu. Car tous ceux pour lesquels Dieu considere que son Fils s'est rendu pleige, & pour lesquels il a satisfait à sa iustice, & ausquels il a ouuert la porte de la misericorde du Pere, ne reçoient pas pourtant le don de l'Esprit qui forme l'image du Fils. Pource que la vocation du Pere interuenant, comme l'effect de la misericorde que le Fils nous

à acquise par la satisfaction, plusieurs résistent à leur vocation, & rejettent le bon conseil de Dieu enuers eux, & refusēt de croire au Fils de Dieu, & d'embrasser la croix, en laquelle il a crucifié le monde pour tous ceux qui croirōt en luy, & les a crucifiez au monde. Pour cette cause, encore que I. Christ ait satisfait pour eux, encore que le Pere, vsant de misericorde, & leur offrant la remission des pechez les appelle par sa grace à la foy, afin que pareille ils embrassent la croix de son Fils, & qu'ils se soumettent à l'obeissance d'icelle : il ne leur depart pas pourtant le don de son Esprit sanctifiant, pource qu'il n'est donné qu'à ceux qui par foy embrassent actuellement la Croix du Seigneur.

Considerant ceci vous recognoistres, que vostre conclusion suiuiante n'est non plus vraye que les precedentes. Vous dittes, *Que ces deux bien-faiçts sont tels, que comme le Sang de Christ a esté espendu afin que son Esprit peust estre donné, il faut que la premiere partie du salut soit l'imputation de ce Sang en iustification, afin que la seconde en prouienne, à sçauoir le don de l'Esprit. Certes le Sang de Christ a esté*

espandu afin que son Esprit peust estre  
donné. Cela est tres veritable. Mais vous  
l'entendez mal, quand pour l'explicquer,  
vous supposez que le don de l'Esprit suit  
immédiatement l'imputation du Sang.  
La chose ne va pas ainsi. Le don de l'Es-  
prit suit la participation réelle au Sang  
de Christ respandu. Il faut boire le Sang  
pour estre abreueuz de l'Esprit. Et l'ef-  
fect de tous les deux, qui ne peuuent  
estre separez, est nostre renouvellement  
à iustice. Ce renouvellement à iustice  
est cette premiere partie du salut. La  
glorification est la seconde. Car parlans  
du salut, nous parlons ici du salut actuel  
accompli en nous. Mais l'imputation  
du sang de Christ, qui est l'acte de l'in-  
telligence de Dieu, acceptant la satisfac-  
tion de l'obaisance de son Fils, pour  
tous ceux pour lesquels il est mort,  
comme pleige deuant le throne de sa  
iustice, ne met rien de reel en nous, c'est  
seulement le fondement de la vocation  
de Dieu. L'effect de laquelle estant ac-  
comply est la premiere partie du salut.  
Car alors sommes nous sauuez de ce pre-  
sent siecle mauuais, quand nous som-  
mes faiets iustes & sainets par la voca-

tion de Dieu.

L'admire que vous ayez voulu appliquer à vostre propos la parabole de l'enfant prodigue, dont l'argument ne se rapporte nullement à vostre suiet. Et en cela vous commettez trois fautes. L'une, que vous voulez prouver vne chose qui n'est point en question, & dont il n'y-a aucun debat. La seconde, que vous ne prouuez pas ce qui est en question. La troisieme, que vous employez cette parabole à prouver vne chose que le suiet de la parabole ne concerne point. Vous voulez prouver qu'il faut premierement, & auant toutes choses, en l'œuure de nostre salut, que Dieu pardonne & face au pecheur remission de ses pechez. Cela est tres-vray. Et nul Chrestien n'en dispute. Ce que vous auiez à prouver, & dont nous disputons, est, que la remission & le pardon que Dieu fait au pecheur, soit sa iustification, & que le pecheur soit iuste, & tel réputé de Dieu, en ce qu'il luy est pardonné. C'est ce que vous ne prouuez iamais, selon le sens auquel vous prenez le pardon. Car au contraire il lui est pardonné afin qu'il soit rendu iuste. Dieu luy

pardonne,

pardonne, pecheur & miserable qu'il  
 est, tous ses pechez gratuitement à cau-  
 se de Iesus Christ. Mais pour cela  
 Dieu ne le reputé pas iuste, & ne luy don-  
 ne pas, pour cela, la couronne de iustice,  
 comme nos reformateurs se sont imagi-  
 né. Mais il luy pardonne, afin de le faire  
 iuste & sainct. Et il le fait iuste & sainct,  
 afin de le couronner de gloire eternelle.  
 Tel est l'ordre des causes & des raisons  
 de nostre salut, que vous confondez &  
 renuersez par vos hypotheses. Au reste,  
 la parabole de l'enfant prodigue ne con-  
 cerne ny ne declare nullement la raison  
 du pardon gratuit que Dieu nous fait à  
 cause de son Fils, & qui est consideré  
 comme prealable & le premier en ordre  
 entre les causes de nostre salut. Iesus  
 Christ, en cette parabole, n'a eu autre fin  
 que de nous apprendre, que Dieu agrée  
 la repentance de tous ceux qui se retour-  
 nent à luy, quelques perdus & misera-  
 bles qu'ils fussent, & qu'il est touché de  
 compassion de leur misere, & d'affection  
 de leur bien faire. En quoy il regarde &  
 indique particulièrement la vocation  
 des Gentils, & la jalousie des Iuifs. C'est  
 tout le but de la parabole. Mais quant à la

raison du pardon gratuit & de la grace par laquelle Dieu preuient le pecheur pour l'amener à la foy & à la repentance; & quant à la grace par laquelle Dieu forme au fidele le nouuel homme créé en justice & vraye saincteté, la parabole n'en represente rien. Elle n'appartient point à l'explication de cette doctrine. Il ne faut pas appliquer les paroles de l'Escripture au delà de leur sens & de leur intention. Si vous vouliez establir la raison de la doctrine de la grace selon cette parabole, vous deuiendriez Pelagien, & donneriez gain de cause à ceux qui disent, que l'acte de l'homme preuient celuy de Dieu en l'ordre des raisons de nostre salut. Car, selon cette parabole, l'enfant prodigue recognoist premierement sa misere & sa faute, puis il se confie en la bonté de son Pere, & du secours qu'il trouuera en sa maison. Il s'en retourne vers luy, luy confesse son peché & son indignité. Tout cela precede auant qu'il soit dit, que le Pere ait eu compassion de luy. Voulez vous donc que la foy & la repentance du pecheur precede l'acte de la misericorde & de la grace de Dieu enuers luy? Qui luy aura donc donné cette

foy & cette repentance? Par ce moyen vous renuerserez toute le raison de l'Alliance de grace contre vostre intention. Cela vient de ce que vous ne considerez pas que Iesus Christ n'expose, en cette parabole, la raison de l'œconomie de la grace de Dieu enuers les pecheurs, que selon la maniere en laquelle cette grace est representee sous l'ancienne Alliance, sous laquelle n'ont pas esté manifestées les causes de la foy & de la repentance que Dieu donne aux hommes, & la maniere de laquelle il escrit sa loy en nos cœurs. Ces choses ne nous sont données à cognoistre que par la manifestation de l'Euangile, qui nous declare la mort de Christ, sa resurrection, & sa gloire. Et pourtant c'est en vain que vous vous figurez, que Iesus Christ nous represente en cette parabole, ou la grace que les Theologiens appellent, *gratis data*, donnée gratuitement, ou la grace qu'ils appellent, *gratum faciens*, qui nous rend agreables en nous reformant à l'image de Christ. Cependant encore que vous induisiez & appliquiez cette parabole hors de son suiet & de sa fin, ie vous diray que nous n'auons nul debat ensemble sur

ce que vous dites, qu'il faut que Dieu nous  
 recoisse premierement à merci comme le pere  
 de l'enfant prodigue pardonna premiere-  
 ment à son fils. D'accord que la miseri-  
 corde & le pardon de Dieu va deuant  
 toutes choses en nostre salut. Nul Ca-  
 tholique ne le reuocque en doute. Mais  
 quand vous appelez ce premier acte de  
 Dieu enuers le pecheur, *sa reconciliation*,  
 vous vous abusez. Car comme ie vous  
 l'ay remonstré au jugement de monsieur  
 Testard, nostre reconciliation avec Dieu  
 a deux parties. Son amour enuers nous,  
 nostre amour enuers luy. Et pourtant  
 encore que nostre reconciliation, & no-  
 stre sanctification (c'est à dire l'effect de  
 la grace, par laquelle ayans esté rendus  
 iustes, & saints, nous deuenons agrea-  
 bles à Dieu) ne puissent estre conside-  
 rées que l'une avec l'autre : neantmoins  
 en la maniere de les considerer nostre  
 sanctification precede nostre reconcilia-  
 tion, contre ce que vous dites, presupo-  
 sant que nostre reconciliation n'est autre  
 chose que le pardon que Dieu nous don-  
 ne. Ie ne veux point aussi disputer avec  
 vous, sur ce qu'en l'explication de la  
 parabole vous appliquez ce que le Pere

fit vestir son fils de nouveaux vestemens & luy donna vne bague, à la signification de la grace, par laquelle Dieu reuest le fidele du nouuel homme en iustice & vraye saincteté. Je suis bien aise qu'en cela vous vous departez de l'imagination de nos premiers Reformateurs, qui ont creu que ce vestement estoit la iustice de Christ imputée, puis que vous reconnoissez que c'est la iustice inherente que l'Esprit de Iesus Christ forme en nous, & par laquelle il nous fait iustes & saints en nous mesmes. Pour ce regard vous estes Catholique. Et si vous demeurez ferme en toutes les consequences de cette confession, vous le ferez en la question toute entiere.

Ce que vous adioustez, *que l'Escripture appelle le don de l'esprit le seau de la grace que la foy reçoit en remission des pechez, & adoption*, a besoin d'explication, afin que nous sçachions de quoy nous demeurons d'accord. Car si par la remission des pechez, & par l'adoption vous entendez (comme vous faites) vn acte de l'intelligence de Dieu, qui acceptant la satisfaction de Christ, ne nous impute point nos pechez, il n'est pas vray que le don de

l'Esprit soit le seau de la grace que la foy reçoit en remission des pechez. Car par ce moyen vous feriez que cét acte de l'intelligence de Dieu, lequel, à cause de l'obeissance de son Fils, ne nous impute point nos pechez, suiuroit le don du S. Esprit, qui est mesme contre ce que vous voulez establir par vos antitheses. L'Escriture appelle le don du Sainct Esprit, le Seau de nostre adopcion dont les fideles sont scellez, pource que, par iceluy, nostre adoption est accomplie. Le cachet, auquel est grauée l'image de la conformité de Christ, est imprimé en nostre ame par ce don precieux de l'Esprit consolant, sanctifiant, & resiouyssant. Ce qui se fait en cette maniere. Premièrement l'homme pecheur, abbatu par sa misere sous le sentiment de son peché, qui de foy mesme le ietteroit en desesper, est appelle à la foy par la grace de l'Euangile, qui luy donne l'assurance que Dieu l'aime à cause de Iesus Christ son Fils, liuré à la mort pour ses offenses, & qui luy presente la croix en laquelle il a beu pour luy la coupe de l'ire du Pere, afin que luy fidele recoiue en suite en cette croix l'effect de la benediction celeste.

Ainsi l'efficace de cette grace forme la foy en l'homme pecheur, & luy fait embrasser, en la croix de Christ, la communion de ses souffrâces & de sa mort. Or au fidele, en cèt estat, est donné en suite le don de l'Esprit en vertu de la promesse de l'heritage celeste, qui est le fondement de l'esperance que Christ nous a conignée en sa resurrection glorieuse. C'est pour cela que l'Apostre, au lieu des Ephesiens que vous citez, dit, *que les fideles & ceux qui ont creu en Iesus Christ sont scellez du Sainct Esprit de la promesse, qui est l'Arche de l'heritage.* Mais vous devez sçavoir que nul ne croit veritablement en Iesus Christ, que celuy qui embrasse en sa croix la communion de ses souffrances & de sa mort. Et ceux là seuls reçoivent son Esprit sanctifiant. Tous ceux de qui la foy n'est point à cette espreuve, n'ont point la foy iustificante, la foy qui produit la vraye iustice en eux. La foy qui reçoit le sceau du Sainct Esprit de la promesse. Car ils sont incapables autrement de cette consolation. Si la mortification du Seigneur Iesus n'est en eux, ils ne sont point capables d'estre vivifiez de son Esprit. Je vous repete à diuerfes

fois mesmes choses sur ce suiet, afin de vous les imprimer bien auant en l'esprit. Car c'est ce que nos Reformateurs n'ont point bien compris avec leur iustification par vne iustice imputée, qui enerue merueilleusement la vertu de la science de la croix.

Suiuant cela vous deuez encore corriger la maniere dont vous avez voulu expliquer, en suite, l'ordre des causes de nostre salut. Car quand vous dites, *que Iesus Christ a comparu deuant Dieu comme chef & pleigle de tous les pecheurs qui viendroient à croire en luy*, ce n'est pas la maniere d'exprimer au vray la raison de la mort de Christ. Le benefice que Dieu y exhibe à tous les pecheurs n'est point conditionnel, mais absolu. C'est ici où toutes vos disputes de la Predestination vous iettent les vns contre les autres en tant d'embarras, que la plus part ne scauent quel parti prendre. D'une opinion le matin, d'une autre le soir. Tout cela pour ne pas discerner ce que ie vous diray clairement en peu de mots. Christ en sa mort a comparu deuant Dieu pleigle de tous les pecheurs, de tous ceux qui estoient morts en leurs fautes & pechez.

Ce benefice, duquel depend la vocation misericordieuse de Dieu, n'est point restreint à ceux qui viendroient à croire en luy. C'est mal l'entendre que de l'auoir ainsi voulu modifier comme vous faites. Dieu, par ce benefice, a ouuert, à tous les hommes pecheurs, la porte de la repentance. Il appelle tous les pecheurs à repentance, pource que son Fils est mort pour eux tous. Dieu donnant son Fils à la mort pour les hommes ne consideroit autre chose en eux, sinon qu'ils estoient miserables, morts en leurs fautes & pechez. Il a donné son Fils à la mort pour les retirer de cette misere. Manifestant par là son amour immense enuers tous, qui ne peut estre assez celebré, & contre lequel sont merueilleusement iniurieux ceux qui osent démentir ouuertement l'Escripture, & dire que Christ n'est point mort pour tous les hommes. *Si vn est mort pour tous, tous aussi sont morts; & il est mort pour tous, afin que ceux qui viuent ne viuent plus à eux mesmes, &c.* 2. Cor. 5. 15. la condition que Dieu regarde aux objets pour lesquels il a donné son Fils à la mort, n'est autre sinon qu'ils estoient miserables pecheurs & mes-

chans. Car nous estans encore misérables  
 ἀσθενῶν ( ἀσθενεία ici est la misere & la  
 langueur de mort en laquelle l'homme  
 est tombé par son peché ) Christ est mort  
 en son temps pour les meschans. Or Dieu  
 recommande sa bonté enuers nous, que nous  
 estans pecheurs, Christ est mort pour nous,  
 Rom. 5. 6. 8. Dieu a donc, sans autre  
 condition, donné son Fils à la mort ab-  
 solument & également pour tous les  
 pauvres misérables pecheurs. Il ne faut  
 point sophistiquer ici. Cela est égal.  
 Celuy qui le nie crache insolemment,  
 cōtre le Ciel & contre l'Escriture sainte  
 qui y est expresse. Il n'y a nulle distin-  
 ction pour ce regard entre les hommes.  
 Ils sont tous naturellement pecheurs, tous  
 misérables. Cela est égal. Et tel estāt l'ob-  
 iect auquel Dieu regarde en la mort de  
 son Fils, il l'a donné à la mort également  
 pour tous les hommes. Mais ce qui  
 abuse ceux qui font, en cēt endroit, de  
 la doctrine salutaire de l'Euangile, vn  
 scandale plein d'horreur aux consciences  
 qui reuerent l'immense bonté de Dieu  
 enuers les hommes : c'est qu'ils ne dis-  
 cernent pas ny la difference des obiects,  
c'est à dire la circonstance des hommes

pour lesquels Iesus Christ est mort: ny la difference des obiects, c'est à dire, la circonstance des hommes pour lesquels Iesus Christ est resuscité des morts, & est monté en sa gloire pour leur preparer place. Car Iesus Christ n'est pas resuscité & monté en sa gloire, pour y preparer place pour tous ceux pour lesquels il est mort, mais seulement pour les fideles qui meurent avec luy, & qui sont rendus participans de sa mortification. Il est chef & pleige de tous les hommes pecheurs en sa mort. Mais en sa resurrection s'estant assis au Throne de la Maïesté ez lieux tres-hauts à la dextre du Pere, il ne comparoist pas là chef indifferemment de tous les hommes, mais seulement des fideles, qui embrassent la croix és la communion de ses souffrances. C'est pourquoy aussi à ceux là seuls est donné son Esprit. Observant cette difference, selon laquelle Iesus Christ est considéré diuersement, c'est à sçauoir chef de tous les miserables pecheurs en sa mort, en consequence dequoy Dieu les appelle tous à repentance par la foy en la misericorde qu'il déploye vers eux à cause de Christ. Et chef des seuls fide-

les en sa resurrection, en consequence de  
 quoy il donne à eux seuls son Esprit :  
 vous vous développerez facilement de  
 ces lacs qui vous enserrent, quand vous  
 taschez de resoudre les difficultez qu'ont  
 engendré les fausses hypotheses de plu-  
 sieurs de nos Docteurs sur la doctrine de  
 la Predestination. C'est à cette differen-  
 ce que vous devez rapporter ce que dit  
 l'Apôtre, *Que Dieu est Sauveur de tous  
 les hommes, & principalement des fideles.*  
 De tous, pource qu'il a donné son Fils à  
 la mort pour tous. Mais principalement  
 des fideles, pource qu'il a resuscité son  
 Fils, & l'a fait seoir à sa dextre, pour esta-  
 blir aux seuls fideles l'esperance de la  
 gloire en laquelle il est entré ; & par la-  
 quelle esperance l'Esprit de consolation  
 & de sanctification leur est donné, qui  
 les rend dignes & capables de cette gloi-  
 re. Cette raison que ie vous remarque de  
 la difference de condition entre les ob-  
 iects par lesquels il est resuscité, se void  
 en la sage dispensation de Dieu en la  
 mort & en la resurrection du Seigneur.  
 Car Christ en mourant a esté exposé en  
 la croix en la presence de tous les hom-  
 mes, pource qu'il mouroit pour tous les

hommes, pour ceux-là mesmes qui le crucifioient. Mais quand il est resuscité & qu'il est monté aux cieux, il ne s'est pas lors exposé en la presence de tous les hommes : mais il s'est seulement manifesté à ses disciples & fideles, pource qu'eux seuls deuoient estre remplis de la vertu d'en haut, & recevoir, par l'efficace de sa resurrection & de sa gloire, la consolation & la sanctification de leurs ames.

Ce que vous dites en suite, *que dès que Dieu donne à quelqu'un de croire, il est incorporé par cet acte là à Iesus Christ*, est vne maxime que vous prononcez selon les hypotheses que vous avez receuës : mais non assez exactement concertées avec la doctrine de l'Apostre. Car toute la suite de vostre raisonnement fait assez cognoistre, que, par l'acte de croire, vous entendez le seul acte de l'entendement, persuadé que Iesus Christ est mort pour nous, & qu'en consequence nos pechez nous sont pardonnez. Je di qu'en ce sens l'acte de croire n'incorpore personne à Christ. Il faut auparauant estre baptisé en sa mort pour estre incorporé en luy. Il faut que l'acte de la foy produise

celuy de l'obeïſſance & de la ſouſmiſſion à la croix de Chriſt embrasſant la communion de ſes ſouffrances. *Il vous a eſté donné* ( dit l'Apoſtre ) *non ſeulement de croire, mais auſſi de ſouffrir pour Chriſt.* Et pourtant nul n'eſt incorporé à Chriſt qu'il ne ſoit baptiſé. Car aux ſeuls baptiſez eſt donnée la communion au corps de Chriſt. Et certes vous ne pouuez vous imaginer vn membre de Chriſt qui ſoit formellement tel, lequel auſſi ne ſoit viuifié de ſon Eſprit. En la raiſon, ſelon laquelle le fidele eſt incorporé à Chriſt, & fait membre d'iceluy, on ne peut ſeparer l'eſtat de ſa mortification à peché d'auec l'eſtat de ſa viuification à juſtice. Et pourtant nul n'eſt effectiuemēt membre de Chriſt, qui ne ſoit mortifié à peché, & viuifié à juſtice.

Quand vous concluez, *Que par la communion à Ieſus Chriſt* ( telle que vous l'auez definie ) *Le fidele ayant droit à l'obeïſſance d'iceluy, comme de ſon pleige, elle luy eſt alloüée en reconciliation & abſolution,* vous confondez diuerſes choſes. Premièrement vous prenez la reconciliation pour le ſeul acte de Dieu pardonnant les pechez : au lieu que c'eſt

l'acte reciproque de Dieu qui nous aime, & de nous qui, de ses ennemis que nous estions en nos entendemens en mauuaises œuures, sommes rendus ses amis, comme ie vous l'ay remonstré cy dessus, & au traitté de Monsieur Testard. Secondement, vous faites vne chose particuliere aux seuls fideles, laquelle est commune à tous les hommes, confidez hors l'exclusion que leur rebellion & leur contumace contre la grace de Dieu leur cause. Car tous les hommes du monde ont droict à l'obeissance de Iesus Christ, & au benefice que sa satisfaction leur a acquis, afin que par la misericorde de Dieu ils soient appelez à la foy & la repentance pour auoir vie. Car Dieu a tant aimé LE MONDE qu'il a donné son Fils afin que quiconque croit en luy ait vie eternelle. C'est à cause de ce Fils bien-aimé, c'est par la souëfue odeur de son sacrifice, que Dieu, appaisé enuers les pechez des hommes, ne veut point la mort du pecheur, mais qu'il se conuertisse, & qu'il viue. Mais neantmoins tous les hommes, pour lesquels Iesus Christ est mort, & pour lesquels il a appaisé l'ire du Pere,

ne sont pas faicts membres de Christ ;  
encore que le merite de sa passion  
& de son obeissance leur soit imputé  
en remission des pechez , & que par  
ce moyen , ils obtiennent , de la mi-  
sericorde de Dieu , le benefice de  
leur vocation à la foy & à la repen-  
tence. Car plusieurs, voire la plus grand  
part de ceux à qui cette grace est fai-  
cte, la reiettent par contumace , & par  
vne orgueilleuse rebellion. Ausquels  
Dieu, par consequent, dira, comme Je-  
sus Christ aux habitans de Ierusalem ,  
*vous ne l'avez point voulu.* Ainsi tous  
ceux qui ont droict à l'obeissance de  
Iesus Christ, comme de leur pleige , &  
ausquels, en ce regard, elle est impu-  
tée, ne sont pas pourtant incorporez à  
Iesus Christ, ni entrez en sa communion.  
mesme en ceux qui suivent la vocation  
de Dieu, & en l'esprit desquels la pre-  
dication de l'Euangile est meslée avec  
la foy (comme parle l'Apostre aux He-  
breux) si vous faictes, en les conside-  
rant, abstraction de la foy seule, & ne  
regardez autre acte que celuy-là , vous  
ne pouuez dire qu'ils soient encore in-  
corporez à Christ. Afin que le fidele soit  
dit

dit membre de Christ, & considéré comme tel, il faut que la charité de Dieu soit respandue en son cœur par le S. Esprit. Car, comme dit l'Apostre, *Si ie n'ay charité ie ne suis rien*. Vous voyez comme vos hypotheses ne s'accordent point avec la doctrine. Et ce que vous adioustez pour la fin, *qu'à cause que l'obeissance de Christ est allouée à quelqu'un, l'Esprit de ce Chef luy est donné en sanctification*, est vne maxime, pour la confirmation de laquelle vous ne trouuerez vne seule parole en l'Escripture. Où auez vous ieu que l'Esprit est donné à quelqu'un, pource que l'obeissance de Christ luy est alloüée? Il y a beaucoup de distance entre deux. Car encore que ces termes, *de l'obeissance de Christ allouée*, ne se trouuent nulle part en l'Escripture, & que ce soit vne phrase introduite par nos Reformateurs, toutesfois ie l'admets avec vous pour signifier la remission des pechez, dont Dieu donne la grace aux pecheurs en consideration du merite de l'obeissance de son Fils, afin de les appeler à la foy & à la repentance. Or après que Dieu allouë cette obeissance de son Fils au pecheur, il faut (auparauant que

l'Esprit de Christ luy soit donné en sanctification) que le pecheur embrasse par foy cette grace de la remission des pechez qui luy est donnée. Encore n'est-ce pas assez. Il faut qu'outre cét acte de la foy, par lequel il embrasse la remission de ses pechez, il se soumette encore, par l'obeissance de cette foy, à la tolerance de la croix, en laquelle le fils de Dieu luy a obtenu ce grand benefice, afin que son vieil homme soit crucifié avec Iesus Christ, & que le corps de peché soit destruit. Il faut, pour cét effect, que le fidele soit baptisé en la mort de Christ. Car le Baptisme est la cause instrumentale de la grace sanctifiante. Alors le fidele, en cét estat & non autrement, reçoit la communion au Corps de Christ, & par elle, l'Esprit sanctifiant, qui le vivifie de la vie celeste dont son chef vit là haut dans les cieux. Tel est l'ordre & la raison des causes de nostre salut, que vous auiez voulu m'expliquer. Et ie m'assure, que vous mesmes choisirez maintenant, & embrasserez plustost mon explication que la vostre,

## CHAP. IV.

*Que les termes de remission des pechez, d'absolution, & de redemption, signifient l'operation de Dieu, par laquelle les fideles sont regene- rez, ainsi que les Catholiques le prennent.*

**L**E discours, auquel vous m'auez voulu apprendre l'ordre des causes de nostre salut, est suiui d'une dispute que vous entreprenez contre les Catho- liques & contre moy, qui maintien la verité de leur doctrine, auquel vous em- ployez les pages 39. 40. 41. 42. 43. 44. Vous le commencez, par vostre eslonne- ment de la creance des Docteurs de l'Eglise Romaine, qui ne recognoissent, pour l'acte de l'absolution & remission des pechez, autre chose formellement que la regeneration, la- quelle consiste en une operation du S. esprit dans nos ames par production de qualitez

*nouvelles.* Sur quoy vous me permettez de vous dire, monsieur, que comme vous sçavez que toute admiration vient d'ignorer les circonstances de ce qu'on admire, c'est estonnement, que vous auez, cesseroit, si vous entendiez bien, en ce suiet, la doctrine des Catholiques, & la doctrine des Peres, & la doctrine des Apostres, qui n'est toute qu'une seule & mesme doctrine. Je vous l'expliqueray donc premierement, & puis ie vous resoudray toutes les difficultez dont vous vous empeschez vous mesmes en cette matiere. Pour dire que c'est que remission, absolution, & redemption du peché, il faut expliquer en quoy le peché consiste. Le peché consiste en deux choses. En la coulpe que l'homme commet par son action. Et au vice dont par l'acte il contracte l'habitude en sa volonté. Le premier n'est point sans le dernier, comme il appert par les actes qui sont comis involontaires. Car là où la volonté ne concourt point, on n'impute point l'acte à peché, & nul ne le punit. La raison de ces deux conditions, qui se considerent au peché, vient des deux conditions relatives qui se conside-

rent au commandement dont le peché est transgression. Quand ie parle du commandement, i'enten celuy que Dieu fait à l'homme. Car vn homme n'a point de commandement sur l'autre, que pource quiluy est donné de Dieu, & qu'il tient enuers luy la place de Dieu. Ainsi proprement tout commandement, auquel l'homme est suiet est de Dieu, soit immediatement, comme sont les commandemens qui regardent la religion, soit immediatement, comme sont les commandemens qui concernent le particulier des choses ciuiles. Et pourtāt, quand les commandemens, que font ceux qui sont constituez en authorité, contreuient aux commandemens de Dieu, alors a lieu la reigle employee par les Apostres vers les Souuerains du peuple, *Il vaut mieux obeir à Dieu qu'aux hommes.* Or les commandemens que Dieu fait à l'homme procedent de deux causes. L'vne est sa puissance, l'autre est sa bonté. Selon sa puissance il oblige la creature à luy obeir. Selon sa bonté il oblige la creature à l'aimer. L'homme par sa transgression viole l'vne & l'autre. En violant l'obeissance deuë à la puissance de Dieu,

il se rend coupable, & attire sur soy la vengeance. En violant l'amour de Dieu à Dieu, il se rend vicieux, & deuiet incapable de felicité. Le peché a donc ces deux conditions, la coulpe, & le vice. Et ces deux conditions se considerent principalement au regard du peché commis contre Dieu. Car aux pechez commis contre les hommes, on ne regarde directement & principalement que la coulpe, c'est à dire la transgression qui viole la puissance & l'autorité du commandant, du Prince, ou de la Republique, pource que le Prince represente Dieu, non au regard de sa bonté, mais au regard de sa puissance. Car encore que le Prince soit meschant, il n'a pas moins, en son autorité, le caractere de la puissance de Dieu, & il ne luy faut pas moins obeïr. Et pourtant quand il est question de la punition, le Iuge ne considere point, si le delinquant se repent, si sa volonté est changée au regard de l'habitude vicieuse. Cela ne fait rien au iugement des hommes. On punit simplement le delinquât, pource qu'il a violé la Majesté. Mais Dieu procede d'autre sorte enuers les hommes au regard de la vengeance de ses com-

mandemens violez. Pource que la principale fin de Dieu est de rendre sa gloire illustre par la manifestation de sa bonté. La fin de rendre sa gloire illustre par la manifestation de sa puissance, seconde & sert à cette première & principale fin. C'est pourquoy, si ainsi estoit que l'homme, qui, en la transgression du commandement, est, d'une part, deuenu coupable, & a attiré sur soy la vengeance de Dieu : &, d'autre part, s'est rendu vicieux, & par mesme moyen est deuenu incapable de felicité, peust de luy-mesme despoüiller son vice, & se rendre bon & aimant Dieu, & par consequent deuenir capable de felicité: il est certain que la bonté de Dieu enuers vn tel homme penitent pour sa faute passée, affectionné à l'amour de Dieu pour le present & pour l'aduenir, exerceroit l'acte de misericorde en son endroit, & luy pardonneroit sa coulpe, & ne le puniroit ny n'vseroit d'aucune vengeance, mais luy donneroit au contraire la felicité conuenable à l'amour quel'homme auroit enuers lui. Je di que si l'homme pecheur pouuoit de soy-mesme se retourner vers Dieu par penitence, & au lieu de vicieux, se rendre

bõ & iuste, Dieu vseroit enuers luy de sa misericorde, & au lieu de miserable le redroit bien heureux. C'est ce que Dieu declare expressement en sa parole, quand il proteste, *qu'il ne veut point la mort du pecheur, mais qu'il se conuertisse & qu'il viue.* Cela est de la nature de la bonté de Dieu & de son essence. Mais il est impossible à l'homme tombé en peché, & qui par sa coulpe s'est assuietti à la misere, & qui par l'habitude du vice qu'il a contractee, est deuenu ennemi de Dieu, de se retourner vers luy, & de l'aimer, & de changer luy mesme son vice & son iniquité en vertu & en iustice. Cela est impossible à l'homme. Et par consequent l'homme ne peut preuenir la misericorde de Dieu. C'est pourquoy il est necessaire que la vengeance de Dieu soit executée. Il est necessaire que la punition du peché soit faite. La Iustice de Dieu exerçant cette vengeance & cette punition, est aussi necessaire & naturelle à Dieu, & autant propre à son essence que sa bonté & sa misericorde. C'est en quoy Socin s'est monstré atteint d'un estrange aveuglement, quand il s'est efforcé de destruire cette verité, & d'oster de la Theologie

c'est indubitable fondement. Mais ce qui  
 l'a induit en cet erreur, est qu'il n'a peu  
 concilier la raison des effets de cette  
 nécessaire & essentielle Justice en Dieu,  
 avec les effets de sa miséricorde, en la  
 reparation du salut de l'homme. Car il ne  
 suffiroit pas, ny pour tirer cet homme d'er-  
 reur, ny pour le convaincre, de dire que  
 Dieu, pour marier sa miséricorde avec sa  
 justice, a interposé la médiation de son  
 Fils, qui ayant satisfait à sa justice, a ouvert  
 le cours à sa miséricorde. Car, outre cela,  
 la difficulté qui a fait fourvoyer ce pau-  
 vre heretique, demeure tousiours. Pour-  
 ce qu'il demande, par quelle raison peut  
 convenir cet acte de la miséricorde de  
 Dieu, cet effet de la bonne volonté de  
 Dieu envers l'homme, par lequel il a  
 donné son Fils pour sa redemption, avec  
 l'acte de sa justice, & avec l'effet de sa  
 vengeance, par laquelle il estoit nécessai-  
 re qu'il punist l'homme, & que sa volonté  
 fust portée à exercer son ire sur luy. Ce  
 qui a rendu cette difficulté inexplicable  
 à cet homme, & ce qui luy a fourni des  
 raisons & des argumens insolubles en  
 effect à ceux des nostres qui disputent  
 contre luy, & contre lesquels il dispute,

c'est l'hypothese fausse qu'il suppose avec eux, & eux avec luy, *que la vengeance, à laquelle la justice naturelle & essentielle à Dieu, l'obligeoit enuers les hommes transgresseurs de sa loy & de la premiere alliance qu'il a contractée avec eux, consistoit en la punition des peines eternelles & infinies.* Car cela presupposé, il est euident, que c'est chose contradictoire que Dieu veuille sauuer les hommes, & les rendre bien heureux, comme il est necessaire que Dieu le veuille suiuant la volonté de donner son Fils pour leur redemption. Et que Dieu veuille tout ensemble, par le mouuement que la Justice vengereffe donne à sa volonté, punir les hommes, pour leur transgression, de peines eternelles & infinies, C'est mettre en Dieu deux volontez necessaires, toutes deux opposées, & qui ne peuuent estre sous-ordonnées l'vne à l'autre. Et luy attribuer, par consequent, choses incompatibles. Mais reduisant les choses à la verité, il n'y a rien plus futile que toute la toile des subtilitez que Socina ourdies en cette matiere, ny rien de plus fragile que les rets où luy mesme a enlacé son esprit & celuy de plusieurs autres sur ce

qu'il traite de la justice de Dieu vengeresse, laquelle il nie estre vn propre de la nature de Dieu. Ayez, ie vous prie, l'esprit attentif à ce que ie vous di, & le considerez comme il appartient. Je vous déueloppe ici d'vn des endroits les plus difficiles en la matiere de la Theologie, telle que les controuerses l'ont embrouillée. Je di donc que la justice essentielle à Dieu obligeoit sa volōté à punir l'homme, & à exercer sa vengeance contre luy pour la transgression de la premiere Alliance : mais suiuant la nature & la condition de l'Alliance transgressée. Or la premiere Alliance estant temporelle, consistant en promesses & en menaces reciproques, toutes temporelles & de cette vie, la justice essentielle à Dieu n'obligeoit sa volonté à punir l'homme que de peines temporelles. Or est-il que cette volonté ne repugne nullement, en Dieu, à la volonté de communiquer à l'homme le benefice auquel consistent les parties du salut eternal, pource que cette volonté est soubordonnée à la volonté de laquelle Dieu a esté emeu, par sa misericorde à donner Iesus Christ à l'homme pecheur pour le tirer de son peché & de

sa misere. Cōme ainsi soit que l'Alliance premiere de nature, selon l'institution de laquelle la volonté de Dieu agit en la punition de l'homme pour son peché, est sous-ordonnée à l'Alliance eternelle de grace, selon laquelle la volonté de Dieu agit en l'exercice de sa misericorde qui a donné Iesus Christ pour Redempteur du peché. Ce n'est donc point chose incompatible que Dieu ait voulu oster à l'homme cette vie presente, & luy en donner vne eternelle. Ains ce sont choses dont la raison & la nature est tres-compatible & tres-accordante. Pource que la raison de communiquer à l'homme le bien eternel concerne la souveraineté fin de Dieu. La raison de punir l'homme de peines temporelles regarde le moyen dont Dieu se sert, pour sa fin, selon son incomprehensible sagesse. Or la raison de la fin, & la raison du moyen employé pour icelle, sont tres-compatibles. Mais si Dieu eust voulu punir l'homme de peines eternelles pour la transgression de la premiere Alliance, ç'auroit esté chose du tout incompatible, qu'il eust voulu l'amener à la communication du salut eternel. Tout ainsi qu'il seroit re-

pugnant à la verité de Dieu & à la raison de la justice qui luy est essentielle, qu'il voulust donner vn Redempteur aux diables & aux reprouuez. Pource que les diables ont peché contre l'Alliance eternelle, à la fin de laquelle Dieu les auoit créées cōme les autres Anges, pour seruir à l'execution de la communication du bien eternel que Dieu a préparé à l'homme. Sur quoy le diable, estant deuenu enuieux de la dignité de l'homme, s'est eleué par orgueil contre la fin & contre l'ouurage de Dieu, au seruice duquel il auoit esté destiné par sa creation. Tellement qu'il a induit l'homme à la transgression du commandement que Dieu luy auoit donné. Et quant aux reprouuez ils pechent aussi contre l'Alliance eternelle, par laquelle Dieu, pour la communication du bien eternel qu'il leur presente par sa misericorde en son Fils, les appelle par luy à foy & repentance. Mais eux, reietans, par orgueil, la grace qui leur est presentee, & de laquelle Dieu donne à chacun le goust, par le sentiment de sa bonté misericordieuse qu'il leur declare par ses tesmoignages, se iugent eux-mesmes indignes de la vie

eternelle. Car il est impossible que ceux qui perseuerent en cette rebellion soient renouellez à repentance, & en qu'ils crucifient derechef le Fils de Dieu quant à eux, & l'exposent à opprobre. Car la terre qui boit souuent la pluye, & produit herbages à ceux desquels elle est labourée, reçoit la benediction de Dieu. Mais celle qui produit espines & chardons est reietée & prochaine de la malediction, de laquelle la fin tend à estre bruslée. C'est donc chose impossible & incompatible avec la verité de Dieu, qu'il veuille communiquer aux reprouvez des moyens de salut apres qu'ils ont reietté l'Alliance eternelle, par laquelle Dieu leur auoit offert la communication du salut eternel en Iesus Christ. Ainsi vouloir punir de peines eternelles, & vouloir faire misericorde, sont choses qui se destruisent l'une l'autre. C'est la grande mesprise qu'ont commise nos Docteurs au fondement de la Doctrine de l'Euangile, faute d'auoir compris la nature & la difference des deux Alliances de Dieu avec l'homme. Ce qui vous a iettez dâs les difficultez où vous vous trouuez sur la doctrine de la Predestination, à l'ouye de laquelle, comme elle est expliquee ordinaire,

ment, tous les peuples tremblent, & les Pasteurs mesmes s'entremangent, au lieu qu'elle est de foy la plus douce & la plus consolatoire, & la plus facile qui soit en l'Evangile, comme estant la premiere & principale partie de l'explication de l'alliance de grace.

Il a fallu représenter ainsi sommairement les raisons de cette premiere verité, pour ouvrir la fenestre & pour donner le iour à ce que j'ay proposé de vous expliquer touchant la raison de la remission & de l'absolution que Dieu donne à l'homme de son peché. Dieu donc pardonnant le peché à l'homme, n'a pas pour premiere & principale fin de luy remettre la coulpe, & de l'exempter de la vengeance. Sa premiere & principale fin est de luy oster le vice & la corruption qu'il a contractée en pechant, & de le rendre iuste & saint, & en ce faisant, de le rendre capable de la felicité eternelle qu'il luy a preparée. La fin de remettre à l'homme la coulpe, & de le retirer de la condamnation de l'ire, est sous-ordonnée à la fin de le repurger de la corruption du peché, & de le rendre iuste. Pour cet effect Dieu, selon sa

grande misericorde, agissant par les raisons de sa sagesse ineffable, voulant amener l'homme, tombé en peché, à la communication du bien eternal, de iustice, & de vie, a donné son Fils vnique & eternal, fait homme, à la mort, pour subir en la place des pecheurs la peine à laquelle leur coulpe les a assuiettis, & pour boire, pour eux, la coupe de l'ire & de la vengeance qu'ils auoient encouruë. Afin que cette mesme peine ( qui deuoit de necessité estre executee sur eux ) cessast par la mediation, la satisfaction, & l'intercession du Fils de Dieu, d'estre malediction & instrument de perdition eternalle, comme elle estoit autrement sur la teste de l'homme pecheur, & qu'elle deuinst, en Iesus Christ, à tous ceux qui croiroient en luy, benediction & instrument de felicité eternalle, à cause que le Fils bien aimé, auquel le Pere a pris son bon plaisir, l'a portee. Par ce moyen Dieu pardonne, à cause de Iesus Christ son Fils vnique, la coulpe à l'homme pecheur qui a violé sa premiere Alliance, non en rescindant l'ordonnance immuable qu'il auoit decretée, que l'homme ayant peché mourroit : mais

en

en changeant sa mort & sa misere en vn  
 moyen de le deliurer de la corruption de  
 son peché en l'amenant à la communion  
 de son Fils vnique, par la foy duquel il  
 crucifie son vieil homme en sa croix,  
 pour remplir son ame de patience & de  
 charité selon l'esperance d'une felicité  
 beaucoup meilleure. Tel est le Myſtere  
 de la croix de Christ. Telle est la raison  
 du pardon de nos pechez que Dieu nous  
 donne en icelle. Et pour cetté cause sous  
 le terme de remission des pechez, d'abso-  
 lution, de redemption du peché, l'Eſcri-  
 ture n'entend pas seulement, que Dieu  
 nous remet la coulpe, mais principale-  
 ment, qu'il nous deliure des cordeaux de  
 peché, & de la corruption du vice qui  
 nous tient enchainés naturellement en  
 la seruitude de sathan. C'est ce que l'Eſ-  
 prit de Dieu nous signifie par ce terme,  
*ἀφῆσις τῶν ἁμαρτιῶν*, remission des pechez,  
 & cet autre, *ἀπολύτρωσις*, deliurance ou  
 redemption. Car l'un & l'autre emporte  
 l'estat de liberté, que nous n'obtenons  
 point iusques à ce que nous soyons af-  
 franchis du vice qui regne en nos corps  
 mortels, selon nostre condition natu-  
 relle.

Or il faut encore observer, que la remission des pechez, qui emporte la deliurance & le reſtaſſement en grace, a eu, ſelon ce ſens, ſa raiſon differente ſous l'œconomie de la loy, d'auec la raiſon qu'elle a maintenant ſous l'œconomie de l'Euangile, par où la vertu de la croix de Chriſt nous eſt reuelee à plein. Sous l'œconomie de la loy, la remiſſion des pechez portoit auec ſoy directement & immediatement la deliurance de la peine. Celuy qui demandoit que Dieu luy remiſt ſon peché, que Dieu oſtaſt ſon peché de deſſus luy, demandoit d'eſtre deliuré de la malediction, ſous le faix de laquelle il gemittoit par les peines & les ſouffrances dont il eſtoit exercé. Et de là vient, que le peché & la peine du peché ſont ordinairement pris l'un pour l'autre en l'Eſcriture. Pour cette raiſon la foy du fidele regardoit directement les promeſſes que Dieu auoit faites, en la loy, des prosperitez & benedictions de la vie preſente. Par cette voye le fidele eſtoit amené à la crainte de Dieu, & à ſon amour, & à l'obeiſſance de ſes commandemens par la conduite de l'eſprit de ſeruitude. Car receuant, par ce moyen,

l'effect des promesses de benediction, qui scelloient en luy l'assurance que Dieu l'aimoit & l'auoit receu en grace, il estoit confirmé, en cette maniere, en l'amour reciproque enuers Dieu. Et le fidele disoit lors, comme nous l'oyons de Daud, *J'aime l'Eternel de ce qu'il a exaucé ma voix & mes supplications*, Psalm. 116. Et pource que cet exaucement regardoit la deliurance des dangers de mort, & des autres maux de la vie presente, ainsi que Daud le celebre en tout ce mesme Pseume, l'Esprit de Dieu qui engendroir en eux son amour, par ce tesmoignage de sa grace, est appelé par l'Apostre, *l'esprit de seruitude*, pource qu'il agissoit en eux par les benedictions de la loy laquelle engendre à seruitude. Elle engendre, di-ie, à seruitude, comme parle le mesme Apostre, à cause que les affections de ces biens attachent l'homme encore ici bas, & l'asservissent sous les elemens du monde, en choses où la chair prend plaisir. Ce qui fait que l'homme retombe aisement au peché par la delictation des choses qu'il regarde comme l'argument de la benediction de Dieu, & en la iouissance desquelles se melle aisement la volupté,

l'ambition & l'avarice, qui sont les racines de tous pechez. C'est pourquoy l'Apotre dit, *que la loy est la puissance du peché*. Obtenir donc, sous la loy remission de ses pechez, est estre deliuré des maux qu'on endure. En suite de quoy estoit donné l'esprit qui les induisoit à l'amour de Dieu par le sentiment de sa bienveillance. C'est ce que Dauid, en ce beau Pseaume de penitence, qu'il commence par la demande qu'il fait à Dieu de le lauer de son peché, requiert en suite quand il luy dit, *Reu moy la liesse de ton salut*, ou de ton assistance, & *que ton Esprit liberal & munifique me soustienne*. Car c'est ainsi qu'il faut traduire, non l'*Esprit franc*, comme nos Interpretes ont traduit. La propre signification du mot est *liberal & munifique*. Car נָדָב *Nadab* signifie donner liberalement & largement. Et ce que les Interpretes Grecs ont tourné *Esprit principal* est vne signification que ce terme reçoit quelquesfois par consequence, pource que c'est le propre des Princes d'estre liberaux & munifiques. Mais aux paroles de Dauid en ce lieu, nous deuons prendre le terme en sa propre & première signification. Il de-

mande à Dieu qu'il luy rende la lieſſe de ſon aſſiſtance. C'eſt à dire, qu'il le reſ-iouyſſe en l'aſſiſtant par l'aſſeurance d'eſ-tre aimé de luy. Et que ſon Eſprit liberal & munifique le ſouſtienne. C'eſt à dire que reſpandât abondâce de benediſtiôns ſur luy, il le ſouſtienne par ſon eſprit, qui lui confirme ainſi ſon amour. Telle eſt la raiſon de la remiſſion des pechez que les fideles affligez demandoient à Dieu ſous la loy. Mais ſous la grace de l'Euangile la raiſon en eſt toute différente. Car le fidele en demandant à Dieu remiſſion de ſes pechez ne regarde plus la deliurance des peines qu'il ſouffre ici bas. Il regarde directement & premierement la deliurance du vice & de la corruption du peché. Ce que les fideles ſous la loy ne regardoient que ſecondairement & par le moyen de la deliurance de la peine. Le fidele maintenant requérant à Dieu la remiſſion de ſes pechez, ne demande pas directement que Dieu le deliure des maux qu'il endure, pour deux raiſons. La premiere eſt, pource qu'il voit maintenât en la face de Chriſt, que ces maux ne ſont plus arguments de l'ire de Dieu, & que Chriſt a eſteint toute cette ire quâd il en

à beu la coupe. La seconde, pource qu'il cognoist que l'usage de ses maux est, en la conformité de Christ, l'exercice par lequel sa foy est espuree & fortifiée par humilité & par patience pour obeïr à la volonté de Dieu. Tellement qu'au lieu de demander à Dieu deliurance absolue de ces maux, il luy dit, *Non point ce que ie veux, Seigneur, mais ce que tu veux, ta volonté soit faite.* Ainsi quand il demande à Dieu remission de ses pechez, il tend directement à la deliurance de la domination du peché en luy, & demande pour cette raison l'effect de la vertu de la croix & du Sang de Christ qui nous purge de tout peché, non par imputation seulement, en ce que la coulpe ne nous en est plus imputée, mais en abolissant l'empire du vice. A ce que n'estant plus sous la loy, mais sous la grace, peché n'ait plus de domination sur nous.

Ces choses comprises & obseruees, recognoissez combien vos maximes vous trompent quand vous me remonstrez, *qu'il faut recognoistre un pardon en Dieu semblable à celui que nous faisons à ceux qui nous ont offensé, distingué des bien-faits qui s'en ensuiuent.* Il le faut, au con-

traire, recognoistrefort dissemblable, aũ-  
 tant que nous sommes dissemblables à  
 Dieu. Car comme ie vous ay dit cy-des-  
 sus, les hommes, ny en la punition, ny  
 au pardon du peché, ne considerent que  
 la coulpe, pource qu'ils n'ont aucune  
 puissance sur le vice qui infecte l'habitu-  
 de de l'ame. Il n'est pas en leur pouuoir  
 de l'oster de là où il est. Cela n'appartient  
 qu'à Dieu seul, qui est le Pere des esprits.  
 C'est pourquoy quand les hommes par-  
 donnent, ils remettent seulement la coul-  
 pe, ils s'abstiennent d'executer la ven-  
 geance que la loy exigcoit du delinquãt.  
 Mais de le rendre meilleur, de luy oster  
 son vice & sa corruption, il ne le peuuent.  
 Cela n'appartient qu'à Dieu seul. C'est  
 l'oeuvre de sa bonté & de sa puissance.  
 Vous vous mescontez donc grandement  
 en tout vostre discours, où vous voulez,  
 que nous mesurions le pardon de Dieu à  
 l'aune du pardon des hommes. Et l'exem-  
 ple que vous rapportez de la demande  
 que nous faisons en la Priere Dominica-  
 le, *que Dieu nous pardonne nos pechez ainsi  
 que nous pardonnons à ceux qui nous ont  
 offense*, est du tout violent, & tiré par les  
cheueux, si vous voulez que la raison de

nostre pardon soit en tout egale à la rai-  
 son du pardon que Dieu nous donne. Par  
 cette raison vous destruiriez aussi la  
 necessité de la satisfactiō de Iesus Christ.  
 Car au pardon que nous faisons à ceux  
 qui nous ont offensé, nous ne deuons pas  
 requerir qu'il interuienne aucune satis-  
 faction de personne qui porte la peine  
 qu'ils auoient meritee. I. Christ par cette  
 demande n'a pas voulu egaler nostre con-  
 dition à celle de Dieu, Mais son intention  
 a esté de nous apprendre, qu'autant que  
 nostre condition le permet, il faut que  
 nous vsions de misericorde & de debon-  
 naireté enuers ceux qui nous offensent,  
 comme Dieu en vse enuers nous. Rayez  
 donc de vostre discours cette consequen-  
 ce que vous inferez, fondee sur l'egalité  
 que vous presupposez entre Dieu & nous,  
 quand vous dites, *que comme le pardon*  
*que nous faisons à nos prochains n'est pas*  
*vn. operation en eux, mais vn acte de nos-*  
*tre iugement pour ne leur plus imputer*  
*l'offense, bien qu'en suite ce pardon nous*  
*oblige à leur faire du bien: ainsi le pardon*  
*que Dieu nous fait, bien qu'il soit suivi de*  
*ses bons effets & de l'operation de son Es-*  
*prit en nos ames, n'est pas pourtant cette*

operation là formellement, mais c'est vn acte de son intelligence, lequel consiste simplement en ce qu'il estime & repare de nous. Il est vray que le pardon que nous faisons à nos prochains n'est pas vne operation en eux. Cela est ainsi, pource que nous ne pouuons rien operer en eux. Nostre espée est trop courte pour y atteindre. Tout ce que nous dirions & ferions, y est inutile. Mais Dieu est tout autre que nous. Cette parole de grace par laquelle il nous pardonne est viuante & defficace, & plus penetrante que nulle espée à deux tranchans, & atteint iusques à la diuision de l'ame & de l'esprit, & des iointures & des moüelles, & est iuge des pensees & intentions du cœur. Dieu par son pardon opere dans nos cœurs. Il y forme la foy & la repentance, & nous conuertit à luy. A quoy pensez vous quand vous representez Dieu comme vn simple homme? Quelle Theologie? Où l'auiez vous apprise? Vous souuenez vous point des paroles du Propheete, *Il y a pardon par deuers toy, afin que tu sois craint.* Le pardon que Dieu nous donne imprime en nos cœurs sa crainte & son amour. C'est vne operation de luy en nous, qui produit tousiours son

effet, si nostre orgueil ne l'empesche &  
 ne reiette son pardon. Certes le pardon  
 des hommes est, comme vous dites, l'acte  
 de leur iugement qui n'impute point  
 l'offense commise. Vous pouuiez bien  
 adiouster aussi veritablement, & pour  
 vne definition plus entiere, que c'est en-  
 core vn acte de leur volonte, qui ne veut  
 point punir l'offense, ny exiger la peine  
 meritee. Mais si vous ne cognoissez au-  
 tre chose au pardon de Dieu, vous n'y  
 cognoissez gueres. Vous ne pouuiez  
 plus mal definir le pardon que Dieu don-  
 ne aux hommes, qu'en disant, comme  
 vous faites, *que c'est vn acte de son intel-  
 ligence lequel consiste simplement en ce qu'il  
 estime & repete de nous.* Produiriez  
 vous bien quelque passage de l'Ecriture,  
 qui definisse ainsi la grace de Dieu? Je  
 croy que vous auez escrit tout ceci pour  
 verifier la raison que i'ay de dire qu'il y  
 a de grandes mesprises en la Theologie  
 de nos Docteurs. Or ie me promets de  
 vostre prudence, & de l'affection que  
 vous auez à la verité, que vous ne trou-  
 uerez pas mauuais que ie vous redresse  
 en celle que vous commettez ici tres  
grande. La plus grande faute qu'on doit

remarquer en vostre meprise, est, qu'en définissant le pardon que Dieu fait aux pecheurs, par vn simple acte de son intelligence, vous presupposez que l'acte de l'homme precede l'acte de Dieu. Car vous voulez que le pecheur croye & se repente, & puis que Dieu par l'acte de son intelligence ne le repute plus pecheur, ains le repute iuste, encore mesme qu'en effet il ne le soit pas. Telle est vostre doctrine de la iustification que vous constituez en la seule remission des pechez. Et vous vous imaginez que ceux qui l'ont introduite, ont trouué en cela tout le secret de l'Euangile. Certes c'est vn secret qui a esté secret à tous les Apostres, & à tous les Docteurs de l'Eglise iusques à Luther. Mais ce qu'il y a de pis, c'est qu'en vous imaginant de magnifier, par cette doctrine, la misericorde de Dieu, sous ombre que vous attribuez toute nostre iustice au pardon que Dieu nous dōne par sa misericorde, vous ne voyez pas que vous ancantissez la cognoissance de la grace de Dieu en Iesus Christ. Et vous croyez cependant que c'est la doctrine des Apostres. Tant satan est subtil à se transformer en Ange de lumiere. Et

à couler subtilement son venin dans l'esprit des hommes. Arrestez ici vostre esprit. La misericorde de Dieu enuers nous, consiste à rendre le meschant bon. A nous deliurer de la seruitude du peché. A nous faire iustes & saincts. C'est là l'effet de la grace. Mais non de nous reputer iustes encore que nous ne le soyons pas, ou de ne nous point reputer pecheurs encore que nous le soyons, attribuer telles choses à Dieu est le despoüiller de sa nature. Car Dieu est verité, il ne iuge des choses que ce qui en est.

Après auoir ainsi defini le pardon que Dieu donne aux pecheurs par vn simple acte de son intelligence, niant que ce soit aucune operation en nos ames, vous adioustez : *Et l'operation du saint Esprit en nos ames est le fruit & l'effet de ce favorable iugement : or l'effet est formellement distinct d'avec sa cause.* Souffrez, ie vous prie, que ie vous interroge, pour cognoistre les raisons de vostre Theologie. Si le pardon de Dieu n'est qu'un simple acte de son intelligence, & non aucune operation de son Esprit en nos ames, comment Dieu y opere t'il la foy & la repentance? Prenez garde à ce que vous me respon-

drez. Vous ne direz pas, sans doute,  
 comme fait Monsieur Amyraut, que la  
 raison par laquelle Dieu nous donne la  
 foy est hors l'enceinte de l'alliance de gra-  
 ce. Qui est vne pensèe que j'admire,  
 tout estonné auoir peu tomber en l'es-  
 prit d'un Theologien. Car qu'est-ce  
 autre chose, que de dire, que la premiere  
 partie de nostre salut n'appartient point à  
 l'alliance de grace? Je m'asseure que cela  
 ne vous plaist pas. Mais que me direz  
 vous donc, si le premier acte de la grace,  
 qui est le pardõ que Dieu fait au pecheur,  
 n'est qu'un simple acte de l'intelligence  
 de Dieu, & non vne operation de luy en  
 nos ames, d'où vient la foy & la repentan-  
 ce en l'ame du pecheur? Respondez ca-  
 tegoriquement. Vous ne l'auéz pas vou-  
 lu faire pour Monsieur Testard, aban-  
 donnant le iugement que ie vous en ay  
 deféré? Respondez ici pour vous mes-  
 mes. La foy & la repentâce precedent el-  
 les en l'ame du pecheur, le pardõ qui est,  
 selon vous, un acte de l'intelligence de  
 Dieu? Si le pardon & le fauorable iuge-  
 ment que Dieu fait du pecheur le reputât  
 iuste encore qu'il ne le soit pas, va deuât  
 la foy, il sera exercé à l'endroit d'un hõ-

me encore infidele & impenitent. Et par ce moyen ce ne sera point par la foy que l'homme sera iustificié, mais sans la foy. Maxime que vous abhorrez sans aucune doute. Si la foy & la repentance precedent en l'homme l'acte de l'intelligence, par lequel Dieu remet le peché, Dieu aura conferé ces deux grands benefices à l'homme en son ire, & auparauant qu'il ait vsé de grace & de misericorde enuers luy, qui est vne maxime absurde, contradictoire, & qui se destruit elle-mesme. Restera donc que la foy & la repentance ne soient plus benefices de la grace de Dieu, mais œuvre du franc-arbitre de l'homme, si le pardon que Dieu donne à l'homme n'est qu'un acte de son intelligence, qui suit la foy & la repentance du pecheur. C'est le precipice de l'heresie Pelagiene. Dites vray, vous estes à la gehenne. Et de quelque costé que vous vous tourniez, vous recognoissiez que vostre opinion est vne mesprise qui vous esloigne grandement de la verité. Je vous veux donc encore redresser ici en la droite voye. La foy & la repentance sont œuvres de l'Esprit de Dieu en nous. Ce don de l'Esprit nous est conferé par l'acte du

pardon que Dieu nous fait, en Iesus Christ  
 son Fils, de tous nos pechez, non par vn  
 simple acte de son intelligence, mais par  
 son operation en nos ames. Laquelle ope-  
 ration il y fait par la parole de grace toute  
 puissante & viuifiante, & fructifiante en later-  
 re, queluy mesme laboure de son doigt.  
 Par lequel doigt il abat prealablement  
 le pecheur dans l'humiliation de soy mes-  
 me, & en la cognoissance de son peché  
 par le sentiment de sa misere. D'où la ver-  
 tu de la parole de grace, par laquelle l'Es-  
 prit de Dieu agit en l'ame du pecheur,  
 forme en luy la foy en Iesus Christ cruci-  
 fié, le seul autheur de son salut & de son  
 eternelle beatitude. Pour paruenir à la-  
 quelle il embrasse, par la lumiere de la foy,  
 la conformité des souffrances de Christ  
 en sa croix. Telle est la premiere opera-  
 tion de Dieu en l'homme. Cela compris,  
 ne dites plus maintenant que l'operation  
 du saint Esprit en nos ames soit le fruit  
 & l'effet de ce fauorable iugement, par  
 lequel vous presumez que Dieu repute  
 le pecheur iuste encore qu'il ne le soit  
 pas. Vous ne trouuerez, en l'Escripture,  
 vne seule parole qui appuye cette imagi-  
 nation. L'operation de l'Esprit de Dieu

en nos ames est de deux sortes. L'une qui  
 forme la foy, & par la foy l'humilité & la  
 repentance. L'autre qui suit la foy, &  
 qui par l'esperance & la patience forme  
 en l'ame du fidele la continence & la  
 charité. Dieu fait la premiere opera-  
 tion en l'ame du pecheur, pour le faire  
 fidele. Dieu fait la seconde operation  
 en l'ame du fidele pour le faire saint.  
 Le premier don de l'Esprit est donné  
 au pecheur mort en ses fautes & pechez.  
 Le second don de l'Esprit est donné  
 au fidele combattant sous la croix de  
 Christ contre la chair, le péché, le mon-  
 de, & le diable, afin qu'il en remporte  
 victoire, & que par la victoire il soit  
 parfait, iuste, sanctifié & rendu digne de  
 la couronne de gloire. Le dernier don  
 de l'Esprit de Dieu est appelé specia-  
 lement l'oeuvre du Consolateur, & du  
 SAINCT Esprit, pource qu'il est don-  
 né par l'esperance de la gloire de Christ  
 au fidele combattant le bon combat  
 sous la croix. Par où le fidele est con-  
 solé, ressiouy & rempli de paix, mesme  
 au milieu des aduersitez les plus gran-  
 des. Or le Royaume de Dieu est ioye  
 & paix par le saint Esprit. Tellement  
 qu'en

qu'en celuy qui patiente avec ioye & paix dans le combat de ses aduersitez Dieu regne veritablement, & toutes ses volonteiz sont souismises à celle de Dieu. Il est, par ce moyen, rendu iuste & sanctifié. La dilection de Dieu est espandue dans son cœur par le S. Esprit. Aduoüez, Monsieur, que cette doctrine sent mieux le stile de Sainct Paul, que tout le discours que vous m'avez voulu faire sur cette matiere. Et que vous auez iusques icy mal entendu l'operation du S. Esprit en nos ames, quand vous dites que c'est le fruit & l'effect du fauorable iugement que Dieu fait de nous, qu'il repute iustes encore que nous ne le soyons pas. Sçachez que Dieu ne nous donne pas son Esprit pource qu'il nous repute iustes, mais pour nous faire iustes & saints, & dignes de nostre vocation celeste. Si vous me pouuez produire vn seul passage de l'Escripture (ie n'en demande qu'un) par où vous me monstriez, que Dieu nous donne son S. Esprit pource qu'il nous repute iustes encore que nous ne le soyons pas, ie souismets ma teste à toute la fureur de vos anathemes. C'est en ce point que gist

toute nostre controuerse. Si vous ne le pouuez monstrier, confessez que vos anathemes sont aussi temeraires qu'iniustes. Et recognoissez encore, que quand vous adioustez, *que l'effect est formellement distinct d'avec sa cause*, disputant cōtre moy, comme si i'auois confondu l'vn avec l'autre, vous n'auiez compris ny la cause du don du S. Esprit au fidele, ny la raison de ses effects. Je me promets que vostre conscience m'en sera tesmoin apres auoir leu ce que ie vous en ay remonstré ici. Et au lieu qu'en la preface de vostre escrit vous dites, *que vous l'avez entrepris, entre autres choses, pour esclaircir quelques matieres que ie confonds ordinairement*, vous trouuerez que vous l'avez fait pour me donner suiet de vous esclaircir cette matiere dont nos Docteurs, par leur mesprise, ont confondu tout l'ordre & la raison.

Voyon la comparaison par laquelle vous taschez de donner lumiere à vostre raisonnement. *Si vn Prince irrité, dites-vous, contre quelque Gentilhomme, sien domestique, qui se seroit battu en duel, & y auroit esté fort blessé, venoit à luy pardonner, & à le faire penser de ses playes, ne distin-*

gueriez vous pas ces deux choses, comme deux bien-faiçts differens? Ie vous respon-  
 tres-differens. Mais non encore si diffe-  
 rens que la raison du pardon que Dieu  
 donne au pecheur, est differente de la  
 raison du pardon que vostre Prince don-  
 ne à son domestique. Ie vous demande  
 à vous-mesmes, pourquoy le pardon du  
 Prince, & la cure des playes faite à son  
 domestique, sont-ce deux benefices dif-  
 ferens? Vostre bon sens vous fera dire,  
 que c'est à cause que le peché, que  
 le Prince pardonne, & les blessures  
 du Gentilhomme sont en vn genre  
 tout different l'vn de l'autre. Mais le  
 peché dont Dieu nous pardonne la coul-  
 pe, & le peché dont Dieu guerit le vice  
 en nos ames ne sont pas de different gen-  
 re. C'est vn seul & mesme peché, de  
 mesme genre & de mesme nature. Qui  
 seulement a ces deux relations & ces  
 deux considerations diuerfes. Et pour-  
 tant le Prince pourroit bien pardonner  
 le peché à celuy qui s'est battu en duel  
 sans le faire penser de ses playes. La di-  
 uision de ces deux benefices ne repugne  
 point à la nature del'vn ou del'autre, ny  
 à la Maiesté du Prince. Mais Dieu ne

peut pardonner la coulpe du peché commis, qu'il n'employe à mesme temps les moyens d'en effacer & d'en guerir le vice en l'ame du pecheur. Cela est incompatible avec la nature de Dieu, & avec la raison de son pardon, comme elle vous a esté cy-dessus expliquée. Cela vous fait voir le mesconte des paroles où vous dites ensuite : *Or c'est ce qui se rencontre icy: car Dieu nous pardonne nos pechez, & nous en absout à cause de Iesus Christ: & secondement il guerit en nos ames les playes du vice par l'efficace de son Esprit regenerant: La remission des pechez nous deliure de la peine que nous auions encouruë, & la regeneration nous deliure de la corruption qui residoit en nos ames, & de la souillure que le peché y produisoit.* Ce que vous dites qui se rencontre, ne se rencontre nullement. Dieu imprime la foy en l'ame du pecheur par la mesme parole de grace par laquelle il luy pardonne ses pechez à cause de Iesus Christ. Vous ne sçauriez marquer vn seul instant entre l'vn & l'autre. C'est vne mesme operation de l'Esprit de Dieu agissant en la parole de grace administrée au pecheur. Si par orgueil il resiste à la parole, il reiette aussi par vn mesme acte

& le don de la foy & le pardon que Dieu luy presente. Or par la foy l'homme est regeneré. L'Esprit qui forme premierement la foy en nostre ame, commence à nous regerer. C'est le principe de la nouvelle creature. Il n'y a donc entre la remission des pechez & la regeneration aucune distance ny de temps ny d'operation. Et certes tout ce que vous dites est mesme directement contraire à vos propres hypotheses. Confessez-vous pas que celuy qui a la foy est regeneré? Que celuy qui n'est point regeneré n'a point la foy? Or vous, qui vous figurez que vostre iustification par la iustice imputée consiste en la remission des pechez, requerez prealablement la foy en celuy qui est iustifié, en celuy à qui les pechez sont remis. Comment donc dites vous que les pechez sont premierement remis, & puis que l'homme est regeneré? Vouliez-vous donc que les pechez soient remis, que l'homme soit iustifié, avant qu'il ait la foy? Sentez-vous pas de tous costez vostre mesprise?

Le surplus de vostre dispute contre les Catholiques & moy sur ce sujet, vous paroistra bien peu solide, quand vous y

repasserez les yeux apres l'adresse que ie vous ay donnee ici en la verité que vous n'auiez pas apperceuë. Examinon donc ensemble, s'il vous plaist, ce que vous dites. Ce sont ici vos paroles qui suivent les precedentes. Or ce que les Docteurs de l'Eglise Romaine ont mieux aimé confondre la remission des pechez avec la regeneration, que de les distinguer, a esté de peur de donner lieu à une imputation de iustice. Pource que Dieu ne peut n'imputer point le peché, qu'il n'impute au pecheur une iustice. L'imputation donc de la iustice de Christ leur desplaisant (ainsi qu'elle vous desplaist aussi) ils se sont aduisez de prendre la remission des pechez pour mesme chose que la production d'une sainteté & iustice residente en nous, ce qui est la regeneration & sanctification. La premiere chose que j'ay à vous demander sur l'observation que vous nous donnez de l'intention des Catholiques, est, que vous nous cottiiez, s'il vous plaist, le temps auquel ils ont pris ce nouvel aduis, de prendre la remission des pechez pour l'operation de Dieu qui produit en nous le principe de nostre regeneration. Car c'est ainsi que vous deviez declarer le sens des Catholiques, si vous l'eussiez bien entendu. Car de di-

re qu'ils prennent la remission des pechez pour la iustification & la sanctification, c'est ignorer absolument la croyance des Catholiques contre laquelle vous faites estat de disputer. Les paroles du Concile de Trente cy-dessus citées vous l'ont deu apprendre autrement. Considererez les donc, s'il vous plaist en les relisant. *Cette disposition ou preparation est suivie de la iustification mesme, qui n'est pas la seule remission des pechez, mais aussi la sanctification & le renouvellement de l'homme interieur.* Vous voyez que l'opinion des Catholiques n'est pas que la remission des pechez soit la iustification & la sanctification mesme. Dites apres cela, que vous ne vous estes pas mespris. Puis que vous vous mesprenez vous mesmes au sens de la croyance des Catholiques. Mais puis que vous les taxez de nouvel aduis, en ce qu'ils prennent la remission des pechez pour l'operation de Dieu qui produit en nous le principe de nostre regeneration, cotez nous, si vous pouuez, le siecle où ce nouveau sens s'est introduit. Or ie vous feray voir cy-dessous, que ç'a esté mesme le sens des Apostres. Car des Peres vous ne le nierez pas.

Quant à la peur que vous leur imputez auoir eue d'estre obligez de reconnoistre vne imputation de iustice, s'ils prenoient la remission des pechez pour le seul pardon de la coulpe ; pardonnez moy si ie vous dy, que la raison de vostre consequence n'est pas mieux fondée que celle de la crainte que vous leur attribuez. C'est, dites vous, *pource que Dieu ne peut n'imputer point le peché, qu'il n'impute au pecheur vne justice.* Si ie vous nie cette maxime comment la prouueriez-vous ? N'imputer point le peché à quelqu'un, c'est ne le vouloir point punir pour son peché. C'est l'exempter de la peine qu'il auoit encouruë ; Imputer au pecheur vne iustice, c'est le tenir iuste (selon vous) encore qu'il ne le soit pas, & le reputer, par consequent, digne du salaire de iustice, à cause de la iustice qui luy est imputee. Ainsi vous soustenez, selon vostre maxime, que quiconque exempté quelqu'un de la peine qu'il a meritée, ne peut qu'à mesme temps il ne le iuge digne du salaire qu'il n'a point merité. Pensez-vous donc que les Catholiques ayent deu auoir si grand peur de la necessité de cette maxime, qu'ils

ayent esté obligez, pour en éuiter la con-  
 sequence, de recourir à vne nouvelle in-  
 terpretation du terme *de la remission des*  
*pechez* ? Certes i'admire que vous ne  
 voyez pas, qu'en nous donnant de telles  
 maximes, vous establissez vne nouvelle  
 jurisprudence pour fonder vne nouvelle  
 Theologie. Hé quoy ! nul ne peut par  
 grace remettre à vn criminel la peine or-  
 donnée par la loy au transgresseur, qu'à  
 mesme temps il ne le iuge digne du salai-  
 re que la loy promet à celuy qui l'accom-  
 plit ? Est-ce que vous croyez que remet-  
 tre la peine, & donner le salaire (ce que  
 vous appelez, *n'imputer point le peché &*  
*imputer justice*) soit vne seule & mesme  
 chose ? Si tel est le sens de vostre propo-  
 sition, vous vous iouiez de vos lecteurs.  
 Vous pensez vne chose & en dites vne  
 autre. Si vous recognoissez que ce sont  
 deux choses differentes, comme elles le  
 sont en effect, vous deuez aussi conside-  
 rer qu'il y a vne distance entre elles qui  
 donne lieu à l'interuention d'une condi-  
 tion, laquelle separe & de temps & d'ef-  
 fect la raison de l'une & la raison de l'au-  
 tre. Car celuy qui par grace remet la pei-  
neau coupable, le restablit seulement en

l'estat de pouuoir obtenir le salaire promis par la loy moyennant qu'il accomplisse deormais la condition de l'obeissance & du seruice requis. Vous mesmes si vous pardonnez à vos enfans les fautes qu'ils auroient commises, ne voudriez pas au mesme instant leur donner le salaire qu'ils auroient merité s'ils vous auoient obey. Mais apres leur auoir pardonné, vous leur remonstreriez que si à l'aduenir ils font leur deuoir & vous obeyssent, ils iouyront du fruct de la bien-veillance paternelle en la recompense qui leur sera renduë suiuant l'ordonnance de la loy. Ainsi pour leur auoir pardonné vous ne leur imputeriez pas iustice, mais vous en requerriez d'eux l'effet. Dieu fait la mesme chose en nous pardonnant, quoy qu'il la face d'autre façõ, & qu'il face beaucoup d'auantage que ne peuuent faire les peres charnels. Quand il nous pardonne les pechez commis contre la loy, il exige en suite de ceux à qui il pardonne qu'ils ne pechent plus. C'est la Parole du Seigneur, *Tes pechez te sont pardonnez, va & ne peche plus, que pis ne t'aduienne.* Mais Dieu fait encore d'auantage en nous pardonnant, car

il nous donne ensemble par la mesme grace la vertu qui arrache de nos cœurs ce mauuais germe par lequel nous pechons. Il ne nous impute pas quelque iustice imaginaire qui ne soit pas nostre, mais il nous en donne vne reelle laquelle il fait nostre, pource qu'il la forme en nous. En tout ceci, Monsieur, ne recognoissez vous point vostre mesprise? Et que vostre iustice imputée, dont vous faites croire que les Catholiques ont eu peur de la confesser, est vne chimere que les Apostres ny l'Eglise n'ont iamais cognüe. Et certes vous auez raison de dire que l'imputation de la justice de Christ desplaist aux Catholiques, & qu'elle me desplaist aussi, au sens que vous prenez cette imputation, non pour la raison pour laquelle Dieu nous pardonne nos offenses à cause de son Fils. Car en ce sens les Catholiques & moy recognoissons que cette imputation de l'obeyssance de Christ est le fondement de nostre salut, encore que le terme n'en soit point vsté par les Apostres. Mais celle qui desplaist aux Catholiques & à moy est cette imputation de la justice de Christ, que nos premiers Reformateurs se sont imagi-

née, par laquelle ils veulent que Dieu nous repute iustes encore que nous ne le soyons pas en nous mesmes, & en laquelle ils disent que consiste toute la iustice pour laquelle nous deuons attendre au iugement de Dieu la couronne de justice. Qui est vne doctrine qui doit à bon droit deplaire à tous Chrestiens, pource que si ces cōsequences auoient lieu, elles destruiroient toute la raison du Christianisme, qui tend à nous rendre vrayment iustes & saincts en nous-mesmes, afin que, comme dit l'Apostre, *au iugement de Dieu, qui mettra en lumiere les choses cachées des tenebres, & qui manifestera les conseils des cœurs, soit alors de par Dieu renduë à chacun sa loüange*, c'est à dire la recompense de son merite. Par ceci vous reconnoistrez, que i'ay eu iuste cause au lieu que vous alleguez de ma response à Mr Daillé de dire, *que c'est avec raison que les Docteurs de l'Eglise Romaine improuent la distinction que font les nostres entre la justification & la sanctification, & qu'en cela il n'y a point de mesconte de leur depart.* Certes tout le mesconte est de la part des nostres, qui prennent la iustification pour la maniere d'estre iuste deuant Dieu.

par vne iustice imputée encore qu'on ne le soit point en soy-mesme, & la sanctification pour la maniere dont le fidele est rendu sainct en soy-mesme par vne justice & saincteté inherente. Iugez vous-mesmes si les Catholiques se sont mescontez, & s'ils n'ont pas fuiui le sens naif de l'Apostre en ces paroles qui doiuent decider toute la controuerse de cette matiere. *Ne scauez vous pas que les iniustes n'heriteront point le Royaume de Dieu. Ne vous abusez point. Ny les paillards, ny les idolatres, ny les adulteres, ny les effeminez, ny les bougres, ny les larrons, ny les auaricieux, ny les yurongnes, ny les mesdisans, ny les ravisseurs n'heriteront point le Royaume de Dieu. Et telles choses estiez vous quelques uns, mais vous en auez esté lauez, mais vous en auez esté sanctifiez, mais vous en auez esté iustifiez au nom du Seigneur Iesus, & par l'Esprit de nostre Dieu, 1. Cor. 6. 9. 10. 11.* Ne voyez vous pas que l'Apostre exclud de l'heritage des cieux tous les injustes, tant par le terme general d'iniustice, que par l'enumeration de toutes ses parties. Or si vostre doctrine estoit veritable, la denonciation de l'Apostre ne le seroit pas. Car si nous som-

mes iustifiez par vne iustice imputée, qui nous face reputed iustes encore que nous ne le soyons pas, il sera vray de dire que les paillards, les idolatres, les adulteres, &c. quoy que tels en effect, heriteront le Royaume des Cieux, pource qu'ils sont reputez iustes encore qu'ils soient paillards, idolatres, adulteres, &c. Combien s'esloigne de vostre pensée le raisonnement de l'Apostre, qui ne confirme pas les fideles auxquels il escrit en l'esperance d'heriter le Royaume des Cieux, par l'imagination d'estre iustifiez par vne iustice imputee, mais par le sentiment d'auoir esté en effect d'iniustes rendus iustes. *Telles choses estiez vous, mais vous en auez esté lauez, vous en auez esté sanctifiez, vous en auez esté iustifiez.* Selon vostre sens il faudroit dire, vous estes paillards, idolatres, adulteres &c. mais naantmoins vous en estes iustifiez, vous estes reputez iustes encore que vous ne le soyiez pas. Il dit tout le contraire, vous estiez tels, mais vous ne l'estes plus, pource que la cognoissance que vous auez receuë de Iesus Christ, & la vertu de son Esprit qui vous a esté donné, vous a lauez, & d'iniustes que vous estiez, vous

a rendus saints & justes. C'est la sainte  
 ré & la justice inherente, germe de l'Es-  
 prit de Dieu en nous, & non autre, qui est  
 au cœur des fideles l'arrhe bien-heureux  
 de l'heritage celeste. Ne tergiuerson  
 point. Au nom de Dieu, Monsieur, ne  
 soyon point amoureux de nos pensées,  
 ni idolatres de nos Docteurs, ne soyon  
 point serfs des hommes. Adoron la  
 seule immuable verité que l'Esprit de  
 Dieu a reuelée à son Eglise. Embrasson  
 la, & nous departon de cette doctrine  
 d'une feinte iustice imputée qui n'est  
 bonne que pour endormir les hommes  
 en leurs vices, pour engendrer vne secu-  
 rité en leurs ames. Telle n'est point l'es-  
 perance du Chrestien laquelle ne con-  
 fond point, non pource qu'une iustice  
 estrangere nous soit imputée, mais pour-  
 ce que la dilection de Dieu est respan-  
 due en nos cœurs par le Saint Esprit,  
 qui nous a esté donné.

Cependant cette opinion vous tient  
 tellement en l'esprit, ou du moins vous  
 croyez si importât, pour quelque cōsïde-  
 ration que ce soit, de ne l'abandonner pas,  
 que vous en entreprenez la defense. En  
 laquelle vous insistez par cinq argumens

que i'examineray l'un apres l'autre, afin de vous en faire voir la futilité. Et pour vous arracher, en ce faisant, du poulmon, tous les scrupules qui vous y en restent. Vostre premiere raison est, que *S. Paul* parle en telle sorte de la justification & remission des pechez *Rom. 4.* qu'il ne permet pas de la confondre avec la regeneration & sanctification, laquelle produit en nous la iustice inherente: à sçauoir quand il dit que *Dauid* declare la beatitude de l'homme à qui Dieu impute iustice sans œures, disant, *Bien-heureux est l'homme duquel les iniquitez sont pardonnées, & auquel le Seigneur n'aura point imputé le peché.* Car premierement ces mots, *iustice sans œures*, monstrent que la iustice de Dieu imputée est autre que la iustice inherente, veu que celle-ci consiste en œures. Je vous ay desia remonstré, que les Catholiques ne confondent pas la remission des pechez avec la sanctification. Mais comme nostre regeneration se fait par deux voyes, l'une par la croix mortifiante, & l'autre par l'Esprit viui-  
fiant, la remission des pechez est la grace par laquelle Dieu fait cette operation qui despend du premier moyen de nous regenerer, c'est à sçauoir, par la croix de  
son

son Fils, par laquelle il nous a acquis le pardon de tous nos pechez. Car c'est par l'operation de cette grace, que la foy, qui est la racine de la justice de Dieu en nous, est formée en nos cœurs. En suite de quoy, receuans l'Esprit saint qui nous est donné en l'esperance de la resurrection glorieuse, nous sommes iustifiez & sanctifiez. C'est la doctrine des Catholiques, qui ne confondent pas l'operation que Dieu fait de la foy en nous par la remission des pechez, avec la iustification & la sanctification. Cela compris vous entendrez facilement le passage de l'Apostre que vous alleguez, & vous le prendrez en vn meilleur sens que celuy que vous luy avez voulu donner. I'estime que ce que vous aurez leu, sur ce suiet, en mon Iugement de Monsieur Testard, depuis la page 282. iusques à la 292. vous aura fait changer d'aduis, m'asseurât que vostre conscience ne peut resister à vne verité si manifeste. Presuppôsé donc que vous avez leu & considéré ce que j'ay escrit en celieu là, ie respon breuement à l'induction que vous faites des mots de l'Apostre, que quand il dit, *que Dieu impute iustice sans œures*, il ne dis-

joint pas les œuvres de la iustice, comme elles en font l'effect, mais comme elles en pourroient estre estimées la cause. Car la iustice que Dieu produit en nos cœurs par la foy produit les bonnes œuvres. Elles en font les fruits. Ainsi considerant l'origine de la iustice que Dieu produit en nous, elle est iustice sans œuvres. Car Dieu la produit par la foy en l'ame du pecheur, mort en ses fautes & pechez, lequel n'a point fait d'œuvres, ains lequel est coupable de la transgression de la loy. Et pourtant Dieu la produit par la remission des pechez. Pour preuue de quoy l'Apostre allegue les paroles de Dauid, *Bien-heureux est l'homme à qui les pechez sont remis.* Ainsi ce que vous inferrez est faux, que la iustice que Dieu impute est autre que la iustice inherente, veu que celle-ci consiste en œuvres. Car si vous considererez la cause de la iustice inherente que Dieu produit en nous (qui est le sujet de la dispute de l'Apostre avec les Juifs iusticiaires) elle est sans œuvres. Mais si vous considererez ses effects, elle n'est pas certes sans œuvres. Car elle les produit. Or l'Apostre disputoit de la cause, non des effects de la iustice que Dieu impute.

Car les Iuifs & tous ceux qui establiſſent le franc-arbitre de l'homme pour principe de leur ſalut, cherchans d'eſtre iuſtifiez par les œuvres de la loy, croyent eſtre iuſtes pource qu'ils font les œuvres que la loy commande. Mais les fideles, qui eſtabliſſent pour principe de leur ſalut la grace de Ieſus Chriſt, ſçauent qu'ils font de bonnes œuvres, pource que Dieu, de meſchans qu'ils eſtoient, les a rendus juſtes. Celuy qui eſt iuſtifié par la loy ſe glorifie en ſoy-mesme d'eſtre iuſte, pource qu'il fait les œuvres. Celuy qui eſt iuſtifié par la foy ſe glorifie en Dieu de faire les œuvres qui luy ſont agreables, pource que Dieu l'a rendu iuſte. Retenez le fil de cette diſtinction, & vous fortirez du labyrinthe où voſtre opinion vous enuolppe.

Votre ſeconderaison tirée du meſme lieu de l'Apoſtre eſt, *Que le mot d'imputer, monſtre que la iuſtice, dōt il parle n'eſt pas inherente. Car la juſtice inherēte Dieu ne l'impute pas, mais la produit. Et ſi Dieu l'imputoit à quelqu'un, il faudroit qu'il l'imputaſt à celuy qui l'auroit. Mais ici il s'agiſt de celuy qui ne l'a point. Car S. Paul parle de l'acte par lequel Dieu juſtifie le meſchant.*

*Celuy, dit-il, qui n'œuvre point; ains croit en celuy qui iustifie le meschant, sa foy luy est imputée à iustice. Si vous auiez bien pensé à ce qu'emportent les consequences que vous inferez des paroles de l'Apostre contre la verité de leur sens, elles vous feroient horreur, comme ic m'asseure qu'elles feront, quand vous les aurez ici considérées avec moy. L'opposition que vous faites, entre imputer iustice, & la produire, est la cause de vostre achoppement. Certes imputer iustice à quelqu'un, & produire iustice en luy, sont bien choses differentes, mais non incompatibles. Dieu nous impute & alloüe pour bonne & valable, & digne de remuneration, la iustice que luy mesme produit en nous. Imputer iustice à quelqu'un, c'est le iuger digne de la recompense due à sa iustice, & la luy vouloir retribuer. Tout de mesme imputer peché, c'est iuger quelqu'un digne du salaire deu au peché, & l'en vouloir punir. Quand l'Escripture dit que Dieu impute le peché à quelqu'un, elle n'entend pas qu'elle repete pecheur celuy qui ne l'est pas: Ainsi quand elle dit que Dieu impute iustice, elle n'entend pas qu'il repu-*

te iuste celuy qui ne l'est pas. Le peché inherent est aussi imputé de par Dieu à tous ceux qui sont rebelles à sa vocation. Et la iustice inherente est aussi imputée de par luy à tous ceux qui croient de cœur à iustice. Mais vostre plus grand erreur est en ce que vous dites, *que si Dieu imputoit à quelqu'un la iustice inherente, il faudroit qu'il l'imputast à celuy qui l'auroit. Mais il s'agit de celuy qui ne l'a point.* Voyez où va la consequence de vostre dire, & vous-mesmes, comme j'ay dit, l'aurez en horreur. Vous reconnoissez que Dieu donne la couronne à celuy à qui il impute iustice. C'est vn axiome indubitable, & que tous confessent. Or vous voulez que par la doctrine del'Apostre Dieu impute iustice à celuy qui ne l'a point. C'est selon vous la raison formelle de la iustification qui est suiui de la glorification. Or si à celuy, qui n'a aucune iustice en soy, Dieu impute iustice, & luy donne en consequence la couronne, il s'ensuit que ceux qui sont iniustes en eux-mesmes, paillards, rauisseurs, adulteres, & remplis de tous les vices les plus enormes, sans estre changez en eux mesmes, sans auoir re-

noncé à leurs vices, n'ayans aucune iustice, par consequent estans formellement ennemis de Dieu, heriteront le Royaume des Cieux. Miserable doctrine! Que dites vous quand vous prononcez, que quand Dieu impute iustice à quelqu'un il s'agit de celuy qui ne l'a point? Y auiez vous bien pensé? Et vous croyez que tel a esté le sens de l'Apostre, & pour le monstrier vous adioustez, *Car Sainct Paul parle de l'acte par lequel Dieu iustifie le meschant.* C'est ce qui vous trompe. S. Paul ne dit nulle part que iustifier le meschant, & imputer iustice, soit vn mesme acte en Dieu. C'est la resuerie de ceux qui se sont forgez cette iustice imputatiue. Iustifier le meschant & imputer iustice sont deux diuers actes. Dieu premierement iustifie le meschant quand de meschant il le fait iuste; & puis il luy impute iustice, accepte comme bonne & valable la iustice qu'il a formée en luy, & la remunere de la couronne de vie eternelle. Relisez les paroles que vous citez de l'Apostre, & vous n'y trouuerez rien de tout ce que vous y auez pensé voir. *A celuy qui n'œurre point, ains croit en celuy qui iustifie le meschant, sa foy luy est*

*imputée à iustice.* Il ne dit pas que iustifier le meschat & imputer iustice soit vn mesme acte. Ains il declare quel est l'obiet à qui Dieu impute iustice. Cét obiet est l'homme, lequel, estant auparauant meschant, & n'ayant fait aucune bonne œuvre, a receu de Dieu le don de la foy qui est la racine de toute vraye iustice. Celuy donc à qui Dieu a donné la foy lors qu'il estoit encore meschant, est l'obiet auquel Dieu impute iustice. Pource que la foy que Dieu luy a donnée est la racine de toute iustice, d'autant que la vraye foy est operante par charité, sa foy luy est imputée à iustice. Mais les œuvres des justiciars ne leur sont point imputées à iustice, d'autant que la vraye iustice que Dieu agréee ne consiste point en telles œuvres que l'homme ne produit que par le propre amour de soy-mesme. La raison pourquoy la foy est imputée de Dieu à iustice, c'est pource que par la foy l'homme est veritablement conuerti à Dieu, pour l'aimer comme son pere. Mais par les œuvres de la loy l'homme n'aime Dieu que pource qu'il s'aime soy-mesme. Il aime Dieu comme font les mercenaires, non comme les enfans ai-

ment leur pere. Tel est le suiet de toute la dispute de l'Apostre. Il monstre que le vray amour de Dieu, la vraye iustice de l'homme par consequent, ne vient que de la foy que Dieu nous donne. Il en poursuit la preuue par Abraham, & parce que l'Escripture dit de luy, *Abraham a creu à Dieu, & il luy a esté imputé à iustice.* Et certes quand Abraham a obtenu cette foy, qui luy fit quitter son pays & son parentage, qui luy fit passer sa vie en terre estrange, qui luy fit regarder les promesses de Dieu pour le seul fondement de sa felicité, il deuint vrayment aimant Dieu, il deuint vrayment iuste. Et pour cette cause sa foy luy fut alloüée à iustice. La iustice procedante de cette foy fut agreable à Dieu. Or l'Apostre observe, *qu'il estoit encore au prepuce quand il est escrit, que cette foy luy fut alloüée à iustice.* Afin de conuaincre les Iuifs, que nulles œuvres de la loy n'auoient precedé en luy le don de la foy. Vous comprenez, ie pense, maintenant, qu'en tout ce raisonnement l'Apostre n'a rien qui puisse flatter l'imagination de vostre iustice imputatiue, ou l'opinion que la vraye iustice inherente ne soit pas celle que Dieu

impute au fidele, comme vous argumentiez.

Vostre troisieme raison est comme vne flechetirée en l'air. Car vous n'argumentez contre personne quand vous dites, *D'abondant comme n'imputer point le peché en l'homme, n'est pas ne point produire le peché en l'homme, mais ne l'en punir pas encore qu'il en soit coupable : ainsi par le contraire imputer iustice n'est pas produire la iustice en l'homme, mais repater l'homme pour iuste encore qu'il ne le soit pas en soy.* Nul ne dit (comme ie vien de vous le remontrer) que produire la iustice en l'homme & imputer iustice, soient vne mesme chose. Vous vous feigniez des ombres pour les combattre. Mais ie m'estonne encore plus du sophisme que vous commettez en la comparaison de contrarieté que vous faites entre *imputer peché*, & *imputer iustice*. Car au premier membre de vostre comparaison vous vsez d'une negative, & le second est conceu par vne affirmative : Et puis vous changez de terme, & supposez vn terme pour l'autre. En quoy vous faites vne manifeste illusion à vostre lecteur. Nous deuons disputer en simplicité sur vne matiere

où nous ne deuons auoir d'autre but que la gloire de Dieu & l'edification des consciences. Vous dites en la premiere partie de la comparais<sup>on</sup>, *que ne point imputer le peché à l'homme est ne l'en punir pas encore qu'il en soit coupable*. Et cela est vray. En la seconde partie vous dites, *que par le contraire imputer iustice est reputer l'homme iuste encor qu'il ne le soit pas*. Pourquoi dites vous au premier *n'imputer point*, & au second, *imputer*? Pourquoi dites vous au premier, *ne l'en punir pas encore qu'il en soit ioulpable*; & au second, *reputer iuste encor qu'il ne le soit pas*? Faites quadrer les membres de vostre comparais<sup>on</sup>, & vostre erreur sera manifeste. Dites au second membre negatiuement, & en termes correspondans au premier, *N'imputer point iustice est ne point rendre la recompense à celuy qui l'a meritée*. Vous trouuerez que ce sera vn acte qui ne peut conuenir à la bonté de Dieu, encore que l'acte de n'imputer point le peché ou de ne punir point l'homme quoy qu'il l'ait merité, conuienne tres-bien à cette bonté souveraine, comme acte de misericorde. Derechef enoncez le premier membre de vostre comparais<sup>on</sup> affirmatiue.

ment, & le second aussi, & en termes correspondans, & dites, *Imputer peché à quelqu'un est le punir encor qu'il n'en soit point coupable* : ainsi par le contraire, *imputer iustice à quelqu'un est luy donner la recompense encore qu'il ne l'ait point meritée.*

Voustrouuerez que le premier membre ne peut auoir lieu entre les actes de Dieu que par dispensation, & en telle sorte que la punition decernée ne contreuienne point au bien souuerain que doit obtenir l'innocent, & celuy qui n'est point coupable: en sorte que cette punitiō soit plustost vne aide dispensée pour ce bien là.

Autrement si la punition estoit absoluë & finale, & si elle priuoit l'homme innocent & iuste de son souuerain bien, elle seroit incompatible avec la bonté & la iustice de Dieu. De ce premier genre a esté la punition que Dieu a deschargée sur son Fils, auquel il a imputé nostre peché par dispensation. En suite de cela voustrouuerez au second membre, par conformité de raison, que si le bien-faict communiqué à celui qui ne l'a point merité est d'autre nature qu'un bien inferieur, & immediat à la fin : & si c'est le bien souuerain de la felicité

éternelle, cet acte seroit du tout incōpa-  
 rable avec la iustice de Dieu, qui ne peut  
 souffrir, que celuy qui est meschant soit  
 éternellement bien heureux. Ainsi Dieu  
 communique bien aux meschans le bien  
 qui consiste au moyen de la grace, enco-  
 re que par leur peché ils ayent mérité  
 d'en estre tout à fait priuez. Et en ce re-  
 gard Dieu ne leur impute point leur pe-  
 ché. Ce que Dieu fait enuers tous les  
 hommes à cause de son Fils en ne leur  
 imputant point leurs pechez; & en ce re-  
 gard (si vous voulez) en leur imputant  
 la iustice de Christ. Mais ce bien par eux  
 non mérité, que Dieu leur communique  
 par dispensation, n'est pas le bien de la  
 félicité éternelle. Car ce n'est pas le bien  
 de la fin, mais seulement le moyen à la  
 fin. Et pourtant la communication de ce  
 bien, qui est la grace, n'empesche point  
 l'effect de la punition éternelle sur la re-  
 bellion des reprouuez qui la reiettet. Par  
 ce moyen, déuélépé des tenebres du so-  
 phisme dont vous vous estiez abusé vous  
 mesmes, vous voyez maintenant que  
 comme Dieu ne peut imputer à l'inno-  
 cent & iuste le peché, qui requiert puni-  
 tion éternelle, c'est à dire l'en punir : aus-

si ne peut-il imputer au meschant & in-  
 iuste la iustice qui requiert la recompen-  
 se de vie eternelle, c'est à dire, luy en  
 donner iouyssance. Delà vous apperce-  
 urez vostre mesconte aux paroles qui  
 suivent, *C'est un acte de Dieu par lequel,*  
*comme il a fait Iesus Christ peché pour vous,*  
*c'est à dire, victime pour le peché, ayant iet-*  
*té nos pechez sur luy, ainsi qu'en parle Esaye*  
*chap. 58. aussi nous sommes faits justice de*  
*Dieu en luy, Dieu nous imputant sa justice*  
*& satisfaction, ainsi que l'enseigne l'Apostre*  
*2. Cor. 5.* Quand Dieu a fait son Fils pe-  
 ché pour nous, qu'il a puni en nostre pla-  
 ce celuy qui n'a point cognu peché, qui  
 estoit innocent & iuste, separé des pe-  
 cheurs, il ne l'a pas puni d'une punition  
 eternelle. Ainsi quand vous voudriez  
 que les pecheurs demeurans pecheurs  
 fussent faits iustice de Dieu, cōme Iesus  
 Christ a esté fait peché, vous n'obtien-  
 drez pas pourtant par là, que la couron-  
 ne de gloire eternelle leur fust donnée.  
 Mais l'Apostre ne dit pas, au lieu des Co-  
 rinthiens que vous alleguez, que comme  
 Iesus Christ a esté fait peché, ainsi nous  
 sommes faits justice de Dieu. Il n'en  
 parle pas par comparaison, Il ne dit pas

quel vn soit semblable à l'autre. C'est ce  
 qui vous trompe. Il dit, *que Dieu a fait*  
*celuy qui n'a point cogneu peché, estre peché*  
*pour nous, afin que nous fussons faits iustice*  
*de Dieu en luy.* Notez ce terme, *afin*, qui  
 vous monstre que l'intention de l'Apo-  
 stre est de declarer, en ces paroles, la fin  
 pour laquelle Dieu a donné son Fils à la  
 mort. C'est à sçauoir pour nous amener à  
 luy, pour nous conuertir à luy, pour faire  
 que nous l'aimions, pour mortifier par sa  
 croix le peché en nous, afin que nous  
 soyons viuifiez à iustice. *Afin*, comme dit  
 le mesme Esaye, *que par sa meurtrissure*  
*nous ayons guerison.* Or nostre guerison  
 n'est pas imputatiue, mais inherente.  
 C'est afin que nous soyons gueris de la  
 playe de l'ancien Serpent, du peché qui  
 infecte nostre nature, & que nous recou-  
 urions nostre vraye santé par vne iustice  
 réelle & inherente, qui est appelée, *iusti-*  
*ce de Dieu*, pource que Dieu la forme en  
 nous par l'Esprit de son Fils. Et nous som-  
 mes dictés par l'Apostre, *faits iustice de*  
*Dieu en Iesus Christ*, en mesme maniere  
 qu'il dit aux Ephes. 2. 10. *que nous sommes*  
*l'ouvrage d'iceluy, estans creez en Iesus Christ*  
*à bonnes œuvres.* Car nous sommes creez

en Iesus Christ à bonnes œuvres, quand nous sommes faits iustes, quand la vraye iustice est formée en nous.

Vostre quatriesme raison est, *que les aspersions du Sang faites iadis sous la loy, monstroient que le sacrifice & le Sang de la victime estoit alloüé à ceux sur qui elles se faisoient. Or c'estoient des types de l'imputation du sãg de I. Christ aux croyãs.* Cette derniere periode est ce qui vous trompe, quand vous rapportez la communion que doiuent auoir les fideles au Sang du Sacrifice de Iesus Christ (figurée par l'aspersion du Sang aux Sacrifices anciens) à ce que vous appelez l'imputation de son obeissance & de sa mort. Vous voulez que cette imputation soit vn acte de l'intelligence de Dieu, & non vne operation de sa vertu. Et pourtant vous distinguez la iustification de la sanctification, par cette mesme raison, attribuans la premiere au simple acte de l'intelligence de Dieu, & la seconde à sa vertu. Que sera ce donc si ie vous montre que l'aspersion du Sang de Christ, est l'acte par lequel Dieu nous sanctifie. Vous auouerez, ie pense, que l'aspersion du Sang n'est pas vostre simple imputation. Escoutez l'Apostre

Sainct Pierre aux deux premiers versets de la premiere Epistre. *Pierre Apostre de Iesus Christ, aux élus dispersez çà & là hors de leurs maisons, de Pont, de Galatie, de Cappadoce, d'Asie, & de Bythynie, selon la determination de Dieu le Pere, en sanctification d'esprit, pour l'obeyssance & l'asper-sion du Sang de Christ.* Le rapporte ce passage tout entier pour luy donner plus de lumiere, que la version & l'explication ordinaire des Interpretes ne luy en a lais-sé. Nos Interpretes y commettent deux fautes. Premièrement, ils transposent ce mot *élus*, & le mettent à la teste du se-cond verset. Secondement, ils tradui-sent ces mots, *παρεισδυουσ διασπορας ωντων*, &c. *esirangers qui estes espars en Pont, &c.* au lieu qu'ils signifient, que les fideles des prouinces là déuommées, à qui l'Apostre escrit, estoient dispersez çà & là hors de chez eux à cause des persecutions qu'ils souffroient. Ce qui n'ayant pas esté compris, a fait estimer à quelques vns, mesmes des An-ciens, que cette Epistre s'adressoit aux Juifs des dix Tribus dispersées. Chose absurde, & qui n'a nul rapport au but de S. Pierre. Lequel ayant pris cette mes-

mepersecution, que souffroient les fideles de ces prouinces, pour principal suiet de son Epistre, leur enseigne qu'en elle s'accomplissoit la determination du bon plaisir de Dieu pour leur salut. Et pouttāt ces deux termes, ἐκλεκτοῖς παρ' ἡμῶν διασπορᾶς, *Eleus, dispersez çà & là hors de chez eux*, ne doiuent nullement estre disjoints ny transposez de leur ordre Car le secōd est l'explication du premier. Pource que l'Electiō s'accomplit & se manifeste par la tribulation & par l'affliction des fideles. D'oū S. Paul dit aux Theſſaloniens, *ſçachans, freres bien-aimez, vostre Electiō*, 1. Ep. 1. 4. Dequoy il adioust la raison au verset 6. *pource qu'ayans esté imitateurs des Apostres & du Seigneur, vous avez receu la parole en grande tribulation.* Sainct Pierre donc ayant, en mesme façon, representé, par ces mots, aux fideles à qui il escrit, l'accomplissement de leur Electiō par leur souffrance, adioust que cela se faisoit, κατὰ πρόγνωσιν Θεοῦ πατρὸς, *selon la determination de Dieu le Pere en sanctification d'esprit.* Pource que ceux que Dieu a determinez, ἐς ᾧ ἐγένετο, *il les a predestinez à estre faits conformes à l'image de son Fils.* Or c'est

la sanctification d'esprit qui parfait cet  
 image. C'est pourquoy, afin qu'elle soit  
 formee en eux, il faut qu'ils soient ame-  
 nez, par la tribulation, εις υπακοήν καὶ πα-  
 τισμὸν αἰματός Ἰησοῦ Χριστοῦ, à l'obeïssan-  
 ce & à l'asperision du Sang de Iesus Christ.  
 C'est l'obeïssance de foy, par laquelle ils  
 embrassent la croix & la communion de  
 leur Sauueur. Ainsi cette asperision du  
 Sang de Iesus Christ est bien autre chose  
 que vostre imputation, que vous dit-  
 tes estre vn simple acte de l'intelligence  
 de Dieu. C'est la communion reelle du  
 Sang de Iesus Christ. Et en elle (comme  
 vous voyez) se fait, non vostre iustifica-  
 tion par laquelle l'homme soit reputé iu-  
 ste encore qu'il ne le soit pas: mais la vra-  
 ye iustification & la sanctification, par  
 laquelle le fidele est rendu iuste de  
 vraie iustice & sainteté inherente &  
 reelle. Mais iem'estonne que vous, qui  
 auez, par vn si long espace de temps, tra-  
 uillé, en vos presches, sur l'explication  
 de l'Epist. aux Hebrieux, ayez si peu com-  
 pris le principal traicté de l'Apostre en  
 icelle, que vous rapportiez l'asperision du  
 Sang à vostre iustification par vne iustice  
 estrangere & imputee, & non à la sancti-

fication qui purifie nos consciences des œuvres mortes. Souuenez vous de ces paroles tant expresses du chapitre 9. *Vf. 13. 14. Si le sang des taureaux & des boucs & la cendre de la genice, dont on fait asper- sion, SANCTIFIE les souillez quant à la chair : combien plus le Sang de Christ, qui par l'Esprit eternal s'est offert à Dieu soy- mesme sans nulle tache, purifiera-il nos con- sciences des œuvres mortes pour seruir au Dieu viuant. Il s'agist ici, comme vous voyez, d'une pureté actuelle & actiue. Toute l'Epistre est pleine de lieux sem- blables. Et l'Apostre n'y traite autre chose que la raison de nostre sanctifica- tion par la vertu du sacrifice & de l'obla- tion de Christ, qui nous doit estre, pour cet effect, reellement appliquée, selon l'Institution du sacrifice de l'Eglise.*

Vostre cinquiesme & dernier argu- ment ne touche en rien nostre question. Et vous vous peinez sur vne chose que personne ne vous conteste, quand vous inferez, *qu'à fin que Dieu nous regenere par son Esprit, il faut que precede l'imputation de l'obeissance de Iesus Christ.* Car ie vous ay desia dit plusieurs fois, que quand les Catholiques enseignent, que la mort &

l'obeïſſance de I. Chriſt nous ont meritè tous les benefices que Dieu nous octroye, ils ſouffriront aiſement, qu'en ce ſens on die, que la mort & l'obeïſſance de Chriſt nous ſont imputees, non pour faire que nous ſoyons reputez juſtes encore que nous ne le ſoyons pas, mais pour nous faire reellement & actuellement iuſtes & ſaincts. Toutesſois pource que le diſcours, auquel vous eſtendez cette derniere raiſon, me donne ſuiet de vous faire voir combien vous vous meſprenez en toute voſtre diſpute, ie vous le representeray encore ici piece à piece. *Si Meſſieurs de l'Egliſe Romaine, dites-vous, veulent bien que la deſobeïſſance d'Adam nous ait eſté imputée, d'autant qu'il comparoiſſoit comme chef de ſa poſterité, avec quelle raiſon peuvent-ils nier que l'obeïſſance du ſecond Adam nous ſoit imputée ?* Les Catholiques ne nient non plus l'un que l'autre. Reconnoiſſez ſeulement au ſecond la raiſon du premier, & toute la diſpute ſera terminee, & voſtre opinion exterminée. La deſobeïſſance d'Adam ne nous eſt pas imputée afin que nous ſoyons reputez pecheurs, encore que nous ne le ſoyons pas. Tout de meſme l'obeïſſan-

ce de Christ ne nous est pas imputée afin  
 que nous soyons reputés iustes, encore  
 que nous ne le soyons pas. Mais pource  
 que la desobeissance d'Adam nous est im-  
 putée, & que sa peine & sa malediction  
 a passé, par ce moyen, sur nous, & nous  
 a esté communiquée, nous auons esté  
 rendus pecheurs en nous-mesmes. Aussi,  
 pource que l'obeyssance de la croix de  
 Christ nous est imputée, & que sa  
 croix, en laquelle il a establi la benedi-  
 ction du Pere celeste, nous est par ce  
 moyen communiquee, nous sommes  
 rendus iustes en nous-mesmes. Ce n'est  
 pas mon discours, c'est celuy de l'Apo-  
 stre. *Comme par la desobeyssance d'un seul  
 homme plusieurs ont esté rendus pecheurs,*  
*AINSI par l'obeyssance d'un seul plu-*  
*sieurs seront rendus iustes. Rom. 5. 19.* Sur  
 cela vostre conscience parle pour moy  
 contre vous-mesmes, & vous fait dire.  
*Mais, dites-vous, la corruption d'Adam*  
*passé reekement en nous, & nous est inherente.*  
 I'adiouste de plus, Et nul n'est reputé  
 meschant pour la desobeyssance d'Adam  
 s'il ne l'est en soy-mesme. Que respon-  
 dez vous? Voicy vos paroles. *Cuy, mais*  
*ie di que l'acte de l'imputation de sa desobeis-*

*sance precede, & que c'est à raison de ce que nous auons peché en Adam, comme en nostre chef, que sa corruption passe en nous par la generation. Dieu abandonnant, par son iuste iugement la posterité d'Adam à la corruption de leur pere, à cause du peché d'iceluy. Ainsi afin que Dieu nous regenere par son Esprit, faut que precede l'imputation de l'obeissance de Iesus Christ. En tout cela vous ne respondes rien à propos, & vostre conclusion est contre vous-mesmes. Car il s'agissoit de monstrier que par l'imputation de l'obeissance de Christ nous soyons reputez iustes encore que nous ne le soyons pas. Et vous concluez, que par cette imputation nous sommes regenerez & rendus iustes en nous-mesmes. Pour qui portez vous les armes que vous tournez ainsi contre vous? Au reste i'ay cy-dessus expliqué, comment & par quelle raison toute la race d'Adam a esté infectée de la corruption de peché par celuy qu'il a commis. Ce qui s'appelle en tous les hommes le peché d'origine, dont la seule grace de nostre Seigneur Iesus Christ nous deliure, en nous mortifiant à peché, & en nous viuifiant à iustice, pour nous rendre iustes, saints, & ir-*

reprehensibles deuant Dieu en charité.

Pour clorre la respōse à vos instāces, ie vous aduertiray, Mōsieur, de prēdre garde de les faire sur le fuiet quiest en question. Nous recognoissōs tous que la mort & l'obeyssance de Iesus Christ est la cause de tout le bien que Dieu nous communique. Et pource que le bon plaisir du Pere enuers nous n'a autre fondement que le merite de son Fils, ce bon plaisir du Pere n'est executé enuers nous qu'en consideration du merite du Fils. Ie vous ay desia dit plusieurs fois, que pour ce regard, ny les Catholiques ny moy ne contestons point contre vostre façon de parler, que le merite, la mort, l'obeyssance de Iesus Christ nous est imputee par la mesme grace par laquelle Dieu agit enuers nous en la remission de nos pechez. Nul n'est rendu participant de cette grace, qu'en consequence de l'imputation du merite de la mort & de l'obeyssance de Iesus Christ. Mais ie di que le benefice de cette imputation n'est pas que Dieu par vn simple acte de son intelligence nous reputé, en consequence, iustes, encore que nous ne le soyons pas. C'est vostre doctrine. Et c'est vne chimere, formee

premierement dans le cerueau de nos  
 premiers Reformateurs. Vous n'en trou-  
 uerés vne seule ombre dans l'Ecriture. Je  
 vous défie d'en produire vn seul tesmoi-  
 gnage. Dieu ne repute personne iuste  
 que ceux que luy mesme a fait réelle-  
 ment iustes; que ceux qu'il a formez à  
 l'image de son Fils selon le nouuel hom-  
 me créé en iustice & vraye saincteté,  
 que ceux qu'il a rendus iustes, saincts, &  
 irreprehensibles deuant luy en charité.  
 La question est donc s'il est vray, que  
 Dieu nous impute de telle sorte l'obeis-  
 sance de son Fils, qu'en consideration  
 d'icelle il nous repute iustes encore que  
 nous ne le soyons pas en nous-mesmes:  
 voire que les iniustes, paillards, ruisseurs,  
 adulteres, & remplis de toute autre sorte  
 de vices, doiuent estre couuerts au Iu-  
 gement de Dieu, de cette justice impu-  
 tee, & que selon elle nous sera rendu la  
 couronne de justice, & non selon nos  
 œuures & la iustice inherente qui est en  
 nous. C'est ce que nos reformateurs ont  
 affirmé. Et ce que les Catholiques nient,  
 & moy avec eux par la grace de Dieu.  
 Tel estant l'estat de nostre question,  
 voyez, ie vous prie, comme vous avez

escrit en l'eau toutes les paroles qui suivent en la closture de vostre dernier argument. Et puis que vous, avec les docteurs de l'Eglise Romaine, voulez bien que la mort de Iesus Christ soit meritoire de nostre regeneration, comment est-ce que Dieu peut regenerer un homme à raison de la mort de Iesus Christ, s'il ne la luy impute prealablement? Quel peut estre l'egard que Dieu a à cette mort pour nous regenerer à cause d'icelle, s'il ne la considere comme chose subie pour nous par nostre pleige? Or cela n'est-ce pas nous l'imputer? Ainsi cela mesme que posent les docteurs de l'Eglise Romaine, appellans la mort de Iesus Christ cause meritoire du salut, les force à confesser vne imputation de l'obeyssance & mort de Iesus Christ. Il n'y a personne instruite de nostre question, qui, de la lecture de vos paroles, ne conjecture que vous vous estes endormi sur vostre œuvre, & qu'à vostre resveil vous ne vous estes plus souvenu de la these que vous auiez entrepris de defendre. Car elle vous obligeoit à prouver, non vne imputation de l'obeyssance & de la mort de I. Christ, en consequence de laquelle Dieu nous regenere, (de laquelle nous sommes tous d'accord) mais vne imputa-

tion, en conséquence de laquelle Dieu nous repute iustes encore que nous ne le soyons pas. Qui est le seul point duquel nous disputons.

---

## CHAP. V.

*Que par le tesmoignage des Apostres, & selon l'analogie de leur doctrine, la remission des pechez se prend pour l'operation de Dieu qui nous mortifie à peché afin que nous soyons vivifiez, à iustice.*

**A**yant satisfait de telle sorte à tous vos argumens, ie ne puis croire, que vous, ny autre personne de sens & de conscience, s'y laisse desormais persuader. Mais pour accomplir vostre pleine satisfaction sur le vain estonnement que vous aués que les Catholiques, suiuant tous les Peres (comme vous sçauiez trop mieux) prennent la remission des pechez,

non pour vn simple acte de l'intelligence  
 de Dieu seulement, mais pour vne ope-  
 ration de sa vertu, par laquelle il forme  
 en nous la foy & la repentance, principes  
 de nostre regeneration: ie veux vous fai-  
 re voir ici, pour corollaire de la dispute  
 presente, que tel est le sens naif des Apo-  
 stres, quand ils nous parlent de la remis-  
 sion des pechez que nous auons au Sang  
 de Christ. Ce que si nos Reformateurs  
 eussent compris, ils n'auroient iamais  
 formé mal à propos, comme ils ont fait,  
 cette controuersé de la iustification avec  
 les Catholiques. Je di donc que la re-  
 mission des pechez n'est pas limitee, se-  
 lon le sens des Apostres, au seul pardon  
 de la coulpe, mais qu'elle s'estend princi-  
 palement à l'operation par laquelle Dieu  
 nous deliure de la seruitude de la corru-  
 ption & du vice. Escoutez l'Apostre.  
*Nous auons en Christ redemption par son*  
*Sang, la remission des pechez, selon les ri-*  
*chesses de sa grace, laquelle il a fait abonder*  
*euers nous en toute sagesse & intelligence,*  
 Eph. 1. 7. La remission, ἡ ἀπολύτρωσις,  
 est opposee formellement à la seruitude  
 ou captiuité. Or nostre seruitude confi-  
 ste en deux parties. En la misere que le

peché du premier homme a attirée sur  
 toute sa race: & en la corruption du vi-  
 ce, que la misere a renduë necessaire en  
 la chair de tous les hommes. Si donc la  
 remission des pechez est la redemption  
 que nous auons par le Sang de Christ,  
 commel'Apostre la definit en ce lieu: il  
 s'ensuit que c'est l'operation de Dieu par  
 laquelle nous sommes deliurez du peché  
 regnant, auquel nous estions asservis.  
 Cela est encore plus évident par la raison  
 quel'Apostre donne de nostre deliuran-  
 ce ou redemption, quand il l'attribuë au  
 Sang de Christ. Car Christ, par l'effu-  
 sion de son Sang, ayant satisfait à la peine  
 que nous auons meritee, & ayant beu, en  
 nostre place, la coupe de l'ire de Dieu, a  
 changé cette malediction de Dieu qui  
 estoit sur le genre humain, en instrument  
 de benediction sur tous les fideles, l'ayāt  
 faite la matiere & le suiet, auquel son Es-  
 prit, par la consolation de l'esperance de  
 sa gloire, imprime la vertu qui rend l'af-  
 fliction, la souffrance, & la mort, propres  
 à mortifier nos membres à peché, afin  
 qu'ils soient viuifiez à iustice. Telle est  
 la raison de nostre redemption par le  
 Sang de Christ, lequel, en cette sorte,

nous nettoye de tout peché, comme parle l'Apostre S. Iean. Ainsi, par la vertu du Sang de Christ, ce qui nous estoit misere, n'est plus misere; ce qui nous estoit malediction, n'est plus malediction. Et pourtant le fidele se réjouit & se glorifie en ses souffrances. Ainsi, par la vertu du Sang de Christ, cette malediction precedente, qui, par la crainte de mort, nous tenoit toute nostre vie assuiettis à servitude, est deuenue instrument de benediction, pour affranchir le fidele du peché par l'esperance qu'il a, que souffrant avec Christ il regnera avec luy, & que mourant avec luy il viura avec luy. C'est par cette raison que Christ en sa croix nous a crucifié ce monde, afin que nous mourions avec luy au monde selon la chair, pour viure à Dieu en esprit. C'est la raison du grand Mystere que Dieu a establi en son Fils, selon les richesses de sa grace, par la manifestation de laquelle son Esprit fait cét Œuvre dans le pecheur, ainsi que le declarent ces paroles de l'Apostre qui dit, *que nous auons en Christ redemption par son Sang, la remission des pechez selon les richesses de sa grace, laquelle il a fait abonder enuers nous en toute sagesse & intelligence.*

Par où vous voyez que ce n'est pas vn simple acte de l'intelligence de Dieu, mais l'operation par laquelle il nous illumine, *nous donnant à cognoistre le mystere de sa volonté selon son bon plaisir qu'il a proposé en Iesus Christ, comme l'Apôstre aussi le declare au verset suiuant.* Par où vous deuez obseruer la verité de ce que ie vous ay desia remonstré souuent, que la mesme grace, par laquelle Dieu nous donne remission de nos pechez, est celle par laquelle il nous illumine en la foy, comme il est euident par ces paroles.

Ioignez à ce passage celuy des versets 12. 13. & 14. du premier chapitre aux Collossiens. *Rendans graces au Pere qui nous a rendus capables de participer à l'heritage des Saints en la lumiere. Lequel nous a deliurez de la puissance des tenebres, & nous a transporez au Royaume du Fils de sa dilection, auquel nous auons redemption par son Sang, remission des pechez.* Vous voyez encore ici, que pour expliquer la raison par laquelle Dieu nous a deliurez de la puissance des tenebres, qui est la seruitude du peché: il la recapitule en la redemption que nous auons par son

Sang, c'est à dire, remission des pechez. Car c'est ainsi que Dieu nous rend capables de participer à l'heritage des Saints en la lumiere. C'est à dire capables de recevoir l'illuminatiō qui nous rēd saints, afin que nous heritions le Royaume de gloire. C'est ainsi que Dieu nous delivre de la puissance des tenebres, pour nous transporter au Royaume du Fils de sa dilection, c'est à dire, pour faire que la charité de son Fils regne en nous. C'est, di-ie, en nous tirant de la seruitude & de la captiuité que le peché auoit sur nous en la chair. Ce que Dieu fait en nous par le Sang de son Fils. La raison en est excellemment exprimée en ces autres paroles du mesme Apostre au 2. chapitre de cette Epistre vers. 13. 14. & 15. sur lesquelles vous ne plaindrez pas, comme i'espere, de lire la glose dont ie tascheray de les rendre plus intelligibles qu'elles ne sont sorties iusques à present des mains de nos Interpretes. *Et vous estans morts en vos pechez, & par le prepuce de vostre chair, il vous a viuifiez avec luy vous ayant pardonné tous vos pechez. Ayant effacé l'obligation escrete à la main cōtre nous en ordonnances, qui nous estoit contraire, & laquelle*

*il a ostée du milieu de nous, l'ayant fischee en la croix. Estant depouillé nud, il a mené publiquement en monstre les principauez & puissances, triomphant d'elles en icelle. Nos Interpretes François ont bien fait de ne pas l'er ces trois versets par des conionctions, comme a voulu Beze, qui supplée Et au commencement de chacun, Et ayant effacé. Et ayant despoillé. Ce qui obscurcit vne des principales circonstances qui donne lumiere au sens de l'Apostre. Car ils sont en effect substituez l'un à l'autre appositivement, comme le suiuant estant l'explication de la raison du precedent, ainsi qu'il apparoiſtra par la suite de mon discours. Au premier verset l'Apostre declare trois choses. La premiere l'estat de nostre seruitude du peché qui regnoit par la mort, en l'usage de ce monde. La seconde, nostre viuification en la communion de Christ. La troisieme, la raison par laquelle cette viuification a lieu. L'estat de nostre seruitude du peché, qui regnoit par la mort en l'usage de ce monde, est compris en ces paroles, Et vous estans morts en vos pechez, & par le prepuce de vostre chair. Nostre viuification en la communion de Christ,*

celles-ci, *Il vous a vivifié avec luy*. La raison par laquelle cette vivification a lieu en celles cy, *vous ayant pardonné tous vos pechez*. Quand l'Apostre dit, *que nous sommes morts en nos pechez*, cette parole a bien plus d'emphase que ne luy en attribue l'explication vulgaire de ceux qui prennent ceci comme s'il disoit, que le péché rend nos ames mortes & autant inhabiles & impuissantes à bien faire que les morts sont à produire les actions de vie. Car encore que cette sentence soit véritable en soy, elle n'exprime pas pourtant le sens naïf de l'Apostre qui va bien plus loing. Car il représente par là, qu'en la condition de tous les hommes assujettis à la condamnation de mort, & à toutes les misères qui en dépendent, consiste la cause des pechez dont toutes leurs actions sont souillées. *Vous estes morts en vos pechez*, c'est à dire, pource que vous portez en vostre sein cette mort qui vous remplit de perpetuelle crainte, les passions de vostre chair agitée par l'horreur du mal qui les espouvante, troublent vostre raison en toutes ses pensées ce qui vous fait tomber en continuelle contrauentions à la loy de Dieu. Et de

cela la raison en est adioustee en l'autre membre de la periode, *Et par le prepuce de vostre chair.* Où l'ay euté de traduire comme on fait vulgairement, & *au prepuce.* Car l'Apostre ne dit pas qu'ils soient morts au prepuce, ce qui n'auroit aucun sens conuenable à son propos. Mais ce qu'il dit est, que tous les hommes, comme ils naissent, sont assuiettis au peché, tant par la mort à laquelle ils sont tous condamnez, que par l'vsage de ce monde, auquel tous suiuent naturellement l'appetit de leur chair. C'est ce qu'il appelle, *Le prepuce de vostre chair.* Car en cela estoit distincte la race d'Abraham de tous les autres hommes, qu'elle auoit receu de Dieu la circoncision. Dieu luy ayant déterminé les raisons de l'vsage de ce monde (és benedictions duquel il tesmoignoit neantmoins enuers elle son amour) pour l'adresser par ses ordonnances à le rapporter à la seule fin de son seruice & de sa gloire. Ce que Dieu n'auoit point fait ainsi aux autres nations, qu'il auoit laissées en leur prepuce. Et qu'il auoit laissé cheminer en leurs voyes, suiuan leurs affections & leurs appetits en l'vsage de ce monde, qu'elles

ne rapportoient à d'autre fin que de leur propre amour & de leur propre gloire. C'est ainsi que tous les hommes cheminent naturellement. D'où il arriue que les pensees de leur cœur sont mal en tout temps. Car d'un costé la crainte de mort augmentant en eux la vehemence du desir de la vie, & par consequent de l'amour de leur propre chair; & d'autre part le plaisir des biens de ce monde estant l'vnique obiet du contentement de leur chair, tous leurs mouuemens ne vont de nécessité qu'à satisfaire à ses appetits. C'est donc ainsi que le peché regne en tous les hommes. Ce que l'Apostre a compris en ce peu de paroles grandement emphatiques & significatiues à merueilles.

Or comme tous les hommes ont esté rendus necessairement mortels par le peché du premier homme, & necessairement pecheurs par la mort, Dieu leur ayant determiné la voye de salut en son Fils, a establi en luy la cause de les deliurer du peché par sa mort, ayant mis en sa mort l'efficace de cette vertu à cause de la vie en laquelle il est entré par sa mort. Pour cette cause il faut que tous

ceux, qui, par la foy de ce grand benefice, sont appelez à sa communion, meurent avec luy, & soient crucifiez à ce present monde par l'usage des afflictions, afin que la consolation de l'Esprit de Christ arrachant de leur cœur toute la crainte precedente de la mort & des aduersitez qui la preuiennent, & aneantissant cette crainte par l'esperance de la vie & de la gloire eternelle du Seigneur Iesus, leurs affectations soient arrachees de la terre, & toutes transplantées au ciel, par la seule fin de la gloire de Dieu & de la dilection du prochain qu'ils se proposent désormais en icelles. C'est ce que l'Apostre a compris en ce peu de paroles, *Il vous a viuifiez avec luy.* Ainsi l'Apostre oppose premierement en ces paroles, l'estat de peché auquel tous les hommes sont en eux-mesmes, à l'estat de iustice lequel ils obtiennent en Iesus Christ. Et pour monstrier comment de l'un nous sommes amenez à l'autre, il en propose le moyen en la remission des pechez. L'estat de peché & de la corruption vniuerselle, qui est en tous les hommes vient donc de la condamnation de mort qu'ils ont tous encouruë par la transgres-

sion du premier homme. L'estat de iustice & de sainteté, auquel sont amenez les fideles, vient pareillement de la vie en laquelle Iesus Christ est entré pour leur preparer place, quand le Pere l'a deslié des cordeaux de la mort, & qu'il l'a fait soir à sa dextre. Le moyen par lequel Dieu nous fait passer d'un estat à l'autre est la mort de son Fils, l'effusion de son Sang respandu en remission de nos pechez. Car Dieu estant appaisé enuers le peché des hommes par la mort de son Fils, la communion de cette mort a esté le seul moyen, efficace de destruire la puissance du peché en l'homme. Pource que Dieu luy manifestant, que telle est la cause de sa misericorde & de son bon plaisir enuers luy, cette reuelation ou cognoissance est celle qui forme, par la vertu de son Esprit, la foy en l'entendement de l'homme abbatu sous le sentiment de la misere en laquelle il est tombé par son peché. Tellement que la communion de la mort de Christ, laquelle appaisant l'ire de Dieu a changé la malédiction precedente en instrument de la benediction celeste, rend desormais le fidele capable de recevoir la consolation

de l'esperance de vie & de gloire eter-  
nelle, par laquelle l'Esprit Sainct du Sei-  
gneur respand la charité en son cœur,  
l'elevant à aimer Dieu plus que toutes  
choses & son prochain comme soy mes-  
me. Telle est la raison de la remission de  
nos pechez par le Sang de Iesus Christ.  
C'est l'operation de Dieu en nous, qui,  
par la communion de la mort de son  
Fils, mortifie en nous nostre vieil hom-  
me, afin que le nouuel homme, par la vie  
de Christ, soit formé en nous en iustice  
& vraye sainteté. A quoy se rapportent  
les paroles de l'Apostre, *qu'il est mort pour  
nos pechez*, voila la remission des pechez.  
*Et resuscité pour nostre iustification*, voila  
la iustification du fidele. Ce que si nos  
reformateurs eussent entendu, ils n'eus-  
sent iamais dit que la remission des pe-  
chez & nostre iustification est vne mes-  
me chose. Bien moins encore que la re-  
mission des pechez est vn simple acte de  
l'intelligence de Dieu qui nous repete  
iustes encor que nous ne le soyons pas.  
Esloignez vostre esprit & vostre cœur  
de cette chimere.

Or l'Apostre nous ayant ainsi proposé  
le moyen de nostre viuification à iustice

par la remission de nos pechez, c'est à dire par nostre mortification à peché, il nous declare au verset suiuant, comment Christ, par sa mort, qui est la cause de la remission de nos pechez, a destruit la puissance du peché qui regnoit en nous. *Ayant effacé, dit-il, l'obligation escrite à la main contre nous en ordonnances, qui nous estois contraire, & laquelle il a ostée du milieu de nous, l'ayant clouée à la croix.* Cette obligation escrite à la main, dont il parle, est la loy, laquelle il appelle ailleurs la puissance du peché, dont vous auez veu la raison expliquée cy dessus, & en diuers autres endroiets de mes escrits. I'ay traduit τὸ χειρόγραπον *l'obligation escrite à la main*, à dessein de représenter toute l'amplitude du sens de l'Apostre, lequel traittât de la loy, en la dispute qu'il auoit contre les Iudaïsans, qui vouloient retenir la loy de Moyse, vse expressement de cette espee de Sarcasme, autant plein de bonne grace que d'emphase contre la vanité du sens de la chair de ses aduersaires; pour rabattre les eloges par lesquels ils auoient de coustume de recommander la loy, & de maintenir qu'elle ne deuoit point estre abolie. L'vne de

leurs principales raisons estoit, que la loy auoit esté escriite du doigt de Dieu es Tables de Moÿse, & par consequent qu'elle deuoit durer eternellement. L'Apostre se mocquant de leur ignorance, leur concede que Dieu auoit escrit la loy de sa main. Et neanmoins, pour leur monstrier qu'elle n'auoit pas pour cela force en soy de viuifier l'homme, mais seulement de le retenir en la mort, & par la mort dans le peché, il l'appelle plaisamment τὸ χειρόγραφον, & adiousté, τὸ κατ' ἡμῶν, *vne obligation escriite à la main contre nous.* Ainsi par tout ailleurs il l'appelle *la lettre qui tue escriite en Tables de pierre, le ministère de mort, la puissance du peché.* Mais comment cette loy escriite estoit-elle contre nous? C'est ce qu'il nous donne à entendre par ces termes, τοῖς δόγμασι, qui se rapportent, comme d'autres l'ont obserué, au mot Hebrieu דברי חוקים, signifiant les ordonnances de la loy, qui comprenoient proprement la distinction de l'usage des choses diuerses de cette vie.

Or la raison, pour laquelle l'Apostre dit que la loy estoit vne obligatiō cōtre

nous au regard de ces ordonnances, n'a pas esté vulgairement entēduë par nos Interpretes. Car ils expliquent cette obligation contre nous és ordonnances de la loy, en ce, disent ils, que les ceremonies auoient en elles quelque confession de coulpe, laquelle confession rendoit les obseruateurs d'icelles obligez deuant le iugement de Dieu comme par vne obligation escriite. Exemple: Qu'estoit-ce autre chose des lue-mens, sinon un tesmoignage des souillures & ordures? Toutesfois & quantes que quelque beste estoit sacrifice, le peuple qui estoit là present, ne voyoit-il pas là l'image de sa mort? Car quand les hommes substituoient en leur place vne beste innocente, ils confessoient qu'ils estoient digne de cette mort là. Brief autant qu'il y auoit là de ceremonies, autant estoit-ce de spectacles de la condamnation des hommes, & autant de cedules & obligations. Ce sont les paroles de Calvin sur ce lieu, qui ont aussi esté suiuiques de Beze. Comme le sens auquel se rangent tous les autres. C'est aussi le fondement que vous donnez à l'interpretation que vous auez entreprise de l'Epistre aux Galates. Vous auez tous iusques icy peu compris le sens de l'Apostre. Et

certes le raisonnement que font nos Docteurs sur ceci tire des conclusions toutes contraires à leurs premices. Pourquoy, ie vous prie, les ceremonies seront-elles reputées pour obligation au Iugement de Dieu, sous ombre qu'elles ont en elles, ie ne di pas quelque confession de coulpe, mais vne manifeste confession de coulpe. Car tant s'en faut que la confession de coulpe porte obligation de peine au Iugement de Dieu, qu'au contraire c'est le moyen d'en descharger le pecheur. Veu que la confession de coulpe est vn acte de repentance. Or Dieu ne condamne pas ceux qui se repentent, & qui confessent leurs pechez, mais il leur pardonne. Certes ie ne sçay à quoy pensoient ces bonnes gens quand ils ont raisonné de la sorte. Car si la raison pour laquelle les ceremonies rendoient la loy vne obligation contre nous, & qui a fait qu'elle a deu estre abolie, a esté pource qu'en elles il y auoit vne confession de coulpe; il faudra aussi, par mesme raison, dire que la croix de Christ nous est contraire, & qu'il la faut abolir: car nul ne contemple la croix de Christ, & ne

l'embrasse qu'il ne se confesse grandement coupable. Sera-t'elle donc pour cela reputée vne obligation contre nous ? Que vous en semble ? Voyez-vous pas la foiblesse du fondement sur lequel vous faites la loy vne obligation contre nous ? Si vous dites qu'avec la confession de coulpe, à laquelle nous obliges la croix de Christ, nous auons aussi en elle l'assurance de nostre remission : ie vous respon qu'à proportion les Iuifs auoient en leurs ceremonies, l'assurance de la grace de Dieu. Car comme d'une part ils confessoient en elles leurs pechez, ils embrassoient aussi d'autre costé l'assurance de la misericorde qui leur en auoit institué cette expiation, laquelle se rapportoit, comme type, à la verité de l'expiation & du lauement que nous en auons en Iesus Christ. Et certainement la raison formelle de l'institution des ceremonies consiste en ce qu'elles ont esté seaux de la grace & de la misericorde de Dieu. Et pour cét effect les trois capitales ceremonies dont toutes les autres dependent, sont les Sabbaths, la Circoncision & la Pasque. l'en rendray

ailleurs la raison, & en expliqueray la cause. La raison formelle de l'institution des ceremonies n'estât donc pas restreinte à la seule confession de la coulpe, en ceux qui les obseruoient, mais ayant, outre cela, leur fin correspōdante à la raison de la grace, & à l'assurance de la misericorde de Dieu enuers tous ceux qui se repentent & qui confessent leurs pechez : on ne peut, pour ce regard, en façon du monde, reputer la loy, pour les ceremonies, vne obligation contre nous, & qui nous estoit contraire. Et de faict, repassez les yeux sur les exemples qu'ils rapportent, vous les trouuerez tous contraires à vostre intention. *Les lauemens estoient vn tesmoignage des soüillures & ordures.* Ouy, mais vn tesmoignage que le pecheur qui les confessoit en estoit repurgé & nettoyé. *Le peuple voyoit en la beste sacrifiée l'image de sa mort, qu'il auoit meritée.* Il est vray. Mais il voyoit à mesme temps que Dieu l'auoit espargné, & que par sa misericorde, il l'auoit exempté de cette peine pource qu'il auoit confessé son peché. Trouuez vous en cela qu'il y ait quelque chose pourquoy l'on

doine estimer la loy vne obligation contre nous? Et non plustost vne deliurance de l'obligation?

Ceux qui expliquent ainsi la cause pour laquelle l'Apostre appelle la loy vne obligation contre nous, ont bien preuen cette absurdité qui suit leur explication. Mais ils ne respondent rien qui satisfasse. Voicy la solution que Calvin tasche d'y apporter, *Si on met en auant que c'estoient Sacremens de la grace de Dieu, comme le Baptesme & la Cene nous sont auourd'huy: la responce est facile à faire. Car il faut considerer deux choses es ceremonies anciennes, à sçauoir le qui conuenoit au temps, & ce qui amenoit les hommes au regne de Christ. Tout ce qui se faisoit adonc ne monstrois autre chose en soy qu'obligation: La grace estoit aucunement en suspens, iusques à la venue de Christ. Non pas que les Peres en fussent exclus, mais ils n'auoient pas la manifestation d'icelle presente en leurs ceremonies. Ils ne voyoient rien es sacrifices que le sang des bestes, ils ne voyoient rien es lauemens que l'eau. Ainsi donc, quant au present, la coulpe demeueroit: mesmes les ceremonies scelloient la coulpe ou condamnation. L'Apostre aussi en parle en cette sorte*

*en toute l'Epistre aux Hebreux, pource qu'il met Christ à l'opposite des ceremonies. En toute cette response il n'y a aucune solution categorique de la question. Car il ne satisfait point à la difficulté proposée. Il ne dit point pourquoy les Sacrements du Baptisme & de la Cene, ne sont point reputez contenir vne obligation qui nous est contraire : ou pourquoy cela se doit dire des ceremonies, puis que la raison ( *ex hypothesi* ) en est pareille à celle des Sacrements. Il dit que la response est facile à faire, mais il la trouue facile en ne touchant point du tout à la difficulté de la question. Quant à ce qu'il dit au reste, où il est en partie faux, ou en partie non intelligible, ou contradictoire aux propres hypotheses de l'Auteur. La distinction qu'il nous donne touchant les choses à considerer ès ceremonies, pour la difference de ce qui conuenoit au temps, & de ce qui amenoit les hommes à Christ, n'est fondee en aucune diuersité qui se puisse considerer en la raison formelle de l'institution des ceremonies. Car ce qui est entendu sous ces termes, d'amener les hommes au regne de Christ, est la mef-*

me chose que *ce qui conuenoit au temps*. Le temps est l'enfance de l'heritier. Pour ce suiet, il auoit besoin de pedagogie. La pedagogie est ce qui amenoit les hommes au regne de Christ. C'est ce qui les entretenoit iusqu'à ce que le regne de Christ fust venu à eux. Et par tant cela mesme qui amenoit les hommes au regne de Christ, est ce qui conuenoit au temps. Il n'y a point de diuersité de l'un à l'autre. Il n'y a point de distinction à faire. Quand le regne de Christ est venu, il a fallu que ce qui amenoit les hommes à Christ, & ce qui conuenoit au temps ait cessé. Cette distinction est donc purement illusoire. Ce qu'il apporte en suite pour l'expliquer est tel que i'aduoue ne le pas entendre, & ie ne croy pas que l'Auteur mesme eust pû rendre aucune raison valable du sens qu'il luy auroit voulu donner. *Tout ce qui se faisoit adonc, dit-il, ne monstroit autre chose en soy qu'obligation, la grace estoit aucunement en suspens iusques la venue de Christ.* Mais tout ce qui se faisoit lors, c'est à dire, comme il l'entend, tout ce qui conuenoit au temps, estoit la pedagogie qui amenoit les

hommes au regne de Christ. Je ne sçay donc pourquoy il dit que cela ne monstroït en soy qu'obligation. Car cela monstroït, & que les hommes estoient coupables, & que Dieu estoit misericordieux enuers ceux qui se repentent. En ce qu'il dit, *que la grace estoit aucunement en suspens iusques à la venue de Christ.* Ce terme d'*aucunement* n'y est employé que pour arrester l'esprit du lecteur par vne fausse vray-semblance. Car que veut dire *estre aucunement en suspens.*? Dieu communiquoit-il lors sa grace aux hommes, ou non? S'il ne la communiquoit point encore, il ne faut point dire qu'elle fust aucunement en suspens. Il faut dire rondement qu'elle estoit en suspens, qu'elle n'auoit point du tout d'existence. Si Dieu communiquoit sa grace, on ne peut dire en aucune façon qu'elle fust en suspens. Car vne chose qui a effect n'est point suspendue. Or il est constant que Dieu communiquoit lors sa grace. Car encore qu'elle ne fust, ny en telle mesure, ny telle efficace, que par la manifestation de Iesus Christ, elle estoit neantmoins actuellement communi-

muniquée. Ce que l'Autheur de ce commentaire n'a point mesme ignoré ny reuouqué en doute. Et c'est aussi ce qui l'oblige à se retracter sur le champ, mais par vn discours plein d'ambiguité & d'ambages. *Non pas, dit-il, que les Peres en fussent exclus, mais ils n'auoient pas la manifestation d'icelle presente en leurs ceremonies.* S'ils n'en estoient pas exclus, elle n'estoit donc pas suspendue. Au reste, si par la manifestation presente de la grace aux ceremonies, il entend cette mesme declaration qui nous en a esté faite par Christ, il est certain qu'ils ne l'auoient pas presente en leurs ceremonies. Mais cela ne sert de rien au propos. Car ils auoient presente aux ceremonies la grace qui leur estoit reuelee, & de laquelle ils iouyssoient lors. Et pourtant ce qu'il adiouste est purement faux, *qu'ils ne voyoient rien aux sacrifices que le sang des bestes; qu'ils ne voyoient rien aux lauemens que l'eau.* Cela estoit bon pour les prophanes, pour ceux qui estoient destituez de foy, qui ne contemploient point aux ceremonies la raison formelle de leur institution. Mais tous les fideles voyoient, avec le Sang des bestes sacri-

fices, la grace de Dieu, qui par sa miséricorde exemptoit de mort le pecheur repentant. Ils voyoient avec l'eau aux lavesmens, la grace de Dieu, qui par sa vertu nettoyoit les fideles pour estre admis à la participation de la benediction de l'Eternel. Tous les Liures des Prophetes, tous les Pseaumes de David deposent en toutes leurs pages pour cette verité. Mais ce qui est plus estrange en cette hypothese, & ce qui doit faire croire que ces propositions sont eschappees à Calvin, pour n'auoir pû voir la vraye raison de l'abolition des ceremonies, & de ce qui les rendoit contraires à l'exercice de la parfaite pieté : c'est qu'en effect elles sont contraires à ses autres hypotheses qui vont à vne autre extremité. Comme quand il veut que les Sacremens de l'ancienne loy fussent les mesmes formellement que ceux de la nouuelle. Attribuant aux vns & aux autres vne mesme definition, qui consiste à signifier ou à sceller au cœur des fideles la grace que la mort de Iesus Christ nous a acquise. Et n'y recognoissant autre difference, sinon que les anciens exhiboient Christ à venir, & les nouveaux Christ desia venu.

Or les Sacremens faisoient parties des ceremonies. Auroit-il donc dit, que les anciens ne voyoient en la Pasque que l'Agneau? Qu'ils ne voyoient en la Circuncision que la chair sanglante du prepucierougné? Certes il auroit luy-mesme le premier prononcé anatheme contre qui auroit eu cette pensée.

Ses fondemens ainsi destruits, la solution qu'il a bastie dessus tombe aussi par terre. Car ce qu'il conclud, *qu'ainsi donc quant au regard present la coulpe demeureit, & que mesmes les ceremonies seelloient la coulpe ou condamnation*, est manifestement contraire à toute l'institution legale. Veu que Moysse declare notamment par tout, que par la fonction sacerdotale le sacrifice pour le peché estant offert pour celuy qui est coupable, le peché luy est pardonné. C'estont les paroles solennelles tant de fois reïterees au Leuitique. *Et le Sacrificateur fera propitiation pour luy deuant l'Eternel, & il luy sera pardonné, pour quelque chose d'entre toutes celles qui luy seroit aduenu de faire, seulement qu'il en fust coupable.* Leuitiq. 6. 7. En quel sens, ie vous prie, a-t'il pû dire, *que la coulpe demeureit, & que mesme les*

ceremonies seelloient la coulpe ou condamnacion. Veu que c'est chose trop cogneuë, qu'elles estoient instituées exprès, afin que le coupable, qui auroit deuëment satisfait à leur ordonnance, fust absous de son peché & mis hors de coulpe. Ce qu'il dit, que l'Apostre en parle aussi en cette sorte en toute l'Epistre aux Hebreux, pource qu'il met Christ à l'oppo site des ceremonies, est vn telmoignage, que, comme ce bon personnage n'a point cognu la vraye raison de l'institution des ceremonies, ny de la necessité de leur abolition: aussi a-t'il compris peu exactement les raisons & le sens veritable de la doctrine que l'Apostre traite en cette excellente Epistre aux Hebreux. Il y auoit leu que la loy ayant l'ombre des biens à venir, non l'image mesme des choses, ne peut sanctifier par les mesmes sacrifices qu'ils offrent chacun an continuellement, ceux qui s'en approchent. Veu qu'ils auroient cessé d'estre offerts, pource que ceux qui sacrifient n'auroient plus aucune conscience de peché, estans vne fois purifiez, mais il y a en iceux vne commemoration de pechez tous les ans. Car il est impossible que le sang des taureaux & des boucs ostent les pechez, Hebr. 10. 1. 2.

3. 4. C'est d'icy, sans doute, qu'il a creu  
recueillir, que nonobstant les sacrifices &  
l'accomplissement des ceremonies, la  
culpé demeueroit, & que la condamna-  
tion n'estoit point ostee. Mais sa mespri-  
se est toute manifeste. Car comme il y a  
deux choses au peché, la culpé & le vice,  
l'Apostre ne dit pas icy, que par les sacri-  
fices de l'ancienne loy, la culpé ne fust pas  
ostee, & que le sacrifiant ne fust pas deli-  
uré de la cōdamnation: mais il remonstre  
que par iceux la conscience du pécheur  
n'estoit pas repurgee du vice. Car son  
propos est notammēt de la parfaicte san-  
ctification, du moyen d'estre purifié en  
sa conscience. Mais quant à la culpé &  
à la condamnation encourue par le pe-  
cheur, il est constant que le peché luy  
estoit pardonné pour ce regard, & qu'e-  
stant, par ce moyen, deliuré de la peine  
dont la loy le menaçoit, il estoit admis,  
en la société du peuple de Dieu, à la par-  
ticipation de toutes les benedictions  
promises. Et cēt estat du pecheur ainsi  
reestabli, tenu pour ce regard vray mem-  
bre de la société du peuple Israelite, ex-  
terieure & charnelle quant à ce, & confi-  
stant en l'usage des biens presens & ex.

rornes, est ce que le mesme Apostre ap-  
 pelle au chapitre precedent verset 13.  
*la pureté de la chair, disant, que le sang des*  
*taureaux & des boues, & la cendre de la*  
*genice dont on fait aspersión sur les souillees,*  
*les sanctifie quant à la chair.* Mais non  
 qu'il ait eu la vertu de purifier la con-  
 science des œuvres mortes pour seruir  
 au Dieu viuant. Il n'y a que le Sang de  
 Christ qui s'est offert soy-mesme par l'Es-  
 prit Eternel sans nulle tache à Dieu, à qui  
 cette vertu appartienne. La raison de  
 cela est que, par le sang des taureaux &  
 des boues, le pecheur, obtenant pour le  
 temps le pardon de sa coulpe & l'exem-  
 ption de la peine encourue par la loy,  
 iouissoit, en la société de son peuple, des  
 biens de la vie presente. Or cela n'estoit  
 pas capable de former en la conscience  
 vne parfaite saincteté, d'y engendrer  
 vn amour souuerain de Dieu sur toutes  
 choses, & du prochain comme de soy-  
 mesme. Car tous ceux qui dans la de-  
 liurance de leurs peines arrestoient leur  
 cœur à la benediction temporelle de la  
 loy, sans monter à la cause de cette bene-  
 diction qui estoit la promesse, & à l'ac-  
 complissement esperé de la promesse,

n'aimoient Dieu pour tout que selon la chair. Mais maintenant par le Sang de Christ nous obtenons, en la remission de tous nos pechez, l'effect de nostre mortification par l'usage mesme des souffrances, lesquelles, au lieu de malediction, ont esté rendues matiere & instrument par où la benediction celeste paruient à nous, & la participation, non des biens presens & qui sont passagers avec cette vie, mais de ceux qui demeurent au siecle à venir. Et dont le sentiment que nous donne l'Esprit Eternel est vrayment capable & puissant de former en nous la saincteté parfaite, & d'y engendrer le souuerain amour de Dieu sur toutes choses, & de nostre prochain comme de nous-mesmes.

On dira que nonobstant les sacrifices de l'ancienne loy les sacrifiants ne laissoient pas de mourir; & par consequent que Calvin a raison de dire que la coulpe demeueroit, puis que l'effect de la condamnation s'enfuiuoit en fin par la mort. Mais cette raison pourroit estre aussi bien alleguée contre luy-mesme, & contre l'Euangile. Car nonobstant la grace obtenue de la remission de nos pechez par le

Sacrifice de Iesus Christ, les fideles ne laissent pas de mourir. Dira-t'on donc que la coulpe demeure? Nenny certes. Quoy donc? Et que faut-il cependant respondre à l'obiection? Car en effect elle a de l'apparence, & contre le Sacrifice de Iesus Christ, & contre les sacrifices de la loy. Pour le Sacrifice de Iesus Christ la solution est facile à donner, par ce que i'ay desia dit diuerfes fois sur ce suiet, que l'effect de son Sacrifice a esté, en souffrant la mort pour le peché des hommes, de leur en obtenir le pardon, non en retractant la loy immuable de Dieu pour la mort de cette chair, que le peché a introduite : mais en ostant de cette mort l'ire & la malediction de Dieu, & en nous acquerant, par sa mort, la grace & la benediction du bien eternal & immuable, afin de nous amener à la communication de ce bien par la communion de sa mort. Au regard des sacrifices de la loy, la response doit estre tiree de trois obseruations. La premiere est, que la loy donnee à l'homme pecheur (tel que l'usage en est considéré en la loy de Moysse) ne promet nullement à l'homme immortalité : mais elle suppose, comme chose

définie de Dieu, la fin des iours de  
 l'homme, que Moyse limite selon le  
 cours ordinaire à soixante & dix, ou  
 quatre vingts ans. C'est pourquoy la loy  
 promet, suiuant la propiciation de ses  
 sacrifices, deliurance d'aduersité, prof-  
 perité & benediction en l'usage des cho-  
 ses de cette vie, durant le cours d'icelle.  
 La seconde obseruation est, que comme  
 la loy des commandemens ( qui est  
 celle que l'Apostre oppose à la grace  
 & à l'Euangile ) procede par l'obserua-  
 tion des commandemens singuliers, pour  
 conduire l'homme à l'accomplissement  
 du grand commandement, qui est la fin  
 de la loy, c'est à dire la iustice parfaite de  
 l'Euangile: aussi les pechez, qui sont con-  
 trauentions à la loy, se considerent en la  
 transgression des commandemens singu-  
 liers, aupatauant qu'en la transgression du  
 grand commandement. La loy, pour  
 l'obseruation des commandemens, regar-  
 de premierement, si l'homme s'est abste-  
 nu de rendre seruice aux faux Dieux. S'il  
 s'est gardé des Idoles. S'il a euité de  
 prendre le Nom de l'Eternel en vain: S'il  
 a gardé les Sabbaths. S'il a honoré pere  
 & merc. S'il s'est abstenu de meurtre,

de paillardise, de larcin, de faux témoignage, & de pratiques pour auoir ce qui est à son prochain. Et généralement, s'il a obserué toutes les ordonnances qui dependent en detail des commandemens des deux Tables, tant és choses religieuses que ciuiles. Tout de mesme pour la contrauention, elle regarde s'il a delinqué en quelqu'une de ces choses. C'est ce que l'Escripture appelle les œuvres de la loy, & les pechez contre la loy. Or c'est à l'observation de ces commandemens que la loy promet sa benediction, & à leur contrauention qu'elle menace de sa malediction. Mais quant au grand commandement, D'aimer Dieu de tout son cœur, & son prochain comme soy-mesme: ny les menaces de la loy ne peuvent destourner l'homme pecheur d'y contreuenir, ny ses promesses l'encliner à les obseruer. La troisieme observation est, que la loy des sacrifices, qui propose, en iceux, au pecheur qui cōfesse son peché & qui s'en repent, le remede que la misericorde de Dieu luy presente, pour le deliurer de la peine qu'il a encourue par son peché: regarde pareillement l'expiation des mesmes pechez que la loy des

commandemens considere. Et par consequent exemptant le pecheur repentant de la peine dont la loy le menace, sa propiciation le restablit en la iouyssance des benedictions que la loy luy promet. Ce qui a lieu selon le cours defini pour cette vie à l'homme pecheur, auquel la loy de Moysa estée donnée. Partant la response est, que la mort ineuitable qui arriue à l'homme pecheur sous la loy, ne contrevient point à la raison de la propiciation des sacrifices, & au pardon que le pecheur repentant obtenoit par iceux de chaque peché pour lequel il offroit; pour ce qu'il iouyssoit de la benediction par la propiciation faite pour son peché par le sacrifice, tout autant que la raison de l'usage de la loy & de ses sacrifices a d'estenduë. Tellement qu'on ne peut dire que la coulpe demeueroit, & que la condamnation s'ensuiuoit encore apres le sacrifice.

Il faut donc retenir cette obseruation, que la loy donnée à l'homme pecheur ne luy promet point l'immortalité. Mais qu'elle luy propose, dans vn cours limité de sa vie, la benediction & l'usage commode des choses qui appartiennent à la

prosperité d'icelle moyenant l'obserua-  
 tion des commandemens, & moyenant  
 l'expiation des sacrifices, à ceux qui de-  
 linquent & se repentent. Dont est que  
 l'homme cependant ne laissoit pas de  
 mourir, & de goustier les maux & les mi-  
 seres de la vie. Ce qui arriuoit mesme  
 le plus souuent aux gens de bien. Or de  
 cette obseruation nous recueillons la rai-  
 son pour laquelle toute l'institution du  
 seruice de la loy est appelée vne pedago-  
 gie pour amener les hommes à Christ.  
 Ce qui est tres-digne d'estre entêdu. Le  
 fondemêt sur lequel nous en deuons as-  
 seoir l'explication est en ces paroles de  
 l'Apostre, Rom. 13. 10. *L'accomplissement  
 de la loy est charité, que luy-mesme expri-  
 me encor ainsi, 1. Tim. 1. 5. La fin du com-  
 mandement c'est charité d'un cœur pur, d'une  
 bonne conscience, & d'une foy non feinte.*  
 Car il fait distinction en ces paroles entre  
 l'accomplissement de la loy ou la fin du  
 commandement, qu'il dit estre accom-  
 plie par la charité. Et cela est euident par  
 la suite de ce qu'il dit, *que la loy n'est point  
 mise pour le iuste, mais pour les iniques & qui  
 ne se peuent ranger, pour ceux qui sont sans  
 pieté & les mal-viuans, pour les gens sans*

*religion & profanes, pour les meurtriers de  
 pere & de mere, & homicides, bougres,  
 larrons d'hommes, menteurs, perjurez, &c.  
 C'est chose claire que par la loy il entend  
 ici les commandemens singuliers où ces  
 choses sont defenduës. Car quant aux  
 deux grands commandemens, en l'ac-  
 complissement desquels la charité consi-  
 ste par l'amour de Dieu de tout nostre  
 cœur, & de nostre prochain comme de  
 nous mesmes : il est certain que l'Apo-  
 stre ne diroit pas, qu'ils ne sont pas mis pour  
 les iustes, mais pour les iniques, Car il est ma-  
 nifeste que ces deux commãdemens ap-  
 partiennent aux justes, aux plus saincts,  
 aux Anges, à Iesus Christ mesme. Or leur  
 principale difference est, que l'homme  
 peut bien cheminer en l'execution des  
 commandemens singuliers par l'adresse,  
 par la conduite, & par l'inclination de  
 son franc-arbitre, meu par les promesses  
 ou par les menaces de la loy. Mais quant  
 à l'execution des deux grands comman-  
 demens qui consiste en charité, l'homme  
 n'y peut cheminer que par la conduite  
 du Sainct Esprit, selon les promesses &  
 l'esperance de l'Euangile. Car le fruiet de  
 l'Esprit est charité, ioye, paix, esprit patient,*

*benignité, bonté, loyauté, douceur, at-*  
*trempance : contre telles choses ne s'adres-*  
*se point la loy, Gal. 5. 22. 23. Ainsi donc,*  
 par la loy proprement & spécialement  
 ainsi appelée, est entendue la multitude  
 de tous les commandemens singuliers  
 que les promesses & les menaces de la  
 loy regardent, & pour la contrauention  
 desquels l'expiation ou la propiciation  
 des sacrifices & l'usage de toutes les cere-  
 monies estoient instituez. A ce fonde-  
 ment, *que la fin de la loy est charité, est*  
 conforme ce que dit le mesme Apostre,  
 Rom. 10. 4. *Que Christ est la fin de la loy en*  
*justice à tout croyant.* Car c'est par la  
 seule cognoissance de Iesus Christ que la  
 loy de iustice, le parfait amour de Dieu  
 & du prochain, la vraye charité est ac-  
 complice en nous. Pour cette cause, Dieu  
 enseignant à son peuple l'usage de la loy  
 & de son alliance instituée avec l'homme  
 selon la nature, tel que l'homme devenu  
 pecheur, & assuietti à la mort, en peut &  
 doit user pour le seruice qu'il doit à  
 Dieu : il adioignit l'enseignement de cet  
 usage de la loy, à la cognoissance qu'il  
 auoit auparauant donnée à son peuple  
 de ses promesses de grace, fondees en

l'esperance de la venuë d'une semence benite, qui deuoit amener l'accomplissement des benedictions de Dieu. Cette semence benite est le Messie, dont l'en-uoy a esté predict par Moysse, figuré par Iosué, promis de temps en temps par les Prophetes. Durant l'attente de ce Messie, ( par la venuë duquel le Royaume de Dieu a deu estre accompli en tous ses fideles, moyenant la iustice des siecles, & la parfaicte charité qu'il deuoit faire regner en leurs cœurs, ) l'usage de la loy cependant a serui de pedagogie aux enfans de Dieu pour les amener aux bords de ce Royaume, comme Moysse amena le peuple d'Israel à l'entrée de la terre de Canaan sans passer le Iordain. Car ce fut Iosué qui les fit passer le Iordain, & les introduisit en la terre. Figure de l'accomplissement spirituel de la grace de Iesus Christ, par le Baptesme duquel, apres que la loy de Moysse est morte & enterreée pour tous les fideles, ils sont introduicts en la benediction promise, qui est le Saint Esprit qui nous est donne, par lequel Dieu regne en nous pleinement par la charité respandue en nos cœurs. Car auparauant cela sous

Moyse & sous la loy, cette plenitude de grace, cette parfaicte charité n'estoit point respanduë au cœur du fidele. La pedagogie de la loy, auant que la mort de Christ fust accomplie, & la vertu manifestee, engendroit au cœur du fidele vn amour de Dieu foible, tendre, & encore charnel, à cause que les vrais biens eternels, qui n'ont peu estre manifestez que par la gloire de Christ, estoient voilez de l'ombre des biens temporels & charnels, en l'esperance de la venue du Messie. Or à cette fin estoit employée la pedagogie de la loy, dont la raison estoit double. L'une en ses menaces, l'autre en ses promesses. Les menaces estoient de mort, de maux, de souffrances, de tribulations, & de misere, selon la vengeance de Dieu contre le peché. Ce decret de vengeance a esté, par la loy, irreuocablement, perpetuellement, & vniuersellement executoire sur tous les hommes à cause de la corruption de toute chair aduenue par le peché du premier homme. Quant aux promesses, elles n'ont peu auoir leur effect ny vniuersel, ny perpetuel, à cause qu'elles estoient suspenduës d'une cause qui n'est, ny vniuerselle, ny perpetuelle, à sçauoir,

à sçauoir l'obeïssance del'homme, lequel  
 peche sept fois le iour. Pour cette rai-  
 son, la malediction a predominé en la  
 loy par dessus la benediction. Et pour-  
 tant l'Apostre nous dit, *que tous ceux qui  
 sont de la loy sont sous malediction*, Gal. 3.  
 10. C'est la cause pourquoy toutes les  
 ceremonies, les sacrifices, les expiations,  
 les propitiations, la fin desquelles estoit  
 de restablir la benediction, ne le pou-  
 uoient faire en telle sorte que la maledi-  
 ction vniuerselle de la mort ne tranchast  
 en fin le plus beau fil de la prosperité de la  
 vie. C'est pourquoy si les fideles n'eussent  
 eu autre esperance que celle qui estoit  
 fondée sur les prosperitez qu'ils obte-  
 noient sous la loy, elle auroit esté entie-  
 rement fragile & ruineuse Il falloit donc,  
 pour cette raison, que l'esperance de la  
 venue du Messie interuint, en laquelle  
 vne benediction & vne felicité sans fin  
 estoit attenduë. Et pourtant, comme la  
 mort ineuitable par la loy retranchoit  
 aux fideles le cours des prosperitez pro-  
 mises, il falloit que leur foy se reposast  
 en l'attente bien heureuse de la venue du  
 Messie. Par ce moyen la pedagogie de la  
 loy amenoit les hommes à la foy de la

promesse, & par la foy à la fin de la loy, c'est à dire, à la vraye iustice, & à l'amour de Dieu sur toutes choses, quoy que foible pour les raisons susdites. Car les fideles, sous cette pedagogie, aimoient Dieu foiblement au prix de l'amour & de la charité que le S. Esprit, par la cognoissance de Christ, respand en nos cœurs. Mais toutesfois ils aimoient aussi Dieu sur toutes choses, pource qu'ils recognoissoient Dieu autheur de toutes choses, & qu'ils acquiesçoient en luy comme au rocher de leur salut & de leur deliurance, & duquel toutes les benedictions découloient sur eux. Ils preferoient donc Dieu & sa gratuité, comme la cause, à la prosperité qu'ils desiroient, comme à l'effect. Et ainsi ils chantoient à Dieu comme fait David, *Ta gratuité est meilleure que la vie; pourtant mes lèures te loueront.* C'est pourquoy cōme les fideles, consideroient lors les prosperitez presentes, par lesquelles Dieu, selon la loy, confirmoit son amour enuers les hommes: ils cognoissoient que leurs propres defauts les rendoient incapables de posseder les biens qu'ils desiroient, & que l'expiation des sacrifices ne leur en

pouuoit reſtablir vn vſage perpetuel, à  
 cauſe que les ſacrifices des taureaux &  
 des boucs ne pouuoient oſter la cauſe du  
 peché, ni par ce moyen ſanctifier l'hōme  
 pour ne pecher plus. Regardans dōc, pour  
 cette cauſe, à la neceſſité de la mort, il fal-  
 loit qu'ils cherçaſſent vn autre fonde-  
 ment de proſperité que celui de la loy, &  
 vne autre maniere de ſacrifice, qui con-  
 ſiſtoit en l'humiliation meſme que leur  
 donnoit l'aduerſité & l'apprehenſion de  
 la mort. C'eſt pourquoy la foy des fide-  
 les amenee, par cette pédagogie, à la co-  
 gnoiſſance de la fin de la loy, les faiſoit  
 parler comme nous voyons que fait Da-  
 uid au Pſeume 51. *Tu ne pren point plaiſir  
 aux ſacrifices, auirement i'en bailleroy, l'ho-  
 locauſte ne t'eſt point agreable.* Comme s'il  
 diſoit, Ce ne n'eſt pas de là que dépend  
 le bon plaiſir par lequel tu donnes ioye &  
 lieſſe aux tiens. *Les ſacrifices de Dieu ſont  
 l'eſprit froiſſé. O Dieu tu ne meſpriſe point  
 le cœur froiſſé & brisé!* Ce qu'ayant dit,  
 nous voyōs qu'il eleue, au meſme temps,  
 ſon cœur vers l'eſperance de l'eſtabliſſe-  
 ment d'une parfaite felicité en la venuë  
 du Meſſie, laquelle eſt touſiours celebree  
 de tous les Prophetes, par le reſtabliſſe-

ment de Ierusalem. *Fay bien, selon ta bien-  
veillance, à Sion, & edifie les murs de Ieru-  
salem. Adonc tu prendras plaisir aux sacri-  
fices iustement faits, à l'holocauste & aux sa-  
crifices qui se consomment entierement par  
feu, adonc offrira-t'on des boureaux sur ton  
autel.* Car tout ceci est dit prophetique-  
ment du sacrifice de la nouvelle alliance,  
par lequel les fideles, en l'oblation du  
corps de Iesus Christ, offrēt tous les iours  
à Dieu leurs propres corps (lesquels  
communient à iceluy) en sacrifice vi-  
uant, sainct, plaisant à Dieu, qui est leur  
seruice selon sa parole. C'est le sacrifice  
iustement fait, & qui se consume entiere-  
ment par le feu de la tribulation pour la  
decadence de l'homme exterieur, afin  
qu'en la mortification du vieil homme, le  
nouveau se forme de iour en iour par  
l'Esprit du Seigneur Iesus. Telle a esté la  
raison pour laquelle la loy est appelée vne  
pedagogie pour nous amener à Christ.

Mais voyon maintenant pourquoy la  
loy estoit, au regard de ses ordonnances,  
& des ceremonies qui en dépendoient,  
vne obligation contre nous, & qui nous  
estoit contraire. Et pour quelle cause il  
a fallu que Christ l'ostast du milieu de

nous, & qu'il la cloüast en la croix. Les  
mesmes raisons qui rendoient la loy vn  
pedagogue pour amener les hommes à  
Christ, sont encores celles qui luy ont  
donné cette qualité d'obligation contre  
nous, & pour lesquelles il a fallu que  
Christ, ayant fait au monde l'œuvre de  
nostre salut, & en ayant establi les causes  
en sa croix & en son Esprit, ostant la loy  
du milieu de nous l'ayant cloüée en sa  
croix. Cesont, di-ie, les raisons des me-  
naces & des promesses de la loy, desquel-  
les dépend la raison de toutes les cere-  
monies & de toutes les institutions de  
son seruice. Car toutes les ceremonies,  
toutes les institutions des sacrifices &  
des obseruations du seruice de Dieu  
sous la loy, consistans en choses corporel-  
les & visibles, auoient leur cause de ce  
que les promesses & les menaces de la  
loy, & par consequent l'esperance & la  
crainte des fideles sous la loy, regardoiēt  
ces mesmes choses corporelles & visibles.  
Pour raison de quoy aussi l'estat politi-  
que estoit vne dépendance de la religion  
entre les Iuifs. Ce qui n'est plus entre  
les Chreitiens. Car l'estat politique, &  
l'estat Ecclesiastique sont choses toutes

separées en elles. De quoi il y aura lieu de parler ailleurs. Or d'autant que les choses de ce present monde sont les obiets des desirs de la chair, son affection s'attache aux obiets par trois diuerses fins principales. L'une en regarde la possession, l'autre la seigneurie, l'autre l'usage. Et pource que l'homme, de praué par le vice originel, est naturellement amoureux de soy mesme, de là vient, que par cét amour l'affection de la chair s'appliquant aux obiets de la vie, suiuant ces trois diuerses fins, l'affection qui regarde la possession de ces biens, deuiet auarice. L'affection qui en regarde la seigneurie deuiet ambition. L'affection qui en regarde l'usage deuiet volupté, qui sont les trois vices principaux, & desquels tous les autres dépendent. Pour cette cause, tant que nous sommes en la chair, c'est à dire, tant que nous regardons les obiets de ce monde comme les suiets de nostre beatitude qui est selon la chair, il est necessaire que le peché regne en nous par la loy. C'est la raison pour laquelle l'Apostre dit aux fideles, *que peché ne regnera point en eux, pource qu'ils ne sont plus sous la loy, mais sous la*

*grace.* Et à ce propos, ie veux bien faire  
 encore ici vne petite digressiõ avec vous,  
 pour vous faire entendre, sur le mesme  
 sujet, le sens des paroles du mesme Apo-  
 stre au chap. 7. aux Romains depuis le 1.  
 vers. iusques au 7. plus naïvement qu'el-  
 les ne sont expliquées par nos Interpre-  
 tes. Aux trois premiers versets l'Apo-  
 stre n'employe l'exemple ou la comparai-  
 son de la femme, qui est liée à son mary  
 par la loy tout autant que le mary est en  
 vie, que pour induire le fondement de  
 ce qu'il veut principalement establir,  
 c'est à sçauoir, *que la mort dissout la puis-  
 sance de la loy entre les hommes.* Car pour  
 nous faire entendre la raison de nostre  
 affranchissement du ioug de la loy, il  
 nous en represente la maniere en l'usage  
 familier de la loy entre les hommes. *La  
 loy, dit-il, seigneurie sur l'homme autant  
 que l'homme vit,* vers. 1. Car il faut rap-  
 porter ces mots, ἐφ' ὅσον ζήσονται, à  
 l'homme. Et non pas (comme il me sou-  
 vient que vouloit Monsieur Cameron)  
 la loy-mesme. Que telle soit la raison  
 de la seigneurie de la loy, il le represen-  
 te par l'usage de la loy coniugale, que  
 la mort du mari dissout. Car le mari

mort, l'action qui estoit singulierement prescrite à la femme, c'est à sçauoir l'adherence à son mari seul, est libre à la femme, pour s'adioindre par mariage à vn autre si bon luy semble, verset 2. 3. Tout de mesme en est il de la loy par laquelle Dieu nous a prescrite nostre deuoir au regard del'vsiage des choses de ce monde. Cette loy seigneurie sur nous tant que nous viuons en la chair, tant que nostre vieil homme est viuant. Car la chair & le vieil homme en l'Escripture est vne mesme chose. Et l'vn & l'autre est l'estat de vie selon lequel nous adherons aux obiets de ce monde, comme estans les suiets de nostre beatitude, & les argumens de la benediction de Dieu, ainsi que iel'ay dit cy-dessus. Or c'est par la loy, c'est par l'alliance de nature, que Dieu a lié les affections de nostre chair aux obiets de ce present monde, nous les ayant donnez, par l'alliance de nature, pour les argumens de sa benediction & de son amour enuers nous. Et par les commandemens qu'il a determinez par la loy il nous a prescrite les reigles de nostre deuoir en l'vsiage des choses de ce monde. En la transgression desquels com-

mandemens le peché consiste. Ainsi nous embrassons, par les promesses de la loy, les biens de ce monde comme suiets de felicité, & nous les possédons comme des arrhes & des tesmoignages de la faueur de Dieu. Mais la vehemence des affections de la chair vers cette nature de biens, ne luy permet pas de demeurer dans les reigles que les commandemens de la loy ont prescriptes pour leur vsage. Et de là vient que l'affection du peché, c'est à dire, l'ardente amour de soy mesme, qui est en tout homme charnel depuis la corruption originelle, prend occasion, par le commandement & par la defense, d'allumer en l'homme toute convoitise. C'est la cause pourquoy le peché domine en tous ceux qui sont sous la loy, & que pour estre affranchis du peché il faut estre deliurez du ioug de la loy. Or pour estre deliurez du ioug de la loy, il faut que nostre vieil homme meure. Il faut que nostre chair soit crucifiée. Il faut que cét estat de la vie, selon lequel nous adherons aux objets de ce monde, comme estans les argumens de la benediction de Dieu, & les suiets de nostre beatitude, soit destruit. C'est

ce que Iesus Christ a fait pour tous ses fideles par sa mort. Par sa mort, di-ie, à la communion de laquelle il les appelle. Par son corps à la participation duquel il les oblige. C'est par ce moyen que nous sommes morts à la loy. Maintenant entendez-vous d'une autre maniere que vous n'avez iamais fait ces paroles de l'Apostre, vers. 4. *De sorte, mes freres, que vous estes morts à la loy par le Corps de Christ.* Par le Corps de Christ lequel il vous communique. Par le Corps de Christ, à la participation duquel vous estes tous les iours appelez en son Eglise, afin que, selon le Mystere d'iceluy qui s'accomplit en nous par sa communion, nostre vieil homme soit crucifié, & que tout l'estat de cette vie qui est selon la chair, soit aneanti en vostre conuersation. De telle sorte que vous ne cherchiez plus les choses qui sont en bas, mais celles qui sont en haut où Iesus Christ est assis à la dextre de Dieu. Nostre vieil homme donc estant mort par le Corps de Christ, nous sommes morts à la loy. La loy n'a plus de puissance ny de domination sur nous, ny par consequent le peché. Car nous ne sommes

plus liez aux objets de ce present monde, & ne les regardons plus comme les argumens de la benediction de Dieu, ny comme suiets de nostre beatitude. Nous auons, en ce mesme corps de Christ, qui est mort pour nos offenses & resuscité pour nostre iustification, vne esperance beaucoup meilleure, & des biens infiniment plus excellens, qu'il nous a preparez à la dextre de son Pere en son Royaume celeste. Ainsi nostre vieil homme estât mort, nous sommes de nouveau conioints & mariez au nouuel homme qui est resuscité des morts, pour ne viure plus selõ la chair, mais selon l'Esprit, afin que de cette conionction spirituelle s'engendre en nous, au lieu des pechez precedens, tous fructs de iustice & de saincteté agreables à Dieu. C'est ce que dit l'Apostre par ses paroles suiuanes au mesme verset 4.

*En sorte que vous estes mariez à un autre, à celuy qui est resuscité des morts, afin que nous sanctifions à Dieu. Car il y a vne opposition perpetuelle de l'estat precedent, au present. Pource que lors que nous estions en la chair, lorsque nous estions mariez & incorporez à nostre vieil*

homme, les affections des pechez, qui  
 sont determinez par les commande-  
 mens de la mesme loy, dont les pro-  
 messes ont establi l'argument de la be-  
 nediction de Dieu és choses de ce mon-  
 de, agissoient continuellement en nos  
 membres par toutes les facultez de no-  
 stre vieil homme; de telle sorte que les  
 fruiets que nous engendrions estoient  
 autant de transgressions dignes de mort  
 selon les menaces de la loy. Mais lors  
 que nostre vieil homme est mort, lors  
 que l'estat de la vie charnelle regardant  
 les choses d'ici bas comme arguments  
 de la benediction de Dieu, & comme  
 suiets de nostre felicité, a esté destruit  
 & aneanti par le Corps de Christ, la loy  
 a esté aussi aneantie, & nous en auons  
 esté affranchis. De sorte que cette ne-  
 cessité des commandemens prohibitifs  
 qui regloient l'vsage des choses de ce  
 monde, & qui par leur contradiction à  
 l'affection de la chair l'enflammoient  
 d'auantage, n'a plus lieu maintenant  
 pour vne pedagogie seruile qui nous  
 oblige à l'obeissance par la crainte,  
 comme faisoit l'ancienne œconomie  
 de la loy escriite és tables de pierre.

Mais estans, par la mortification de no-  
 tre vieil homme, vnis au corps de  
 Christ lequel est resuscité des morts: le  
 nouuel homme, de qui l'estar de vie est  
 spirituel & celeste, & qui ne regarde la  
 benediction & l'argument de l'amour  
 de Dieu, qu'en la communion avec son  
 Père, nous gouuerne maintenant, & n'a  
 plus besoin de cette vieille pedagogie  
 pour nous faire seruir à Dieu. Car sans  
 contrainte, par le renouvellement de  
 nostre entendement qui contemple les  
 biens celestes pour son vnique esperan-  
 ce, nous seruons à Dieu en esprit par vn  
 amour vraiment filial & libre. C'est  
 le sens des paroles de l'Apostre aux  
 deux versets suiuaus 5. & 6. *Car lors que  
 nous estions en la chair les affections des pe-  
 chés qui sont par la loy agissoient en nos  
 membres pour fructifier à la mort. Mais  
 maintenant nous sommes deliurez de la loy,  
 de luy auquel nous estions detenus estant mort,  
 de sorte que nous seruons en nouveauté d'es-  
 prit & non en velleſſe de lettre, Rappel-  
 lez, s'il vous plaist, vos premieres pen-  
 sées, & consultez tous nos Interpretes  
 sur ce lieu, & vous verrez par leur cōfe-  
 rence avec l'esclarcissement que ie vous*

en donne, combien loin vous estiez de l'intelligence du vray sens de l'Apostre. Car, ie vous prie, où va l'imagination qu'ils en ont, quand ils establisent nostre liberté, par Christ, de la servitude de la loy, *en ce que la loy requiert une perfection entiere, & qu'à faulte de l'observer elle nous astreint à la condamnation de mort eternelle.* Car ce sont les propres paroles de Calvin sur ce lieu. Or vous m'aduouïerez que la perfection de la loy, à quelque poinct qu'on la veuille estendre, sera toute comprise en l'un & en l'autre des grands commandemens, *d'aimer Dieu de tout son cœur, & son prochain comme soy-mesme.* Voyez donc maintenant en quoy ils constituent la liberté chrestienne, quand ils veulent qu'elle nous exempte de la perfection entiere que la loy requeroit. Ils veulent, par ce moyen, que par l'Euangile nous ne soyons plus obligez d'aimer Dieu de tout nostre cœur & nostre prochain comme nous mesmes. Et qu'encore que nous n'aurons ny aimé Dieu de tout nostre cœur, ny nostre prochain comme nous mesmes, & que nous nous serons aimez plus que toutes choses,

car il faut necessairement que l'un ou l'autre ait lieu, il n'y a point de milieu entre deux ) Dieu nous pardonnera ces défauts, & les couvrira de la iustice imputée de son Fils, qui en nostre place a aimé le Pere plus que toutes choses. Ce sont là les belles conceptions des Docteurs de la justification imputatiue, touchant la liberté chrestienne & nostre affranchissement du ioug de la loy. Qui sont iustement tout le rebours de ce que l'Apostre nous enseigne. Lequel au contraire nous apprend, que d'autant qu'estans sous la loy nous ne pouuons paruenir à la perfection de iustice & de sainteté, il a fallu que nous fussions affranchis de son ioug, en mourant avec Christ à ce present monde, afin que par son Esprit fust resplandüe en nos cœurs la charité, en laquelle consiste l'accomplissement de l'un & de l'autre commandement. Faites vous acroire, apres cela, que nos reformateurs ont remis sus la cognoissance de l'Euangile en vne plus grande pureté qu'elle n'auoit esté preschée depuis les Apostres, comme se persuadent ceux qui idolatrent, & qui ne pésent pas qu'on puisse rien adiouster à leur cognoissance,

ou qu'il soit loisible de reuoker en doute aucune de leurs de decisions.

Or ayant compris la raison que l'Apostre nous donne de la necessité de nostre affranchissement de la loy, aux paroles dont ie vien de vous esclarcir le sens : vous entendez maintenant pourquoy la loy nous estoit contraire, pourquoy elle estoit vne obligation contre nous en ordonnances ; & pourquoy elle a esté ostée du milieu de nous ayant esté clouée à la croix de Christ. Elle nous estoit contraire, pource que sous elle nous ne pouuions paruenir à la perfection de iustice, & que mesme par elle le peché auoit domination sur nous. Elle nous estoit contraire en ordonnances, pource que tous les commandemens singuliers dependans de l'une & de l'autre table, & decernans l'exercice du seruice de Dieu & la reigle de la vie ciuile, par la determination de l'usage de toutes les choses appartenantes à cette vie, pour estre rapporté à la fin de la gloire de Dieu, multiplioient, par vne infinité de circonstances, les sujets de la transgression où la chair impuissante de ses desirs faisoit tomber l'homme. Dont est cette parole, ditte sous

Sous la loy, *que le iuste tombe sept fois le iour.* Il a donc fallu qu'elle ait esté cloüée à la croix de Christ, afin que nous en fus-  
 sions affranchis. Elle y a esté cloüée quand Iesus Christ nous a crucifié ce monde en sa chair, quand ayant esté cru-  
 cifié pour nous, il nous a appellez à la communion de son Corps à mourir avec luy à ce present monde. Or estans ainsi  
 morts avec Christ au monde, la raison de toutes les ordonnances de la loy, qui  
 consistoit en la definition de l'vsage des choses de ce monde, comme en manger  
 & en boire, & en telles autres choses qui sont les loix des ceremonies, cesse abso-  
 lument pour les fideles. Selon qu'argu-  
 mente le mesme Apostre au mesme cha-  
 pitre des Coloss. vers. 20. *Si donc vous estes morts avec Christ, quant aux elemens du monde, pourquoy vous charge-t-on d'or-  
 donnances comme si vous viuiez au monde? Ne mange, ne gousté, ne touche point, &c.*

Ce que l'Apostre dit en suite, aux pa-  
 roles dont j'ay proposé l'explication, est  
 vne raison excellente pourquoy l'ancan-  
 tissement de Christ nous affranchit du  
 ioug de la loy, quand il adiouste, *Estant despoillé nud, il a mené publiquement en*

monstre les principautez & puissances, triomphant d'elles en la croix. l'ay traduit, ἀπεξ-  
δυσάμενος, estant despoüillé nud, le prenant  
en vne signification absoluë, & non pas  
relative aux noms de principautez & puis-  
sances. Lesquels en effect ne sont point  
regis de ce participe, mais du verbe  
ἐδέσμευτο. Selon aussi que ce verset a  
esté leu & exposé par les Anciens, & en-  
tre autres par l'Interprete Syriacque, qui  
traduit, *Et par le despoüillement de son corps.*  
Et comme nous le voyons encore, non  
seulement dans l'Auteur du liure de la  
Trinité ( mal attribué toutesfois à Ter-  
tullian, & plustost appartenant à Noua-  
tian, à qui l'eminence de doctrine & l'au-  
thorité dans le Clergé Romain fit ambi-  
tionner la competence du Siege avec  
Corneille, & former schisme enfin con-  
tre luy. ) Mais aussi dans S. Augustin, le-  
quel au 16. liure contre Faustus chap. 29.  
le rapporte en cette mesme façon. A la  
verité l'un & l'autre, pour explicquer ce  
despoüillement de Christ, le rapportent,  
quoy que differemment, à sa chair, &  
pour cet effect traduisent, *exuens se car-  
nem.* Ce que le premier veut interpreter  
du corps mesme, que Christ auroit laissé

par la mort & pris par la resurrection. Mais Sainct Augustin, plus conuenablement à l'analogie de la foy, par la chair entend la mortalité, & veut que ceci soit entendu de la resurrection de Christ, en laquelle il a despoüillé la mortalité. Et pour appliquer cela au raisonnement de l'Apostre, il dit, que c'est par cette mortalité que les puissances diaboliques enuieuses de nous dominant sur nous. Mais que Christ nostre Chef ayant fait ce qui doit estre pareillement accompli, en toute l'Eglise qui est son Corps, c'est à dire, estât resuscité, a triomphé par ce moien, pour luy & pour nous, des puissances ennemies. Toutesfois les paroles de l'Apostre ne peuuent pas souffrir qu'on interprete ce qu'il dit de la resurrection, puis qu'il rapporte nottamment le triomphe de Christ à sa croix. C'est pourquoy l'interpretation du Syriaque est plus naïue. Car en disant, *par le despoüillement de son corps*, il entend simplement, que Christ a esté despoüillé, & que ses habits luy estans ostez, son corps a esté mis nud, lors qu'il fut attaché à la croix. Car ܐܬܪܐ qui est le terme duquel vse l'Interprete signifie en Chaldaïque & Syriaque

despoüiller ses habits. Ainsi au premier liure de Samuel chapitre 19. verset 24. *וַיַּחַלץ הַתַּרְגֻּמוֹן אֶת וְאֶתְלָא* Et il despoüilla aussi ses vestemens. Et de fait en l'histoire du crucifiement du Seigneur, où Saint Matthieu dit, *καὶ ἐκδύσαντες αὐτὸν*, le Syriaque a traduit *וַיַּחַלְצוּהוּ* Et ils le despoüillerent. C'est donc à ce mesme despoüillement, & à la nudité en laquelle fut mis nostre Seigneur quand il fut crucifié, que l'Apostre regarde ici, lors qu'il dit, *qu'estant despoüillé il a mené en monstre les principautez & puissances*. Car ceux qui traduisent, qu'il a despoüillé les principautez & puissances, ne s'esloignent pas moins du sens & de l'intention de l'Apostre, que de l'ordre de la construction de ses paroles, qui veut de necessity que ces mots, *τὰς ἀρχὰς καὶ τὰς ἐξουσίας*, les principautez & puissances, soient regis du verbe *παρεδεδυγκέναι*, il a mené en monstre, & non pas du participe *ἀπεκδυσάμενος*. Car il est manifeste que si le participe les regissoit, il auroit fallu adiouster le pronom *αὐτὰς* pour donner vn regime au verbe suiuant, lequel demeureroit autrement suspendu & sans construction. Le sens est donc necessaire comme ie l'ay

traduit. Et, selon ce sens, la raison de ce que nous dit l'Apostre est excellemment liée avec son propos precedent, qui est de nous monstrier, que l'aneantissement de Iesus Christ nous affranchit du ioug de la loy. Car comme la loy, qui est l'alliance de nature, a pour fondement la possession de ce monde, & comme la possession de ce monde dépend des principautez & puissances qui le gouernent, en la main desquelles sont toutes les choses que l'entretien & l'aise de cette vie desire, & que la chair se propose pour fin de sa volupté, de son auarice, & de son ambition: par mesme raison Iesus Christ, en sa croix, ayant obligé tous les fideles de la porter apres luy, les a deliurez de la seruitude de peché qui n'a de force, en l'homme qu'autant que son affection est encline à conuoiter la domination du monde, ou à la craindre. Car le peché ne regne en nous que par ces deux causes, la conuoitise de la vie, & la crainte de la mort. C'est aussi la raison pour laquelle la loy est appelée la puissance du peché. Or comme Christ l'a cloüée en sa croix, aussi a-t'il par mesme raison mené en monstre les principautez & puis-

sances, & triomphé d'elles en sa croix. Car le pouuoir qu'elles ont, soit de nous donner, soit de nous permettre l'usage des choses de cette vie, ou de nous en priuer, n'a plus aucune vertu à l'endroit de ceux qui sont crucifiez avec Iesus Christ à ce present monde, & ne peut plus esloigner leurs affections de l'amour qu'ils portent à la gloire de Dieu, & de l'affection qu'ils ont au seruice qu'ils luy rendent en esprit & verité. Pour cette raison, les fideles disent avec l'Apostre, *Nous sommes assurez, que ny mort, ny vie, ny Anges, ny principautez, ny puissances, ny les choses presentes, ny les choses à venir, ny hautesse, ny profondeur, ny aucune autre creature ne nous pourra separer de l'amour de Dieu que nous auons en Iesus Christ nostre Seigneur.* Toute la puissance que le monde enferme, pour faire pecher l'homme, est abolie, par la croix de Christ, pour tous ceux qui sont rendus participans de l'usage salutaire de cette croix. Mais hélas! cette precieuse vertu est comme inconnue, pource que la pratique de la discipline Chrestienne est maintenant hors d'usage. Et ce diuin sçauoir d'un seul Iesus Christ & iceluy crucifié, qui rem-

plit l'une & l'autre page de l'Evangile, est comme enseveli en ignorance, tandis que les contentions, & les controuerses, & les vaines questions d'une Theologie, faussement ainsi nommée, ont égaré les esprits d'une estude si necessaire. De là vient que cét excellent passage de l'Apostre est si peu entendu par les Interpretes, comme tant d'autres qui regardent la mesme fin & la mesme raison de la vocation des fideles en Iesus Christ. Lequel par sa croix les a deliurez de la domination du monde & de la seruitude de péché, s'ils embrassent cette croix, s'ils chargent sur eux son ioug aisé & son fardeau leger à tous ceux qui, par l'esperance de sa gloire, cheminent selon la lumiere de son Esprit.

L'opinion commune des Interpretes n'a rapporté ailleurs le sens de ces termes de principautez & puissances, qu'aux puissances diaboliques. Mais l'intention de l'Apostre & la raison de son discours ne s'arreste pas là seulement. Il est bien certain que par consequence necessaire la puissance du diable y est principalement entendue. Car tout ce que le monde, & les conuoitises du monde,

& l'avarice & l'ambition des biens & des grandeurs du siecle operent en l'homme, pour l'eloigner de Dieu, & pour le rendre serf de peché, tout autant qu'il conuoite, qu'il admire & adore les grandeurs, l'aïse & la puissance de ceux qui regnent au monde, ou qu'il craint d'estre priué de leurs faueurs: tout cela, di-ie, se rapporte à la domination que le diable exerce sur l'homme. Et c'est pour cette cause que l'Escripture l'appelle le Prince de ce siecle, & le Dieu de ce monde, & que luy-mesme se vante d'auoir en sa main tous les Royaumes de ce monde & leur gloire, & de les donner à ceux qui l'adorent. Mais neantmoins il ne faut pas restreindre ces termes de principautez & puissances dont parle ici l'Apostre à la seule puissance diabolique. Et si on l'y rapporte seulement, on n'entendra pas mesme la raison pour laquelle la puissance du diable exerce son empire sur l'homme. Car toutes ses tentations ne peuuent rien que sur ceux qui sont touchés de la conuoitise des grandeurs, des honneurs, des biens, & des voluptes que presentent les Royaumes du monde & leur gloire; sur ceux, di-je, qui desirent

ce que les puissances du monde peuvent donner, ou qui craignent les choses esquelles ils peuvent faire nuisance. Mais sur ceux qui sont morts avec Iesus Christ au monde, le diable ne peut rien, qui ne peut rien que par le monde & par la conuoitise de ses Royaumes & de leur gloire. Si le premier homme que le diable seduisit n'eust point conuoité le fruit defendu, iamais le diable ne l'eust trompé, iamais il ne luy eust fait croire, qu'en mangeant de ce fruit il deuiendrait semblable à Dieu. Iamais il ne l'eust induit à violer le commandement. Estre mort au monde & aimer Dieu de tout son cœur sont choses qui s'entresuiuent necessairement. Celuy qui ne conuoite point les grandeurs & la puissance du monde adore vn seul Dieu, & sert à luy seul. Celuy qui est espris du desir des choses mondaines tombe aisement en idolatrie. Et quiconque se forme plusieurs objets de son adoration & de son seruice, celuy-là de necessité sert à la conuoitise des choses mondaines. Il ne sçait que c'est d'adorer vn seul Dieu en esprit & verité. C'est ce que nous apprenons par la response de nostre Seigneur à

la tentation du diable qui luy offroit tous les Royaumes du monde & leur gloire, quand illuy dit, *Il est escrit, vn seul Dieu tu adoreras, & à luy seul tu seruiras.* Nul ne peut seruir à Dieu & au monde. Christ nous a donc cloüé en sa croix cette loy du monde, de laquelle l'homme auoit abusé par sa chair, pource qu'attachant ses desirs aux biens de ce monde, il met en leur possession la fin de sa felicité & son bien souuerain. Mais Christ nous a, par sa chair crucifiée, dedié le chemin nouveau & viuant par lequel nous paruenons à la vraye saincteté. Pour cette cause, estans morts avec luy rien ne nous peut separer de l'amour que nous portons à Dieu en luy. Les principautez & puissances n'y peuuent plus rien, ny par leurs promesses ny par leurs menaces, qui sont les plus puissans moyens que le diable employe pour seduire les élus mesmes s'il estoit possible. Mais pource qu'ils se glorifient en la seule croix de leur Sauueur, par laquelle le monde leur est crucifié, & eux au monde, tous ces efforts sont vains. C'est la raison pour laquelle Christ estant despouillé nud en sa croix amené en monstre les principautez &

puissances, & a triomphé d'elles en icelle.  
 Pource que la croix fait trouuer vains &  
 invtiles tous leurs efforts contre la pa-  
 tience & la constance de ses Martyrs. Or  
 par les principautez & puissances sont  
 donc entendues les principautez & puis-  
 sances du monde ennemies de Christ  
 & de son Euangile, qui luy font  
 la guerre & le persecutent. Car pour  
 les principautez & puissances qui em-  
 brassent l'Euangile, & qui luy seruent,  
 celles-là trouuent aussi en leur sceptre sa  
 croix, & en leur couronne ses espines,  
 esquelles ayans ample matiere de leur  
 mortification, leur foy ne manque point  
 d'exercice pour produire les fruiçts de  
 patience & de charité, de iustice & de  
 vraye sainteté chrestienne en la commu-  
 nion du Seigneur. Tel est le sens entier  
 de ce beau passage. Par la suite & la liaison  
 duquel, ie croy que vous apperceuez  
 maintenant comment c'est que Dieu  
 nous viuifie par le pardon qu'il nous don-  
 ne de nos pechez en la croix de son Fils,  
 par laquelle il a effacé cette lettre qui tuë,  
 & nous a deliurez de la seruitude de pe-  
 ché nous ayant crucifiez au monde. Con-  
 fessez la verité, cette doctrine Catholi-

que n'est-elle pas plus Apostolique, plus Chrestienne, plus propre à produire l'abondance des fruiets del'Esprit de Dieu en l'ame du fidele, que vostre doctrine, qui enseigne que la remission des pechez est vn simple acte de l'intelligence de Dieu, par laquelle il nous repute iustes encore que nous ne le soyons pas, & nous iustifie par vne iustice imputée, & non inherente. Car comment trouueriez-vous, suiuant telle iustice, la raison pour laquelle Christ en sa croix a cloüé la loy, & a effacé la lettre qui tuë, & a mené en monstre les principautez & puissances? Croyez-vous aussi, que tout cela ne soit fondé qu'en imputation, & ne s'exécute en nous que par vn simple acte de l'intelligence de Dieu, & non par l'operation efficacieuse de sa vertu? Certes, Monsieur, ie me promets, que me sçachant gré de l'esclaircissement que ie vous donne, sur ces matieres, vous en ferez vostre profit, & n'aurez point de honte d'en embrasser & d'en professer avec moy la verité ouuertement.

## C H A P. V I.

*De la raison des merites du fidele, selon la iustice de Dieu, en la remuneration.*

**E**N mon amiable esclaircissement depuis la page 16. iusques à la 20. ie vous auois explicqué la raison des merites du fidele, & comment par le rapport qu'il y a entre la premiere partie du salut, sçauoir est la iustice & la sainteté, & entre la seconde, qui est la vie & la gloire eternelle, il est necessaire que la premiere, estant la condition qui rend le fidele capable de la seconde, soit dite, pour cette raison, sa dignité & son merite. Et pour vous faire entendre que le merite du fidele n'exclud nullement la misericorde de Dieu, ie vous ay remonstré la distinction qu'il faut faire entre l'acquisition, & entre la communication du salut. Qu'au regard de l'acquisition, l'une & l'autre partie du salut n'a pour cause

que la seule misericorde de Dieu, & le seul merite de Iesus Christ. Et qu'au regard de la communication, la premiere partie du salut n'a aussi autre raison que la seule misericorde de Dieu, & le seul merite de Iesus Christ. Il n'y a en l'homme, ny condition, ny dignité, ny merite qui induise Dieu à la luy communiquer. C'est l'effect de l'amour par lequel Dieu preuient l'homme pecheur & enfant d'ire, pour le faire iuste & son enfant. Et qu'au regard de la seconde partie du salut, la misericorde & la iustice de Dieu conuiennent fort bien ensemble en la recompense du merite. La misericorde, pource que ce grand benefice n'a esté acquis ny promis, ny proposé à l'homme pecheur que par la seule misericorde de Dieu en Iesus Christ. La iustice, pource qu'il n'est donné pour recompense qu'à ceux qui par iustice & saincteté ont esté rendus capables & dignes d'en posseder l'heritage, qui leur en appartient dignement & meritoirement, pource que Dieu les a faits ses enfans, formez à l'image de son Fils vnique.

Contre cette verité, qui est de soy tres-claire & tres-solide, & qui ne pou-

uoir receuoir aucun contredict, si vous  
 eussiez voulu l'examiner comme elle est  
 proposée, vous disputez en vostre dis-  
 cours depuis la page 6. iusqu'en la page  
 15. & pages 22. 25. 28. 29. Mais de telle  
 sorte que si on confere ce que i'ay escrit,  
 avec vos responses, on trouuera que vous  
 ne disputez ny contre moy, ny contre  
 les Catholiques. Et iugera-t'on que vous  
 le faites à dessein de rendre manifeste  
 la mesprise que ie remonstre auoir esté  
 commise par les Euangeliques, en esta-  
 blissant cette controuersie contre les Ca-  
 tholiques, desquels ils n'ont compris ny  
 la verité, ny la raison de la doctrine sur  
 cette matiere, comme sur les autres qui  
 ont formé la diuision. Or afin de vous o-  
 ster deormais tout pretexte à vous de-  
 ceuoir vous mesmes & autrui, en propo-  
 sant comme vous faites, des raisons qui  
 ne touchent ny prés ny loin la creance  
 des Catholiques: ie vous la représenteray  
 premieremēt ici, comme elle est definie,  
 touchant les merites & leur raison, par le  
 Cōcile de la Trente au 16. ch. de la 6. sess.  
 Et puis ie refuteray toutes vos raisōs l'v-  
 ne apres l'autre, & les solutiōs dont vous  
 auez essayé foiblement d'escleurer les  
 mienes.

Le chapitre du Concile de Trente, qui traite des merites, est intitulé : *Du fruit de la iustification, c'est à dire du merite des bonnes œuvres, & de la raison du merite mesme.* Voicy comme ils en determinent la doctrine. Les hommes estans donc iustifiez en cette maniere, soit qu'ils ayent perpetuellement conserué la grace qu'ils ont receuë, soit que l'ayans perduë ils l'ayent recouurée, il leur faut proposer les paroles de l'Apostre, *Soyez abondans en toute bonne œuvre, sçachans que vostre labour ne sera point vain en nostre Seigneur. Car Dieu n'est point iniuste pour oublier vostre œuvre, & la dilection que vous avez monstrée en son nom. Et gardez vous de perdre vostre confiance laquelle a grande remuneration.* Et pourtant à ceux qui font de bonnes œuvres iustiques à la fin, & qui esperent en Dieu, il leur faut proposer la vie eternelle, & comme vne **GRACE** promise misericordieusement par Iesus Christ aux enfans de Dieu. Et comme vn **LOYER**, qui par la promesse de Dieu mesme, doit estre fidelement rendu à leurs bônes œuvres & à leurs merites.

merités. Car c'est là cette couronne de justice que l'Apostre disoit luy estre reseruée apres son combat & sa course, pour estre renduë par le iuste Iuge, non seulement à luy, mais à tous ceux qui aiment son aduenement. Car comme ainsi soit que Iesus Christ luy mesme influë continuellement dans les iustifiez sa vertu, comme le chef dans les membres, & la vigne dans les sarments, laquelle vertu precede, accompagne, & suit tousiours les bonnes œuures, & sans laquelle ils ne pourroient en aucune façon estre meritoires, il faut croire qu'il ne defect plus rien aux iustifiez qu'ils n'ayent pleinement satisfait, par telles œuures qui sont faites en Dieu, à la loy diuine selon l'estat de la vie presente, & qu'ils ne doiuent estre estimez auoir veritablement mérité la vie eternelle, laquelle ils obtiendront aussi en leurs temps, si toutesfois ils meurent en grace : attendu que nostre Sauueur dit, *Si quelqu'un boit de l'eau que ie luy donneray il n'aura iamais soif, mais il se fera en luy une fontaine saillante en vie eternelle.* Ainsi la propre iustice que nous auons, n'est point reputée comme si elle estoit propre de par nous mesmes, &

nous n'ignorōs point ny ne reiettoſ la ju-  
 ſtice de Dieu. Car la Iuſtice qui eſt ditte  
 noſtre, parce que nous ſōmes iuſtifiez par  
 elle inherente en nous, elle meſme eſt iu-  
 ſtice de Dieu, pource que Dieu l'eſpand  
 en nous par le merite de Chriſt. Mais il  
 ne faut point auſſi obmettre, qu'encore  
 que l'Eſcriture attribuē tant aux bonnes  
 œuures, iuſques là que Chriſt promette  
 meſmes à *celuy qui aura donné vn verre*  
*d'eau froide à boire à vn de ſes petits, qu'il*  
*ne perdra point ſon ſalaire;* & que l'Apo-  
 ſtre teſmoigne, *que noſtre legere affliction,*  
*qui ne fait que paſſer, produit en nous vn*  
*poids de gloire excellemment excellente:*  
 toutesſois à Dieu ne plaiſe que l'homme  
 Chreſtien ſe confie & ſe glorifie en ſoy-  
 meſme, & non au Seigneur, de qui la bon-  
 té eſt ſi grande enuers tous les hommes,  
 qu'il a voulu que ſes propres dons ſoient  
 leurs merites. Et pource que nous of-  
 fenſons tous en pluſieurs choſes, chacun  
 doit auoir deuant les yeux, comme la mi-  
 ſericorde & la bonté de Dieu, auſſi ſa ſe-  
 uerité & ſon iugement, & nul ne ſe doit  
 iuger ſoy meſme encore qu'il ne ſe trou-  
 ue en rien coupable, pource que toute la  
 vie des hommes ne doit pas eſtre exami-

née ny iugée par le iugement des hommes, mais de Dieu, qui mettra en lumiere les conseils des cœurs, & à lors sera à chacun sa louange de par Dieu, lequel, comme il est escrit, rendra à chacun selon ses œuvres.

Souuenez-vous apres la lecture de ces paroles, que la doctrine des Catholiques touchant les merites du fidele, est, I. Que leurs bonnes œuvres sont meritoires en ce qu'elles sont agreables à Dieu. II. Qu'elles sont agreables à Dieu & meritoires, pource que toute leur excellence vient de la vertu & de la grace de Iesus Christ, laquelle découle de lui dans les fideles, comme du chef dans les membres, & pource que l'origine, le progrez, & la perfection des bonnes œuvres vient de cette vertu de l'Esprit de grace. III. Qu'ainsi la iustice des fideles est la Iustice de Dieu, pource que Dieu l'espand en eux par le merite de Christ, & qu'ainsi tous leurs merites ne sont autre chose que dons de Dieu. IV. Que pour cette cause la recompense de vie eternelle, qui a esté promise & qui sera rendue aux bonnes œuvres & aux merites du fidele, est tout ensemble, & grace promise mi-

sericordieusement par Iesus Christ, & loyer qui doit estre iustement & fidelement rendu selon la promesse. V. Et par ainsi que nul fidele, de qui la conscience le tient ioyeux & content par le sentiment de telles œuures & de tels merites, ne se glorifie point en soy mesme, mais en Dieu seul. Ces choses obseruees selon la definition du Concile de Trente, vous verrez maintenant, en l'examen de tout ce que vous dites contre la doctrine des merites, que vous ne disputez à l'encontre, que par faute de bien entendre & de rapporter naïuement le sentiment des Catholiques. Or i'ay entrepris d'y obliger vostre consentement, par des raisons & des esclaircissemens auxquels ie me promets qu'à la fin vostre conscience ne resistera plus, quand vous aurez ici la solution à toutes les obiections que vous me faites.

Ce que vous traitez touchant la raison du merite est compris en vostre discours depuis la page 6. iusques à la 20. Et en outre page 22. 25. 28. 29. 30. 31. Je suiuray toutes vos raisons & toutes vos positions de page en page, ligne apres ligne, & mot à mot, pour vous satisfaire

pleinement comme sur les precedentes. Vostre premiere proposition, en laquelle vous mettez l'estat de la question entre les Catholiques & vous, est conceuë en ces termes page 6. *Nous recognoissons bien qu'il faut à celuy à qui Dieu donne la vie & la gloire, vne condition qui le rende capable de la recevoir, & recognoissons pour cette condition outre la foy, la iustice & la sainteté. Mais nous ne voulons pas que cette sainteté tienne lieu de merite, ains que Dieu pardonnant les defauts & manquemens qui y sont, la remunere gratuitement: en sorte que non seulement l'homme ait esté sanctifié par grace: mais aussi que ce soit vne nouvelle grace qui remunere le peu qu'il a de sainteté.* Vostre proposition a deux parties. L'une contient vostre consentement avec les Catholiques, l'autre vostre dissentiment. Quand vous recognoissez que la sainteté est vne condition necessaire au fidele pour le rendre capable de la gloire, vous recognoissez la verité, & vous estes en effect Catholique, & vous departez de la doctrine de nos premiers reformateurs qui n'ont admis autre condition, pour rendre le fidele capable de la gloire, que la iustice de Christ imputée. Le vous

l'ay ainsi remonstré & demonstré au Ju-  
 gement de Monsieur Testard, & en la  
 conuiction de Monsieur Amyraut. Mais  
 quand vous voulez que cette condition  
 ne tiene pas lieu de merite, &c. vous  
 semblez les enfans de Zebédée, vous ne  
 sçavez ce que vous voulez. Et vous vous  
 implicez de contradictions & de re-  
 pugnances miserables. Pour vous le fai-  
 re comprendre, dites moy, s'il vous plaist,  
 puis que la saincteté est vne condition  
 necessaire pour rendre le fidele capable  
 de la gloire, est-ce pas Dieu qui a requis  
 cette condition au fidele, afin de luy don-  
 ner la recompense de la gloire? Vous  
 m'auouerez sans doute qu'ouy. Je vous  
 demande en suite, Dieu, qui a posé cette  
 condition de la saincteté, a-t'il requis  
 que la saincteté fust imparfaite? Ou a-t'il  
 requis que la saincteté fust parfaite? Ou  
 a-t'il laissé pour indifferent qu'elle fust  
 parfaite ou imparfaite? N'en a-t'il deter-  
 miné aucun degré, plus ou moins? Ne  
 chaut-il iusqu'ou l'on paruiene? Regar-  
 dez ce que vous respondrez. Car pour  
 ceux qui suiuent l'enseignement de nos  
 premiers reformateurs, ils n'ont point  
 d'interest à cette response. Pource que

n'admettans autre mérite que celuy de  
 Iesus Christ, & ne recognoiffans autre  
 condition que l'imputation de sa iustice  
 pour obtenir la gloire, ils disent hardi-  
 ment que la saincteté ny les bonnes œu-  
 res du fidele ne viennent point en com-  
 pte pour obtenir la remuneration. Et par  
 consequent qu'il n'importe du plus ou  
 du moins de saincteté, puis qu'elle n'est  
 point considérée. Mais vous qui voulez  
 que la saincteté soit vne condition de la  
 gloire, auez interest de respondre à mes  
 demandes. Or quand ie demande que  
 vous me respondiez, i'enten que vous  
 authorisiez vos responses de l'Escripture,  
 & qu'elles soient conformes à sa doctri-  
 ne. Direz-vous que Dieu, pour condi-  
 tion de la gloire qu'il promet au fidele  
 pour recompense, requiere de luy vne  
 saincteté imparfaite pleine de defauts &  
 de manquemens, meflée d'impureté &  
 & de souillure. Si vous le dites vous obli-  
 gez le fidele aux defauts & aux manque-  
 mens, à l'impureté & à la souillure. Vous  
 l'y obligez, di-ie, par la loy & par la con-  
 uention de Dieu, ce qui seroit chose hor-  
 rible à penser, & que ie tien aussi reculée  
de vostre sens & de vostre pensée, qu'elle

est éloignée de l'Evangile. Car vous sçavez trop mieux que par la vocation de Dieu, qui est aussi selon l'élection de sa grace, nous sommes appelez à estre saints & irreprehensibles deuant luy en charité, Eph. 1. 4. Et que la fin pour laquelle les fideles sont incorporez en la communion du corps de Christ pour estre reconciliez à Dieu, est qu'ils soient rendus saints, sans tache, & irreprehensibles deuant luy, Col. 1. 22. Vous sçavez que telle est la condition de tous les fideles & de toute l'Eglise, & qu'à cette fin, Christ s'est donné soy-mesme pour elle, afin qu'il la sanctifiast apres l'auoir nettoyée par le lauement d'eau par la parole, & se la rendist vne Eglise glorieuse, n'ayant tache ny ride, ny autre telle chose, ains afin qu'elle fust sainte & irreprehensible, Eph. 5. 25. 26. 27. Vous sçavez qu'estans pour cette cause appelez à la conformité de Christ nostre Chef, selon le nouuel homme creé en iustice & vraye sainteté, l'esperance de sa gloire est proposée au fidele, afin qu'il se purifie, comme aussi iceluy est pur, & qu'il face iustice & soit iuste, comme iceluy est iuste, Ieh. 3. 3. 7. Vous m'auouerez donc qu'en telle condition de iustice, de pureté, & de sainteté,

Dieu n'admet point de defauts, d'impuretez ny de souillures. Il veut que, pour la condition de la gloire qu'il nous a promise, nous soyons iustes, purs, saints, sans tache, & irreprehensibles. L'Euangile requiert de nous vne saincteté parfaite. Vous ne direz donc pas qu'en la condition de la saincteté, que Dieu a requise pour la remuneration de la gloire, il ait requis qu'elle soit imparfaite. Ce seroit vn blaspheme. Vous ne direz pas non plus qu'il ait laissé en cette condition l'indifference de plus ou de moins. Ce seroit vne profanité manifeste, & vn entier renuersement de la vocation où le fidele est appellé par l'Euangile, selon ces beaux textes precedens, & infinité d'autres semblables que vous sçavez par cœur. Reste donc que vous disiez de nécessité que Dieu requiert des fideles, pour condition de la gloire qu'il leur a promise, vne saincteté parfaite, sans tache, & irreprehensible, si vous ne voulez renuerser tout l'Euangile & la loy de l'Esprit de vie qui est en Iesus Christ. Or si vous recognoissez la saincteté condition de la gloire, & si vous auouez qu'elle doit estre parfaite, pourquoy ne voulez-

vous pas qu'elle tiene lieu de merite? Pour quelle raison pouuez-vous nier que le fidele, qui a accompli la condition à laquelle Dieu a promis la remuneration de gloire par l'Alliance de l'Euangile, ne doit estre reputé ny dit auoir meritè la recompense promise? Reconnoissez vous pas comment vos pensées s'entrechoquent, & quelle contradiction vous faites rencontrer entre vos maximes? Auez vous bien pensé derechef à ce que vous dites, en prononçant que vous voulez que Dieu pardonnant les defauts & manquemens qui sont en la sainteté des fideles, la remunerer gratuitement? Car ie vous prie determinez vne fois quelle condition, quel degré de sainteté Dieu requiert des fideles en l'Euangile, pour leur promettre la recompense moyenant l'accomplissement. Si vous voulez que cette sainteté ne soit pas requise en degré de perfection, mais manque & defectueuse, & que Dieu se contente de cette sainteté imparfaite: cèluy, en la sainteté duquel se trouueront ces defauts & ces manquemens, aura satisfait à la condition, il n'a point besoin de pardon; si Dieu n'a rien requis de luy d'auantage, il

ne peut estre blasmé, il a fait ce que Dieu demande de luy. Il merite par consequent la recompense suiuant la conuention de Dieu. En ce cas le pardon ny la grace n'ont point de lieu en la remuneration qu'il doit attendre. Pour faire trouuer lieu à la grace ou au pardon, il faut de necessité qu'il ait obmis ou commis quelque chose contre la loy de la condition requise. Il faut que vous disiez, que la saincteté que Dieu requiert pour condition de la gloire soit vne saincteté parfaite; & que le fidele n'accomplissant pas cette saincteté, il faut que Dieu luy pardonne les defauts & les manquemens qui la rendent imparfaicte. Si vous en reuenez là, voyez la contradiction où de rechef vous vous enferrez. Car si, par l'Alliâce del'Euangile, Dieu requiert du fidele vne saincteté parfaite pour obtenir la recompense de la gloire, & si le fidele ne peut paruenir, comme vous pensez, à aucune saincteté que defectueuse, par quelle raison, par quelle loy, par quelle condition trouuerez vous, que Dieu, qui requiert en l'Euangile vne saincteté parfaite au fidele pour luy donner la gloire, lors qu'il viendra pour iuger le monde se-

son l'Euangile, & pour rendre à chacun  
 selon ses œuvres, pardonne les defauts  
 de la saincteté, & en pardonnant donne  
 la couronne, à ceux qui n'auront point  
 accompli la saincteté qu'il auoit requise  
 d'eux? Est-ce pas manifestement esta-  
 blir vne loy pour la destruire? Et puis, ie  
 vous prie, par quelle Alliance Dieu par-  
 donnera t'il les defauts de la saincteté, si  
 par l'Euangile il requiert vne saincteté  
 parfaicte? Il faudra derechef vne autre  
 Alliance de misericorde que celle de l'E-  
 uangile, qui establisce grace & pardon à  
 ceux qui auront defailli à la condition  
 d'une parfaite saincteté que l'Euangile  
 requiert aux fideles, pour leur donner la  
 recompense de vie & de gloire eternelle.  
 Vous voyez, par ces raisons, que vous  
 establissez des maximes qui se destrui-  
 sent. Et que de necessité, si vous voulez  
 exclurre le merite en la remuneration, il  
 faut que vous retourniez à l'opinion de  
 nos premiers reformateurs, qui ont sou-  
 stenu que l'Euangile ne requiert des fide-  
 les, pour la recompense de la gloire, que  
 la seule foy qui embrasse la iustice de  
 Christ imputée, par le moyen de laquel-  
 le tous leurs defauts sont couuerts au

Jugement de Dieu, tant peu de sainteté & de bonnes œuvres qui soient en eux, desquelles Dieu ne fait point de consideration quand il remunerer. Il ne faut plus que vous disiez, que vous reconnoissez vne condition, pour rendre les fideles capables de la gloire, qui soit outre la foy, la iustice, & la sainteté. Vous n'en devez reconnoistre d'autre que la seule iustice de Christ imputée que la foy du fidele embrasse, si vous voulez que la remuneration se face absolument par grace, & en conséquence du pardon donné aux defauts & aux manquemens de la sainteté. Ou bien si vous voulez persueuer en ce que vous dites, que vous reconnoissez la iustice & la sainteté pour condition de la gloire, outre la foy: il faut que vous soyez tout à fait Catholique. Il faut que vous reconnoissiez que cette condition accomplie tient lieu de merite, & que la remuneration qui la suit se fait selon la iustice & l'équité de Dieu, qui pour cette cause qualifie le Jugement, où cette remuneration a lieu, **IUSTE IUGEMENT, & SELON IUSTICE.** Il faut que vous vous departiez de cette

opinion, que non seulement l'homme soit sanctifié par grace, mais aussi que ce soit une nouvelle grace qui remunerer le peu de sainteté qu'il a. Et j'espere que vous vous en departirez tant plus facilement, que l'autorité que vous deferez à l'Ecriture vous y obligera. Car en quel lieu de l'Ecriture avez-vous trouué, que la grace de Dieu se contente d'un peu de sainteté aux fideles. Vostre peu de sainteté est-ce au moins quelque degré de sainteté que Dieu requiere? Ce degré, de quelque façon que vous le définissiez, est-il suffisant? est-il necessaire? S'il est necessaire, on n'en peut auoir moins. Quiconque en aura moins, sera necessairement exclus de la remuneration, si vous voulez que Dieu soit veritable en ses promesses. S'il est suffisant, quiconque l'aura accompli, n'aura point besoin de pardon. Car il ne faut point de pardon pour celuy qui a fait ce qu'on luy demande. Reuenez donc à la recognoissance du vray, & distinguez l'effect de la grace & l'effect de la Justice de Dieu. Le fidele est totalement sanctifié par grace. C'est la seule grace de Iesus Christ qui forme en luy

toutes les vertus Chrestienes pour estre  
 rendu capable de la gloire. Tout son  
 merite est de pure grace, c'est le don de  
 Dieu en luy. La gloire qui luy a esté ac-  
 quise, pour estre donnee pour recom-  
 pense à sa saincteté & à son merite, luy  
 a esté seulement acquise par la seule  
 grace de Iesus Christ. Pour l'une &  
 l'autre de ces raisons, la recompense  
 donnee est aussi appelée don, grace, &  
 effect de la misericorde de Dieu en Je-  
 sus Christ. Mais quand il s'agit de con-  
 siderer la raison de la remuneration, &  
 comment la couronne de gloire est ren-  
 due pour loyer à la saincteté du fidele,  
 qui a constamment combattu le bon  
 combat, & accompli & gardé les œu-  
 res de Christ, comme sa vocation l'y  
 appelle & l'y oblige : en ce regard in-  
 teruient, non la misericorde & le par-  
 don de Dieu pour pardonner les de-  
 fauts & les manquemens à ceux qui  
 n'auront pas gardé ses œuvres : mais sa  
 seule iustice, son équité, & la verité de  
 ses promesses, qui seront fidelement  
 accomplies en tous ceux qui auront  
 vaincu & qui auront gardé ses œuvres.  
 Telle est la doctrine de l'Euangile. Tel-

le est la doctrine Catholique, que toute l'Eglise a constamment enseignee iusques à Luther. Toute autre doctrine tombe iustement sous la denonciation de l'Apostre, Gal. 1. 8. 9. Ce qui vous trouble, & ce qui vous a empesché iusques à present d'en bien comprendre la raison, vient de ce que vous & tous nos reformateurs n'ont iamais entendu, comme il appartient, la perfection de sainteté à laquelle l'Euangile appelle & oblige les fideles. Ce que ie vous explicqueray, Dieu aidant, en la suite de cet oeuvre.

La premiere raison par laquelle vous voulez establir cette imagination, qui exclud le merite du fidele & la iustice de Dieu, de la remuneration en laquelle sera rendue la couronne de iustice aux fideles, est comprise par vous en ces mots pag. 7. *La raison est que le merite emporte une remuneration due par rigueur de iustice pour la condignité de l'oeuvre, selon que S. Paul s'explique, Rom. 4. disant, A celui qui oeuvre le loyer n'est point imputé pour grace, mais pour chose due: suivant cela donnez telle source & tel principe qu'il vous plaira au merite, à sçavoir, ou les forces de*  
*la na;*

*La nature, ou la grace: si vous dites que la remuneration est dueë par rigueur de iustice, & pour la condignité de l'œuvre (qui est ce que tient l'Eglise Romaine touchant la remuneration des œuvres de la regeneration) le loyer ne sera point imputé pour grace, mais pour chose dueë? Que faut-il donc, afin que la vie eternelle soit un loyer imputé pour grace & non pour chose dueë? Il faut que nous recognoissions que Dieu remunerer nos œuvres en sa misericorde & bonté paternelle, supportant & pardonnant les defauts qui y sont, & que la bonne œuvre ait non seulement pour origine la grace, mais qu'en suite aussi il y ait grace en la remuneration que Dieu en fait. Pour vous débrouïller de l'obscurité qui vous a fait concevoir un raisonnement si aliené de l'Evangile & de l'intention de l'Apostre au passage que vous alleguez, j'ay deux choses à faire en ma réponse. La premiere regarde ce gros mot dont vous enfliez vostre stile, en disant, *rigueur de iustice*, pour faire peur à ceux qui ne sçauent que c'est que iustice. Vous sçavez que le terme de rigueur appartient plus proprement à l'execution de la vengeance pour la loy violée, qu'à la distribution du prix pour la loy ac-*

accomplie. Or si vous voulez qu'en la re-  
 muneration, c'est à dire en l'action où  
 Dieu rendra le salaire aux œuvres des  
 hommes en son iuste Iugement, il n'vse  
 point de la rigueur de sa iustice : vous  
 voulez qu'il punisse moins ceux qui se-  
 ront punis que ses menaces ne portent.  
 Et ainsi excluant la rigueur de iustice,  
 vous excluez en effect la iustice. Si  
 vous consentez, qu'au regard de ceux  
 qui seront punis Dieu vsera de la rigueur  
 de sa iustice, c'est à dire, qu'il exercera  
 sa iustice enuers eux, selon la teneur de  
 ses menaces, ie vous demande, pourquoy  
 ne voulez vous pas, qu'en donnant le  
 prix & la recompense à ceux qui auront  
 bien fait, il exerce aussi sa iustice selon la  
 teneur de ses promesses. Croyez-vous  
 donc, ou qu'il leur donne moins qu'il  
 leur a promis, ou qu'il donne la recom-  
 pense à ceux qui n'auront pas accompli  
 la condition requise par la conuention?  
 Si vous ne croyez ny l'un ny l'autre, com-  
 me indigne de la verité de Dieu, auoüez  
 que Dieu exerce aussi sa iustice selon la  
 teneur de ses promesses, enuers ceux qui  
 receuront le prix de gloire : aussi bien  
 qu'il exercera sa iustice, selon la teneur

de ses menaces, enuers ceux qui encour-  
ront le supplice. Et par consequent que  
le iuste iugement de Dieu, auquel il ren-  
dra à chacun selon ses oeuvres, accompli-  
ra tant enuers les bons qu'enuers les mau-  
uais la mesme teneur de iustice, que vous  
auez appellée rigueur. Vous sçauiez que  
c'est que iustice, τὰ ἴσα τοῖς ἴσοις τὰ ἀνί-  
σα τοῖς ἀνίστοις, c'est celle qui rend à *egaux*  
*choses egales, à inegaux choses inegales.*  
Tournez vostre rigueur de iustice en  
tous les sens qu'il vous plaira, vous n'y  
en sçauriez trouuer dauantage. Or  
vous qui voulez bien que la saincteté  
soit vne condition necessaire pour ren-  
dre l'homme capable de la gloire, faites  
l'homme non sainct, vous l'en excluez,  
faites le sainct, vous l'y admettez. Et  
tout cela selon iustice, selon rigueur de  
iustice. Determinez le degré de saincte-  
té que vous requerez pour rendre l'hom-  
me capable de gloire, ou ne le determi-  
nez pas. Si vous le determinez, tous  
ceux, qui ne seront point paruenus à ce  
degré de saincteté, seront exclus de la  
gloire, tous ceux qui y seront paruenus,  
y seront admis. Et tout cela selon iusti-  
ce, & selon rigueur de iustice. Si vous

ne le determinez pas, le moindre degré aura moindre gloire, le plus grand vne plus grande. Et tout cela encore selon iustice, & selon rigueur de iustice. Toujours & par tout, les egaux auront choses egales, les inegaux choses inegales. Telle est la vraye & seule raison de iustice. Et tout ce que vous pouuez entendre sous vostre rigueur de iustice, n'est autre chose que cetteloy. Car la iustice se considere, ou en la raison mesme de la loy, ou en l'execution de la loy mesme. La raison de la loy est la proportion, soit arithmetique soit geometrique, qui determine à chacun ce qui luy appartient selon les conditions differentes du suiet, qui sont réglées par l'vne ou par l'autre proportion. C'est ce que suiuent tous les Legislaturs en toutes les loix qu'ils establisent. De quoy il n'est pas besoin de traiter ici plus particulièrement. L'execution de la loy n'est autre chose que l'application de sa raison sur chaque suiet singulier, suiuant ses promesses & ses menaces, pour le prix & pour la peine qu'elle propose à la condition requise ou à son contraire. Ainsi, en l'execution de la loy, la raison de la iustice ne considere au-

ère chose que son accomplissement ou sa  
 transgression, pour rendre à l'un ou à  
 l'autre la recompense ou la peine, l'effect  
 de la promesse ou de la menace. Or si  
 vous auiez bien pensé à ces choses, vous  
 ne vous porteriez iamais à nier qu'en la  
 remuneration Dieu suiue autre chose  
 que la raison de iustice, quelque condi-  
 tion que vous veilliez presupposer en  
 l'Alliance de l'Euangile, selon laquelle  
 Dieu iugera le monde vniuersel en iusti-  
 ce. Car presupposez si bon vous semble,  
 qu'en l'Alliance de grace la foy soit  
 la seule condition proprement dite,  
 & selon le sens des Iuriconsultes,  
 pour parler selon les nouvelles specula-  
 tions de Monsieur Amyraut. Qu'à la  
 seule foy, qui embrasse la iustice de  
 Christ imputée, soit promise la vie  
 & la gloire eternelle. Celuy qui aura ac-  
 compli cette condition, qui par foy aura  
 embrassé la iustice de Christ imputée, &  
 en sera couuert, comparoissant au iuge-  
 ment de Dieu, aura droit de demander,  
 selon iustice, & selon toute rigueur de  
 iustice, le prix de la gloire promise. Et  
 Dieu l'en remunerant exercera iustice,  
 & s'il ne l'en remunereroit pas, feroit in-

iustice. En rendant la gloire à celuy qui aura creu, Dieu n'exercera plus misericorde, bien qu'il ait exercé misericorde en proposant le prix de gloire à celuy qui auroit la foy, & en donnant la foy à celuy qui ne l'auoit pas, & ne la pouuoit auoir de foy-mesme. Mais, en la remuneration, où Dieu execute ses promesses selon la conuention qu'il a faite, considerant la condition accomplie de la part du suiet, & accomplissant de sa part ce qu'il a promis, il ne fait, en ce regard, autre acte qu'un acte de iustice. Et puis que, selon que vous le recognoissez, la remuneration qui est selon iustice donne la qualité du merite à l'acte pour consideration duquel se fait la remuneration : il faut que vous-mesmes donniez la qualité de merite à la foy, que vous faites condition à laquelle seule est promise la gloire en l'Alliance de l'Evangile. Car quand vous allez vous figurant que Dieu, remunerant celuy qui aura creu, exercera un acte de misericorde, à cause qu'il donnera la gloire à un pecheur qui en est indigne : vous bastissez contre vos propres fondemens. Car l'object de Dieu remunerant n'est pas le pe-

cheur qui en est indigne, mais, selon-  
 vous mesmes, c'est le fidele, lequel par  
 le moyen de sa foy est couuert de la ius-  
 tice de Christ, laquelle iustice est digne  
 de la gloire. Tellement que vous pour-  
 riez bien dire que quand Dieu couure le  
 fidele de la iustice de son Fils ( comme  
 vous vous l'imaginez) il vseroit de mise-  
 ricorde, & quand il luy donne la foy pour  
 en estre couuert. Mais quand Dieu don-  
 ne la gloire au fidele, couuert de la iustice  
 de son Fils, selon vos hypotheses, il faut  
 de necessite que vous confessiez qu'il  
 exerce vn acte veritable de iustice, ou  
 vous ne scauez pour tout que c'est que  
 iustice, & en abolissez toute raison. Ain-  
 si voulant oster le merite en la remunera-  
 tion, vous despoüillez Dieu de sa iustice,  
 & pour magnifier, comme il vous sem-  
 ble, sa misericorde, vous en destruisiez &  
 le suiet & la raison. Mais si vous voulez  
 perseuerer en la recognoissance que vous  
 faites, *que la condition qui nous rend capa-*  
*bles de la gloire, est, ouure la foy, la iustice*  
*& la sainteté,* vous ne disputerez plus  
 contre la raison du merite que Dieu re-  
 munere selon iustice, ainsi que les Ca-  
 tholiques l'enseignent. Car en disant,

que ceux, en qui se trouuera, au Jugement de Dieu, la iustice & la sainteté, que l'Euangile requiert des fideles, receuront la couronne de gloire selon la promesse de Dieu, vous auouerez que Dieu accomplissant ainsi sa promesse fera vn acte de iustice. Et par mesme raison vous auouerez, selon vostre maxime mesme, que la sainteté du fidele, qui est ainsi remunerée selon iustice, est bien & raisonnablement appelée merite, comme les Catholiques la qualifient. Mais ce merite est merite de grace, pour ce que la grace & la misericorde de Dieu a produit son effet en l'homme en le faisant fidele, iuste & saint par la Communion de la Chair & de l'Esprit de son Fils.

L'autre poinct sur lequel j'ay à vous deueloper de la mesprise que vous cōmettez en vostre raisonnement, concerne le passage que vous alleguez de l'Apostre, disant, *qu'à celuy qui œuvre le loyer ne luy est point reputé pour grace, mais pour chose dueë*. En l'employ duquel vous commettez deux fautes notables. La premiere, en ce que l'induction que vous en tirez ne fait rien contre la maxime que vous voulez combattre. La

Seconde, que vous le tirez en vn sens  
 tout contraire à celuy de la dispute de  
 l'Apostre. Que voulez-vous donc con-  
 clure de ces paroles de l'Apostre, *Que*  
*le loyer* ( comme il est formellement  
 loyer & recompense ) *n'est point reputé*  
*pour grace, mais pour chose due.* Certai-  
 nement ceux contre qui vous disputez  
 touchant les merites ne le nieront pas.  
 C'est ce qu'ils disent & maintiennent  
 comme vne verité necessaire. Car en-  
 core que la vie & la gloire eternelle,  
 donnee pour loyer de la sainteté des  
 fideles, soit grace, & ainsi appelée pour  
 deux raisons; tant pource que la seule  
 grace de Dieu en Iesus Christ nous l'a  
 acquise & constituee pour loyer, lors  
 que nous en estions du tout indignes:  
 que pource que le merite, auquel la re-  
 compense est renduë, prouient aussi de  
 la seule grace: neantmoins tant qu'elle  
 est considerée formellement com-  
 me loyer & recompense, elle n'est point  
 reputée pour grace mais pour chose  
 due. Car, comme l'Apostre l'affirme,  
 telle est la raison du loyer & de la re-  
 compense. Et pourtant, quand Dieu  
 considere le fidele qui a combattu le

bon combat, qui a vaincu, qui a gardé la foy & les œuvres du Fils de Dieu, comme le S. Esprit parle, & qu'en le considérant ainsi il se propose de luy donner la recompense promise, comme il fera en la remuneration au dernier iour, il ne le regarde pas comme l'objet auquel il exerce vne acte de misericorde, mais de iustice, auquel il donne vn benefice qui ne luy appartient pas, mais qui luy appartient. Alors a lieu la parole de l'Apostre. A celui qui aura ouuré les œuvres de Dieu, le loyer de la gloire qui luy sera rendue ne luy sera pas, pour ce regard, réputée pour grace mais pour chose dueë, encore que, pour les autres raisons susdites, elle soit vraiment & raisonnablement appelée grace, voire plus grace que loyer, à cause de son origine & du principe de son estre, qui est le seul mérite & la grace de Iesus Christ.

Quant à l'intention de l'Apostre en ce passage, elle n'a rien de commun avec l'induction que vous en faites. Car l'Apostre ne dit pas en ce lieu, ny nulle part, que la couronne de gloire ne soit reputée au fidele pour chose dueë

mais seulement pour grace. Iamais il ne luy dénie le titre de recompense & de loyer. En ce 4. chapitre aux Romains, d'où ces paroles sont tirees, l'Apostre ne dispute point de la raison de la glorification, mais de la iustification. Or est-il que quand Dieu donne, à l'homme pecheur, la foy par laquelle il est iustifié & rendu iuste, par laquelle la vraye iustice de Dieu est formee en luy, ce benefice est à luy vne pure grace. Pourquoi? Pource qu'il procede de la remission des pechez. Il ne suppose donc en l'homme autre chose que peché & indignité, non aucun merite. Par consequent la iustice qui est par la foy est vn don de Dieu, qui est de pure grace. Ce n'est pas vn loyer ny vne recompense qui suppose aucun merite prealable en l'homme. C'est de quoy l'Apostre dispute C'est ce qu'il remonstre aux fideles, lesquels il prend à tasche d'instruire de la vraye iustification de l'homme par la grace de Iesus Christ qui luy donne la foy, seul principe de l'amour veritable de Dieu, qui seul est eputé pour iustice. Pour cette raison l'Apostre oppose la foy aux oeuvres en

la iustification. Il argumente donc ainsi : Abraham a esté iustifié par foy, il n'a donc point esté iustifié par les œuvres. Il prouue l'antecedent par ce qu'il dit, *qu'il a creu à Dieu, & il luy a esté réputé à iustice.* Il prouue le consequent par cette raison, *A celuy qui œuvre le benefice de Dieu, & le loyer qui suit son œuvre: ne luy est point réputé pour grace, mais pour chose due.* Or est il que la foy, qui est le premier benefice de Dieu enuers Abraham, & qui luy a esté allouée à iustice, luy a esté réputée pour grace. En suite de quoy il prouue son assomption par le dire de Dauid, qui celebre le bon heur de ceux desquels les iniquitez sont pardonnées, & desquels les pechez sont couverts, & ausquels Dieu n'impute point le peché. Or ce pardon n'est autre chose que la grace par laquelle la foy est formée en l'homme. De sorte que celuy qui reçoit la foy est necessairement pecheur & sans œuvres, qui puissent tenir lieu ny consideration de cause mouuante, qui ait induit Dieu à luy departir ce benefice. Ainsi le benefice de la iustice qui est par la foy, est de pure grace, elle ne peut estre imputée à aucunes œuvres precedentes, aus-

quelles il ait esté rien deu. Car à celuy  
 qui œuure le loyer ne luy est point repu-  
 té pour grace, mais pour chose deuë.  
 Appliquez donc cette sentence au suiet  
 de la iustification, & vous suiurez l'inten-  
 tion de l'Apostre, & vous ne direz rien,  
 ny n'argumenterez point par là contre la  
 doctrine Catholique, dont ie vous re-  
 monstre la verité sur le suiet de la glorifi-  
 cation. Car les merites, que les Catholi-  
 ques enseignent estre au fidele, qui a esté  
 iustificié & rendu iuste & sainct par l'ope-  
 ration de la grace de Iesus Christ en luy,  
 sont merites au regard du benefice de la  
 gloire que Dieu luy communique. Mais  
 ils ne mettent aucun merite en l'homme  
 pour raison duquel la grace de la iustifi-  
 cation luy ait esté conferée. Les bonnes  
 œuures, que les Catholiques appellent  
 meritoires, suiuent la grace de la iustifica-  
 cation, & en procedent, & ne la prece-  
 dent pas, comme vous auez veu que le  
 Concile de Trente le determine & l'en-  
 seigne. Si quelqu'un veut attribuer à  
 l'homme quelque merite pour obtenir la  
 grace de la iustification, vous serez Ca-  
 tholique si vous prononcez contre luy  
 anatheme. Il n'y a merite ni dignité que

celle que la seule grace de Iesus Christ a mise en nous. Toutes les bonnes œuvres, qui sont les fructs du S. Esprit en ceux que la grace de Iesus Christ a iustifiez & sanctifiez par vraye iustice & sainteté inherente, viennent en compte, & sont considérées de Dieu, quand il est question de la gloire qu'il rendra à ses Saints au dernier iour. C'est la raison pourquoy les Catholiques, c'est à dire, toute l'Eglise Chrestienne depuis les Apostres iusques à Luther, les a qualifiées du nom de merites, comme la gloire est tousiours appelée recompense & loyer. Direz-vous que la gloire ne soit pas dueë aux Saints? Direz-vous que la couronne qu'ils receurent ne soit pas le loyer de leur combat, de leur course, de leur travail, & de leur victoire? Direz-vous, au regard, pour exclurre la raison du merite & du loyer en la remuneration, qu'à celuy qui œuvre les œuvres de Dieu, qui aura gardé les œuvres de Christ, le loyer ne luy doit point estre réputé pour chose dueë, mais seulement pour grace? Ou, qui pis est, direz-vous, afin de faire trouver que la gloire donnée est purement gratuite, comme vous voulez, qu'elle ne

sera donnée qu'à celuy qui n'aura point  
 ouuré? Car il faut de nécessité, si vous  
 voulez appliquer à la glorification ce que  
 l'Apostre dit de la iustification, que vous  
 sousteniez que le benefice de la gloire,  
 pour estre simplement reputé à grace,  
 ne sera donné qu'à ceux qui n'œuurent  
 point, qui n'auront point fait ny gardé  
 les œuures de Christ. Comme il est cer-  
 tain que la grace de la iustification n'est  
 donnée qu'aux pecheurs, à ceux qui  
 sont sans aucunes œuures de iustice. Car  
 ainsi le benefice en est purement gratuit,  
 & ne le seroit point autrement. Reue-  
 nez à vous mesmes. Considérez vostre  
 mesprise. Distinguez entre le benefice  
 de la glorification, & entre le benefice de  
 la iustification. Au regard de certui-cî  
 dites hardiment qu'il n'y a aucun merite  
 en l'homme qui le precede. Au regard  
 de la gloire, perseuerez fortement &  
 constamment à dire, qu'en ceux qui la  
 doiuent obtenir, ceux à qui elle est deuë,  
 à qui elle est donnée pour loyer & pour re-  
 compense, doiuent auoir en eux vne con-  
 dition, qui est, outre la foy, la iustice &  
 la saincteté. Reconnoissez donc, par  
 mesme raison, que la iustice & la saincte-

té des fideles est vrayement & raisonna-  
 blement le merite, pour raison duquel la  
 gloire leur est communiquée, selon les  
 promesses de Dieu : comme l'iniquité &  
 la souillure est le merite contraire, en  
 tous les infideles, & à tous ceux qui obeis-  
 sent à iniustice, pour raison duquel leur  
 sera dōnée, pour retribution, l'ignominie  
 & le supplice eternel, que les menaces de  
 l'Evangile leur denoncent. Ainsi vous  
 deviédrez Catholique de vous mesmes.  
 Vostre propre recognoissance vous fera  
 Catholique. Car la confession d'une ve-  
 rité nous mene necessairement à l'autre,  
 pourueu que nous la recherchions en  
 bonne conscience. Vous ne direz donc  
 plus, *que la vie eternelle soit vn loyer im-  
 puté pour grace, & non pour chose deuë.*  
 Qui est vne contradiction que vous fai-  
 tes à vous mesmes & à l'Apostre. Car  
 l'Apostre, des paroles duquel vous pen-  
 sez argumenter, dit expressement, que  
 le loyer n'est point imputé pour grace,  
 mais pour chose deuë : & non pas, cōme  
 vous, qu'il y ait vn loyer imputé pour gra-  
 ce, mais non pour chose deuë. Si l'Apos-  
 tre veut que la vie eternelle soit vn loyer,  
 il veut tout ensemble, que ce soit vne  
 chose

chose deuë, qui est tout le contraire de  
 de ce que vous voulez inferer. Or vous  
 ne niez pas que, selon l'Apostre, la vie  
 eternelle ne soit vn loyer. Vous deuiez  
 donc inferer, des paroles que vous alle-  
 guiez, que la vie eternelle est chose deuë  
 au fidele qui a deuëment combatu. Car  
 la raison formelle du loyer, par la defini-  
 tion de l'Apostre, est d'estre chose deuë.  
 C'est pourquoy, quand la vie eternelle est  
 considerée comme grace, elle n'est pas  
 lors considerée au regard de la raison for-  
 melle pour laquelle elle est dite loyer.  
 Car ce qu'elle est grace, c'est au regard de  
 ce que Dieu l'a promise & constituée aux  
 hommes pecheurs qui en estoient indi-  
 gnes. C'est encor au regard de ce que  
 par grace illes en rend dignes. Mais au  
 regard de ce qu'il la communique à ceux  
 qui en ont esté rendus dignes, elle est for-  
 mellement loyer, & en ce regard c'est  
 chose deuë & non grace, suiuant la defi-  
 nition de loyer quel'Apostre nous don-  
 ne. Rayez donc tout ce que vous dites  
 ensuite, comme tout à fait contraire à  
 ce que vous deuiez induire du passage  
 de l'Apostre par vous allegué, quand  
 vous nous donnez cette obseruation si

mal fondée, Il faut que nous reconnoissons que Dieu remunerer nos œuvres en sa misericorde & bonté paternelle, supportant & pardonnant les défauts qui y sont, & que la bonne œuvre ait non seulement pour origine la grace, mais qu'en suite il y ait grace en la remuneration que Dieu en fait. Vous vous trompez infiniment en assignant l'acte de la remuneration à la misericorde de Dieu. Dieu exerce sa misericorde en nous rendant de pecheurs & vicieux iustes & saints, & en relevant nos corps de la poudre en laquelle ils auront esté abbatus par la misere & par la mort. Jusques là s'estend l'acte de la misericorde de Dieu envers nous, tant pour le corps que pour l'ame. Mais lors que nous serons resuscitez, nous serons iugez pour recevoir, en nos propres corps, chacun de nous, selon que nous aurons fait ou bien ou mal. Alors aura lieu seulement l'acte de la Justice de Dieu remunerant & salariant chacun ainsi qu'il l'aura meritè. Alors il n'y aura plus de pardon ny de misericorde pour personne. Car Dieu iugera chacun selon ses œuvres. Alors il n'y aura plus de pardon pour les ouvriers d'iniquité, pour ceux qui auront obci à

Iniustice, & qui auront esté rebelles à la grace du Seigneur Iesus qui les conuioit à repentance. Tous ceux-là tomberont sous l'ire & sous le Iugement horrible de la vengeance de l'Agneau, maudits au feu eternal preparé aux diable & à ses anges. Mais aux fideles, qui par patience en bien faisant, obeïssans à la grace celeste, auront vescu en ce present siecle, iustement, sobrement, & religieusement, leurs œures de iustice, de temperance, & de pieté receuront, pour salaire, la couronne d'immortalité & de gloire eternelle. Car à tous ceux qui seront tels, qui auront receu en eux-mesmes la vertu de la benediction spirituelle, & en auront produit les fruiets, sera dit de par le Seigneur, *Venez les benits de mon Pere, possédez le Royaume en heritage, lequel vous a esté preparé dès la fondation du monde. Car i'ay eu faim, & vous m'avez donné à manger, i'ay eu soif, & vous m'avez donné à boire.* Il ne leur dira pas, venez les benits de mon Pere, possédez le Royaume, pource que vos œures estans toutes defectueuses & souillées ie les couure de ma iustice, & par ce moyen ie vous ren iustes encore que vous ne le soyez pas

Car j'ay eu faim, & vous m'avez chichement & rarement donné à manger, j'ay eu soif, & vous m'avez chichement & rarement donné à boire, mais ie supporte, & pardonne à tous vos defauts, pource que vous avez creu que i'estois mort pour vous. C'est là vostre Euangile, mais non celuy de Iesus Christ & de ses Apostres. Vous ne trouuerez, en aucun lieu de leurs'escrits, rien qui se rapporte à vne telle idée du jugement de Dieu, auquel il remunerera les bonnes œuures que sa grace a produit au fidele. Et vous vous abusez grandement, quand vous supposez que la mesme œuvre bonne, produite en nous par la grace de l'Esprit de Christ, soit defectueuse. C'est à dire, bonne & mauuaise tout ensemble, pour estre obiet de pardon & de recompense. Il semble que vous n'ayez pas encore compris la raison du bien & du mal en chacune œuvre, & ce pourquoy elle est dite bonne ou mauuaise. La raison formelle de la bonne œuvre consiste en deux parties. L'une est sa dépendance & son emanation de la reigle de la volonté de Dieu. L'autre est son rapport à la fin de son amour sur toutes choses. C'est

En suivant la guide de ces deux conditions que nous accomplissons ce que l'Apostre nous ordonne, *quelque chose que vous faciez, faites le tout à la gloire de Dieu.* Car Dieu n'est glorifié de nous que par les œuvres que nous faisons selon la regle de sa volonté, & pour la fin de son amour sur toutes choses. C'est en telles œuvres seulement que la charité est accomplie. Et pourtant, si l'une de ces conditions manque en l'œuvre, elle ne vaut rien. Pour exemple, si l'œuvre a la condition requise par la volonté de Dieu, comme de donner aux pauvres son bien, ou exposer son propre corps à la souffrance, si cela se fait pour nostre propre gloire, pour l'amour de nous mesmes, non pour la gloire de Dieu & pour son amour, la charité n'y est pas, l'œuvre ne vaut rien. C'est pourquoy l'Apostre dit, *quand bien ie distribueroy tout mon avoir pour la nourriture des pauvres, & quand bien ie liureroiy mon corps pour estre bruslé, & que ie n'aye point charité, cela ne me profite en rien*, 1. Cor. 13. 3. Telle estant la raison formelle de la bonté del'œuvre, direz-vous quelà où vne de ces conditions manque l'œuvre soit bonne? Direz-

vous, que là où ces deux conditions se trouuent, l'œuvre soit defectueuse? Au premier cas, direz-vous que Dieu en son Jugement supportera ou pardonnera le defect de l'œuvre, où l'une de ces deux conditions aura defailli? Direz-vous, qu'il remunerera une telle œuvre en supportant & en pardonnant à son defect? Au second cas, direz-vous que l'œuvre, où ces deux conditions auront esté accomplies, ait besoin de support & de pardon pour recevoir la recompense que Dieu a promise aux bonnes œuvres faites en foy, selon son commandement & pour sa gloire. Reconnoissez donc que vostre doctrine confond entierement la raison de la misericorde & de la iustice de Dieu, quand vous voulez que l'acte de la misericorde entre en la raison formelle de la retribution du loyer & de la recompense promise aux bonnes œuvres, à la iustice, & à la sainteté des fideles. Faites nos premiers Reformateurs tant habiles & si entendus qu'il vous plaira, cela n'empeschera pas, comme j'espere, que vous & plusieurs autres ne reconnoissiez qu'il se font lourdement abusez sur ce dogme. Et principalement en ce que pour esta-

blir la necessité de leur hypothese, que Dieu ne remunerer les bonnes œuvres des fideles qu'en grace & en misericorde, & non selon iustice, ils ont enseigné que nul ne peut accomplir les œuvres de Dieu, ny obtenir la perfection de iustice que l'Euangile requiert de nous, quelque don du S. Esprit que nous receuions. Car telles sont les instructions de nos Catechismes, *que quoy que Dieu nous donne son S. Esprit nous ne pouuons accomplir les commandemens que l'Euangile nous ordonne.* Qui est vne doctrine diametralement contraire à ce que S. Paul enseigne, que la loy de l'Esprit de vie, qui est en Iesus Christ, nous a affranchis de la loy de peché & de la mort, afin que la iustice de la loy qu'il nous estoit impossible d'accomplir estans en la chair, fust accomplie en nous qui ne cheminons point selon la chair, mais selon l'Esprit. Rom. 8. 2. 4. Et à ce qu'il nous dit de luy-mesme: *Je sçay auoir disete, ie sçay aussi estre abondant. Je peux toutes choses en Christ qui me fortifie,* Philip. 3. 12. 13. Où il exprime les œuvres de patience & de charité, de patience en la disete, & de charité en l'abondance, qui est la vocation de tous les fideles. Car en cela toute iustice, & tou-

te saincteté est accomplie. Or comme ie ne dénie pas, ains au contraire ie celebre & louë la bonne intention de nos reformateurs, quand ils ont célébré la grace & la miséricorde de Dieu, pour induire les hommes à humilité, & pour abbatre tout orgueil & toute presumption d'eux-mesmes: aussi deuez vous ingenuëment confesser, qu'ils se sont grandement mespris en l'application de la verité & de la raison de la miséricorde de Dieu enuers nous, lors qu'ils ont reietté la doctrine Catholique des vrayes merites de grace, que l'Esprit de Dieu produit aux fideles. Et que, pour reietter cette doctrine, ils ont introduit cette maxime tres pernicieuse à la pieté, que les fideles conduits par l'Esprit de Dieu ne peuvent accomplir ce commandement de leur Seigneur, de s'aimer les vns les autres comme le Seigneur les a aimez, en quoy consiste la parfaite charité, qui est l'accomplissement de la loy. Et ce qui est d'autant plus estrange, mais toutesfois ordinaire en tous ceux qui introduisent de fausses hypotheses en la verité, c'est la manifeste contradiction qui paroist entre leurs maximes. Car quand ils ma-

gnifient la grace de Dieu operante en nous, ils ont accoustumé principalement de l'exprimer ( & avec raison ) par ces paroles de l'Apostre, qui la décrit *par l'excellente grandeur de la puissance de Dieu enuers nous qui croyons par l'efficace de la puissance de sa force.* Or est-il que l'excellente grandeur d'une puissante force & vertu ne se peut mieux cognoistre que par son effect. Si donc la vertu de l'Esprit de Christ qui nous est donnée ne peut accomplir en nous la iustice & la sainteté que l'Euangile nous demande selon le but de nostre vocation celeste : ou c'est en vain que l'Apostre en celebre si hautement l'excellence & l'efficace, ou vous faites une insigne iniure au Saint Esprit & à l'Apostre, quand vous niez, que ceux à qui Dieu donne son S. Esprit ne peuuent pas accomplir les commandemens de Dieu. De quelque costé que vous vous tourniez, il faut que vous confessiez la contradiction qui est en vostre doctrine. Car si vous dittes, que le defect vient de la chair qui est en nous, & non de l'impuissance de l'Esprit agissant, vous ne dites rien. Car l'action de l'Esprit consiste à mortifier la chair dans

le sentiment de la croix du Seigneur. Si donc la chair produit ses œuvres c'est qu'elle n'est pas mortifiée. Où est donc cette puissante force de l'Esprit qui la devoit mortifier? A-t'elle esté donnée ou non? Si elle a esté donnée, pourquoy n'a t'elle pas produit son effect? C'est à quoy vous ne sçauriez respondre selon vos hypotheses. Et tout cela, pource que vous n'avez iamais bien compris la naïve doctrine de l'Euangile touchant l'operation de la grace de l'Esprit de Christ en nous, qui n'agit que suiuant l'exercice de l'instrument prealable de la croix, qui seule prepare la matiere à ses consolations, pour former le fidele en nouveauté de vie. De quoy ie traiteray amplement & suffisamment, Dieu aydant, pour l'instruction de tous fideles, en la refutation de la reprehension que Monsieur Amyraut a entrepris de faire des ouuertes que ie luy auois données, pour entrer en cette voye de la verité. Mais au lieu de la suiure, il a mieux aimé la fermer, entant qu'en luy est, à soy-mesme & à autrui, par les illusions, & cauillations, dont il a tasché d'obscurcir ce que ie luy en auois donné à cognoistre.

Mais passon à la refutation de vos raisons  
suiuantes.

Pour monstrier, que la remuneration  
de la gloire est vn acte de la grace & de la  
misericorde de Dieu supportant & par-  
donnant les defauts de nos bonnes œu-  
res, vous alleguez les paroles de l'Apo-  
stre 2. Tim. 1. 18. Voicy le raisonnement  
que vous en faites page 8. *C'est cette grace  
que l'Ecriture nous oblige de recognoistre en  
la seconde partie du salut, dont vous parlez,  
à sçauoir au don que Dieu fait de la vie &  
gloire celeste. Oyez ce que dit S. Paul 2.  
Tim. 1. touchant Onesiphore dont il celebre  
les bonnes œuvres. Le Seigneur luy doit  
trouuer misericorde vers le Seigneur en cette  
iournée-là. Remarquez misericorde. Or  
misericorde est opposée à merite. Et en cette  
iournée-là, à sçauoir en celle du dernier Ju-  
gement, laquelle concerne la derniere partie  
du salut. Il me fasche d'estre obligé de  
faire tant de leçons sur toutes rencon-  
tres à vn homme qui enseigne les autres.  
Mais j'espere que vous les prendrez en  
bonne part, pource qu'elle vous instrui-  
ront de la verité que vostre bonne con-  
science recherche. Obseruez donc la  
mesprise que vous commettez sur ce*

passage en la remarque que vous y faites de *misericorde*, que vous opposez à *merite*. Car en vous concedant, que par *misericorde* soit enté du ici le loyer de la gloire qui sera rendu au dernier iour, ie vous nie que pour cela *misericorde* soit opposée à *merite*. Car la gloire sera lors appelée *misericorde*, à cause de l'origine & du principe qui a meu Dieu à la constituer à l'homme pecheur & mort en soy-mesme, pour recompense de la iustice & de la sainteté à laquelle il a voulu l'appeller pour le couronner de cette gloire. Et à cause de la grace, par laquelle il le rend iuste & saint pour luy donner cette couronne. Car ce principe & cette cause n'est autre que la *misericorde* de Dieu & l'amour ineffable qu'il nous a porté en son Fils lors que nous en estions du tout indignes, & lequel il déploye en nous par luy, pour nous rendre dignes de cette couronne. Mais cette raison pour laquelle la gloire eternelle sera appelée *misericorde*, n'est nullement opposée à la raison du *merite*, qui est considérée en la iustice & en la sainteté du fidele, lors que la retribution de la gloire est rapportée à icelle, suivant la raison formelle du

loyer & de la recompense dont elle ob-  
 tient le nom. Et ie ne veux point de lieu  
 plus exprés, ny de plus fort argument,  
 que le raisonnement que nous fournis-  
 sent ces mesmes paroles de l'Apostre que  
 vous alleguez. Car pour opposer la raison  
 du merite dans les bonnes œuvres du fi-  
 dele, à la raison de la misericorde con-  
 siderée en la recompense, vous voulez  
 que la recompense leur soit donnée en  
 consequence de ce que Dieu supporte &  
 pardonne le defaut qui est en ces bonnes  
 œuvres. Or ie vous demande, en con-  
 science, croyez vous que quand l'Apo-  
 stre celebre les bonnes œuvres d'Onesi-  
 phore, & qu'il demande que Dieu luy  
 doint trouver misericorde en cette iour-  
 née-là, il ait voulu dire que Dieu suppor-  
 te & pardonne aux defauts de la charité  
 dont Onesiphore auoit vsé enuers l'Apo-  
 stre? Selon vostre hypothese, il fau-  
 droit que telle eust esté l'intention de  
 l'Apostre. Mais selon raison & verité,  
 croyez vous qu'une telle pens'ée soit  
 conforme à son intention. Appellerez  
 vous cela celebrer les bonnes œuvres  
 d'Onesiphore, que de les noter précisé-  
 ment de defauts & d'imperfections?

Estiméz-vous que S. Paul ait accusé en son ame ( quand il parle ainsi ) Onesiphore d'avoir manqué de charité en son endroit, & que pour ce suiet il ait prié Dieu qu'il luy pardonnast ? Qui est l'intention qu'auroit deu avoir l'Apostre. selon le sens que vous donnez à la misericorde, en ses paroles, pour opposer la misericorde aux merites des œuvres. Cela seroit bon pour Phygelle & Hermogene, lesquels il dit l'avoir abandonné avec tous ceux d'Asie. Certes à ceux là, qui auoient tant defaillly à la charité, l'Apostre auroit bien peu demander que Dieu eust supporté & pardonné les defauts de leurs œuvres. Mais à telles œuvres, qui sont vray objet de pardon, n'attendez pas que les Catholiques ny moy donnions le nom de bons merites. Et si S. Paul eust demandé misericorde pour telles œuvres ( comme sans doute il l'a fait pour ceux qui l'abandonnoient, ainsi que nous le lisons au verset 16. du dernier chapitre, *Nul ne m'a assisté en ma premiere defense, ains tous m'ont abandonné, point ne leur soit imputé* ) il n'auroit pas demandé l'effect de la misericorde de Dieu

pour eux en cette iournee-là, mais dès à present, à ce que Dieu leur donnast de s'en repentir, & leur augmentast par son Esprit vne charité plus ardente & plus genereuse pour compatir aux afflictions de leurs freres. Or pour vous tirer de toute difficulté sur ce lieu, sçachez que quand l'Apostre demande que le Seigneur doint à Onesiphore de trouuer misericorde en cette iournee-là, il n'entend autre chose sinon, qu'il luy doint de trouuer le fruit & la recompense de l'oeuvre de misericorde dont il auoit vsé enuers luy. C'est ce qu'il appelle trouuer misericorde en cette iournee-là. Car si nous sommes charitables enuers nos freres, nous trouuerons le loyer de charité & de compassion, que la charité & la compassion de Christ pour nous, nous a establi en sa gloire. C'est pour cette raison proprement que la gloire est ici appelée *misericorde*. Et c'est pour cette raison que l'Apostre vse ici du mot de *trouuer*, pour monstrier que les oeures des fideles ne sont pas perduës. Car elles les suivent au repos de leur Seigneur, où ils en trouueront recompense. Vous sçauiez

par cœur tous les beaux textes de l'Escriture qui vous confirment cette vérité, sans qu'il soit besoin que ie m'estende à vous les rememorer.

Vous adioustez à mesme dessein un autre texte du 3. de Malachie, que vous insinuez ainsi: *A cela se rapporte ce que Dieu promet à ceux qui le craignent, Malachie 3. touchant le mesme iour: Ils seront miens lors que ie mettray à part mes plus precieux ioyaux; & ie leur pardonneray comme vn chacun pardonne à son fils qui le sert. En ce iour là donc il y aura pardon pour les pechez, à ceux qui obtiendront le salut, lors mesmes que Dieu mettra en auant leurs bonnes œuvres.* Ie m'estonne que vous estimiez deuoir interpreter ce que dit le Prophete en ce lieu, du iour du dernier Iugement, ou du second aduenement du Fils de Dieu, veu que toute la suite des deux chapitres 3. & 4. est vne continuelle prophétie de la benediction de Dieu qui deuoit aduenir au premier aduenement du Messie, dont Dieu commence ainsi la declaration aux premiers versets du chapitre, *Voicy ie m'en vay enuoyer mon Messager deuant moy, il accoustrera le chemin*

*chemin deuant moy, & incontinent le Seigneur que vous cherchez entrera en son Temple, & le Messager de l'Alliance, lequel vous souhaitez. Voicy il vient, a dit l'Eternel des armées. Or c'est à ce iour de sa venue, que Dieu, parlant, en suite, de ceux d'Israel qui le craignent, dont la memoire est escrite en vn liure deuant Dieu, comme dit le Prophete, promet qu'il les mettroit à part comme ses plus précieux ioyaux, & qu'il leur pardonneroit. Car en ces paroles sont entendus ceux-là mesme que S. Paul, en l'accomplissement de cette Prophetie, appelle, entre les enfans d'Israel, le residu selon l'election de grace, lesquels il dit auoir obtenu la benediction, lors que les autres ont esté endurecis. Et cette benediction est l'effect du pardon que Dieu leur promet. Car c'est par la grace de la remission des pechez que Dieu amene ses éleus à la foy de son Fils. Vous n'avez donc rien, en ce passage, qui fauorise vostre imagination, que Dieu salariera les bonnes œuures des fideles, non en les estimant selon leur valeur, mais en pardonnant à leurs defauts. Sa misericorde & son pardon consiste à les creer à bonnes*

œuvres, afin que cheminans en icelles ils parviennent au Royaume. Car nostre regeneration se fait en cette vie, Dieu ne nous imputant point nos pechez, & nous mortifiant continuellement par la vertu de la Croix de son Fils, & nous viuifiant par la vertu de la consolation de son Esprit en l'esperance de sa gloire. Tel est l'effect de la misericorde de Dieu enuers nous à nous pardonner nos pechez. Lequel effect n'a lieu qu'en cette vie, tandis que viuans en ce monde nostre vieil homme se va destruisant sous la Croix du Seigneur. Mais à tous ceux qui n'auront point eu part à cette vie nouuelle, d'où procedēt toutes bōnes œuvres de iustice & de saincteté, il ne reste plus de misericorde pour eux, qui doiue pardonner au dernier Iugement aux defauts & aux souillures de leurs œuvres. Car alors chacun sera iugé selon ses œuvres, & tous receuront, en leurs corps, ainsi qu'ils auront fait ou bien ou mal.

Aussi peu sert encore à vostre intention le passage du 6. aux Romains, duquel vous argumentez ainsi: *C'est pourquoy Sainct Paul ayant dit, Rom. 6. que le gage de peché c'est la mort, n'a diouste pas selon*

que le fil de son propos & l'opposition qu'il faisoit le requeroit, que le gage de iustice est la vie eternelle, mais change son discours, & dit que le don de Dieu est la vie eternelle par Iesus Christ. Le Cardinal Caietan en son commentaire sur ce lieu a fait cette remarque tant elle est euidente. L'Apostre, dit-il, ne dit pas que le salaire de iustice soit vie eternelle, afin que nous entendions que ce n'est pas de nos merites, mais du don gratuit de Dieu que nous obtenons pour fin vie eternelle. Il adioust que l'Apostre exprime le mot de don par un mot qui signifie un don gratuit. De mauuaise Grammaire, mauuaise Theologie. C'est grand pitié qu'en vne matiere, dont la verité est si importante, on forme des debats & des controuerfes, qui dechirent la charité & la robe du Seigneur Iesus, sur des mots & des paroles mal entendues; & que du sens qu'on leur attribue on en argumente contre la raison. Dites moy, ie vous prie, en consultant mieux vostre raison & vostre conscience, si l'Apostre eust dit, selon le fil de son propos, & comme l'opposition qu'il faisoit le requeroit, (ainsi que vous parlez) que la vie eternelle est le gage, la recompense, & le loyer de la

iustice & de la saincteté des fideles, eust  
 il parlé contre la verité & contre l'anal-  
 ogie de l'Euangile? Eust-il dit chose qu'il  
 n'ait dit luy mesme en diuers autres  
 lieux, & que le Fils de Dieu a proferée  
 luy mesme de sa bouche, quand il pro-  
 met à ceux qui le suiuent, que leur loyer  
 est grand és cieux, & à ceux qui ont  
 compassion de leurs freres, qu'ils ne per-  
 dront point leur salaire? Et quand l'A-  
 postre nous declare, que Dieu rendra à  
 chacun selon ses œuures, puis que vous-  
 mesmes auoüez que ce qui est rendu se-  
 lon les œuures est loyer & recompense  
 proprement dite. Veu que, par les paroles  
 de l'Apostre, telle est la definition du  
 loyer, comme vous mesmes l'auiez rap-  
 porté. Dites moy donc, ie vous prie,  
 si vous recognoissez que l'Apostre pou-  
 uoit en celieu, comme en tant d'autres,  
 appeller la vie eternelle loyer & recom-  
 pense, & en l'y appellant, parler bien, le-  
 gitimement, veritablement, & conue-  
 nablement à l'analogie de l'Euangile:  
 quel argument est le vostre, d'inferer,  
 l'Apostre n'a pas appelé en ce lieu cy la  
 vie eternelle *loyer*, comme il l'appelle en  
 diuers autres lieux, donc elle ne peut

estre dite loyer, ny la iustice des fideles, par consequent, appellée merite? En conscience est-ce là, Monsieur, vne bonne consequence? Mais que serace, si ie vous fais voir qu'en ce mesme lieu, par ces mesmes paroles, que vous & tous nos autres Theologiens auez iusques iei tres mal entenduës, l'Apostre appelle aussi proprement la vie eternelle loyer & recompense que Dieu donne aux fideles par Iesus Christ, comme il nomme la mort gage du peché? Les paroles originales de l'Apostre sont: τὰ γὰρ ὁψώνια τῆς ἁμαρτίας θάνατος, τὸ δὲ χάρισμα τῆς Θεοῦ ζωὴ αἰώνιος ἐν χριστῷ Ἰησοῦ τῷ κυρίῳ ἡμῶν. *Car le salaire du peché c'est la mort. Mais le donatif de Dieu c'est la vie eternelle en Iesus Christ nostre Seigneur.* Pour quelle raison a-t'on traduit τὰ ὁψώνια le salaire? L'usage de ce mot en ce sens vient de la signification en laquelle, non les Grecs anciens, que i'aye obserué, mais les Hellenistes l'ont employé pour la solde des gens de guerre. En ce sens se trouue ce mot au 3. chapitre du 1. liure des Macabees parlant d'Antiochus, καὶ ἠνοίξε τὸ θησαυροφυλάκιον αὐτοῦ καὶ ἔδωκεν ὁψώνια τοῖς δυνάμεσιν αὐτοῦ. *Il fit ouurir son Espargne, &*

*donna la solde à ses troupes. Et au 14.  
 chapitre parlant de Simon, Il fournit des  
 armes aux gens de guerre de sa nation,  
 καὶ ἔδωκεν αὐτοῖς ὀψώνια, Et leur donna la  
 solde. Et au 4. chapitre du liure d'Esdras  
 parlant de Darius, καὶ πᾶσι τοῖς φραυρούσι τὴν  
 πόλιν ἔγραψε δοῦναι αὐτοῖς κλήρους καὶ ὀψώνια.  
 Il leur ordonna leurs departemens & la solde.*  
 Cét vsage de ce mot est particulier aux  
 Escriuains sacrez, qui ont escrit en Grec,  
 c. à d. Iuifs vsans de la langue Grecque,  
 comme Suidas l'a remarqué, ὀψώνιον πα-  
 ρὰ τῇ θεῇ γραφῇ, ἢ ἀφορισμένη τροφή, *Opso-*  
*nium, dans l'Ecriture sainte signifie la pi-*  
*tance reglée.* Les Chrestiens qui ont em-  
 ployé, dans leur langage ordinaire, plu-  
 sieurs termes qui leur sont deuenus fa-  
 miliers par l'vsage de la religion, ont  
 apres donné cours à ce mot en cette si-  
 gnification, comme il se remarque de ce  
 que Gregoire de Nazianze contre Iulian  
 interprete, τὸ ὀψώνιον, τὸ βασιλικὸν σιτη-  
 ρεῖον, καὶ τὰς ὑπαρχούσας ἐκ νόμου τοῖς ἀξιό-  
 μασι δωρεὰς. Ce sont les appointemens  
 des Officiers qui auoient accoustumé  
 d'estre payez partie en argent, partie en  
 especes des choses necessaires à la vie,  
 comme on payoit aussi les appointe-  
 mens des soldats, dont la partie qui leur

estoit fournie en argent s'appelloit proprement *stipendium*, celle qui estoit fournie en especes s'appelloit *salarium*, pour ce qu'elle consistoit en chair de bœuf, de porc, de cheure salée, huile, vin, sel, herbes, bois, comme il se void particulièrement en la lettre de Valerian touchant Probus lors fait Colonel d'une Legion, qui deuint depuis Empereur dans Flavius Vopiscus. Ce qui s'appelloit par les Romains *salarium*, est ce que les Hellenistes ont dit *ὁ μισθός*, la solde ordinaire & journaliere des gens de guerre. Or l'Apostre, qui nous represente par tout la vie du Chrestien comme vne milice, pour raison dequoy il employe les metaphores prises des combats, soit de guerres, soit de ioustes: nous propose aussi la fin & le fruiet de l'exercice Chrestien sous les mesmes noms de la recompense donnée à ceux qui combattent vaillamment. Il nous designe par tout la vie & la gloire ecernelle du titre de prix & de couronne, & de la recompense donnée à ceux qui auoient bien combatu & vaincu. Les paroles dont il vse au verset duquel il s'agit, procedent de la mesme intention. Il y oppose la recompense de ceux qui seruent à la chair, à la recom-

pense de ceux qui seruent à l'esprit. L'un  
 & l'autre sous les noms empruntez du  
 payement des gens de guerre. Car com-  
 me τὰ ὀψώνια d'une part signifie la solde  
 ordinaire & reglée, τὸ χάρισμα d'autre  
 part signifie la recompense extraordinai-  
 re que les Empereurs donnoient aux  
 soldats apres quelque signalée victoire,  
 que les Latins appellent *Donatium*,  
 comme Tertullian le traduit doctement  
 au liu. de la Resurr. de la chair chap. 47.  
 C'est ce que nos Interpretes ont mal con-  
 sideré en l'opposition que fait l'Apostre  
 des soldats de Christ & des soldats du  
 monde. Car commeaux vns τὰ ὀψώνια  
 signifie la recompense du seruice, aussi  
 pour les autres, τὸ χάρισμα, *Donatium*,  
 signifie le prix & le guerdon du bon de-  
 uoir que font les fideles de bien comba-  
 tre en cette bonne guerre, comme parle  
 ailleurs l'Apostre. L'un n'a pas plus nom  
 ou signification de recompense que l'au-  
 tre. Et de faict Suidas interprete τὰ  
 ὀψώνια, par ce mesme terme, χάρισματα,  
 qui luy est opposé par l'Apostre. Οψώνια  
 κερδή, χάρισματα ὁ ἀντίπολος, τὰ γὰρ ὀψώνια  
 τῆς σαρκὸς θάνατος. Et certes, vous vous  
 abusez grandemēt, quād vous vous faites  
 accroire que ce mot *χάρισμα* ne signifie

autre chose qu'un don gratuit, c'est à dire, comme vous l'entendez, ce qui est donné à qui ne l'a pas mérité. Car au contraire τὸ χάρισμα *Donativum*, est la recompense signalée & singulière, donnée à ceux qui avoient mérité, par leur prouesse, d'estre extraordinairement reconnus. Ainsi appelloit on *Donatice coronæ*, les couronnes qui se donnoient aux vainqueurs aux jeux Olympiques, ou autres. Et afin que la signification du mot ne vous abuse pas, sçachez que *χάρις*, *χάρισμα*, *δῶρον*, *δωρεά*, ne se prennent pas moins pour le loyer & pour la récompense donnée à ceux qui l'ont bien méritée, que pour un don gratuit, comme vous parlez. Et que tant en Grec, qu'en Latin, *δῶρον χάρισμα*, *Dona militaria* & *Donativum*, sont dits spécialement pour la récompense qu'on donne aux gens de guerre. Comme aussi Eusthate l'a remarqué sur ces paroles d'Agamemnon, *Iliad. p. δῶροισι χαλκῶ τρύχω καὶ ἐδωδῇ λαίβεσθαι. δῶρα δὲ λέγει τὴν δίχα τῆς ἐδωδῆς μισθοφορίαν.* Et certes *δῶρον*, *δωρεά*, *χάρισμα* sont souvent pris pour même chose que *ἀθλον γέρας μίσθος*. Ainsi vous vous trouvez bien loin de vostre compte, quand vous estimez que

l'Apostre ne suit pas la maniere de parler que requeroit le fil de son propos, & l'opposition qu'il fait entre ceux qui seruent à la chair, & ceux qui seruent à l'Esprit, appellant aux vns la mort qu'ils encourent, τὰ ὀψώνια, & aux autres la vie qu'ils obtiennent τὸ χάρισμα. Car au contraire l'Apostre n'a nullement changé de figure. Il observe, en l'un & en l'autre, la metaphore de la recompense donnée aux soldats. Car τὰ ὀψώνια en l'un c'est *salarium*. τὸ χάρισμα en l'autre c'est *Donatium*. Seulement il a retenu le nom plus noble & plus honorable, pour signifier le prix de la vie eternelle donnée aux fideles. Que vous en semble ? Ce passage ainsi entendu & naïvement explicqué, fauorise t'il vostre intention ? Y trouuerez-vous deormais que la vie eternelle ne soit pas la recompense que Dieu donne aux bons merites de la iustice & de la saincteté des fideles, qui font bon deuoir de combattre en la milice Chrestienne, tout ainsi que la mort est le salaire rendu aux mauuais merites du peché & de la souillure des infideles, qui ont eu honte de la Croix de Christ ? Mais comment n'avez vous point veu, aux versets precedents,

la raison continuë du parallele de l'Apostre, opposant la mort & la vie eternelle pour prix & recompense ou aux vns ou aux autres? Car vous voyez, que cōme il a dit, que de ceux, qui seruent à peché, le fruit sont les œuvres sales & honteuses, & la fin en est la mort: il dit tout de mesme, que de ceux qui seruent à iustice, le fruit sont les œuvres de sainteté, & la fin vie eternelle. Ainsi donc, puis que la fin des œuvres ou des fruits aux vns est la mort, & la fin des œuvres ou des fruits, aux autres est la vie: voyez-vous pas que, par le raisonnement de l'Apostre, la vie n'est pas moins la recompense des bonnes œuvres & des bons merites des fideles, que la mort est le salaire des mauuaises œuvres & des mauuais merites des infideles? Et pourtant, que l'opposition qui suit entre les termes τὰ ὄψωνα, & τὸ χάρισμα, *le salaire & le donatif*, emporte, de necessité, en l'intention de l'Apostre, vne pareille raison de leur parallele, selon la naiueté du sens que ie vous en ay representé. Par ceci vous recognoissez que ce passage, qui estoit l'unique argument de nos gens contre les merites du fidele, est maintenant vne

des plus insignes demonstrations de la verité Catholique. Or cela n'empesche point, que la parité de raison, en ce que l'un & l'autre est loyer ou recompense, ne laisse vne grande disparité en la cause & en la raison de l'origine d'où l'une & l'autre procede. Car la mort qui suit le peché naist & prend son origine du peché mesme, lequel vient de l'homme, & ainsi l'homme ést autheur à soy-mesme de sa perdition. Mais la vie, qui suit la iustice, ne prend son origine que de la grace & du bon plaisir de Dieu en son Fils, duquel aussi proceda la iustice mesme, à laquelle elle est renduë pour recompense. Et pour cette cause, l'Apostre a choisi le terme qui signifie la recompense naturelle & ordinaire pour exprimer le salaire du peché. Mais pour représenter le prix proposé à la iustice, il a choisi le terme qui signifie la recompense extraordinaire & procedante de la bonté & de la liberalité du Prince, pour la recognoissance de la valeur & du bon deuoir de ses soldats. Pour cette raison ç'a esté fort bien obserué au Cardinal Caietan d'escire sur celieu ce que vous remarquez & qu'il a traduit mot à mot de Sainct

Chrysoſtome, *Que ce n'eſt pas de nos meri-  
tes, mais d'un don gratuit de Dieu que nous  
obtenons pour fin la vie eternelle.* Ce qui eſt  
tres bien & tres veritablement dit, tant  
pour exclurre nos propres merites,  
comme venus de nous, que pour affi-  
gner la cauſe de la vie eternelle, eſta-  
blie pour reeompence par la promeſſe  
de Dieu à la ſeule grace & au ſeul meri-  
te de Jeſus Chriſt. Car c'eſt tellement  
le bon plaifir de Dieu, qui, par ſa pro-  
meſſe, a eſtabli la vie eternelle pour re-  
compence de la juſtice & de la ſaincteté  
des fideles : que c'eſt encore par cette  
meſme promeſſe, & par la vertu de la  
parole de grace, que le S. Eſprit forme  
aux fideles la juſtice & la ſaincteté, &  
met en eux cette condition en laquelle  
conſiſte leur dignité & leur merite.  
Mais pour tout cela ne vous allez pas fi-  
gurant, que le Cardinal Caietan non  
plus que Sainct Chryſoſtome, ou quel-  
que autre des Peres, ou des Docteurs  
Catholiques, ayent fauoriſé l'opinion  
de nos Reformateurs, lesquelſ excluans  
tous merites des fideles, ont defini que  
Dieu, en leur rendant la couronne au  
dernier iour, n'aura égard ny à la juſtice

ny à la sainteté inherente en eux, ny à leurs bonnes œuvres, mais à la seule iustice de Christ qui leur soit imputée, & pour laquelle ils soient reputés iustes & saints, encore qu'ils ne le soient pas en eux-mêmes, comme nos Docteurs l'ont estimé. Certes, M<sup>r</sup>, vous n'avez jamais leu les œuvres du Cardinal Caietan, ou vous sçavez que nul entre les Docteurs Catholiques n'a esté plus severe defendeur de la doctrine des merites. Et ie ne puis assez m'estonner, que vous ayez entre eux voulu choisir celuy-là pour le faire parrein de vos opinions. Mais c'est avec même raison & même couleur, que vous alleguez cy-apres quelques endroits, ou d'autres Docteurs, ou de S. Bernard, ou de quelques autres Peres de l'Eglise. Si vous vous en voulez tenir à l'opinion de celuy d'entre eux tous qu'il vous plaira choisir, pour vous faire voir combien il vous fauorise, & avec quelle raison vous les alleguez comme fauteurs de vostre sentiment, ie vous declare que ie m'en rapporte à leur iugement. Faites choix pour vous du plus fauorable.

Reuenez-donc à vous, Monsieur, & reconnoissez que la raison de la grace de

Christ, & la raison du merite que la mesme grace forme en nous, ne se combattent ny ne se destruisent. Mais que l'une est excellemment liée avec l'autre, selon que le Concile de Trente, retenant la doctrine de tous les Anciens, l'a tres-bien defini par les paroles expresses, & suivant toute l'analogie de l'Euangile, appellant la vie eternelle **G R A C E & L O Y E R**, comme vous l'avez veu cy-dessus. Cessez donc, s'il vous plaist, de vous intriquer en l'opposition que vous voulez faire des passages de l'Escripture, qui magnifient la grace de Dieu par l'Jesus Christ, avec les merites du fidele que la mesme grace forme en luy. Comme est ce que vous citez en suite du 8. aux Romains, *Que Dieu n'ayant point espargné son Fils, ains l'ayant liuré pour nous tous, nous eslargira  $\chi\alpha\epsilon\iota\sigma\tau\alpha\iota$  toutes choses avec luy.* Par où l'Apostre indubirablement entend, & la consolation de son esprit en cette vie, par où nous sommes iustifiez & sanctifiez, & la gloire en l'autre. Car cette grace  $\tau\omicron\ \chi\alpha\epsilon\iota\sigma\mu\alpha\ \tau\omicron\ \nu\acute{\omicron}\varsigma$ , ce donatif, cette munificence celeste, n'empesche point que la couronne soit vrayement recompense, comme la saincteté, qui est

couronnée est vraiment méritée par Iesus Christ, en la Communion duquel nous obtenons ce mérite, humiliez sous l'obeissance de la Croix, en laquelle il a esté crucifié pour nous.

L'instance que vous faites en suite pag. 10. des Pseaumes 130. & 143. est encore bien moins à propos. Je rapporteray toutes vos paroles pour y satisfaire. *Quand vous aurez bien considéré (me dites vous) ce que les fideles disent, Ps. 130. Eternel, si tu prens garde aux iniquitez, qu'est-ce qui subsistera? Et David Ps. 140. N'enire point en iugement avec ton seruiteur, car nul vivant ne sera iustificié en ta presence, vous reconnoistrez qu'ils parlent de tout le cours de leur vie, & y comprennent le temps dans lequel Dieu leur auoit fait la grace de faire plusieurs bonnes ceures, car ils tiennent ce propos dans l'estat de la regeneration & du service qu'ils rendoient à Dieu. Et partant n'ont pas seulement égard à ce que vous appelez la premiere partie du salut, mais aussi à la seconde, pour dire que si lors qu'ils comparoistront deuant le Tribunal de Dieu, Dieu n'vsoit de grace & de misericorde, ils ne pourroient subsister. Je demeure d'accord avec vous, que les fideles, avec*  
David,

David aux lieux alleguez, parlent de tout le cours de leur vie. Mais vous sçavez que ie vous ay remonstré amplement, parlant à vous-mêmes, & sur l'obiection de ce mesme lieu de David, dans le Jugement de Monsieur Testard, depuis la page 178. iusques à la 229. la difference qu'il y a entre le langage & le sentiment de la conscience, sur ce suiet, des fideles sous le vieil Testamēt, & des fideles sous le nouveau. Je m'estonne donc de la consequence que vous inferrez, que leurs paroles ne se doiuent pas rapporter à la premiere partie du salut. Comme si, en tout le cours de la vie des fideles ici bas, ne se consommoit pas en eux la premiere partie du salut, leur iustice & leur saincteté. Comme si toute leur vie n'estoit pas leur combat & leur course. Comme si durant leur combat ils n'auoient pas continuellement besoin d'implorer le pardon, la misericorde, & la grace du Seigneur, pour estre par elle rendus victorieux. Et comme si cela empeschoit qu'estans demeurez victorieux, ils obtiennent la couronne en consideration de leur victoire, de la iustice, & de la saincteté en laquelle ils seront demeu-

rez fermes, & auront gardé les œuvres  
 du Seigneur. Mais cependant il est be-  
 soin que ie vous die encore là dessus  
 quelque chose de la difference des fide-  
 les sous le vieil Testament, & des fideles  
 sous le nouveau. Ie ne vous repeteray  
 rien ici de ce que ie vous ay dit là. Seu-  
 lement i'adiousteray, pour vne breue re-  
 capitulation de cette difference, que sous  
 l'economie Mosay que les fideles mesu-  
 roient toute leur vie selon l'usage de la  
 loy qui auoit vigueur en leurs membres,  
 & qui engendroit à seruitude, & dont  
 la fin estoit le recours à la grace & mise-  
 ricorde de Dieu. Et pourtant, estans  
 tousiours batus sous la loy des peines,  
 qu'elle a dénoncées & determinees con-  
 tre le peché, ils demandoient à Dieu  
 continuellement, dans cet exercice, pour  
 estre deliurez des maux qu'ils souffroiēt,  
 qu'il n'entraist point en compte avec eux,  
 qu'il ne les iugeast point en sa colere; re-  
 cognoissans que nul vivant ne seroit iu-  
 stifié deuant luy, ny ne pouuoit subsister  
 au Iugement, par lequel il exerçoit sur  
 eux les vengeances de sa loy. Et pour-  
 tant ils requeroient incessammēt de luy,  
 grace & misericorde pour estre deli-

tirez de l'ire. Mais maintenant, sous l'oe-  
 conomie de l'Euangile, la loy est abolie  
 pour tous les fideles. L'horreur de la ma-  
 lediction & de la vengeance diuine con-  
 tre le peché a esté engloutie pour eux  
 par la Croix, par laquelle Christ est mon-  
 té en sa gloire pour leur preparer place.  
 Et pourtant les fideles, qui trauaillent in-  
 cessamment à leur salut avec crainte &  
 tremblement, sous l'humiliation de la  
 croix de leur Sauueur, ne sont plus ef-  
 frayez du iugement de l'ire diuine, pour  
 ce qu'ils sçauent qu'il n'y a plus de con-  
 damnation à ceux qui sont en Iesus  
 Christ, qui ne cheminent point selon  
 la chair ( car ils ne regardent point les  
 choses presentes ) mais qui cheminent  
 selon l'Esprit; car ils regardent aux  
 choses qui sont en haut où Christ  
 est assis à la dextre de Dieu. La croix  
 de Iesus Christ, qui a esteint l'ire de  
 Dieu, estoit la fin de la loy, & c'est le  
 commencement de l'Euangile. Les fide-  
 les sous le vieil Testament finissoient par  
 où commencent les fideles sous le nou-  
 uveau. La fin de leur sanctification n'e-  
 stoit que le commencement de la nostre.  
Viuaus sous la loy, ils mouroient en la

foy du premier aduenement du Messie,  
 qui nous a apporté la remission de nos  
 pechez. Mais les fideles maintenant es-  
 tans morts à la loy par le Corps de Christ  
 crucifié en son premier aduenement,  
 viuent & meurent au Seigneur en l'esper-  
 rance de son second aduenement, qui  
 leur donnera la communion de sa gloire.  
 C'est pourquoy les fideles sous le vieil  
 Testament disoient fort bien & conue-  
 nablement à l'estat de leur dispensation,  
*que nul VIVANT ne seroit iustificié deuant*  
*Dieu.* Car nul n'est iustificié qu'il ne meu-  
 re. *Celuy qui est mort, dit l'Apostre, est iu-*  
*stifié de peché.* Or maintenant, en Christ,  
 sous l'Euangile, nous sommes morts avec  
 luy par le Baptisme, auquel nous obte-  
 nons la remission de nos pechez, & la grace  
 salutaire de nostre iustification & sancti-  
 fication parfaite. En quoy cōsistel' amour  
 de Dieu sur toutes choses & de nostre pro-  
 chain, selon la parfaite charité qui est es-  
 panduë en nos cœurs par le S. Esprit, qui  
 nous est donné en la communion de sa  
 Croix. Considerant cette difference de  
 l'un & de l'autre estat des fideles, comme  
 ie vous la represente, vous recognoistrez,  
comme i'estime, que vous vous estes

grandement mespris en vostre obiection, ne voyant point, qu'encore que Dauid, & les fideles parlent, en ce qu'ils disent, de tout le cours de leur vie, & qu'ils y comprennent le temps dans lequel Dieu leur auoit fait la grace de faire plusieurs bonnes œuures, & qu'ils tiennent ce propos dedans l'estat de la regeneration & du seruice qu'ils rendoient à Dieu: neantmoins lors qu'ils parlent du Iugement, ils n'ont point égard à ce que j'appelle la seconde partie du salut, pour dire que si lors qu'ils comparoistrônt deuant le Tribunal de Dieu, Dieu n'vsoit de grace & de misericorde, ains examinait leurs œuures à la rigueur de sa iustice, ils ne pourroient subsister. Car quand vous estimez le contraire, ainsi que vous le dites en vostre obiection, vous vous abusez d'un bout à l'autre. Les fideles sous le vieil Testament, parlans, comme fait Dauid, du Iugement de Dieu, consideroient le iugement que Dieu exerce selon la loy & hors de son Fils, & non pas le Iugement qu'il exercera selon l'Euangile, en son Fils & par son Fils. Or le Iugement de Dieu selon la loy s'exerce en cette vie. Mais le dernier Iugement s'exercera

après cette vie, & c'est celuy auquel Dieu  
 rendra à ses fideles & saints la couronne  
 & le Royaume en la gloire de son Fils.  
 Laquelle gloire n'a point esté manifestée  
 aux fideles sous le vieil Testament, quoy  
 qu'elle y ait esté predite. Comme S.  
 Pierre nous l'enseigne, 1. Ep. 1. 11. 12. Car  
 aussi sa gloire ne pouuoit estre annoncée  
 que la Croix & sa resurrection ne fussent  
 accomplies. Ce n'est donc point du Ju-  
 gement auquel nous sera communiquée  
 la seconde partie du salut, que David  
 parle, comme vous cuidiez. Mais du Ju-  
 gement que Dieu exerce en cette vie se-  
 lon la loy par les peines & afflictions en-  
 uers les pecheurs. L'horreur duquel Ju-  
 gement faisoit lors recourir les fideles au  
 Throne de grace & de misericorde. Ain-  
 si, de quelque costé que vous vous tour-  
 niez, vous ne trouuerez point quel effet  
 de la grace & de la misericorde de Dieu  
 enuers l'homme pecheur ait lieu ailleurs  
 qu'en cette vie. C'est ici où il nous la  
 faut implorer continuellement, à ce  
 qu'elle produise en nous son fruit en  
 sanctification. Car en l'autre vie aura  
 lieu seulement la Iustice de Dieu, pour  
 rendre à chacun selon ses oeures.

L'instance qui suit en vostre discours pag. 10. est bastie sur le faux fondement d'une pareille inaduertance qu'en l'argument precedent. *Quand David*, dites-vous, *constitue sa felicité en ce que Dieu luy pardonne ses pechez*, comme S. Paul le rapporte, Rom. 4. Oseriez-vous nier qu'il parle des pechez qu'il auoit commis depuis sa regeneration, & qu'il ne comprenne, en la felicité dont il parle, l'esperance de la vie eternelle pour le iour de la mort & du dernier iugement, à l'opposite des frayeurs de l'ire & de la malediction de Dieu, dont sa conscience auoit esté trauaillée par le sentiment de ses pechez. Si vous croyez l'Apostre S. Paul (comme ie sçay que vous faites) interpretant ces paroles du Prophete, vous recognoistrez que la felicité dont il parle, regarde la grace de la iustification, & non pas la recompense de la gloire. David, selon l'autorité de l'Apostre, parle de ceux qui d'impies & meschans ont esté faits iustes par la grace de la remission des pechez, mais non de ceux, qui ayans esté rendus iustes & saints, seront mis en possession de la gloire. Et combien que David voirement, sous le terme de la remission des pechez, entende aussi

tous les pechez, qu'il auoit commis depuis sa regeneration, & qu'il commettoit toute sa vie: cela pourtant ne fait rien pour estandre la felicité dont il parle à la remuneration aduenir. Vous n'en pouuez inferer autre chose sinon que la grace de la remission des pechez a vn effet continu, pour nostre iustification ou sanctification, tout le temps de nostre conuersation en ce seiour temporel, où nous auons besoin de demander tous les iours à Dieu, qu'il nous pardonne nos offenses & qu'il nous sanctifie. C'est la seule cōsequence veritable que vous en pouuez recueillir. Mais qui est diametralement contraire à vostre opinion de la iustification par la iustice imputée, laquelle, selon vous, se fait à l'instant que l'homme a creu en Iesus Christ, que par luy ses pechez luy sont remis. Et non successiuelement & durant tout le cours de sa vie. Ce qui conuient tres-bien à la iustification par la iustice inherente, par laquelle le fidele est de plus en plus iustifié de iour en iour, selon qu'il est escrit, *Que celui qui est iuste soit iustifié dauantage*, Apoc. 22. Prenez le fil de cette verité en main, & vous

Sortirez du labyrinthe de vostre erreur, qui vous fait faire tant de tours & de destours d'obiecctions inuitiles.

Telle est celle que vous continuez des paroles de Sainct Iehan, aussi mal appliquees à leur sens, que la consequence, que vous en voulez induire contre la verité que ie vous remonstre, est hors de propos & de raison. Voici vos paroles pag. ii. *Et S. Iehan ne parloit pas à ceux qui ont à obtenir la regeneration qui est, selon vous, la premiere partie du salut, mais à ceux qui l'auoient desia obtenüe & regardoient à la seconde, quand il disoit au premier de sa premiere, Si nous disons que nous n'auons point de peché, nous nous seduisons nous mesmes, & verité n'est point en nous. Si nous confessons nos pechez, Dieu est fidele & iuste pour nous pardonner nos pechez & nous nettoyer de toute iniquité. Il a voulu mettre en tout temps le fidele en estat d'humilité, pour dire comme le pauvre Peager en frappant sa poictrine, Dieu sois propice à moy qui suis pecheur. Au lieu que vous le mettez en l'estat du Pharisien, qui se contentoit de recognoistre que ses bonnes ceures & sa sainteté estoient prouennës de la grace, disant, O Dieu, ie te ren graces que ie ne suis*

point comme les autres hommes ; iniustes, ravisseurs, &c. D'où ie vous laisse à iuger combien vostre doctrine est preiudiciable au salut. Ie suis marry, Monsieur, que vous n'ayez eu plus de soin de vostre pudeur, en me faisant vn reproche si defraisonnable, à la suite d'un argument dont la matiere est si fort esloignée de vostre intention. Ie respondray premierement à ce reproche, & puis ie refuteray vostre argument. Le premier effet de la doctrine de la grace est de nous humilier sous la croix de nostre Sauueur Iesus Christ, qui par cette humilité nous prepare à la vraye iustice & sainteté que son Esprit saint forme en nous par la charité qu'il y respand, en remplissant nos cœurs de l'esperance de sa gloire. La doctrine que i'ay expliquée selon la definition des Catholiques, touchant le merite que la grace de Iesus Christ forme en nous, ayant pour fondement l'humilité & les causes d'où elle procede, ie ne puis assez m'estonner que vous ayez voulu me faire vn reproche si iniuste, que de me dire que ie mets, par cette doctrine, le fidele en l'estat du Pharisien. Et ie m'en

estonne d'autant plus, que vostre conscience (dormoit-elle ou non quand vous escriuiez?) estoit suffisamment instruite du contraire, par le seul escript auquel vous avez voulu faire quelque semblant de respondre, en effleurant de biaux, sans suite ny ordre, l'esclaircissement que ie vous auois amiablement proposé sur cette matiere. Si vous l'eussiez considéré comme il appattenoit pour y respondre, vous y eussiez trouué ce que ie vous en représenteray ici, pour vous faire iuge vous mesme de l'iniquité du reproche que vous me faites. Voici donc l'estat auquel ie mets le fidele, que vous appelez l'estat du Pharisien. Ce sont mes paroles extraictes de la 33. page. Cette forme en nous de l'homme parfait à la mesure de la parfaite stature de Christ, cette iustice, di-ie, & cette saincteté des fideles, qui consiste à aimer Dieu de tout son cœur, & son prochain comme soy mesme, a son commencement, son progrez, & sa perfection. Sa naissance commence par la foy, que l'ame du pecheur, abbattue sous le sentiment de sa misere, conçoit par la vertu de

„ l'Esprit de Iesus Christ en la parole de  
 „ l'Euangile, en laquelle luy est annon-  
 „ cée la remission de ses pechez & la be-  
 „ nediction du Pere celeste. Il embrasse  
 „ premierement, par cette foy, avec  
 „ l'assurance de la remission de ses pe-  
 „ chez, la communion de la Croix de son  
 „ Sauueur en la conformité de sa mort.  
 „ D'où naist, en sa cōscience, LA REPEN-  
 „ TANCE ET L'HVMILITE, qui sont  
 „ les premieres parties du renouvellement  
 „ de nostre entendement, & de la sousmis-  
 „ sion de nostre volonté à la volonté de  
 „ Dieu. L'Esprit, qui par la foy forme la  
 „ repentance & *l'humilité* en l'ame du  
 „ Chrestien, est celuy qui suscite en luy le  
 „ mouuement de sa conscience vers Dieu,  
 „ qui s'appelle l'Esprit de priere. Par le-  
 „ quel il prie & gemit continuellement à  
 „ Dieu, pour obtenir de iour en iour le  
 „ fruiet de la remission de ses pechez, &  
 „ l'assistance & la benediction de sa main,  
 „ pour le soulagement de toutes ses foi-  
 „ blesses & aduersitez. Le progres du  
 „ nouuel homme fait son accroissement  
 „ par l'esperance, par laquelle l'Esprit de  
 „ consolation subuiuent au fidele combat-  
 „ tant sous la Croix de son Sauueur en l'at-

tente del'immortalité glorieuse, & de la „  
couronne du Royaume où Iesus Christ „  
est entré pour nous preparer place. Et de „  
là se forment en l'ame du fidele LA PA- „  
TIENCE ET LA CHARITE', en la „  
la perfection desquelles consiste l'accom- „  
plissement de la iustice & de la vraye „  
saincteté du nouuel homme. Or la pa- „  
tience & la charité du fidele s'accomplit „  
par la mort, par laquelle le Fils de Dieu „  
nous a reconciliez au Corps de sa Chair. „  
Car, en cet estat, la foy du fidele embrasse „  
pleinement la Croix de son Sauueur, & „  
il reçoit entierement la conformité à sa „  
mort. Et son esperance embrasse pleine- „  
ment la communion à sa gloire, dont il „  
reçoit entierement, par l'abondance de „  
l'Esprit de paix & de ioye, le gage certain „  
& immuable que Dieu, qui est fidele, „  
gardera son depost iusques à la iournée „  
du Seigneur. C'est ainsi que son obeis- „  
sance à la volonté de Dieu, son amour „  
enuers luy, sa charité enuers les hommes, „  
& par consequent sa iustice & sa saincte- „  
té est accomplie & parfaite. Je vous de- „  
mande maintenant, Monsieur, auiez- „  
vous ce discours deuant les yeux, quand „  
vous auez escript, *que ie mets le fidele en l'e-*

*stat du Pharisien; & que vous dites, que vous me laissez à penser combien ma doctrine est preiudiciable au salut. Si vous l'auiez deuant les yeux, en quelle conscience l'auiez-vous pû dire? Si vous ne l'auiez pas, en quelle conscience auez-vous pû feindre & mettre en l'esprit de vos lecteurs, que i'enseigne quelque doctrine Pharisaïque & preiudiciable au salut? Puis que la vraye doctrine du salut ne peut estre plus véritablement ny plus naïfument proposée qu'en ce sommaire que ie vous en auois représenté. Iamais, Monsieur, vous ne vous lauerez de l'iniustice de ce reproche, qu'en deschirant de vos propres mains la feuille où vous l'auiez escrit. Et i'espere que vous ferez le mesme de l'escrit entier où vous auez combattu la doctrine Catholique sans la bien entendre; & que vous direz de bon cœur, en la recognoissant pour la seule doctrine de l'Euangile, *Nolim factum, nolim scriptum.**

Mais ceci n'est pas encore assez pour vous faire cognoistre l'iniustice de vostre reproche. Je veux vous faire voir, que par l'application que vous faites de la parabole de nostre Seigneur, vous ne com-

prenez, ny son intention, ny celle du  
Pharisien mesme. L'intention de nostre  
Seigneur, comme l'Euangeliste S. Luc  
le declare vers. 9. est *de redarguer ceux  
qui se confient en eux-mesmes de leur iustice.*  
Cen'est donc pas de redarguer ceux qui  
croient estre iustes par la grace de Dieu,  
& qui luy en attribuent la gloire, & non  
pas à eux. Et par là vous deuez voir, que  
vous ne faites rien plus iniustement, qu'  
d'accuser ceux, qui donnent à Dieu tou-  
tela gloire du bien qui est en eux, de se  
mettre en l'estat du Pharisien. Et certes  
vous ne commettez pas en cela moins  
d'inaduertance sur le mouuement de  
l'orgueil Pharisaique: si vous estimez  
que les Pharisiens ayent recognu que  
leurs bonnes œuures & leur saincteté  
soient prouenuës de la grace. Dites moy,  
s'il vous plaist, si tel estoit le sentiment  
des Pharisiens, y pourriez vous trouuer  
quelque difference d'avec la doctrine de  
l'Euangile? Ce que l'Apostre dit contre  
l'orgueil & la presumption Pharisaique,  
*Qu'as-tu que tu n'ayes receu, & si tu l'as re-  
ceu pourquoy t'en glorifies-tu, comme si tu ne  
l'auois point receu?* Pourroit-il estre dit  
contre ce sentiment que vous attribuez

au Pharisien ? De quel esprit lisez-vous l'Escripture ? De quel esprit la glosez-vous ? Si le Pharisien, comme vous dites, reconnoist que ses bonnes œuvres & sa sainteté prouiennent de la grace, comment est-ce que nostre Seigneur employe les paroles où le Pharisien, selon vostre opinion, professe cela, pour l'exemple de ceux, *qui se fient en eux-mesmes qu'ils sont iustes* ? Car ainsi le Pharisien ne se confieroit pas en soy-mesme, mais en Dieu & en sa grace. D'où auez vous donc tiré, que le Pharisien reconnoissoit que ses bonnes œuvres & sa sainteté prouenoient de la grace de Dieu ? De ce qu'il dit, respondrez-vous, *O Dieu ie te rends graces que ie ne suis point comme les autres hommes, ravisseurs, iniustes, adulteres, &c.* Mais ie vous demande, dit il, que ce qu'il n'est pas tel prouienne de la grace de Dieu ? Oüy, direz vous, puis qu'il en rend graces à Dieu. Si vostre consequence est bonne, & si le sens de ces mots, *ie te rends graces*, est que le Pharisien reconnoisse que ce qu'il estoit iuste prouenoit de l'effect de la grace de Dieu en luy, nostre Seigneur auroit eu grand tort de nous le proposer comme le Patron de ceux, *qui se*

*se confient en eux mesmes qu'ils sont iustes;*  
 πεποιθότες ἐφ' ἑαυτοῖς ὅτι δίκαιοι εἰσι. Et  
 certes, si, contre l'intention & les paroles  
 de nostre Seigneur, vous attribuez à ces  
 mots, *ie te ren graces que ie ne suis point*  
*comme les autres hommes, &c.* que le Pha-  
 risien creust deuoir à Dieu le bien dont  
 il se presumoit estre rempli, vous co-  
 gnoissiez bien mal le sentiment de ceux  
 qui rendent cette louange à la grace de  
 Dieu. Car comme la grace de Dieu n'a  
 produit son effect qu'en ceux qui sont  
 touchez du sentiment de leur peché &  
 de leur misere, agissant par l'assurance  
 qu'elle forme en eux de la remission de  
 leurs pechez : soit qu'elle commence d'a-  
 gir en eux, soit qu'elle aduance son pro-  
 grez, ils demandent tousiours l'assistan-  
 ce de cette grace, & en la demandant ils  
 recognoissent le besoin qu'ils en ont, &  
 par consequent qu'ils sont pecheurs, &  
 qu'ils ont à combatre encore contre le  
 peché. Car aussi ce combat dure iusques  
 à la mort, en laquelle tout est accompli  
 au fidele, qui meurt en la foy du Fils de  
 Dieu. Or est-il que le Pharisien, que no-  
 stre Seigneur nous represente, ne deman-  
 de nullement à Dieu cette grace, comme

il ne se recognoist point pecheur : mais il se confie en luy mesme d'estre iuste. Il presume estre iuste, encore qu'il ne le soit nullement de la vraye iustice agreable à Dieu. Et il attribue, à sa propre vertu, la cause de sa iustice. Le Peager, au contraire, que Iesus Christ luy oppose, implore la grace de Dieu, & luy demande qu'il soit appaisé enuers luy, se recognoissant pecheur, & par ce moyen ayant besoin du secours de Dieu pour de pecheur estre rendu iuste. Et de là vient que le Pharisien, qui n'a point recours à la grace de Dieu, mais qui se confie en soy-mesme, pourchassant iustice n'atteint point iustice, pource qu'il ne se soumet point à la justice de Dieu, laquelle il ne cognoist pas : mais le pauvre Peager s'en retourne iustifié & rendu iuste, pource qu'implorant la grace de Dieu, il atteint par elle la justice qui est par la foy. Non quelque iustice imputée, mais vne vraye iustice, que Dieu forme en luy par la foy qu'il a en la grace de son salut. Telle est la vraye idée du Pharisien non iustifié par les œuvres de la loy desquelles il se vante, proposant à Dieu ses jeunesses & le payement de ses dixmes : & la

vraye idée du Peager iustificé en implorant la grace de Dieu, pour la deliurance du peché qu'il sentoit en luy. Tel est le sens naïf de la parabole du Seigneur. Et pour le sens de ces paroles *ευχαριστῶ σοι, Je te ren grace, ὅτι οὐκ εἰμι &c. d'autant que ie ne suis point comme les autres hommes,* vous ne deuez pas rapporter cette action de graces du Pharisien, à vne recognoissance que le bien, dont il se presume rempli, fust l'œuvre de la grace de Dieu en luy. C'est en quoy vous, & la plus part de nos Interpretes se mescontent grandement, n'apperceuans pas la contrariété manifeste dont ils enuoloppent, en ce faissant, les paroles de nostre Seigneur. Mais vous deuez vous représenter, que cette action de graces est conforme au sentiment & au mouuement d'esprit de tous ceux, qui ne recognoissent autre cause de leur vertu & de leurs bonnes œuvres, que leur franc-arbitre. En quoy neantmoins ils n'entendent pas exclure tout à fait la prouidence de Dieu, qui est auteur de la nature, laquelle ils font profession de suiure, & dispensateur des biens que leur desir naturel appetite, en l'usage desquels ils exercent les forces

de leur franc-arbitre. Pour cette raison les Pharisiens, qui n'ont cogneu autre iustice que celle des œuvres de la loy, rendoient aussi graces à Dieu de ce qu'ils estoient iustes. Et parmy les Philosophes ils ont eu aussi les Stoiciens pour compagnons, encore que les Epicuriens & les Academiciens s'en mocquaient. Mais cette sorte d'actions de graces n'a rien de commun avec le sentiment des fideles, qui sont iustifiez & sanctifiez, c'est à dire rendus vraiment iustes & saints, par la grace du Seigneur Iesus.

Voyant le tort que vous avez eu de me reprocher le Pharisaïsme, considerez maintenant le vice que vous commettez en la ratiocination que vous faites sur les paroles de S. Iehan. Vous dites, *qu'il ne parloit pas à ceux qui ont à obtenir la regeneration, qui est, selon moy, la premiere partie du salut; mais à ceux qui l'avoient desja obtenue & regardoient à la seconde.* Est-il possible que ce raisonnement soit parti de vous apres la lecture des paroles de S. Iehan, que vous avez transcriptes à la suite? Croyezvous, que l'effect de nostre regeneration se produise en vn instant, ou successivement? Qu'elle se forme

tout à coup en sa perfection, ou par de-  
 grez? Si vous reconnoissez, que l'œuvre  
 s'en fait successivement & par degrez en  
 l'ame des fideles, cōment dites-vous que  
 S. Iehan ne parle point à ceux qui ont  
 à obtenir la regeneration, mais à ceux  
 qui l'auoient desia obtenue? Si vous  
 croyez, qu'ils l'eussent desia obtenue en  
 telle perfection qu'ils n'eussent plus au-  
 cun besoin de la grace sanctifiante pour  
 combattre contre le peché, quel hom-  
 me estes vous qui raisonnez ainsi? Vous,  
 di-ie, qui voulāt me faire croire, que ceux  
 qui apres auoir paracheuē leur course  
 en la foy du Fils de Dieu, se presenteront  
 deuant son Throne, n'auront aucune  
 iustice ny saincteté si parfaite qui puisse  
 subsister deuant son Iugement: souste-  
 nez cependant, que les fideles, durant cet-  
 te vie mesme, & auant sa fin, ont telle-  
 ment obtenu la regeneration, qu'ils n'ont  
 plus à l'obtenir. Quand vous parlez ain-  
 si, estes-vous bien concerté avec vous  
 mesme? Mais relisez encore ici, apres  
 moy, les paroles de S. Iehan que vous auez  
 transcrites, & voyez à qui c'est qu'il par-  
 le, à ceux qui n'ont point besoin d'estre  
 sanctifiez, ou à ceux qui, pour l'estre, doi-  
 uent tous les iours implorer la grace de

Dieu. Si nous disons que nous n'avons point de peché, nous nous seduisons nous-mesmes, & verité n'est point en nous. Si nous confessons nos pechez, Dieu est fidele & iuste pour nous pardonner nos pechez, ET NOUS NETTOYER DE TOVTE INIQUITE'.

Voyez vous pas qu'il parle à ceux qui ont besoin d'estre nettoyez de toute iniquité? Et qu'à cette fin il les exhorte à implorer la grace de Dieu en confessant qu'ils sont pecheurs. Il parle donc à ceux qui auoient encore à obtenir la regeneration, contre ce que vous soustenez formellement. Cessez donc de vous abuser vous mesme & autrui plus long temps, Et recognoissez que quiconque a besoin de la grace de la remission des pechez, celui là a besoin d'estre deliuré de la seruitude de son peché, ou de l'estat de sa misere. Car l'vsage de la grace en nous n'a point d'autre fin. Or est-il que quand les fideles comparoistront deuant le Throne de Iesus Christ, pour reccueillir la couronne & le royaume, ils n'auront plus besoin d'estre sanctifiez ny viuifiez. Car ce sera apres la resurrection de leurs corps. Donc la grace de la remission des pechez, qui ne tend qu'à les nettoyer de toute

iniquité, & à les retirer de toute misere, n'aura plus lors d'vsage. C'est donc ici bas seulement, où la premiere partie du salut se doit accōplir en nous, pour estre capables de receuoir là haut la seconde en la iournée de Christ: que nous deuons implorer le pardō & la remissiō des pechez, en confessant nos pechez à Dieu, & en recognoissant, que de nous-mesmes il n'y a rien de bien en nous, & qu'en nostre chair n'habite point de bien; afin que la grace de son Esprit nous subuienne, en l'vsage de la croix de nostre Sauueur, sous laquelle nostre chair & nostre vicil homme se va destruisant de iour en iour. Telle est la doctrine Catholique. Telle est la science del'Euāgile que vous deuez prescher à vos peuples, & non plus cette fausse iustice imputée, en laquelle vous allez constituant tout l'effect de la grace par laquelle nos pechez nous sont remis, au lieu de recognoistre que l'effect de cette grace consiste à nous nettoyer de toute iniquité, comme saint Iean nous l'enseigne, afin que nous soyōs iustes, saints, & irreprehensibles deuant Dieu, comme saint Paul nous le remonstre.

Après auoir appuyé de raisons si foibles

de faire iuger à personne, que mes obiections soient ny foibles ny invtiles. Appelez à vostre ayde tous les Autheurs reformans que vous avez leus, & avec eux defendez vous si vous pouvez contre ma replique, qui vous ferasentir la necessité & la force de mes obiections.

Ma premiere raison a esté, que pour la seconde partie du salut, qui est la communication de la gloire, il faut qu'il y ait vne condition en nous qui nous rende capables de la posseder. Pour prouver cette maxime, i'ay allegué les paroles de l'Apostre Coloss. 1. *Que Dieu nous a rendus capables de participer à l'heritage des Saints en la lumiere.* Vous respondes, que cela est inutile, pource que vous estes d'accord que sans la sanctification nul ne verra Dieu; & si quelqu'un n'est né derechef, il ne verra point le Royaume de Dieu. Appelez-vous donc ainsi vne raison invtile, qui vous amene, de viue force, & necessairement, à la verité dont vous vous departiez par vos maximes. Et par la confession de laquelle vos maximes tombent en contradiction manifeste. Car si vous accordez que nul ne verra Dieu, ny n'aura part au Royaume de gloire, ny ne posse-

dera l'heritage des Saints, que ceux qui  
 par vraye iustice & saincteté inherente  
 en auront esté rendus capables: que de-  
 uient la raison de vostre iustice imputée?  
 Ce n'est donc plus elle qui nous rend ca-  
 pables de posseder la gloire. Car quand  
 toute la iustice de Christ seroit imputée à  
 celuy qui le croit estre mort pour ses pe-  
 chez, s'il n'a la iustice & la saincteté inhe-  
 rente, il ne sera point (par vostre confes-  
 sion presente) capable de posseder l'heri-  
 tage de gloire. Est ce là la maxime de  
 nos premiers reformateurs, qui ensei-  
 gnent en nostre Confession art. 18. & sui-  
 uans, *que toute nostre iustice est fondée en la*  
*remission de nos pechez, & que Dieu n'a égard,*  
*pour nous donner le Royaume, à aucunes ver-*  
*tus ny dignitez qui soient en nous, mais au seul*  
*merite de I. Christ.* Pour establir la raison  
 de vostre iustice de Christ imputée, il faut  
 que vous luy attribuiez toute la cause de  
 la retribution de la gloire, ou que vous re-  
 nonciez absolument à la doctrine de la  
 justification que nos Reformateurs ont  
 introduite. Car, par leur maxime, la san-  
 ctificatiō, qu'ils font formellement diffé-  
 rente de la iustification, suit la iustification  
 par laquelle ils disent que le fidele est re-

puté iuste deuant Dieu, à cause de la iustice de Christ qui luy est imputée. L'homme donc, par la doctrine reformée, est réputé iuste deuant Dieu, auant qu'il soit saint, & Dieu ne luy donne l'Esprit de sainteté, que pource qu'il le reputé iuste en luy imputant la iustice de son Fils à cause qu'il croit en luy. Par ce moyen, puis que celuy qui est iustifié est necessairement capable de la gloire ( car *ceux que Dieu a iustifiez, il les a aussi glorifiez* ) & puis que celuy qui croit que ses pechez luy sont remis par le merite de Iesus Christ, est iustifié, selon nos reformateurs, en cela mesme que sa foy embrasse la remission des pechez, & non en ce qu'elle est operante par charité: n'est il pas vray, que nulle iustice ny sainteté inherente n'alieu & ne peut estre requise, selon cette doctrine, pour rendre l'homme capable de la gloire? Et puis qu'il est iustifié sans la iustice inherente & sans la sainteté. Et qu'en ce qu'il est iustifié il est capable d'estre glorifié ( car *ceux qu'il a iustifiez il les a glorifiez* ) ne s'ensuit il pas, par cette doctrine reformée, que l'homme est capable de la gloire sans iustice ny sainteté inherente? Après cela

direz vous encore, que, pour faire voir  
 vostre doctrine absurde, aliene de la  
 vraye iustice & sanctification par ses  
 consequēces, & formellemēt contraire  
 à la doctrine des Apostres, ce soit chose  
 inutile de vous remontrer, par l'autho-  
 rité de S. Paul, que, pour estre rendus  
 participans de la gloire celeste, il faut  
 que nous ayons en nous vne condition  
 de iustice & de saincteté qui nous en-  
 rende capables ? Si vous vsez, en l'ap-  
 plication de cette maxime, du bon sens,  
 de la bonne conscience, & de la droite  
 raison que Dieu vous a donnée, reco-  
 gnoistrez vous pas, que quand vous de-  
 meurez d'accord de la verité, vous re-  
 nonceez necessairement à la doctrine de  
 nos Reformateurs touchant la iustifica-  
 tion par la seule iustice de Christ impu-  
 tée ? Et que vous vous rangez à la con-  
 fession de la verité Catholique qui en-  
 seigne, que la mesme raison qui nous  
 rend capables de la gloire, est celle par  
 laquelle nous sommes iustifiez & repu-  
 rez iustes deuant Dieu. Et par conse-  
 quent, qu'estans rendus capables de la  
 gloire par la iustice & par la saincteté  
 que l'Esprit de I. Christ forme en nous,

nous sommes aussi iustifiez formellement par cette vraye iustice & saincteté inherente, & non imputée d'ailleurs sans y estre. Croyez-vous maintenant, qu'ayant leu les auteurs de nostre reformation ie ne les aye pas bien compris ? Ou doutez vous que les ayant bien compris, ie ne les reprenne, avec raison, de la grande mesprise qu'ils ont commise en cette doctrine ?

Mais que fera ce, si à vous, qui me reprochez de n'auoir pas reconnu, en la lecture de nos Auteurs, la foiblesse des raisons qui combattent leur doctrine, ie monstre que vous combattez la doctrine des Catholiques sans l'entendre, & par des raisons où vous ne vous entendez pas vous mesmes ? Or considerez vous mesmes vostre procedure. Car vous aduoüez que la iustice & la saincteté du fidele est la capacité pour l'heritage de la gloire, & pour la possession du Royaume : & cependant, voulant destourner la consequence qui s'en ensuit, pour la necessité de recognoistre que cette mesme capacité est le merite du fidele auquel la recompense est rendüe, vous égarez maintenant l'esprit de

vostre lecteur en vne speculation creuse  
d'une distinction sans fondement. *Mais*  
la question est, dites-vous, si cette capacité  
constitue un vray merite de condignité & de  
rigueur de iustice : ou seulement une disposi-  
tion que Dieu agrée & accepte par une beni-  
gnité & bonté paternelle, laquelle passe par  
dessus diuers manquemens. Vous n'en-  
tendez ny ce que vous dites, ny ce que  
les Catholiques enseignent. Quoy? cet-  
te disposition accompagnée de diuers  
manquemens est elle la capacité ou la con-  
dition qui nous rende capables de la gloi-  
re? La disposition la plus deffectueuse est  
elle donc autant capacité que la moins  
deffectueuse? N'a t'elle ny loix ny regles?  
Dieu agrée-t'il, accepte-t'il, par sa beni-  
gnité & bonté paternelle, la plus deffe-  
ctueuse disposition, aussi bien que la  
moins? Iuge-t'il le moins iuste aussi ca-  
pable de la gloire, que le plus iuste? Le  
croyez-vous ainsi? Oseriez-vous bien en-  
seigner ainsi vos peuples? Si vous les en-  
seignez ainsi, que respondrez-vous à  
ceux qui vous diront que vous arrachez  
de leurs cœurs le soin & l'estude des bon-  
nes œuvres, puis qu'autant est capable de  
la vie eternelle celuy qui en a moins que

celuy qui en a plus. Si vous rougissez de cette doctrine, & si vous en avez honte, comme ie le croy, définissez-nous en fin cette capacité, afin que nous sçachions iusqu'où il nous faut paruenir dans la voye de iustice & de sainteté, pour estre capables de la Gloire. Et quand vous l'aurez définie, ie vous demanderay, est-ce la loy & la condition que Dieu a posée? Est-ce la capacité que luy-mesme requiert de nous? Si le terme que vous y poserez est establi de Dieu, par quelle raison l'appellerez-vous deffectueuse? Car celuy qui aura accompli la condition que Dieu aura requise de luy, n'aura point commis de manquemens. S'il ne l'accomplit pas, il ne sera point capable de la Gloire. Reconnaissez-vous pas, par ces raisons, qu'en vostre disposition que Dieu agrée & accepte par vne benignité & bonté paternelle, laquelle passe par dessus diuers manquemens, vous n'entendez pas mesmes ce que vous dites? Et que tout vostre discours s'implicque de contradictions & d'absurditez insolubles.

Aussi peu entendez-vous, comme il semble, la doctrine & les raisons des Catholiques, touchant le merite que les Do-

Heurs Scolaſtiques ont appellé de condignité, ſur le doute que vous propoſez, ſi cette capacité conſtituë vn vray mérite de condignité & de rigueur de iuſtice. Car, par ces gros mots de *condignité* & de *rigueur de iuſtice*, vous effarouchez les ſimples, & faites peur à vous meſme, vous figurant parlà; que ceux qui reputent la iuſtice & la ſaincteté des fideles, merite digne de la recompenſe promiſe ſelon la iuſtice de Dieu, doiuent prendre Dieu à la gorge, & l'appeller en iugement, pour leur faire droit ſur leur pretention, comme vn ouurier apres la beſogne faite, celui qui l'auroit mis en beſogne, & qui luy refuſeroit le payemēt. Ie ſçay bien, Monſieur, qu'il eſt aiſé à tout diſputeur, qui veut rendre la verité difficile à cognoiſtre, de l'embroüiller, en égarant l'eſtat de la queſtion, ou en deſguiſant la naïueté du ſens & de l'intention des parties, & des termes eſquels elle eſt propoſée ou expoſée. Mais ie ſçay auſſi qu'il eſt tres facile, à qui a bonne cognoiſſance de la verité, & la conſcience bonne, de la mettre en euidence avec autant de ſincerité que de clarté, & de diſſiper par ce moyen les tenebres dōt on l'envelope. Vous le verrez

par

par experience au demeslement que ie  
 feray icy du doute, dans lequel vous iet-  
 tez la question des parties en cette matic-  
 re. Je vous ay desia monstre cy-dessus  
 que vous abusez le lecteur sur le terme de  
 rigueur de iustice. Et que vous ne sçau-  
 ez que c'est que iustice, ou bien qu'il faut  
 que vous auouiez que Dieu rendra à ses  
 Saincts, selon iustice, la recompense qu'il  
 leur a promise, comme aux iniques le sa-  
 laire qui leur est ordonné, quand il iuge-  
 ra le monde vniuersel en iustice, & qu'il  
 rendra à chacun selon ses œuvres. Com-  
 me tout l'Ecriture nous l'enseigne, en la  
 plus grande euidence qu'aucune doctri-  
 ne qui nous y soit proposée. Et certes il  
 n'y a rien plus digne d'estonnement, que  
 de voir la confidence de ceux qui ont  
 embrassé l'Ecriture pour regle vniue-  
 relle de la foy & de la doctrine de salut, & qui  
 osent cependant heurter vne verité qui  
 est proposée en termes si exprés, si for-  
 mels, & si manifestes, en toute l'Escri-  
 ture. Or comme l'Ecriture nous dit, en  
 paroles expressees, que le iugement de  
 Dieu, auquel il rendra à chacun selon ses  
 œuvres, sera selon iustice : elle nous dit  
 aussi en termes autant formels, que ceux

Ce rapport & cette proportion procede de deux raisons. L'une est fondée en la loy, soit de Dieu, soit des hommes. On peut appeller cette proportion legale. L'autre raison est fondée en la nature des choses. Elle se peut appeller proportion naturelle. La premiere est externe, la seconde est interne. La loy de Dieu est double, l'une dont la raison est finale. L'autre dont la raison sert de moyen à la finale. Celle là a son usage eternal & permanent : celle ci a un usage temporel. La loy de Dieu finale n'establit aucune proportion entre la condition qu'elle requiert, & le benefice qu'elle promet, qui ne soit naturel & essentiel & dont la raison ne soit interne. La loy de Dieu mediate, qui est celle que nous appellons la loy de nature, & que l'Apostre appelle la loy des œuures, qui propose les commandemens singuliers & externes, & de laquelle loy deriuent toutes les loix qui ont usage entre les hommes : cette loy, di-je, propose, en diuerfes especes, des proportions entre la condition requise & le benefice promis, qui n'ont leur raison qu'en la volonté de la loy. Telles sont toutes les loix des ceremonies & des ty-

pes en l'ancien Testament. Car, pour exemple, Dieu ordonna à son peuple au desert, que tous ceux qui auroient esté mordus des serpens bruslans, qui regarderoient le serpent d'airin que Moysé eleua, seroient gueris. La proportion d'entre la condition du regard, & le benefice de la guerison, n'a autre fondement qu'en la volonté de Dieu, de qui la puissance executoit d'a illeurs par des causes & des moyens qui n'appartiennent qu'à elle, le benefice promis, en ceux qui accomplissoient la condition. Ainsi de soy mesme, il n'y auoit aucune raison naturelle & essentielle pour la proportion d'entre le regard du serpent & la guerison des morsures. Il en est de mesme, pour la plus part, des proportions establies par les loix des hommes. Car encores qu'elles retiennent quelques fois quelque ombre de la raison naturelle, elles dependent plus neantmoins, pour la plus part, de la volonté des Legislatteurs que de la nature des choses. Pour exemple, il est ordonné en vn Estat qu'une telle famille aura la principauté & le regne de lignée en lignée. La raison naturelle, qui donneroit le regne à quelqu'un, seroit

son excellence en prudence & force poli-  
 tique, de laquelle il surpasseroit tous les  
 autres citoyens ensemble. Par laquelle  
 vertu il feroit capable de les garantir du  
 mal, & de leur fournir le bien necessaire  
 pour l'entretien de la societé. Cela ne se  
 trouue en aucun homme en vn tel degré.  
 Mais pource qu'il se rencontre de grands  
 hommes, en certains siècles, qui excellent  
 tellement en prudence, en courage, & en  
 bonté, que l'usage de ces vertus produi-  
 sent de si grands biens dans les peuples  
 parmy lesquels ils viuent, que ces mes-  
 mes peuples, meus par la consideration  
 de leur bien propre, se soumettent à la  
 conduite de telles gens, ou qu'ils sont  
 mesmes obligez de s'y ranger par la force  
 de leurs armes : de là naist souuent l'ori-  
 gine de ces loix, qui ordonnent qu'à  
 tous les descendans de ceux qui sont tels  
 appartienne, en la nation, la principauté &  
 le regne. Or cette condition de la nais-  
 sance des descendans, à laquelle est or-  
 donnée la principauté & le regne, n'a, en  
 effect, aucune raison naturelle de sa pro-  
 portion, encore qu'elle en retiene quel-  
 que ombre, à cause de l'excellence & des  
benefices receus, dans la nation, du chef

de la race regnante. Mais, à parler véritablement, cette proportion n'est fondée qu'en la loy & en la volonté de ceux qui l'ont establie. Ces choses explicquées ainsi sommairement, autant que le sujet present le requiert, ie di, que quelle que soit la raison de la proportion entre la condition requise & le benefice promis, soit qu'elle soit fondée seulement en la loy, ou qu'elle soit fondée en la nature : le nom de dignité & de merite est toujours proprement attribué à la qualité requise pour condition, à laquelle le benefice est proposé pour recompense. C'est toujours dignité & merite, toujours merite de condignité, à cause de la proportion establie, encore que la proportion en soit differente. Car la raison du merite & de la dignité depend de la proportion, & non de la raison de la proportion. Ce qu'il y a proportion, de quelle façon qu'elle soit, fait qu'il y a merite & dignité. Ce que la proportion est ou legale ou naturelle rend seulement le merite & la dignité de diuerse cause, mais ne fait pas qu'il soit moins merite & dignité. Pour exemple, Si le Roy a promis le gouuernement d'une place à celuy qui

Emportera la bague en vn tournoy, ou à celuy qui reduira vne place, par sa valeur, en l'obeissance du Roy : l'un & l'autre ayant accompli la condition, merite aussi bien la recompense, quoy qu'il la merite diuersemēt. Tous deux sont dignes d'obtenir le gouuernement, quoy que leur dignite soit differente. Car l'une est naturelle, l'autre est purement volontaire, par la volonté du Prince, qui n'y est obligé que pource qu'il l'a ainsi voulu. Vous voyez donc que quiconque dit condition à laquelle est promise recompense, quiconque dit capacité, & qui nomme ainsi la qualité qui correspond au benefice que doit receuoir celuy qu'elle en rend capable, dit, de necessité, dignité & merite, & vray merite de condignité & selon rigueur de iustice, quelque raison que vous puissiez presupposer de la proportion qui fait le rapport & la relation de l'un à l'autre. Et par consequent, vous cognoissez combien vous vous estes abusé, quand vous faites vne chose douteuse qui ne le peut estre, & que vous reuocquez en question de sçauoir, si la capacité constitue vn vray merite de condignité & de rigueur de iustice. Certes vous ne

ſçauéz que c'eſt que capacité ny mérite,  
 ſi vous en doutez. Et vous monſtrez bien  
 que vous n'auéz iamais bien entendu  
 la raiſon du mérite, quand vous dittes,  
*conſtitue un vray mérite de condignité,*  
 comme ſi vous recognoiſſiez, pour mé-  
 rite, quelque autre condition ou qualité  
 qui ne fuſt pas vray mérite de condigni-  
 té. Sçachez que tout ce qui n'eſt point  
 vray mérite de condignité, ne peut ny ne  
 doit eſtre appellé mérite. Car le ſeul mé-  
 rite du fidele, auquel la vie éternelle eſt  
 renduë pour recompenſe, eſt la vraye  
 iuſtice & la vraye ſaincteté que l'Eſprit  
 du Seigneur Ieſus forme en luy par la  
 foy en ſon nom. Il n'y a autre mérite que  
 celuy-là digne d'une telle recompenſe. Et  
 celuy-là en eſt vray mérite de condigni-  
 té. Car l'homme ne peut mériter de  
 Dieu, ne luy peut eſtre agreable, ny faire  
 choſe qui luy plaiſe, pour laquelle il puiſ-  
 ſe ou doiue eſperer, de l'amour de Dieu  
 reciproque, vne telle recôpenſe promiſe,  
 que par l'effect de la grace en luy. Et là  
 deſſus ie veux bien vous aduertir, que ce  
 que l'Eſchole des Catholiques diſtingue  
 entre merites de condignité, & merites  
 de congruité, n'eſt pas pour attribuer le

nom de vray & de bon merite à quelque autre œuvre qu'à celle qui est produite par l'assistance de la grace de Dieu. Et c'est pour cette raison, qu'ils disent que l'œuvre faite par la grace en nous, est merite de condignité. Appellans aussi la mesme œuvre merite de congruité, au regard de ce qu'elle procede de la volonté del'homme. Car, en leur langage, *Meritum condigni est ex parte gratiae, meritum congrui est ex parte voluntatis liberae*. Mais, par leur definition, il n'y a nul vray merite qu'en l'œuvre produite par la grace en nostre volôté. Et ainsi il n'y a aucun vray merite qui ne soit aussi merite de condignité. C'est ce que j'apperçoy que vous n'avez pas bien compris, comme la plus part de nos gens qui combattent la doctrine des Catholiques. Car d'ordinaire ils font vn grand *quanquam* de ce que les Catholiques enseignent que les fideles meritent la vie eternelle, non seulement, disent-ils, *ex congruo*, mais aussi *ex condigno*. Hé ! pauvres gens ! ce qu'ils appellent le merite *ex condigno*, c'est à cause de la grace qui produit l'œuvre, laquelle n'a aucune dignité que par la grace, pour ce qu'elle est faite en foy, & selon charité, par la vertu del'Esprit de

Dieu. C'est là le merite *ex condigno* des Catholiques. Ce qu'ils appellent l'œuvre merite *ex congruo*, c'est, comme ie vous ay dit, à cause qu'elle procede de la volonté, & qu'elle est volontaire & libre. Car Dieu regardant à l'acte de l'homme en ce regard, *congruum est diuina bonitati vt remuneretur*. Mais Dieu regardant à l'acte de l'homme en ce que sa grace le produit en sa volonté, *condignum est diuina iustitie, vt retribuaturs illi quod promissum est*. Si vous ne me croyez que tel soit le sens des Catholiques sur la raison du merite *ex congruo*, & du merite *ex condigno*, lisez S. Thomas par toute la question cxiiii. qui est la dernière de la première partie de sa seconde, si tant est que les disputes du Cardinal Bellarmin, que vous auez leuës, ne vous l'ayent suffisamment appris.

Mais que sera ce, si sortant de l'Eschole, & vous ramenant à l'examen de la raison des choses, ie vous fay voir que vous ne pouuez recognoistre la iustice & la sainteté des fideles pour capacité, ou pour condition, qui les rende capables de la gloire : que vous ne la recognoissiez aussi, à mesme temps, pour vray merite

de condignité. Des deux raisons de mérite, que ie vien d'exposer, la naturelle establit d'avantage le mérite de condignité que la legale, pource que celle-là est interne & essentielle, celle-ci est externe & accidentale. Celle là consiste en la nature de la chose, celle-ci ne dépend que de la volonté du Legislateur. Or est-il que la iustice & la sainteté ont vne naturelle, interne, & essentielle raison de rapport & de proportion à la gloire du Royaume, dont vous recognoissez qu'elle rend le fidele capable. Que cette raison soit naturelle, vous l'entendez par son origine. Car l'origine de toute perfection, c'est Dieu. Or pource que Dieu est parfaitement Saint, il est aussi parfaitement heureux. Car à l'excellence de bonté, en la nature diuine, est aussi iointe l'eminence de pouuoir, qui constitue la parfaite félicité de Dieu. L'une & l'autre ont ensemble vn rapport naturel & essentiel. Dieu est infiniment puissant, pource qu'il est infiniment bon, & par l'un & par l'autre il est infiniment heureux. Afin que l'homme participe de la félicité, il doit participer de la sainteté de Dieu, & participant de la sainteté il doit à proportiō partici-

per de sa gloire, pour estre parfaictement heureux. Comme en la felicité de Dieu cette relation est naturelle, aussi l'est-elle en la felicité de l'homme qui ne consiste qu'en la communion avec Dieu. Pour-  
tant Dieu, par son conseil eternal, & suivant le bon plaisir qu'il en a establi en son Fils, ayant ordonné d'élever l'homme dans le Throne de sa gloire, & de luy donner l'empire sur toutes choses, a premierement voulu que l'homme, qui de soy-mesme est devenu pecheur, fust rendu saint par la communion de son Fils, participant à sa croix & à son Esprit. Et comme le Seigneur en sa croix pour accomplir toute iustice, s'est offert luy-mesme par l'Esprit eternal à Dieu son Pere, & ayant esté déclaré Fils de Dieu en puissance selon l'Esprit de sanctification par la resurrection des morts, est entré en sa gloire & s'est assis dans le Throne du Pere: il faut aussi que tous les fideles, en la communion d'iceluy, estans sanctifiez par sa croix & par son Esprit, & resuscitans par la vertu du mesme Esprit de sanctification, regnent avec luy & soient assis en son Throne. Cette relation, cette proportion entre la sainteté & la gloire,

establie pour tous les fideles en la communion du Fils de Dieu, est naturelle & essentielle. Comme elle est au Pere & au Fils, aussi est-elle en tous les fideles par la vertu du S. Esprit, qui procede du Pere & du Fils. Puis donc que la relation d'entre la saincteté & la gloire des enfans de Dieu est naturelle & essentielle, & que la raison de la proportion des deux est interne: vous devez aussi recognoistre que la saincteté, qui seule rend l'homme capable de la gloire, est vn vray merite de condignité, en consideration duquel la gloire luy doit estre conferée. Car comme c'est chose impossible que la gloire, qui est la perfection de beatitude, appartienne à vne creature non saincte, aussi est-il impossible qu'une creature sanctifiée ne soit aussi glorifiée. Ainsi l'homme pecheur est, de pure grace & misericorde, sanctifié par la foy du Fils de Dieu. Mais le fidele sanctifié obtient, par merite, la gloire que Dieu, par sa grace & misericorde, luy a ordonnée & preparée en son Fils, & à laquelle par la mesme grace il l'a préparé en le sanctifiant. Entendant donc mieux, que vous n'avez fait iusques à present, la raison du vray

merite de condignité, consistant en la saincteté qui rend le fidele capable de la gloire : vous vous deferez, s'il vous plaist, d'une mauuaise glose que nos Reformateurs ont introduite, sur ce que l'Apostre dit par tout que nous sommes sauuez par la foy. Car exposans le sens de l'Apostre, ils veulent que le salut, qu'ils comprennent tant en la iustification qu'en la glorification, soit attribué à la foy, comme à la cause instrumentale, entant que la foy regarde la mort de Christ, & s'applique, en icelle, l'imputation de son obeissance, en consideration de laquelle ils veulent que le fidele soit aussi couronné. Et à ce suiet ils comparent la foy, au regard du salut, à la veüe du serpent d'airin, au regard de la guerison de ceux qui le regardoient. Mais tout cela est entierement aliené de l'intention de l'Apostre, & de la raison de nostre salut par la foy. Car à la foy est attribué le salut, comme estât la racine de la saincteté, à cause que de la seule foy procede en l'homme le vray amour de Dieu & du prochain. C'est la foy operâte par charité qui nous sauue. Non comme cause instrumentale,

mais cōme cause formelle de nostre iu-  
 stification ou sanctification. Et comme  
 merite & dignité qui nous rēd capables  
 de la glorification. Et pourtāt la condi-  
 tion de la foy, au regard du salut & de la  
 vie eternelle, n'est nullemēt semblable  
 à la cōdition de la veuē du serpent d'ai-  
 rin, au regard de la guerison de ceux  
 qui le regardoient : ainsi que nos Do-  
 cteurs l'ont estimé. Car, en la veuē du  
 Serpent, la condition n'a aucun rapport  
 ny proportion à la guerison, que par la  
 seule volonté de Dieu. La raison n'en  
 estoit point fondée en lanature de la  
 chose mesme. Mais la foy, au regard de  
 la vie eternelle, a la raison de sa propor-  
 tion & de son rapport, naturelle, es-  
 sentielle & interne, entant qu'elle san-  
 ctifie ceux à qui elle est donnée, c'est à  
 dire, que par elle s'engendre en nous le  
 vray amour de Dieu sur toutes choses,  
 & la charité enuers le prochain. Car  
 ainsi la sanctification du fidele, proue-  
 nante de sa foy, est la condition qui le  
 rend formellement capable de la gloi-  
 re & de la beatitude eternelle, que Dieu  
 luy a préparée, & qu'il luy rendra au  
 dernier iour.

Après tous ces esclarciffemens, ie n'auray pas grand' peine à vous faire comprendre, que le passage, que ie vous ay allegué du 3. de l'Apocalypse, vous confirme invinciblement le merite & la dignité des fideles. Et ie pense que vous mesmes reietterez les exceptions, par lesquelles vous vous estiez essayé d'en eluder la consequence. Car quand vous oyez que l'Esprit dit, *que les fideles chemineront avec Iesus Christ en vestemens blancs, car ils en sont dignes* : croyez vous maintenant à vous mesmes, qui, pour eluder l'argument de leur dignité, si authentiquement declaree en ces paroles, respondiez lors, *que la question est, s'ils sont tels par la gracieuse acceptation que Dieu fait d'eux en Iesus Christ, leur pardonnant par une benignité paternelle, ou s'ils sont tels par la perfection de leurs œuvres estimees selon la rigueur de la iustice de Dieu.* Qu'entendez vous par les vestemens blancs des fideles ? N'est ce pas leur pureté & leur sainteté ? Ne sont ce pas ces robes blanches de ceux, qui, venans de la grande tribulation, où leur foy a esté espuree comme l'or, les ont lauees au Sang de l'Agneau, par lequel ils ont esté sanctifiez.

fiez. Puis donc que leurs vestemens sont blancs, que leur saincteté est pure & sans macule, & que pour cette raison ils sont appelez, *dignes de cheminer avec Iesus Christ*, quel homme estes vous qui voulez reuoquer en doute ce que l'Esprit de Dieu affirme. L'Esprit de Dieu dit, qu'ils sont dignes, vous dites qu'ils ne le sont pas. Car vostre gracieuse acceptation, vostre pardon interuenant, est tout le contraire de la dignité que le S. Esprit leur attribue. Ne sçavez-vous pas, que grace est faite à l'indigne pecheur, afin que de pecheur il soit rendu iuste & digne du Royaume de Dieu. Nul n'est rendu digne que celuy qui est lauë, & sanctifié, de qui les vestemens, c'est à dire toute l'habitude de l'ame & du corps, a esté blanchie & faite nouuelle. Estant tel il est digne. Estant digne, vostre question est absurde & ridicule. Vous confondez l'estat de l'homme au regard de la premiere partie du salut, pour laquelle luy est donnée la grace qui le sanctifie: & son estat au regard de la seconde, pour laquelle à luy sainct est rendue la gloire. Or la gloire (qui est icy designée sous le terme de cheminer avec

Iesus Christ ) n'est pas donnée à l'indigne, comme la grace, mais à celuy qui en a esté rendu digne par la grace.

Ce que vous adioustez pour supplément à vostre solution, *que ie recognoy que le mot de digne se prend souuent pour le mot de capable & disposé conuenablement; quand ie tradui le mot du passage cy-dessus allegué, il nous a rendus capables, par celuy de dignes*: vous escriuez en tout cela vostre condamnation propre. Car ne voyez vous pas que le mot de *capable & disposé conuenablement*, exclud, de necessité, en ce regard, la raison de la grace, à l'action de laquelle vous attribuez la recompense de la gloire? Car ie vous demande, quand Dieu donne à l'homme pecheur, mort en ses fautes & pechez, la grace pour le faire iuste, est ce pource qu'il estoit capable & conuenablement disposé pour recevoir ce don, tout ainsi que le fidele sanctifié par la grace, est capable & conuenablement disposé pour recevoir la gloire? Reconnoissez vous au pecheur vne capacité & vne disposition conuenable à la grace, semblable à la capacité & à la disposition conuenable du fidele à la gloire? Que dites-vous? Reconnoissez

vous pas que l'un est tout à fait différent de l'autre? Qu'au pecheur on n'y peut considerer pour disposition, que celle qu'on appelle *sine qua non*, & encore seulement pour l'effect de l'operation de la grace. Laquelle est mesme communiquée, par la bonté de Dieu, à plusieurs qui sont affectez d'une disposition toute contraire, & auxquels aussi la grace n'a point d'effect par leur propre perversité. Tels que sont tous les reprouvez. Mais, en l'object de la gloire, reconnoissez-vous pas qu'il y faut vne capacité & vne disposition formelle, proportionnée & correspondante, par vne relation naturelle, à cette precieuse habitude? Et que la iustice & la sainteté est cette capacité & disposition conuenable. Vous voyez donc, par l'opposition de l'object de la grace, & de l'object de la gloire, que d'une part l'object de la grace est en soy indigne du benefice qui luy est conféré, pource qu'il est incapable en soy du bien qu'il reçoit, Et que l'object de la gloire est, au contraire, capable en soy du benefice qui luy est donné, & conuenablement disposé à le recevoir. D'où il est euident que sous le terme de dignité ne peut

estre rien entendu, en ce suiet, que ce qu'emporte le terme de capacité. Et par consequent, que quand vous vous serez tourné, de tous les sens qu'il vous plaira, sur la significatiō du terme de *digne*, vous trouuerez que toute l'acceptation gracieuse, le pardon & la misericorde, selon laquelle vous feignez que la dignité des fideles doit estre prise, est aussi esloignée de raison, que ce seroit chose absurde de dire, que le pecheur est digne de la grace, pource que Dieu la luy confere par vne acceptation gracieuse qu'il fait de luy en son Fils, & par le pardon & misericorde de laquelle il vse en son endroit. Vous ne pouuez, Monsieur, plus manifestement confondre les choses les plus formellement distinctes en la Theologie, qu'en introduisant cette fiction de la signification du mot de *digne*.

Vostre distinction de dignité *d'egale proportion*, & de dignité *de simple conuenance*, que vous me dites en suite que i'auoy ouïe de vous il n'y a pas long temps, est encore de mesme alloy. Je me souuiens fort bien l'auoir ouye de vous. Mais m'alleguer en cela vostre

auctorité, n'est bon que pour me donner  
 suiet de vous remontrer, que tout ce  
 que vous dites en chaire n'est pas texte  
 d'Euangile. Je ne vous demande pas  
 encore, en quelle parole de Iesus Christ  
 ou des Apostres vous fondez cette distin-  
 ction. Je vous demande seulement la  
 raison de cette opposition que vous nous  
 donnez, entre egale proportion & va-  
 leur, & entre simple conuenance, rap-  
 port & conformité. Et supposé que cette  
 opposition soit bien assise, ie vous de-  
 mande encore, pour quelle cause voulant  
 qu'il y ait vne dignité d'egale proportion  
 & valeur, & vne dignité de simple con-  
 uenance, rapport & conformité : vous  
 ne voulez pas aussi bien, qu'il y ait vn  
 merite d'egale proportion & valeur, &  
 vn merite de simple conuenance, rapport  
 & conformité. Pourquoi refuserez-  
 vous au merite la mesme acception dou-  
 ble, que vous concedez à la dignité? Puis  
 que par ce moyen vous admettez vn sens  
 de dignité, auquel vous ne voudriez pas  
 accorder qu'il fallut prendre la sainteté  
 des fideles au regard de la gloire, mais  
 seulement en l'autre. Car prenant le  
merite, comme vous faites la dignité, au

sens de conuenance, rapport, & conformité, nous ferions aisement cesser tout suiet de controuerse sur cette matiere. Car tous les Catholiques vous accorderont aisement, qu'ils n'appellent la saincteté des fideles *merite de la gloire*, qu'à cause de la conuenance, du rapport, & de la conformité, selon laquelle la saincteté a son existence en vn suiet, avec l'existence de la felicité & de la gloire au mesme suiet. Mais en vous accordant ceci, ils vous feront voir à mesme temps, que cette conuenance, ce rapport, & cette conformité, n'est autre chose qu'une égale proportion & valeur. Car, ie vous prie, d'où procede la conuenance, le rapport, & la conformité de la saincteté des fideles, avec la gloire qu'ils obtiendront? Cette conuenance, ce rapport, & cette conformité de la saincteté des fideles avec la gloire promise, ne consiste-t'elle pas aux causes de l'une & de l'autre? N'est-ce pas pource que l'une & l'autre est l'œuvre du doigt de Dieu en l'homme, l'exécution de son conseil eternal, la communion & la conformité de l'homme avec le Fils de Dieu? Puis que telle est la raison de la conuenance, du rapport,

& de la conformité de la sainteté des fideles en cette vie, à la gloire qu'ils receuront en l'autre : cette mesme conuenance, rapport, & conformité, ne rend-elle pas la sainteté des fideles d'egale proportion & valeur à la gloire qui leur est preparee ? L'œuvre de l'Esprit de Dieu nous sanctifiant, n'est-il pas d'egale proportion & valeur à l'œuvre de l'Esprit de Dieu nous glorifiant ? Nostre conformité à Iesus Christ en sainteté n'est-elle pas d'egale proportion & valeur à nostre conformité à Iesus Christ en gloire ? Que direz-vous ? Que nous n'obtenons pas vne egale conformité à Iesus Christ en sainteté, que nous l'obtenons en gloire ? Si vous le dites vous vous contredictes. Car vous recognoissez que la sainteté est ce qui nous rend capables de la gloire. Or ne serions-nous pas capables de la gloire à la conformité de Christ, si nous n'estions saints à proportion à la conformité de Christ, si l'une est la capacité de l'autre. Car toute capacité emporte proportion. Vous contredictes aussi à l'Ecriture qui nous enseigne, *que ceux que Dieu a determinez en son Conseil, il les a aussi predestinez à estre*

conformes à l'image de son Fils, afin qu'ice-  
 luy soit le premier né entre plusieurs freres.  
 Rom. 8. 28. Or cette predestination de  
 Dieu est executée par la vocation à iu-  
 stice & à gloire, comme l'Apostre l'ex-  
 plique au verset suiuant. Par où il s'en-  
 suit que la conformité des fideles à l'i-  
 mage de Christ est égale, tant en la iusti-  
 ce ou sainteté qu'en la gloire. Monsieur  
 Amyraut, avec lequel vous vous heur-  
 tez en diuerses rencôtres sur cette matie-  
 re, dit que des deux parties du salut, la  
 sainteté est plus excellente que la gloi-  
 re. Vous estes bien opposez contraires,  
 si vous voulez que la sainteté ne soit  
 pas d'egale proportion & valeur avec la  
 gloire. Or encor que ce qu'il dit soit  
 mal digeré & fauslement enoncé, & que  
 la gloire, c'est à dire, la puissance de l'a-  
 gent, appartiene plus à l'excellence de  
 nature que la sainteté, & qu'elle soit le  
 degré superieur, auquel la nature de  
 Dieu se manifeste en tous ses ouurages,  
 comme l'Apostre en parle, Rom. 1. 20.  
 l'appellant *αἰδιον δύναμις καὶ θεότης*, eter-  
 nelle puissance & diuinité: le rapport, la  
 conuenance, & la conformité de l'un à  
 l'autre, ne laisse pas d'estre d'egale pro-

portion & valeur. Car il est necessaire que celuy qui est souuerainement bon, soit souuerainement puissant. Et nul ne peut estre souuerainement puissant, qu'il ne soit souuerainement bon. Ce qui n'appartient qu'à Dieu. Or l'Apostre dit expressement, *puissance eternelle*, pource que, par la dispensation de Dieu, la puissance peut bien estre en vn suiet destitué de sainteté, comme aussi la sainteté en vn suiet destitué de puissance. Ce que nous voyons d'une part au diable, qui est appellé le Prince & le Dieu de ce monde, & aux meschans qui regnent ici bas. Mais leur Empire sera destruit, & ils ne regneront point à tousiours: leur puissance ne sera point eternelle, pource qu'elle est destituée de sainteté. Pareillement la sainteté par la dispensation de Dieu, peut bien estre accompagnée de misere & d'infirmité, & destituée de puissance. comme elle a esté en Iesus Christ ici bas, & comme elle y est en ses saints. Mais cette dispensation n'a esté que pour peu de temps. *Tu l'as fait pour un peu de temps moindre que les Anges.* Mais incontinent il a esté couronné de gloire &

d'honneur. Et sa gloire & son regne durera sans fin. De mesme en sera'il en tous les esleus, que sa grace a sanctifiez. Car ils regneront tous eternellement avec luy en gloire. Ainsi la conuenance, le rapport & la conformité de la saincteté avec la gloire, est naturellement d'egale proportion & valeur. Et cela a lieu en tous les membres de Iesus Christ comme en leur Chef. En quoy consiste la fin & l'effect de l'alliance eternelle.

Vous voyez donc, comme ie pense, cōbien a peu de fondemēt vostre distinction d'vne double dignité d'egale proportion & valeur, & l'autre de simple conuenance, rapport & conformité, que vous me dites que i'auois ouïe de vous. Ie l'auois ouïe certainement. Et si bien en souuient à ceux qui estoient assis auprez de moy, ie leur di, à mesme temps, que la conformité, & l'egale proportion & valeur, estoient, en ce suiet, vne mesme chose, comme vous voyez que ie vous l'ay monstré. Mais certes il faut que ie vous aduoüe, que i'ay compassion, qu'un homme versé en l'Euangile comme vous estes, qui le lisez & meditez

auict & iour, ayez voulu chercher vne  
 autorité à cette distinction d'une dou-  
 ble dignité, & en elle, qui pis est, autho-  
 riser l'imperfection de la vie des Chre-  
 stiens, lesquels vous apprenez, en ce fai-  
 sant, non *à tendre à la perfection qui est en*  
*Iesus Christ*, comme l'Apostre nous y  
 exhorte: mais à chercher vne couuerti-  
 re, à toutes leurs souillures & imperfe-  
 ctions, en vne prétendue iustice impu-  
 rec. Et là dessus, pour prouuer à vostre  
 dire, que cette imparfaicte & defectueu-  
 se saincteté, est vne dignité de conuenan-  
 ce, non d'egale proportion, m'alleguer ces  
 paroles de l'Apostre, *conuersez en toute*  
*vostre vie* (car c'est ainsi qu'il faut tradui-  
 re πολιτεύετε. πολιτευμα comprend les  
 actions de toute la vie, tant particuliere  
 que publique en la société en laquelle  
 nous sommes en ce monde) *dignement*  
*de l'Euangile de Christ*; c'est à dire, com-  
 me il est digne & conuenable à la voca-  
 tion à laquelle l'Euangile vous a appelez.  
 Phil. 1. 27. Et ces autres paroles du mesme  
 Apostre. Col. 1. 9. 10. *Demandans que*  
*vous soyez remplis de la cognoissance de sa*  
*volonté en toute sagesse & intelligence spiri-*  
*tuelle, afin que vous chemioiez dignement*

*du Seigneur, pour luy complaire en toutes choses, fructifians à toute bonne œuvre. Que pensez-vous faire quand vous concluez de ces paroles, que nostre conversation ne peut atteindre à la perfection de Iesus Christ & de l'Evangile par egale proportion & valeur? Faites vous l'Apostre vn moqueur? Definissez, ie vous prie, la perfection à laquelle Iesus Christ & l'Evangile nous appellent. Luy pouuez vous donner d'autres termes, que de complaire à Dieu en toutes choses fructifians à toute bonne œuvre? N'est-ce pas en quoy l'Apostre met la dignité des Chrestiens? Cette dignité n'est elle pas parfaite? Si le fidele converse en telle sorte, qu'il complaise en toutes choses à Dieu, fructifiant à toute bonne œuvre, sera-t'il pas parfaitement digne & dignement parfait? Sera-t'il pas celuy que l'Apostre, à la fin du mesme chapitre, nous represente, de voir comparoistre deuant Dieu parfait en Iesus Christ? Qu'il appelle, 2. Tim. 3. 17. l'homme de Dieu parfait, *ὁ ὅς πᾶν ἔργον ἀγαθὸν ἐξερπιαμενός*, accompli de tout poinct ( car ἐξ en composition est ici ἐξολα ) à toute bonne œuvre? Comment dites vous apres cela, que c'est vne dignité estimee, non pas*

*ſelon la rigueur de iuſtice, mais ſelon la benignité de Dieu, qui ſe contente de la foible & deſectueuſe, moyennant que ſincere, obeiſſance de ſes enfans? Si Dieu, par la loy de l'Euangile, qui eſt la loy de benignité & de miſericorde, veut que, pour conuerſer dignement de Ieſus Chriſt, nous luy complaiſions en toutes choſes, fruſtrifians à toute bonne œuvre, comment oſez vous dire, que ſa benignité ſe contente d'une obeiſſance foible & deſectueuſe? Pourriez vous plus ouvertement gloſer l'Eſcriture par ſon contraire? Mais n'apperceuez-vous point la repugnance que vous-mêmes mettez en voſtre diſcours, quand vous nous faites une obeiſſance, que vous nommez tout enſemble ſincere & deſectueuſe. L'obeiſſance qui eſt requiſe des fideles ſelon l'Euangile, eſt d'aimer Dieu de tout leur cœur & ſur toutes choſes. Une obeiſſance & un amour de Dieu ſincere, eſt celui qui n'eſt point mixtionné d'autres affections contraires. Car ſincere eſt une choſe pure, & non meſſangée. Or l'affection contraire à l'amour de Dieu, c'eſt l'amour exceſſif de nous mêmes, du monde, & des*

choses terriennes. Toute la defectuosité, qui est en l'amour que nous devons porter à Dieu, vient du meslange de l'amour excessif de nous mesmes, du monde, & des choses terriennes. Par consequent, estre defectueux, & estre sincere, sont choses opposees, en l'amour & en l'obeïssance que nous devons à Dieu, comme les tenebres à la lumiere. De quel esprit donc nous donnez vous vne obeïssance defectueuse, moyennant que sincere ? Il faut qu'en ce qu'elle est sincere, elle soit parfaite. Il faut qu'en ce qu'elle est defectueuse, elle ne soit pas sincere. Vous ne pouviez composer vostre discours de termes plus repugnans & contradictoires.

Mais ie ne doy pas aussi obmettre le vice que vous commettez, lors que, voulant nous donner vne preuue de vostre double dignité, vous employez ces paroles de l'Apostre, *cheminez dignement de Christ, cheminez dignement de l'Euangile de Christ*, pour argumenter pour vne dignité de conuenance, opposee à vne dignité d'egale proportion. Inferant de ce que nostre conuersation

ne peut atteindre à la perfection de Christ par egale proportion, qu'il faut que ce terme *dignement* ne signifie en ce lieu, sinon vn rapport & vne conuenance. Car vous commettez en tout cela vn notable sophisme. Et vous donnez le change à vostre lecteur d'un bout à l'autre, sur le suiet que vous auiez entrepris de demonstrier. Car la proportion dont il s'agissoit en vostre discours estoit entre la saincteté des fideles, & la gloire qu'ils doiuent receuoir. Ce n'estoit pas entre la saincteté des fideles & la saincteté de Christ. Quand nous disons qu'il y a proportion entre la saincteté des fideles & leur gloire future, nous ne traitons pas de la proportion qu'il y a entre la saincteté des fideles & celle de Christ. Or quand vous niez que la dignité, mentionnee, aux passages alleguez, soit d'egale proportion à celle de Christ, & à la saincteté parfaite qu'il a eue en sa conuersation: vous comparez, non la proportion de nostre saincteté à la proportion de nostre gloire, qui est τὸ ζῆν τιμωμενον, le suiet de nostre question: mais la proportion de nostre saincteté à la propor-

tion de la sainteté de Christ, qui n'est point le sujet dont il s'agit en nostre question. Et par consequent vous commettez vn manifeste sophisme. Mettez telle proportion qu'il vous plaira entre nostre sainteté & celle de nostre Chef: il faudra que vous établissiez pareille proportion entre sa gloire & la nostre. Et si vous n'oséz nier, qu'entre la sainteté de Christ & sa gloire, il y a proportion d'egale valeur: vous n'oseriez nier, qu'entre nostre sainteté & la gloire que nous auons, il doit y auoir aussi proportion d'egale valeur. Vous n'oseriez nier l'antecedent. Car, selon vos propres maximes, vous oseriez ainsi tout merite à Iesus Christ. Vous n'oseriez non plus nier le consequent. Car vous nieriez toute conformité d'entre Christ & nous. Voyez, ie vous prie, en quel labyrinthe tout vostre raisonnement vous amene. Pour vous mettre en main le droit fil de la verité, afin de vous sortir de ce labyrinthe, observez la difference d'entre la sainteté de Christ & la nostre. Et remarquez que cette difference n'est pas en sa raison formelle. Car, pour ce regard, nostre  
sainteté

saincteté est semblable à celle de Christ; nos œuvres sont, pour cesuiet, appellees ses œuvres, nos souffrances sont appellees ses souffrances, l'Esprit que nous receuons est son Esprit mesme. Mais la difference est en l'origine de sa saincteté & de la nostre. Car la chair de Christ a esté conceuë du Sainct Esprit. Il est sainct par sa nature. Nostre chair est regenerée par le Sainct Esprit, par lequel nous mortifions les faicts du corps. Nous sommes saincts par grace. Nous sommes conceus en peché: Christ a esté conceu sans peché. Christ a esté exempt de peché en toute sa vie, & sa saincteté a esté accomplie dès l'origine de sa naissance. Nous sommes atteints & coupables de peché en toute nostre vie, & nostre saincteté n'est accomplie qu'en la fin, en nostre mort, au bout de la course. Mais quand la conuenance, le rapport, la conformité, la proportion de nostre saincteté à celle de Christ, doit estre mesurée: il ne la faut pas considerer, selon la raison de son origine, mais selon sa raison formelle. Car la raison formelle de l'une & de l'autre est pareille. Elle consiste en l'amour de Dieu sur toutes choses, & de nostre prochain

comme de nous-mesmes. C'est à dire,  
 en la parfaicte charité. En l'exercice de  
 laquelle consiste toute nostre conuer-  
 sation selon la regle de l'Euangile, τὸ  
 πολὺτεμα ἡμῶν τὸ ἐν ὑπεραγίοις. C'est la vie de  
 tous ceux qui sont morts avec Iesus  
 Christ en la chair, & qui vivent avec luy  
 en Esprit à Dieu. Qui ne regardent  
 point aux choses qui sont en bas, mais  
 à celles qui sont en haut, où Christ est  
 assis à la dextre de Dieu. Le Pere a  
 donné au Fils d'auoir vie en soy mesme.  
 Mais n'auons tous la vie que par le  
 moyen du Fils. Car ceux-là seuls ont  
 la vie qui mangent sa chair & qui boi-  
 uent son Sang. Pour cette cause il a  
 acquis, par luy mesme, la gloire qu'il  
 possède, laquelle il a aussi acquise pour  
 nous. Et elle nous est communiquée,  
 pource qu'il nous a communiqué sa  
 saincteté. Telle est la raison de la pro-  
 portion de nostre saincteté à celle de  
 Christ; de nostre gloire à celle de  
 Christ; de la saincteté de Christ à sa  
 gloire; de nostre saincteté à nostre  
 gloire; du mérite de Christ au nostre.  
 Si vous enseignez cette doctrine, vous  
 enseignerez la verité del'Euangile, &

vous adresserez les consciences, de ceux qui vous escotent, en la voye de iustice & de sainteté, que l'Evangile nous a ouuerte par la manifestation du Seigneur Iesus. En la face duquel nous contemplons cette lumiere qui est nostre vie.

La solution que vous donnez au passage de la 2. à Tim. 4. 8. ou l'Apostre dit, *que la couronne de iustice luy sera rendue par le iuste iuge*, est l'endroit où vous descouvrez plus à nud la foiblesse de vostre cause. Je veux bien que vostre response & ma replique soient employées, au iugement de tous iuges de raison & d'équité, (ie ne vous recuse pas vous mesmes) pour la decision du different. Vostre response (page 14.) est fondée en la distinction du terme de *iuste*, attribué à Dieu en l'Escripture en deux façons, ou pour signifier vne iustice rigoureuse & seueré : ou pour signifier la benignité selon laquelle mesme Dieu pardonne. Pour appuyer cette seconde acception du mot de *iuste* & de *iustice*, vous alleguez diuers lieux de l'Escripture, de la 1. Ep. de S. Iehan, du Ps. 145. & du 51. & du 3. aux Romains,

Par où vous voulez que nous concluions  
 que quand Dieu est appelé en l'Escriptu-  
 re *le iuste Iuge*, ou que son Iugement est  
 appelé *selon iustice*, comme en ces paro-  
 les del' Apostre, qui appelle Dieu *le iuste*  
*Iuge* en la retribution de la couronne de  
 iustice: nous entendions, par cette iu-  
 stice de Dieu, sa benignté & sa miseri-  
 corde. Et sur cela, vous aiguillonnez ma  
 tardiueté, en me remonstrant que ie  
 vous ay pû ouyr souuent faisant cette le-  
 çon à vos auditeurs. Ma repliche est,  
 que cette diuerse signification de iustice  
 est si vulgaire, & si cogneuë de tous ceux  
 qui ont tant soit peu feüilleté les liures  
 saincts, & qui ont quelque cognoissan-  
 ce de leur langue originelle, que la  
 frequente leçon que vous en auez faite  
 à vos auditeurs, doit estre vne des  
 premieres, que vous auez receuë dans  
 les elements de la Theologie. Rien n'est  
 plus frequent au vieil & au nouveau Te-  
 stament que dire *חַיִּים וְצַדִּיק* *Hisch tzedik*,  
*à vñp dixgros*, pour signifier vn homme  
 debonnaire & benin, comme il est dit de  
 Ioseph le mari de la Sainte Vierge. Ius-  
 ques là, que comme *חַיִּים צַדִּיק* *tzedek*, qui si-  
 gnifie iustice, s'estend à la vertu de be-

benignité & de miséricorde, les mesmes  
 Hebreux ont dit encore צדקה *Tzedaka*,  
 pour signifier l'aumosne. Mais qu'avez  
 vous aduancé par là? Trouuez vous, se-  
 lon l'analogie de l'Escripture, & selon la  
 raison du Iugement de Dieu, que lors  
 qu'il est appelé iuste en cette action, &  
 que l'exécution de sa iustice est mention-  
 née pour ce iour là, il faille plustost en  
 rapporter lesens à sa benignité & mise-  
 ricorde, qu'à sa iustice proprement ain-  
 si appelée? Regardez, ie vous prie, en  
 quel preeipice vous vous estes ietté?  
 Car si vous voulez maintenir l'interpreta-  
 tion de iustice que vous nous donnez en  
 ce suiet, vous despoüillez Dieu absolu-  
 ment de sa iustice proprement dite.  
 Quand l'Apostre nous dit Actes 17. 31.  
*Que Dieu a ordonné vn iour auquel il doit*  
*iuger le monde vniuersel en iustice,* Voulez  
 vous que par iustice soit là entenduë sa  
 benignité & sa miséricorde? Croyez-  
 vous donc que Dieu vse lors de benigni-  
 té & de miséricorde enuers le monde  
 vniuersel? Est-ce la doctrine de l'E-  
 uangile? Quand le mesme Apostre nous  
 parle Rom. 2. 5. 6. *de la declaration du*  
*iuste Iugement de Dieu qui rendra à chacun*

*selon ses œuvres* ; croyez-vous qu'il soit appelé iuste à cause de sa benignité & de sa miséricorde ? Estimez-vous que Dieu doive estre lors misericordieux envers les œuvres de tous les hommes ? Mais plustost, ne voyez-vous pas, ne confessez-vous pas, que puis qu'aux vns il rendra tribulation & angoisse, aux autres honneur & paix, selon la diuersité de leurs œuvres, mauuaises ou bonnes, ce sien Iugement s'exercera selon iustice proprement dite, rigoureuse & seuer, comme vous parlez ? Et quand le mesme Apostre nous dit encore 2. Thess. 1. 5. 6. 7.

*Que c'est vne manifeste demonstration du iuste iugement de Dieu, & que c'est chose iuste envers luy, qu'il rende affliction à ceux qui nous affligent, & à nous qui sommes affligez relasche, lors que le Seigneur Iesus sera reuelé du Ciel avec les Anges de sa puissance, oserez vous soustenir, qu'il appelle le Iugement de Dieu iuste, & son action chose iuste, pour designer sa benignité & sa miséricorde ? Direz vous qu'il rendra affliction à ceux qui nous affligent par sa benignité & par sa miséricorde, & non par sa iustice proprement dite ? Si vous n'osez nier qu'on doit en-*

tendre, en ces paroles; l'action de la iustice de Dieu proprement dite, & que vous appelez rigoureuse & seuer: vostre candeur, vostre sincerité, vostre ingenuité, souffriront-elles que vous interpretiez, en autre sens, l'action de la mesme iustice de Dieu, à donner le relasche à ceux qui ont souffert pour son Nom, puis que l'Apostre exprime l'vne & l'autre action reciproque sous vn mesme terme de *chose iuste*, & le rapporte à vn seul & mesme iuste Iugement? Et tout de mesme, au texte que i'auois allegué de la 2. à Tim. & duquel vous tachez d'esquiuier l'argument, en vous couurant de ce poignard de plomb de vostre distinction de iustice: puis que vous voyez qu'il s'y agit du mesme Iugement, duquel l'Apostre parle en tous ces autres lieux, & que Dieu y est appelé le iuste Iuge, pource qu'il rend le salaire aux fideles selon leurs œuures, & qu'il leur donne le relasche apres leur combat, & la couronne proposee à la fin de leur course: confessez vous pas, nonobstant vostre distinction, que le sens de iustice, prise pour benignité & pour misericorde, ne peut conuenir à ces paroles

où vous auez voulu l'adapter, que vous  
 ne le donniez tel pareillement en tous  
 ces autres lieux? Est que, comme vous  
 ne le pouuez donner en tous ces autres  
 lieux, sans despoüiller Dieu de sa iustice  
 proprement dite: vous commettez vne  
 egale faute en deniant que Dieu soit ap-  
 pellé en ce lieu *iuste iuge*, pour raison de  
 sa iustice proprement dite. Cette de-  
 monstration estant autant inuincible  
 qu'euidente, recognoissez que vostre  
 distinction, & toute la leçon que vous  
 me rememorez vous auoir ouy faire  
 plusieurs fois en chaire, n'est autre cho-  
 se, en ce suiet, qu'une illusion & vne vai-  
 ne eschappatoire pour fuir la confession  
 de la verité, qui vous presse de recognoi-  
 stre la necessité des vrayes merites du fi-  
 dele. Car vous l'auoüez vous-mesmes par  
 vostre concession, si tant est que leurs  
 oeures doiuent estre salariees selon la  
 iustice de Dieu proprement dite. Or  
 vous le voyez maintenant, par les textes  
 expres de l'Escriture, & par les raisons  
 insolubles de l'analogie de la verité. Et  
 partant vous estes conuaincu en vostre  
 conscience de la necessité des merites du  
 fidele selon la doctrine des Catholiques.

Dites moy, ie vous prie, à cette heure, auiez vous raison, quand vous estes entré en la refutation de ces miennes objections, & des argumens dont ie me suis ferui pour vous faire preuue de cette verité, de reprocher à mes raisons qu'elles estoient inuitiles & foibles, & de vous estonner qu'ayant esté nourri parmi les Euangeliques, & ayant leu quelques vns de nos auteurs, ie n'en eusse pas appris la refutation ?

Tel estant (pour emprunter, avec plus de raison, l'usage de vos termes) l'invrilité & la foiblesse de vos responses, vous pouuez iuger, que tout ce qu'ont dit nos reformateurs, touchant le salaire & la recompense que l'Escripture promet par tout aux bonnes œuvres des fideles, est dit sans fondement de raison, & contre le sens de l'Esprit de Dieu; lors qu'ils denient, que ces bonnes œuvres, auxquelles la recompense est promise, doiuent estre appellees merites; & que la recompense leur soit promise ou attribuee selon la iustice de Dieu proprement dite, que vous appelez rigueur de iustice. Et pourtant ie me promets, que vous condam-

nerezvous mesmes, comme dignes d'estre effacees, ces paroles qui suivent en vostre discours page 15. *Que par vos responses ie puis voir quelle est la sorte de salaire & de recompense que nos Docteurs ne veulent pas attribuer aux bonnes œuures des fideles, à scauoir celle qui seroit deuë par rigueur de iustice, telle qu'il faut pour le merite.* Car c'est tout ainsi que si vous disiez, qu'ils ne leur veulent pas attribuer le salaire & la recompense que toute l'Ecriture leur attribue. Ou, pour mieux dire, qu'ils ne leur veulent attribuer aucun salaire ny recompense, pource qu'il n'y en a point dont la raison ne soit dependante de cette proportion establie par la loy & par la nature des choses, qui s'appelle iustice, & comme vous aimez de parler, rigueur de iustice. Je vous auois monstéré en mon amiable esclarcissement, depuis la page 20. iusques à la 25. l'euidence mesprise de nos Docteurs denians le vray merite à la saincteté des fideles, & de recompense ou de loyer proprement ainsi appellé, à la gloire qu'ils doiuent receuoir: sur ce que les fideles sont appellez enfans de Dieu en

L'Eſcriture, comme ſi l'attribution de merite, de loyer, & de recompenſe, n'eſtoit bonne que pour les ſerfs. Vous ſouſtenez que cette raiſon de nos Docteurs eſt tres ſolide. Pour la ſouſtenir telle, vous taſchez de la defendre, premierement contre l'abſurdité où ie vous ay remonſtré qu'elle tombe, oſtant, de neceſſité, tout merite à Ieſus Chriſt. Veu que, par leur raiſon, il faudra d'autant plus dérober le nom de merite à ſon obeïſſance, & le nom de prix & de recompenſe de ſa mort, à l'heritage de vie & de gloire éternelle qu'il a acquiſe pour luy & pour nous, & dont il obtient là haut la poſſeſſion à la dextre de ſon Pere: que plus proprement il eſt Fils de Dieu. Qui eſt bien l'abſurdité qu'où puiſſe imaginer la plus contraire à l'Euangile, & qui en renuerſe plus toute l'analogie. Ie vous aduouë que i'attendois, ſur vne raiſon ſi claire & ſi peremptoire, vn entier acquieſcement de voſtre part. Et ie n'eufſe iamais penſé, veu le ſçauoir & la bonne conſcience que ie preſume en vous, que vous euſſiez ici cherché des deſfaites. Ce qui m'a grandement

estonné, voyant la pauvre couuerture  
 que vous donnez à vn erreur si euident,  
 dans les tenebres d'un autre erreur que  
 vous introduiriez encore beaucoup pire  
 en la Theologie. Quoy? vous osez me  
 dire pour responce, *que ie ne considere pas  
 que Iesus Christ n'a point acquis sa gloire  
 en qualité de Fils: & qu'il l'a seulement ac-  
 quise en qualité de Mediateur.* Me pour-  
 riez vous produire vn seul Theologien  
 soit Catholique, soit Euangelique, qui  
 ait esclos deuant vous vne pensèe si in-  
 digne de la Theologie? Que seroit-ce, si  
 ie vous demandois quelque autorité de  
 Iesus Christ mesme, ou de ses Apostres,  
 qui eussent declaré qu'il n'a point acquis  
 sa gloire en qualité de Fils? Mais que  
 sera-ce, quand ie vous feray voir que  
 toute l'Escripture ensemble accable, de  
 son autorité, ce prodige d'opinion, la  
 plus formellement contraire à toutes les  
 raisons de nostre salut? Premièrement,  
 vostre propre auuglement vous doit  
 ici ouurir les yeux. Vous alleguez pour  
 monstrier que Iesus Christ n'a point ob-  
 tenu la gloire en qualité de Fils, ces pa-  
 roles de luy-mesme, au 17. de S. Iehan,  
*Pere, j'ay paracheué l'œuvre que tu m'as*

*Baillee à faire, glorifie moy, Pere, enuers  
 toy mesme de la gloire que i'ay eue par de-  
 uers toy auant que le monde fust fait. Ce-  
 luy qui dit Pere, parle-t'il point en quali-  
 té de Fils? Celuy qui dit, Glorifie moy,  
 Pere, demande-t'il point la gloire en  
 qualité de Fils? De quel esprit lisez  
 vous ces paroles, pour en induire vne  
 consequence si contraire à leur expres-  
 sion? Vous voulez prouuer que Iesus  
 Christ n'a point obtenu la gloire en qua-  
 lité de Fils. Et pour cet effect vous rap-  
 portez ses paroles, où il demande nom-  
 mement, en qualité de Fils, qu'elle luy  
 soit donnee. Mais dites moy, ie vous  
 prie, pourquoy auez vous ecclipsé ces  
 premieres paroles de la priere du Sei-  
 gneur, où les termes reciproques de Pe-  
 re & de Fils estoient expres? *Pere, l'heure  
 est venue, glorifie ton Fils, afin que ton Fils  
 te glorifie. Comme tu luy as donné puissance  
 sur toute chair, afin qu'il donne vie eternelle  
 à tous ceux que tu luy a donnez.* Vous auez,  
 sans doute, euité de rapporter ces paro-  
 les, pource que vous y voyez diserte-  
 ment enoncé, que Iesus Christ est glori-  
 fié sous le nom & en qualité de Fils,  
 comme sous le nom & en qualité de Fils*

ila glorifié le Pere. Aussi vous ne pou-  
 vez pas nier, que la puissance qu'il a ob-  
 tenuë sur toute chair, luy a esté donnée  
 en qualité de Fils, qui a reuestu nostre  
 chair, & en laquelle estant mort il est re-  
 tourné à vie, & a eleué cette chair dans  
 le ciel sur le Throne de gloire où il est  
 assis. Comme aussi vous ne pouvez pas  
 nier, que c'est en qualité de Fils qu'il  
 donne vie éternelle à ceux que le Pere  
 luy a donnez. Selon ces paroles de luy-  
 mesme au 5. du mesme Euangile 21. 26.  
*Car comme le Pere resuscite les morts & les*  
*viuifie; semblablement aussi le Fils viuifie*  
*ceux qu'il veut. Car comme le Pere a vie en*  
*soy mesme, ainsi a t'il donné au Fils d'auoir*  
*vie en soy mesme.* A quoy pensez vous  
 donc, quand vous dites, pour eluder la  
 force & l'euidence de mon obiection  
 contre vostre maxime, qui déroge tout  
 merite à Iesus Christ, qu'il n'a point ac-  
 quis sa gloire en qualité de Fils : car en cette  
 qualité il en auoit le droit de toute éternité,  
 mais en qualité de Mediateur. Qui est le  
 Theologien qui vous ait appris cette le-  
 çon, qui vous soit auteur de cette Theo-  
 logie? Vous opposez la qualite de Me-  
 diateur à celle de Fils, pour oster à la qua-

ité de Fils le droict & la prerogative de  
 son merite, afin de l'attribuer à la qua-  
 lité de Mediateur. Et quoy? Ce que  
 Iesus Christ est Mediateur, nel'est-il  
 pas en qualité de Fils? Quand le Pere  
 nous l'a donné pour Mediateur, l'Escri-  
 ture ne nous dit-elle pas, *que Dieu a tant*  
*aimé le monde, qu'il a donné son Fils afin*  
*que quiconque croit en luy ait vie eternelle.*  
 Dieu luy même le declarant au monde,  
 ne tonna-t'il pas cette voix du Ciel, *Cet-*  
*tui-ci est mon Fils bien aimé en qui j'ay pris*  
*mon bon plaisir.* Or vous sçavez que le  
 bon plaisir du Pere, *ἡ εὐδοκία*, ce bon  
 plaisir par lequel Dieu l'a agreable, est  
 relatif à l'obeissance & à l'amour que le  
 Fils a rendue. Lequel aussi entrant au  
 monde dit reciproquement au Pere, *Me*  
*voicy ie vien, afin que ie face, ô Dieu, ta vo-*  
*lonté.* Hebr. 10. 7. Et quand le Pere a  
 donné sa gloire au Fils, & qu'il l'a con-  
 stitué heritier sur toutes choses, luy dit  
 il pas, *C'est toy qui est mon Fils, ie t'ay au-*  
*jourd'huy engendré. Et derechef, ie luy seray*  
*Pere, & il me sera Fils,* comme l'Apostre  
 nous l'enseigne au 1. des Hebr. *℣. 5.*  
 Or vous sçavez que ces paroles sont par-  
 ticulierement entendues de la gloire en

laquelle le Pere a eleué son Fils. Et vous osez dire qu'il n'a point acquis la gloire en qualité de Fils, mais en qualité de Mediateur. Et moy ie vous di, qu'il faut que vous appreniez de l'Apostre, que c'est pource qu'il est Fils qu'il a esté glorifié, & que pource qu'il a esté glorifié, il est nostre Mediateur & nostre souverain Sacrificateur. L'acte principal & final de sa mediation & de sa souveraine sacrificature consiste en la gloire qu'il a obtenüe, pource qu'il est Fils, & qu'estant Fils il a appris obeissance par les choses qu'il a souffertes. Vous qui avez par plusieurs annees exposé au peuple l'Epistre aux Hebreux, & qui avez oublié la doctrine de l'Apostre, quand pour vous defendre contre la necessité des merites, & pour soustenir l'opinion de ceux qui en combattent la raison, vous avez forgé, que Christ n'a point obey ni acquis la gloire renduë à son obeissance en qualité de fils, mais en qualité de mediateur: relisez ces paroles qui vous apprendront que la leçon du S. Esprit est toute contraire à vostre doctrine. *Pareillement aussi Christ ne s'est point glorifié soy mesme pour estre fait souverain Sacrificateur.*

*Mais*

Mais celuy qui luy a dit, Tu es mon Fils, ie t'ay aujourd'huy engendré. Comme aussi en un autre lieu il dit, Tu es Sacrificateur eternellement à la façon de Melchisedec. Lequel és iours de sa chair, ayant offert avec grand cri & larmes, prieres & supplications à celuy qui le pouuoit sauuer de mort, & ayant esté exaucé de ce qu'il craignoit: combien qu'il fust fils, toutesfois il a appris obeissance par les choses qu'il a souffertes, & estant consacré il a esté autheur de salut à tous ceux qui luy obeissent. Voyez vous pas que lors que Christ a receu la gloire de son Pere il luy a dit, Tu es mon fils, ie t'ay aujourd'huy engendré. Desquelles paroles, si vous les entendez bien, vous comprendrez que Iesus Christ, Dieu manifesté en chair, est dit auoir esté engendré au iour de son exaltation à la gloire du Pere, à cause que cette mesme gloire, qu'il auoit de toute eternité pardeuers le Pere, comme le Fils eternal ( que le Pere connoissoit seul, & qui ne s'estoit point manifesté aux hommes ) a esté lors manifestee. Et par cette manifestation il a esté rendu notoire, que Iesus Christ est ie Fils de Dieu eternal, engendré du Pere de toute eternité. Car pour cette cause

il dit auoir esté engendré au iour que sa chair a esté esleuee en gloire, pource que ne s'estât manifesté que par la chair qu'il a prise, sa generation eternellen'a esté cogneuë que par la glorification de sa chair, en laquelle il a obtenu la gloire qu'il auoit de toute eternité pardeuers le Pere. A quoy se rapporte ce que dit l'Apostre aux Rom. i. 4. *qu'il a esté déclaré fils de Dieu en puissance par la resurrection des morts.* Par où l'Apostre entend le consequent pour l'antecedent, c'est à dire, sa gloire qui a suivi sa resurrection. Vous voyez d'ōc, que ce n'est propremēt qu'en tant qu'il est Fils, & pource qu'il est Fils, qu'il a obtenu en sa chair la gloire qu'il a acquise par l'obeissance de sa souffrāce, laquelle obeissance il a réduë au Pere en tant qu'il est Fils, selon les paroles expresses de l'Apostre, diametralemēt cōtraires à vostre imagination, qu'il n'a pas obei, & qu'il n'a pas esté glorifié en qualité de Fils, mais en qualité de Mediateur. En quoy vostre inaduertance est d'autant plus grande, que vous n'entendez pas ce que l'Apostre vous enseigne, que sa qualité de Mediateur & de souverain Sacrificateur est accomplie

en luy par sa gloire. Tellement qu'il n'a pas esté glorifié pource qu'il estoit Mediateur, mais il a esté fait Mediateur & souverain Sacrificateur, & comme parle l'Apostre encore, Auteur de salut à tous ceux qui luy obeissent, pource qu'ayant obeï au Pere en sa souffrance, il a esté souverainement exalté en sa gloire, & qu'il a obtenu vn nom par dessus tout nom, & tel qu'il n'y a point d'autre nom donné aux hommes par lequel nous puissions estre sauuez. Or ce nom de Mediateur, de souverain Sacrificateur, de Sauueur, d'Auteur de salut, Iesus Christ l'obtient entant que Dieu manifesté en chair, & eleué en gloire. Et cette gloire il l'obtient entant que Fils, lequel estant Fils, a appris obeissance par les choses qu'il a souffertes. Si ie faisois fondre en ce lieu tous les autres lieux de l'Escripture, qui pourroient amplifier la preuue de cette verité, ie ferois vn volume. Mais ceci suffit pour vous faire cognoistre combien vous auez mal compris la doctrine de l'Euangile sur ce suiet, & comme vous l'allez renuersant de fonds en comble, pour soustenir cette maxime

de nos Docteurs mal digerée, *que le mérite contraire à l'obeïssance d'un fils.* Ce qui oste à Iesus Christ tout son merite, & par consequent toute la cause de nostre salut.

Mais ce qui m'a donné plus d'estonnement en la solution en laquelle vous me dites, *que ie ne considere pas que Iesus Christ n'a pas acquis sa gloire en qualité de Fils, mais en qualité de Mediateur.* C'est que vous n'ayez pas vous mesmes considéré ce que les elemens de la raison vous doiuent auoir appris, pour vous faire voir combien cette distinction est impertinente. Car vous sçauiez que les actions & les passions ne sont pas propres aux qualitez du suiet, & ne leur appartiennent pas, mais au suiet mesmes. Le nom de Fils denote en Iesus Christ le suiet mesme, la personne, le supposit. Ce n'est pas vn simple nom de relation, mais d'essence & de substance. Le nom de Mediateur denote vne qualité en Christ, c'est vn nom d'accident & de simple relation. Ainsi ce que Iesus Christ a fait, ce qu'il a acquis, ce qu'il a obtenu luy appartient proprement en qualité de Fils, entant qu'il est Fils, & au regard de

sa personne, bien que sa personne soit, pour ce regard consideree en qualité de Mediateur. Si vn Medecin a gueri quelqu'un, & s'il en a receu salaire, celuy là seroit ridicule, qui diroit que son action, & le loyer qu'il en a acquis, ne doit pas estre attribuee ou estimee propre de la personne, mais de la qualité de Medecin. Ainsi vous vous moquez avec raison, de ceux qui disent que le Pape peut errer entant qu'homme, mais qu'il ne peut errer entant que Pape. Car si le Pape est infaillible, ou s'il erre, l'homme erre, ou est infaillible. Car toutes les actions sont du suppost. Et certes ceux qui parlent ainsi, pour defendre la doctrine Catholique en cét argument, ne l'entendent pas. Pour parler catholiquemēt il faut dire que le Pape ne peut errer lors qu'il pronōce *ex cathedra Petri*. Or pronōcer en la chaire de de S. Pierre, c'est pronōcer par l'autorité du Concile vniuersel. Car c'est en l'execution de l'autorité du Cōcile vniuersel que l'Euesque de Rome en qualité de Pape & de Chef de l'Eglise vniuerselle, est assis, pour ce regard, en la chaire de S. Pierre. Et c'est en ce regard que le Pape n'erre poit. Mais ceci ap-

partient à vne autre matiere, où il sera  
 traitté, Dieu aidant, comme il appar-  
 tient. Pour closture donc de cette res-  
 ponse à vostre solution, ie ne vous  
 mentiray point, Monsieur, si ie vous di,  
 que si tost que ie iettay les yeux dessus, ie  
 leuay les espaules de compassion, qu'un  
 homme docte & versé en la Theologie,  
 comme vous, fust tombé en vne si gran-  
 de inaduertance. Et que vous ayez osé  
 aduancer, que Iesus Christ n'a pas obte-  
 nu sa gloire en qualité de Fils, pour  
 oster, en luy, l'attribution de merite à la  
 qualité de Fils, qui est la qualité essen-  
 tielle, & pour la rapporter à sa qualité  
 de Mediateur, qui est vne qualité d'offi-  
 ce & accidentele, à laquelle les actions  
 & les passions du suiet ne peuuent ia-  
 mais estre rapportees à l'exclusion du  
 supposit mesme auquel elles appartienn-  
 ent proprement. Voyez, ie vous prie,  
 en cet exemple, iusqu'où l'on s'empor-  
 re par la chaleur de l'affection de defen-  
 dre sa these. Car si vous persistiez en cet  
 erreur, vous introduiriez vne heresie  
 qui renuerseroit de fonds en cōble tou-  
 te l'analogie de l'Euāgile, & qui contre-  
 dict à cinq cens passages formels des es-

crits des Apostres. Mais ie m'assure  
que vous reuiendrez aisément à vous, &  
que vous condānerez vous mesmes vo-  
lontairement vne si notable mesprise.

Après vous auoir remonstré, en mon  
amiable esclarcissement, ce notable in-  
conuenient de l'erreur de ceux, qui dé-  
nians le merite des enfans, ostent, par  
consequent, tout merite à Iesus Christ :  
ie vous auois donné la solution de la  
raison qui leur a fait croire cet erreur  
vraysemblable, par l'opposition de la  
qualité d'enfans à la qualité de serui-  
teurs, &, par mesme raison, de l'herita-  
ge propre aux enfans au loyer & re-  
compense propre aux seruiteurs, à qui  
par consequent, appartiene seulement  
le merite & non aux enfans. A cette  
obiection voici la solution que ie vous  
auois donnée, Que comme le seruiteur  
differe de l'enfant, aussi differe son  
amour & son obeissance de l'amour &  
de l'obeissance de l'enfant, son merite  
du merite de celuy ci, sa recompense  
de sa recompense. L'amour du serui-  
teur enuers son maistre, du mercenaire  
enuers celuy à qui il fait seruice, vient  
de l'amour qu'il porte à soy mesme.

„ l'amour de l'enfant enuers son pere, le  
 „ porte à s'abandonner soy mesme, pour  
 „ seruir à son pere. Et pourtant le merite  
 „ de l'enfant est proprement merite, le  
 „ merite du serf & du mercenaire l'est im-  
 „ proprement. Et par mesme raison, la re-  
 „ compense de l'enfant est de tout l'herita-  
 „ ge du pere, la recompense du serf n'est  
 „ que de quelque chose hors de l'heritage.  
 „ C'est pourquoy ceux qui aimeroient &  
 „ seruiroient Dieu selon la loy ( quand il  
 „ s'en rencontreroit qui accomplissent ce  
 „ deuoir ) ils n'auroient pour recompense  
 „ que les biens temporels pour l'vsage de  
 „ cette vie terrestre. Mais ceux qui ai-  
 „ ment Dieu, & qui luy seruent selon l'E-  
 „ uangile, auront la recompense des biens  
 „ eternels pour la possession de la vie cele-  
 „ ste. Ils ont encore accoustumé de s'em-  
 „ pescher eux mesmes sur ceci par vn mau-  
 „ uais raisonnement, concludans que l'heri-  
 „ tage ne peut estre dit ny estimé recom-  
 „ pense de l'obeïssance des enfans, ny leur  
 „ obeïssance merite de sa possession, ny  
 „ cause de sa iouyssance, pource que l'heri-  
 „ tage leur appartient par leur naissance,  
 „ mesmes auant qu'ils ayent obeï. Parlans  
 „ ainsi ils monstrent qu'ils n'entendent

gueres ce qu'ils disent, au suiet duquel  
 nous parlons. Car, en la naissance char-  
 nelle, il est bien vray que l'obeïssance des  
 enfans n'est pas proprement consideree  
 pour la raison d'obtenir l'heritage, d'au-  
 tant que ce n'est pas l'obeïssance qui les  
 fait enfans, mais la naissance ou l'adop-  
 tion. Autre chose est, en la naissance se-  
 lon la chair, d'estre enfant, & autre cho-  
 se l'obeïssance à la loy paternelle. Il suffit  
 d'auoir este engendré d'un pere en un  
 legitime mariage, ou d'en estre adopté,  
 pour auoir son bien. Mais, en la nais-  
 sance & en l'adoption spirituelle, estre  
 rendu iuste, aimant Dieu sur toutes cho-  
 ses, obeïssant à sa volonté iusques à  
 la mort, estre fait conforme en ces cho-  
 ses à Iesus Christ, estre regeneré, estre  
 renouuellé selon le nouuel homme créé  
 en iustice & vraye saincteté : c'est estre  
 fait enfant de Dieu. L'un n'est point  
 different de l'autre. C'est formellement  
 vne seule & mesme chose. Par la mesme  
 raison, par laquelle nous sommes rendus  
 iustes & obeïssans à Dieu par la grace de  
 l'Esprit de Iesus Christ, nous sommes  
 aussi faits enfans, freres de Iesus Christ,  
 & pour mesme raison coheritiers avec

5. luy. Christ est nostre frere aîné, nostre  
 22 Seigneur & nostre Roy. C'est luy seul  
 22 qui a acquis l'heritage par soy mesme.  
 22 Il appartient à luy seul. C'est de luy &  
 22 par luy que nous en obtenons la posses-  
 22 sion. Mais pour l'obtenir il faut aupa-  
 22 ravant qu'il nous face ses freres par  
 22 son Esprit habitant en nous, lequel y  
 22 respand la charité & l'amour du Pere  
 22 sur toutes choses, & de nos prochains  
 22 comme de nous mesmes. Ainsi nostre  
 22 iustice & nostre obeissance vraiment  
 22 filiale, qui nous fait vraiment en-  
 22 fans, est aussi vraiment cause de la  
 22 possession de l'heritage celeste, où  
 22 nous entrerons comme il nous a esté  
 22 préparé par le Seigneur. Et par  
 22 consequent, elle est vraiment me-  
 22 rite, & l'heritage vraiment recom-  
 22 pense de nostre obeissance. A cela  
 22 qu'avez vous à dire? Estimerez vous  
 22 encore qu'il y aît lieu de m'accuser, ny  
 22 les Catholiques, ( à la croyance des-  
 22 quels ie veux, par ces raisons, que  
 22 nous nous revnissions, de destruire la  
 22 grace de Iesus Christ? Et si quelqu'un  
 22 le dit, peut-il pas d'une mesme bouche,  
 22 cracher contre le visage de l'Apostre,

& démentir tout l'Evangile? Ce que ie suis certain que vous ne ferez pas.

Voila comment ie vous auois remontré l'inaduertance de nos gens en l'argument qu'ils ont voulu faire de la qualité d'enfans donnée aux fideles en l'Escripture, contre la raison du merite que les Catholiques leur attribuent, & contre la raison du loyer & de la recompense dont la vie eternelle est qualifiée. J'aurois désiré que vous eussiez ingenuëment considéré ces distinctions, que ie vous auois representees, & par lesquelles estoit fort clairement resolu le nuage dont nos reformateurs s'estoient derobé à eux mesmes la veüe de la verité en ce suiet. Mais vous mesmes auez mieux aimé dérober à vos lecteurs cette lumiere. Et ne la pouuant obscurcir par l'opposition d'aucunes raisons: au lieu d'examiner ce que ie vous auois remontré, & d'y acquiescer comme vous deuiez (ne le pouuant refuter) vous auez rempli trois pages de papier d'un discours ou vous estallez le mesme argument, que nos gens basti sur les mesmes faux principes que ie vous auois refutez, sans toucher

ny faire mention en façon du monde, de mon esclarcissement precedent. Je ne feray pas, en vostre endroict, comme vous au mien. Car ie rapporteray vostre discours ici tout au long, tant pour faire voir, que vous n'y rappiecez que les lambeaux de la mesme toile que i'auois desia mise en pieces : que pour dissiper encore tous les filets, dont vous pensez pouoir r'attacher la tissu d'une doctrine si mal ourdie. Voici vos paroles pag. 17. 18. 19. 20.

„ [L'autre egard contre les merites, pris  
 „ de la qualité d'enfans consiste en l'obligation qu'ils ont de seruir leur pere. Car  
 „ s'ils doiuent à leur pere toute l'obeissance, la rendans ils ne font que ce à quoy ils  
 „ sont tenus, & partant ne meritent point.  
 „ Or si les enfans sont redeuables à leurs  
 „ peres terriens, nous sommes beaucoup  
 „ plus redeuables à Dieu nostre Pere celeste, selon l'aduertissement de Iesus  
 „ Christ, *Quand vous aurez fait toutes les*  
 „ *choses qui vous sont commandées d'estre*  
 „ *faites, dites, nous sommes seruiteurs inu-*  
 „ *tiles, ce que nous estions tenus de faire nous*  
 „ *l'auons fait.* Et si estans tenus de faire  
 „ tout ce qui nous estoit commandé, nous

auons failli & peché en beaucoup de  
 choses, combien sommes nous loin d'a-  
 uoir mérité ? Or vous remarquerez que  
 Iesus Christ n'argumente de la qualité  
 des serfs qu'entant qu'ils sont tenus de  
 faire ce qui leur estoit commandé, en  
 quoy le fils se trouue semblable au serf.  
 Pourtant bien que Dieu, sous l'Euangile,  
 ne nous traite point en serfs, nous ayant  
 reuelé ses secrets, & nous ayant donné  
 vn Esprit d'adoption, par lequel nous  
 luy crions Abba Pere, nous ne luy som-  
 mes pas moins redevables pour nostre  
 adoption que des serfs, voire plus grand  
 est ce benefice plus sommes nous tenus  
 de le seruir : & mesme au regard de cette  
 obligation nous luy sommes faits serfs  
 selon que dit l'Apostre. 1. Cor. 6. *Vous*  
*n'estes point à vous mesmes, vous estes ache-*  
*ptez par prix, glorifiez donc Dieu en vos*  
*corps & en vos esprits lesquels sont à Dieu.*  
 Ainsi Rom. 6. il represente que nous  
 sommes faits serfs à Dieu & à iustice.

Je desire que l'on confere ces paroles  
 de vostre response, avec le discours cy-  
 dessus de mon amiable esclarcissement,  
 où ie vous remonstrois la cause de l'er-  
 reur de nos reformateurs, en ce que,

pour dénier la raison du merite à l'obeissance que les enfans rendent à leur pere, ils maintiennent que la raison du merite & du loyer proprement appellé, n'appartient qu'à l'obeissance des seruiteurs & des mercenaires, se fondans sur la parole de l'Apostre, *à celuy qui œuvre le loyer ne luy est point reputé pour grace mais pour chose deuë.* Et qu'aux enfans l'heritage ne leur est point donné pour recompense de leur obeissance, pource que le droict del'heritage precede mesme leur obeissance. Vous voyez les distinctions, que ie vous auois remonstré, que vous deuez faire, entre la raison de l'obeissance des serfs, & l'obeissance des enfans, comme aussi entre la raison de l'estre des enfans charnels au regard de leurs peres terriens, que l'obeissance ne fait pas enfans formellement, mais la naissance; & entre la raison de l'estre des enfans spirituels au regard de Dieu leur Pere celeste, que l'obeissance fait formellement enfans. Car tous ceux qui confereront vostre repliche avec mes solutions admireront que vous ne les touchiez ny pres ny loin. Et s'estonneront encor d'auantage qu'en

les dissimulant comme vous faites, vous persistiez en la defense de l'erreur dont ie vous ay remonstré l'absurdité. Et plus que tout encore, qu'entreprenant de le defendre vous y procediez par le renuersement mesme de la maxime sur laquelle nos reformateurs l'ont basti. Car leur maxime contre les merites, que les Catholiques attribuēt à l'obeissance des fideles: & contre la raison de loyer & de recompense dont ils qualifient la vie & gloire eternelle renduë aux merites du fidele, est fondée sur ce que le merite & le loyer, comme ils estiment, est propre aux serfs & non aux enfans. Telle estoit l'hypothese de nos reformateurs, dont ie vous ay remonstré l'erreur. Vous, là dessus, pour le soustenir maintenez tout au rebours de leur fondement, que les serfs ne peuuent rien meriter, à cause qu'ils sont tenus de faire ce qu'ils font, & que les enfans estans pour ce regard semblables aux seruiteurs, ne peuuent aussi rien meriter. Par ce moyen vous ostez & à la qualité de seruiteurs & à la qualité d'enfans toute raison de merite, de dignité, de loyer, de recompense. Ainsi, selon vous, les termes de merite,

de dignité, de loyer, de recompense, de salaire, seront du tout imaginaires & fantastiques, sans raison ny fondement, & n'approprieront à chose quelconque. Par mesme raison vous deuons aussi oster du monde le terme de iustice proprement ainsi appelée. Car vous mesmes sousteniez cy dessus, que pour definir le merite, il faut qu'il ait rapport à la raison de iustice proprement ainsi appelée. Si donc vous otez tout à fait le merite d'entre les hommes, vous otez aussi la iustice. Or vous otez tout à fait le merite, s'il n'est propre ny à l'obeissance des seruiteurs, ny à l'obeissance des enfans comme vous raisonnez à cette heure. N'avez vous pas compassion de vous mesmes, voyant les absurditez dans lesquelles vous vous precipitez par vn raisonnement si auetugle? Quelle societé establirez vous entre les hommes par vostre Theologie? Vous en bannirez toute iustice, tout merite, toute recompense. Quelle relation, quelle liaison donnerez vous aux affections mutuelles des vns enuers les autres, s'il n'y a ni merite, ni recompense de l'inferieur au superieur, du superieur à l'inferieur?

Par

Par quelles loix entretiendrez vous l'empire & la suiecttion, l'autorité de commander, & la volonté d'obeir : si vous faites croire que ceux qui obeissent ne meritent rien, & que ceux à qui on doit obeir ne doiuent rien ? Est-il possible que vous ayez considéré les conséquences de vostre doctrine, & que vous disputiez de la sorte pour la defendre ?

Or la cause de vostre erreur, & de tous ceux qui disputent ainsi avecuglement contre la raison des merites, vient de ce faux principe qu'ils se sont mis en l'esprit, & que vous posez pour fondement de vostre ratiocination, c'est à sçauoir, *que qui rend le deuoir auquel il est obligé ne merite rien.* C'est la premiere fausseté το πρῶτον ψεύδος de toute vostre opinion contre les merites. Je l'ay amplement refutée, en la conuiction de Monsieur Amyraut, depuis la page 124. iusques à la page 158. où j'ay explicqué la raison & la difference des merites de l'homme enuers l'homme, & des merites de l'homme enuers Dieu. Des merites des serfs & des mercenaires, & des merites des enfans. Des merites des suiets, des enfans, & des seruiteurs enuers leurs

Princes, leurs peres, & leurs maistres. J'ay remonstté que tant s'en faut, que la qualité de deuoir, en l'œuvre accomplie, contrarie à la qualité de merite : qu'au contraire elle n'est vrayement meritoire ny agreable, ny obligeante l'affection reciproque de celuy à qui elle est renduë, que pource qu'elle est faite selon le deuoir. Et que, pour cette, cause l'œuvre, dont l'amour est le principe, est beaucoup plus meritoire, que celle qui n'a pour principe que la simple obeissance. D'où vient que le merite est beaucoup plus grand en l'obeissance filiale, qu'en l'obeissance seruite. Et qu'en comparaison de l'une à l'autre, l'obeissance des serfs n'est rien au prix de l'obeissance des enfans, & l'affection des maistres enuers les seruiteurs, n'est rien au prix de l'amour des peres enuers les enfans. Pour raison de quoy les seruiteurs n'ont point de part à l'heritage qui est propre aux enfans.

Si vous auiez entendu ces differences vous auriez compris la raison du dire de nostre Seigneur au passage que vous alleguez du 17. de S. Luc. De l'intelligence duquel, meilleure que vous ne l'auiez eue iusques à présent, vous me ferez

encore, s'il vous plaist, redeuable. Car la fin de nostre Seigneur n'est pas de nous faire croire, que les fideles, seruâs à Dieu en esprit & verité selon l'esperance celeste à laquelle ils s'ont appelez, ne font aucunes œuures qui soient meritoires, qui soient agreables à Dieu, qui doiuent estre recompensees de la vie & de la gloire eternelle. Certainement, comme cette doctrine renuerseroit tout l'Euangile, aussi est-elle autant éloignée de l'intention de nostre Seigneur en ce discours, comme le ciel est de la terre. La remonstrance, que nostre Seigneur fait en ce lieu à ses disciples, est diametralement contraire à ce que vous vous imaginez. Il leur enseigne la difference des fideles, de ceux qui ont la foy, qui sont les vrais enfans de Dieu, engendrez de la semence del'Euangile: d'auec les iustitiaux, ceux qui se croyent iustes par eux-mesmes & non par la grace, mais par les œuures de la loy. Dont les vns sont enfans, les autres sont serfs. Et dont les vns sont traittez comme enfans, & comme les heritiers du Royaume: les autres comme estrangers & mercenaires. Voyez ceci en toute la suite du discours de nostre Seigneur,

Ses Apostres luy demanderent, comme dit l'Euangeliste, *Augmente nous la foy*. Il leur dit, *Si vous auez la foy comme vn grain de semence de moustarde, vous pourrez dire à ce meurier, déracine toy & te iette en la mer, & il vous obeïra*. En ces paroles Iesus Christ instruit ses Apostres, encore rudes & charnels, de l'estat du Royaume des cieux, dont la porte est la foy; par l'obeïssance de laquelle nous nous soumettons à la tolerance de la croix, pour receuoir l'Esprit de vie qui nous renouuelle en iustice & vraye saincteté, afin d'auoir part au Royaume de gloire, où toutes choses nous seront données avec Iesus Christ, & où nous regnerons avec luy, & possederons la gloire & la puissance que le Pere luy a donnée. Il les encourage donc & les excite au desir de ce don precieux de la foy, d'ôt ils luy demandoïent l'augmētation. Et, à cette fin, il leur en declare l'excellence, en leur representant l'admirable vertu que doiuent receuoir ceux qui obtiennent ce don. Car quiconque a cette vraye foy de l'Euangile, par l'obeïssance de laquelle il se soumet à la Croix, a en soy la semence viue qui produit la iustice & la saincteté dont

toutes les bonnes œuvres fructifient. Vntel est la plante que le Pere celeste a plantée, & qui ne sera point déracinée. Cette plante sera plantée au Paradis de Dieu. A vntel sera donnée la gloire & la puissance du Fils de Dieu, à laquelle toutes les choses de ce monde cedent, & à laquelle toute la nature obeit. C'est ce que nostre Seigneur a voulu faire entendre à ses Disciples sous ces termes, *Vous direz à ce meurier, déracine toy & te iette en la mer, & il vous obeira.* Non que l'accomplissement de cette promesse doiue estre attendu des fideles en la vie presente, & auant que leur gloire soit accomplie. Car cette admirable vertu qui doit reluire en tous les saincts, qui par la foy auront esté sanctifiez en cette vie, les enuirônera lors que les enfans de Dieu serôt reuelez. Qui sera le temps auquel toutes les creatures, qui sont maintenant suiettes à vanité & corruption, en seront deliurées & mises en liberté, pour seruir à la gloire des enfans de Dieu, & pour obeir à leur puissance. C'est ce que nostre Seigneur entend, & ce qu'il insinuë à la foible comprehension de ses Disciples, par le commandement fait au meurier de se ietter

en la mer, pour leur représenter la mer-  
 ueilleuse puissance qui sera donnée à  
 ceux que la foy, aura sanctifiez, & dans  
 lesquels cette precieuse semence aura  
 produit son fruit. Or pource que les  
 principes de l'establissement du Royau-  
 me des Cieux, qui s'est fait par la predica-  
 tion de l'Euangile, & par la propagation  
 de la foy a deu correspondre à sa fin & à  
 son accomplissement, par lequel toute la  
 nature cederà & sera assuiettie à la gloire  
 & à la puissance des enfans de Dieu :  
 aussi nostre Seigneur ayant consacré ses  
 Apostres, pour faire ce diuin & admira-  
 ble establissement premier de son royau-  
 me ici bas par la foy en son nom, leur a  
 donné la gloire que le Pere luy auoit  
 donnée, & qu'il auoit luy mesme exer-  
 cée ici bas en son infirmité. *Et moy aussi*  
*je leur ay donné la gloire que tu m'as donnée,*  
*afin qu'ils soient un comme nous sommes un.*  
 Car le Seigneur a donné à ses Apostres,  
 & aux Prophetes & Euangelistes, extraor-  
 dinairement appelez par luy, pour l'œu-  
 re de la fondation de son Eglise & de  
 l'establissement de son regne enterre, la  
 mesme vertu admirable de faire mira-  
 cles, de chasser les diables, de guerir tou-

tes sortes de maladies & de langueurs, de  
 resusciter les morts, & de dominer sur  
 les œuures de la nature, pour le reſtabliſ-  
 ſement de la corruption & des deſauts  
 que le peché y a introduiçts. Afin que  
 par la predication de la foy, & par la ma-  
 niſeſtation de la grace ſalutaire, fut eſta-  
 bli entre les fideles le regne de iuſtice &  
 de ſainçteté, qui conſiſte en la parfaite  
 charité, par le lien de laquelle ils ſont  
 vnis & faits tous enſemble vn meſme  
 corps. C'eſt la raiſon pour laquelle le  
 Seigneur dit, qu'il a donné à ſes Apoſtres  
 la gloire que le Pere luy auoit donnée,  
 afin qu'ils ſoient vn comme le Pere &  
 luy ſont vn. Car la gloire de cette vertu  
 admirable, de faire les miracles & les  
 œuures ſurnaturelles qu'ils ont faites,  
 leur a eſté donnée pour fonder l'Egliſe  
 par la predication de la foy, laquelle abo-  
 liſſant la predication de la loy, deuoit  
 eſtre accompagnée d'une vertu digne de  
 l'autorité & de la puissance de celui à  
 qui toute la nature obeit. Afin comme  
 i'ay dit, que le commencement de l'e-  
 ſtabliſſement du regne de Ieſus Chriſt ſe  
 rapportaſt à la fin de ſon accompliſſe-  
 ment. Les Apoſtres & leurs aſſociéz

fondateurs d'iceluy ayans obtenu à cet  
 effect la gloire de Christ en leur infirmi-  
 té, laquelle gloire sera donnée, en la fin  
 de l'accomplissement, à tous ceux qui au-  
 ront creu en luy par leur parole, & qui,  
 par cette verité, ayans esté sanctifiez, au-  
 ront esté vnis par charité en vn mesme  
 corps en iceluy. Ce qui sera lors que  
 Dieu sera toute chose en tous. Car, par  
 nostre parfaite vnion avec Dieu sa puis-  
 sance & sa vertu en nous produira les ef-  
 fects d'un pouuoir absolu sur toutes les  
 choses créées, sur lesquelles nous domi-  
 nerons pleinement. Ce sera lors que sera  
 accomplie en tous les fideles cette pro-  
 messe que Iesus Christ leur fait en ce lieu  
 de S. Luc, en leur designant combien  
 grande sera leur puissance, sous cette re-  
 presentation de pouuoir commander à  
 vn arbre de se déraciner & de se ietter  
 en la mer. Ainsi par la promesse d'une  
 si grande gloire & puissance, & qui doit  
 estre donnée à ceux qui auront eu la foy  
 en son nom, il leur allume de plus en plus  
 le desir qui brusloit en eux de ce pre-  
 cieux don de la foy de l'Euangile. Or  
 à l'opposite, il leur remontre quel est le  
 chetif & miserable estat de l'homme qui

ne sert à Dieu que selon la loy, au prix de ceux qui sont appelez à la foy. Car de ceux-là les œuvres ne sont ny agreables ny meritoires deuant Dieu, d'autre façon qu'ont accoustumé de l'estre les œuvres des seruiteurs & esclaves à leurs maistres. C'est pourquoy Iesus Christ continuë ainsi son propos à ses Disciples. *Mais qui est celuy d'entre vous ( notez Mais qui vous designe l'opposition ) qui ayant un seruiteur labourant, ou pais-*  
*sant le bestail, qui le voyant retourner des champs luy die, Auance toy incontinent, & te mets à table. Et ne luy die plustost, Ap-*  
*preste moy à souper, & te trouffe, & me sers*  
*iufques à ce que i'aye mangé & beu, & apres*  
*cela tu mangeras & boiras? Sçait-il gré à*  
*ce seruiteur là pource qu'il a fait ce qui luy*  
*a esté commandé? Le ne le cuide pas. Vous*  
*aussi semblablement, quand vous aurez*  
*fait toutes les choses qui vous sont comman-*  
*dees, dites que nous sommes seruiteurs inuti-*  
*les, que ce que nous estions tenus de faire nous*  
*l'auons fait. Par cette parabole Iesus*  
*Christ fait entendre à ces Disciples, quel*  
*est l'estat & la condition opposee de ceux*  
*qui seruent à Dieu selon la loy, & com-*  
*me quoy ils doiuent reputer qu'ils sont*

agréables à Dieu ; & que Dieu leur  
 sçache gré pour toutes les œuvres qu'ils  
 font, κατὰ τὰ πάντα τὰ διαταχθέντα, se-  
 lon toutes les choses ordonnées & pres-  
 crites par tous les commandemens sin-  
 guliers & externes que la loy enjoint,  
 pour l'usage de tous les biens qu'elle pro-  
 pose à l'homme. Car tous ceux qui  
 sont sous la loy sont serfs & esclaves. Au-  
 tant differens des fideles, qui sont sous la  
 grace de Iesus Christ, que les seruiteurs  
 de la maison sont differens des enfans.  
 Comme aussi le but & l'intention des  
 iustitiaux, qui pourchassent la iustice  
 qui est selon la loy, est aussi éloigné du  
 but & de l'intention des fideles, qui pour-  
 chassent la iustice de Dieu par la foy,  
 comme l'affection des seruiteurs est di-  
 versée de l'affection des enfans. Car les  
 iustitiaux font toutes leurs œuvres  
 pour estre regardez des hommes, & pour  
 l'amour qu'ils portent à eux mesmes, non  
 pour la gloire de Dieu, & pour l'amour  
 qu'ils luy portent. Au lieu que les fi-  
 deles & enfans de Dieu font toutes leurs  
 œuvres pour la gloire de Dieu & pour  
 l'amour de luy. Pour cette cause la re-  
 compense des iustitiaux n'est rien, ils

n'ont point de part à l'heritage des enfans. Car ils ont eu leur loyer auant que leurs œuures fussent faites. Dieu ne donne plus de recompense à toutes les œuures pour lesquelles ils se presument estre iustes. Et comme il est dit en la parabole du mauuais riche, *ils ont leurs biens en ce monde.* En la remuneration au dernier iour ils n'auront donc à pretendre aucune recompense. Dieu ne leur scaura point de gré de tout ce qu'ils auront fait. Il n'y aura plus de salaire à esperer pour eux. Ils l'ont desia receu dans les biens de la vie presente, pour lesquels ils ont trauaillé. C'est ce que nostre Seigneur nous represente au 6. de S. Mathieu touchant ceux qui font leurs aumosnes deuant les hommes, pour estre regardez des hommes. Qui se rendent le visage triste & defait quand ils ieusnent, afin qu'il apparaisse aux hommes qu'ils ieusnent. Car il dit de tous ceux-là, *qu'ils n'ont point de salaire vers nostre Pere qui est es cieux, & qu'ils reçoient leur salaire dès cette vie.* Mais quant aux fideles qui exercent les œuures de charité & de pieté, selon vne affection sincere du cœur, pour l'amour de

Dieu, lequel ils seruent en esprit & verité, regardans à luy seul, qui aussi les regarde & void le secret de leurs cœurs: *Ceux-là, dit le Seigneur, auront salaire vers leur Pere qui est és Cieux, qui leur rendra à descouvert.* Car telle est la difference des seruiteurs & des enfans, de ceux qui cherchent leur iustice par la loy, d'avec ceux qui pourchassent la iustice de Dieu qui est par la foy. Si vous eussiez entendu cette difference, si vous en eussiez apperceu la raison, dans ce discours de nostre Seigneur à ses Disciples dans Sainct Luc, vous n'auriez pas argumenté, comme vous faites, du blanc au noir, confondant la qualité d'enfans avec la qualité de seruiteurs, c'est à dire, l'Euan-gile avec la loy, Iesus Christ avec le monde, le ciel avec la terre. Meslange que vous, ny nos Reformateurs n'ont point discerné, & qui est la capitale cause de toutes les mesprises qu'ils ont commises dans l'establissement de leurs controuerses. Je vous prie, où allez vous par la remarque que vous m'ordonnez de faire, *Que Iesus Christ n'argumente de la qualité des serfs qu'entant qu'ils sont tenus de faire ce qui leur est commandé; en quoy le fils*

*Je trouue semblable au serf? Est-ce tout ce que vous y voyez? Et quoy? Iesus Christ ne met il pas principalement cette circonstance en la condition des seruiteurs, que le maistre ne leur sçait point gré pour ce qu'ils ont fait ce quil leur est commandé. En conscience direz vous aussi (vous qui voulez à toute force en tirer la consequence sur les enfans) que Dieu ne sçache point gré à ses enfans des bonnes œuures qu'ils font, qu'il ne les ait point agreables? Cette maxime vous semble-t'elle conforme à l'Euangile? Ou plustost, n'en renuerie t'elle pas toute la substance? Effacerez-vous donc ces belles promesses, Que nostre loyer est grand es Cieux. Que nostre trauail n'est point vain ny invtile en nostre Seigneur. Que Dieu n'est point iniuste pour oublier le trauail de nostre foy, de nostre patience, & de nostre charité, & autres semblables, dont les escrits des Apostres sont pleins? Or si vous insistez, sans distinction ny difference, sur ces termes ce que nous estions t. nus de faire nous l'auons fait, pour conclure, que tous ceux, de qui ils peuuent estre dits, sont invtiles, & que leurs œuures sont de nulle consideration*

& sans gré : vous ne renuerserez pas seulement la raison du merite, comme vous auez pretendu , mais vous bannirez entierement toute raison de bonne œuvre, d'œuvre agreable à Dieu, de loyer & de recompense, de iustice & de iugement de Dieu, qui ne pourra plus iuger personne selon ses œuvres. En vn mot, vous abolirez tout l'Euangile. Reuez donc à vous & à la cognoissance de la verité. Apprenez la distinction & la difference que vous deuez faire entre les seruiteurs & les enfans, entre ceux qui seruent à Dieu selon la loy, & ceux qui luy obeissent par obeissance de foy selon l'Euāgile. Entendez pourquoy aux seruiteurs, qui seruent à Dieu selon la loy, par l'affection des choses charnelles & pour l'amour d'eux mesmes, il conuient de dire, apres qu'ils ont fait toutes les choses que tous les commādements de la loy leur ordonnent. *Nous sommes seruiteurs inutiles, ce que nous estions tenus de faire nous l'auons fait.* C'est pource que tous les benefices, que les promesses de la loy regardent, sont donnés à l'homme par la loy, auant que l'homme ait fait les œuvres que la loy luy prescrit. Et toutes les œuvres de

la loy sont ordonnées à l'homme, pour se  
 conseruer la iouissance des biens de ce  
 monde, que Dieu luy a donné par la na-  
 ture. Tellement qu'il est vray de dire,  
 que ceux qui font les œuvres de la loy,  
 n'ont rien à attendre de nostre Pere qui  
 est es cieux, pource qu'ils ont desia receu  
 leur salaire, qui ne concerne que cette  
 vie, qui leur a esté donnée par la nature.  
 Ils estoient tenus de faire ce qu'ils font,  
 pour se conseruer le benefice qui leur  
 auoit esté communiqué par la nature.  
 Ainsi, considerans toutes leurs œuvres,  
 ils ne peuuent dire autre chose, sinon,  
*Nous sommes seruiteurs inutiles, ce que*  
*nous estions tenus de faire nous l'auons fait.*  
 Mais les enfans de Dieu, qui luy obeis-  
 sent selon l'obeissance de foy, par l'amour  
 qu'ils luy portent sur toutes choses, ne  
 seruent pas Dieu pour se conseruer la  
 iouissance des biens de cette vie. C'est  
 en la perdant, & pour la perdre qu'ils as-  
 pirent à la gloire qui leur est promise. Ce  
 n'est pas pour l'amour d'eux-mesmes  
 qu'ils accomplissent, en humilité, les  
 œuvres de patience & de charité selon  
 l'Euangile. C'est en renonçant à eux-  
 mesmes, & en portant la croix du Sei-

gneur, que paracheuans la course de leur vocation celeste, ils tendent au but, c'est à dire, au prix qui leur est proposé en icelle. Et pourtant, encore qu'ils soient tenus de faire tout ce qu'ils font, & qu'ils le recognoissent d'autant plus, que mesme ils attribuent à la seule grace de Dieu en eux tout le bien qu'ils font : ils ne disent pas pourtant qu'ils soient seruiteurs inutiles, & n'estiment pas que Dieu ne leur sçache point gré de leurs bonnes œuvres. Mais ils sont tres-assurez, qu'eux & leurs œuvres, qui sont faites en foy en la Communion du Seigneur Iesus, sont tresagreables à Dieu. Et que leur Pere celeste, qui cognoist leurs cœurs, & qui les void en secret, leur rendra à chacun sa louange & leur salaire à lors qu'il iugera le monde vniuersel en justice. Telle est la difference que vous deuez faire, au discours de nostre Seigneur, entre ceux qui ont receu le don precieux de la foy, & qui seruent à Dieu en esprit & verité selon icelle : & entre ceux, qui, cheminans selon ce monde, seruent à Dieu charnellement, selon la loy du commandement charnel. Car tel est le but de nostre Seigneur en ces paroles

les. Et ne vous abusez point, de ce que nostre Seigneur ayant adressé le propos à ses Disciples, (qui en effect estoient appelez à la foy de laquelle ils luy demandoiēt l'augmētation) continuē aussi, en la parabole des serfs, le discours à leurs mesmes personnes, disant, *Quand vous aurez fait toutes les choses, &c.* Non que cela soit dit aux Disciples entant que fideles, mais entant que representās aussi en eux la condition de tous les hommes, qui naturellement cheminent selon la loy. Et cette façon de parler, qui transfere le suiet du propos aux personnes à qui on parle, encore que la cause ne leur en conuienne pas, est commune en tous les auteurs, & familiere en tous les propos ordinaires.

Ce que vous adioustez, *que Dieu ne nous traite point en serfs sous l'Euangile, nous ayant reuelé ses secrets, & doüez de son Esprit d'adoption*, est vne remarque en laquelle ie vous ay redressé en mes escrits precedens, sur ce que vous, comme nos autres reformateurs, faisiez Dieu, en la vocation de l'Euangile, agir enuers les vns comme Seigneur, & enuers les autres comme Pere. Dont ie vous ay repris, vous ayant remonstré que l'action de

Dieu, comme Seigneur & Maistre en la dispensation de ses biens, appartient à l'œconomie legale. Et que son action comme Pere, appartient à l'œconomie Euangelique. Vous faites bien maintenant de vous en corriger. Mais vous eussiez encore mieux fait, si vous eussiez suivi la consequence de cette verité. Car elle vous eut conduit à la cognoissance de la distinction, que ie vous ay remonstré que vous deuez faire, entre les seruiteurs selon la loy, & entre les enfans selon la foy, au discours de nostre Seigneur. Mais vous vous abusez par trop, quand pour attribuer ces paroles aux fideles, enfans de Dieu, *Nous sommes seruiteurs inutiles*, vous argumentez de la qualité de serfs qui leur est aussi donnée en l'Euangile; comme quand l'Apostre dit, que nous sommes faits serfs à iustice, pource que nous sommes acheptez par prix. Car cette façon de parler, qui nous represente la grace de Iesus Christ & son effect en nous, n'est pas employee par le Saint Esprit, pour reduire nostre condition, en la consideration de nos œuures, à la semblance de la condition & de la con-

consideration des œuvres des serfs selon la loy, en la maniere que leur condition est estimée entre les hommes, comme Iesus Christ nous la represente en la parabole. Mais ce que l'Evangile appelle les enfans de Dieu serfs de Dieu, & serfs à iustice, est dit par vne façon de parler impropre, & qui ne doit pas estre entendue outre la raison pour laquelle elle est employée. C'est à sçauoir, pour nous représenter nostre dépendance & nostre obligation enuers la grace de Dieu, qui nous a rachetez de la seruitude du diable pour nous acquérir à soy. Tellement qu'à veritablement parler, estre serfs en cette façon, c'est estre vraiment libres. Ainsi que l'Apostre nous l'exprime excellemment, Rom. 6. 16. 17. 18. *Ne sçavez vous pas bien qu'à quiconque vous vous rendez serfs pour obeir, vous estes serfs de celuy à qui vous obeissez, soit de peché à mort, ou d'obeissance à iustice. Or grâces à Dieu que vous auez esté serfs de peché, mais vous auez obei de cœur à la forme de doctrine qui vous a esté enseignée. Ayans esté affranchis du peché vous estes faits serfs de iustice.* Or pource que cette façon de parler de serfs à iustice, est impropre, &

que c'est proprement estre librés, l'Apostre adioust pour correction, *Je parle a la façon des hommes à cause de l'infirmité de vostre chair.* Ce n'est donc pas que si les fideles sont dits serfs de Dieu & de iustice, pour raison de l'obligation qu'ils ont à la grace de Dieu qui les a rachetez, & les a rendus obeissans à la verité: il faille, au demeurât, les mesurer à l'aune des seruiteurs charnels, au regard de leurs œuvres & du loyer qu'ils doiuent attendre. Car, en ce regard, leurs œuvres sôt vraiment meritoires & agreables à Dieu, qui les recompense de la couronne de iustice. Ce que ne sont nullement les œuvres des seruiteurs selon la loy, des iustitiales: au regard de la recompense de vie eternelle, qui n'a point esté promise à leurs œuvres, & à laquelle elles ne sont nullement proportionnees, pource qu'elles procedent toutes de la chair & non de l'Esprit.

Ce qui suit en vostre discours, & que la perplexité, où vous a mis l'argument du merite de Iesus Christ vray Fils de Dieu, vous fait adiouster, vous fera sentir, par la refutation de vos solutions, qui vous entraînent à une dissolution des

fondemens de l'Euangile, combien il vous importe d'estre redressé, sur ce sujet, de vostre mesprise. Voici vos paroles, *Et si vous faites ici l'objection sus-alléguée de Iesus Christ, lequel la qualité de fils n'a pas empesché de meriter par les fonctions de Mediateur, elle ne vous servira pointz pource que Iesus Christ estant Fils eternal de Dieu avec le Pere, n'estoit point obligé de prendre forme de serviteur & mourir pour nous. Outre que ce Fils est un avec le Pere sans diuision aucune de son essence d'avec celle du Pere, & pource est-il egal à son Pere; ainsi que le dit l'Apostre Philip. 2. Ce qui fait que son obeissance a esté une dispensation volontaire, de toute autre nature que celle querendent les enfans à leurs peres terriens. Car leur essence estant diuisec d'avec celle de leurs peres, ils ont pû estre inferieurs à leur autorité, & par ce moyen ont peu estre redeuables à leurs peres d'une subiection & servitude, laquelle ne peut auoir lieu entre les personnes de la Sainte Trinité, à cause de l'indiuise unité de leur essence. Les enfans donc estans ainsi inferieurs à leurs peres, ne peuvent meriter enuers eux, non plus que le suiet enuers son Roy, & l'esclaves enuers son Maître. Car plus celuy que nous*

*seruons est esté par dessus nous, plus nostre obligation enuers luy croist, & moins aussi pouuons nous meriter exuers luy. L'obeïtiō, que vous vous formez de ma part, demeure inébranlable apres voïtre response. En laquelle vous commettez diuerses fautes, contre les fondemens de la Theologie. La premiere est, en ce que parlant de l'obeïssance de Iesus Christ nostre Mediateur, lequel estant Fils a appris obeïssance par les choses qu'il a souffertes, vous luy attribuez ceste obeïssance entant qu'il est Dieu, vn avec le Pere au regard de son essence. Or l'obeïssance de la Croix, de laquelle nous parlons, est propre à Iesus Christ entant qu'il est homme. Comme aussi Iesus Christ est formellemēt nostre Mediateur entant qu'il est homme, & exerce l'office de Mediateur, non en la nature diuine, mais en la nature humaine. En quoy nos reformateurs se sont grandement mespris, quand ils ont encore formé controuerse aux Catholiques en ce suiet, & qu'ils ont reietté la doctrine de l'Eglise, c'est à dire des Apostres & de tous les Peres sur ce chef. Car les Catholiques inaintienent que Iesus Christ*

est nostre Mediateur selon la nature humaine seulement, encore qu'il ne pouuoit estre Mediateur, ny exercer cet office en sa nature humaine, si elle mesme n'estoit iointe hypostatiquement à la nature diuine. La puissance, l'autorité, la vertu, & l'excellence des œuvres qu'il a faites en l'exercice de sa charge, dependant & procedant de la dignité de sa personne, en laquelle la nature humaine est vnio à la diuine, & n'est qu'un mesme suppost. De sorte que pour raison du suppost, ou de la personne, on peut bien dire, que Iesus Christ est nostre Mediateur selon ses deux natures : mais selon la raison du principe formel de sa mediation, il n'est Mediateur qu'en la nature humaine. Et, comme ils parlent aux Escoles, le principe, qui a operé les œuvres du Mediateur, n'a pas esté la deité seule, ny l'humanité seule, mais toutes les deux en vne personne la Parole faite chair, Dieu manifesté en chair. Mais le principe par lequel les œuvres du Mediateur ont esté faites, a esté la nature humaine non la diuine. Telle est là dessus. Comme vous sçaez, la doctrine des

Catholiques. Nos reformateurs au contraire, ont défini, que l'office de Mediateur est propre à I. Christ, tant au regard de sa nature divine, que de sa nature humaine, non seulement en egard au supposit & à la personne du Mediateur, mais aussi en egard au principe formel de la mediation. Et pour ce suiet ils veulent, qu'entre les œuvres du Mediateur, les vnes appartiennent à l'humanité quant à la chose, & à la diuinité quant à l'efficace, comme de souffrir & de mourir: d'autres soient propres à la diuinité seule, comme de remettre les pechez & d'illuminer l'entendement, &c. En quoy certes ils ont mal entendu la raison de l'office de Mediateur, & se sont trop hardiment departis du sens de l'antiquité & de l'Escripture, qui est tres manifeste sur ce suiet. Car l'Apostre nous dit disertement 1. Tim. 2. *Il y a un seul Dieu, & un seul moyenneur entre Dieu & les hommes, Iesus Christ HOMME.* Et le Fils de Dieu luy-mesme nous dit Ich. 5. 27. *Que Dieu a donné tout iugement au Fils, pource qu'il est le Fils de l'homme.* Or le iugement est le principal & souverain acte de l'office de Mediateur. Il est bien certain que toute la raison de la dignité qu'a le Fils de l'homme, Iesus

Christ' nostre Seigneur, dépend de ce qu'il est le Fils eternal de Dieu, & que sa nature humaine est vnice, en vne mesme personne, à sa nature diuine. Car ainsi ce Fils de l'homme, Iesus Christ homme, né de la Vierge, conçu du S. Esprit en son ventre, est luy-mesme le Fils de Dieu, selon la parole de l'Ange à la Vierge, *Et ce qui naistra de toy saint: sera appelé Fils de Dieu.* Car le Fils de l'homme n'est pas Fils de Dieu par grace & par adoption, comme nous, qui ne le deuenons que par la communion que nous auons avec le Fils de l'homme. Le Fils de l'homme, Iesus Christ homme, est le Fils de Dieu, entant mesme qu'il est homme, pource qu'il est Fils eternal de Dieu en sa nature diuine, à laquelle la nature humaine, par laquelle il est homme, est en luy vnice hypostatiquement. C'est la raison pourquoy το γεννώμενον ἀγίου, *ce qui est né saint de la Vierge* est appelé le Fils de Dieu. Ce Fils de l'homme, né, mort, resuscité, est le Fils de Dieu. A quoy se rapporte ce que dit l'Apostre Rom. 1. 3. 4. *Que Iesus Christ le Fils de Dieu, qui a esté fait de la semence de David selon la chair, a esté déclaré Fils de Dieu en puissance, selon l'Esprit*

*de sanctification, par la resurrection des  
morts.* Car il appelle le Fils de Dieu, ce-  
luy qui a esté fait de la semence de Da-  
uid selon la chair. Et dit que luy mes-  
me a esté déclaré Fils de Dieu en  
puissance, selon l'Esprit de sanctifica-  
tion. C'est à dire, à cause que sa puis-  
sance & sa vertu s'estend à communi-  
quer l'Esprit de sainteté, par la vertu  
de sa resurrection, à tous ceux qui la  
croient. Car comme il s'est resuscité  
soy mesme par sa vertu, à cause de l'Es-  
prit de sainteté habitant en luy plei-  
nement, par la raison hypostatique de  
la nature humaine à sa nature diuine:  
aussi communique-t il l'Esprit de sain-  
teté, par la vertu de sa resurrection, à  
tous ceux qui croyans en luy, & embras-  
sans sa Croix, reçoient, en l'esperance  
de sa resurrection & de sa gloire, la  
consolation de son Esprit, qui les san-  
ctifie en cette vie & qui les resuscitera  
au dernier iour, pour les éleuer en gloi-  
re. C'est ainsi que Iesus Christ nostre  
Seigneur, qui est né de la semence de  
Dauid selon la chair, a esté déclaré Fils  
de Dieu selon l'Esprit de sanctification  
par la resurrection des morts. Car puis

que cette raison, par laquelle il s'est  
 resuscité soy mesme, & par laquelle  
 il communique l'Esprit de saincteté,  
 qui habite en luy, à tous ceux qui par  
 foy embrassent sa Croix, & qui espe-  
 rent en sa resurrection & en sa gloire,  
 est aussi la mesme vertu du Pere: il  
 s'ensuit qu'il ne peut auoir cette vertu,  
 si luy mesme n'est vn avec le Pere, en  
 forme de Dieu, égal à Dieu, son Fils  
 eternal, de mesme essence & de mesme  
 nature. C'est donc ainsi que nous co-  
 gnoissons, par l'analogie des causes de  
 nostre salut, duquel il est auteur, que  
 luy mesme, qui est le Fils de l'homme,  
 est le Fils eternal de Dieu. Dieu mani-  
 festé en chair, iustifié en Esprit. Or  
 l'analogie des causes de nostre salut, en  
 laquelle gist la cognoissance de ce  
 grand Mystere, est fondée sur la raison  
 de la mediation que Iesus Christ a exer-  
 cée en sa nature humaine, par la puis-  
 sance & vertu dependante de ce qu'elle  
 est vnie hypostatiquement à sa nature  
 diuine, qui est vne, & egale en essence,  
 avec la personne du Pere, & la personne  
 du S. Esprit, qui procede du Pere & du  
 Fils. Dont est, que le Fils de l'homme

exerçant l'office de Mediateur entant qu'il est Fils de l'homme, a la vertu de pardonner les pechez, de donner le S. Esprit, de resusciter les morts, & de communiquer la gloire, en son iugemēt, à tous ceux qui croient & qui esperent en son nom. Selon qu'il est dit, *Que le Fils de l'homme a puissance de remettre les pechez.* Matth. 9. 9. *qu'il a puissance sur toute chair. Et que les morts oyront la voix du Fils de l'homme, & ceux qui l'auront ouye viuront,* Ieh. 5. 25. Ainsi donc le principe, qui opere les œuvres de la mediation, c'est la personne de nostre Seigneur Iesus Christ Dieu & homme. Car c'est de ce que cette personne est Dieu eternal, que Iesus Christ homme a obtenu cette dignité & cette vertu, par laquelle par luy, entant qu'homme, ainsi que par le principe formel de nostre salut, les œuvres dépendantes de l'office de Mediateur ont esté faites & accomplies. Et pourtant, encore que Iesus Christ homme n'auroit peu estre nostre Mediateur si luy mesme n'auroit esté Dieu eternal : ce qu'il est toutesfois Mediateur, il l'est entant qu'homme, selon la parole del'Apotre, *un seul Mediateur de*

Dieu & des hommes à sçauoir Iesus Christ homme Et selon que toute l'Eglise l'a tousiours enseigné conformément à ces paroles de saint Augustin liu. 2. du péché originel chap. 28. *Il n'est pas Mediateur par ce en quoy il est egal au Pere; car par cela il est autant esloigné de nous que le Pere. Et comment y auroit il medieté où il y auroit tant de distance? Pourtant l'Apostre ne dit pas, Iesus Christ, mais Iesus Christ homme. Il est donc Mediateur par ce en quoy il est homme. Inferieur au Pere par ce en quoy il est plus proche de nous. Superieur à nous, par ce en quoy il est plus proche du Pere. Ce qui se peut dire ainsi plus ouuertement, inferieur au Pere, pource qu'en forme de seruiteur, Superieur à nous, pource que sans tache de péché.*

Telle estant la raison de l'office de Mediateur, que Iesus Christ exerce entant qu'il est homme, vous voyez que c'est à Iesus Christ homme qu'il faut referer l'obeissance par laquelle il nous a merités, enuers son Pere, & la remission des pechez pour nous, & la gloire eternelle pour luy & pour nous. Et par consequent vous ne pouuez plus fuir la necessité de l'argument que vous vous estes obiecté vous

mesmes de ma part, Que la qualité de Fils, en Iesus Christ, ne luy oste point la raison du merite, ains, au contraire, fait qu'en luy le merite est d'autant plus grand, que plus il est Fils. Et qu'estant Fils, il a appris obeïssance par les choses qu'il a souffertes. Et certes vous cômectez encore vne autre faute notable en la solution que vous voulez donner à cet argument. Et la faute que vous commettez, vous iette en vne contradiction entre vos propres maximes, & à la solution que vous auiez tasché de me donner cy dessus au mesme argument. Car en vous obiectant maintenant, *Que la qualité de Fils n'a pas empesché Iesus Christ de meriter par les fonctions de Mediateur*, vous respondes, que la consequence ne fait rien, pour en attribuer le merite au Fils; *d'autant qu'estant Fils eternal de Dieu, & Dieu avec le Pere, il n'estoit point obligé de prendre forme de seruiteur, & mourir pour nous.* Voyez comme vos paroles se ressemblent. Vous argumentiez, en la page precedente, que le merite n'est point où il y a obligation. Ici vous voulez que Iesus Christ comme Fils n'ait point

merité, pource qu'il n'estoit pas obligé de prendre forme de seruiteur, & de mourir pour nous. Selon vos maximes, ie conclurrois tout le contraire, Qu'il a d'autant plus merité comme Fils, en prenant forme de seruiteur, & en mourant pour nous, qu'il n'y estoit point obligé, si, comme vous voulez, celui là merite seulement, qui fait ce qu'il n'est point obligé de faire. Mais voyez encore comme vos maximes s'entrechoquent. Vous voulez que Iesus Christ soit Mediateur entant que Fils eternal, aussi bien qu'entant que Fils de l'homme. Vous reconnoissez, qu'il a merité entant que Mediateur. Il a donc, par vous mesmes, merité entant que Fils eternal, contre ce que vous sousteniez par la distinction que vous faisiez cy dessus de Christ entant que Fils, & de Christ entant que Mediateur, niant qu'il ait merité entant que Fils, mais entant que Mediateur. Or s'il est Mediateur entant que Fils, & entant que Fils eternal de Dieu, il a merité aussi entant que Fils.

Vous errez encore, (mais cet erreur vous est commun avec plusieurs autres)

quand vous estimez que l'assomption de  
 la nature humaine, en Iesus Christ, a esté  
 de prendre forme de seruiteur. I'ay re-  
 marqué cette mesprise dans le iugement  
 de Monsieur Testard. Où i'ay remon-  
 tré, que l'humanité en Iesus Christ, &  
 la forme de seruiteur sont choses diffe-  
 rentes. Car Christ est auioird'huy vray-  
 ment homme, vrayment Fils de l'hom-  
 me. Mais non en la forme de seruiteur,  
 mais en la forme du Roy de gloire. Car  
 il obtient, entant qu'homme, entant que  
 Fils de l'homme, l'empire & la gloire  
 qu'il obtenoit par deuers son Pere auant  
 que le monde fust fait. Il obtient au-  
 iourd'huy, entant qu'homme, la gloire  
 qu'il a meritée, entant qu'homme, par  
 l'obeïssance qu'il a rendue à son Pere en  
 la forme de seruiteur, en laquelle il s'est  
 humilié sous la croix qu'il a portée pour  
 l'amour de nous, & qu'il a dignement  
 supportée par la vertu de l'Esprit, qui  
 habitoit en toute plenitude en sa nature  
 humaine, à cause de son vnion person-  
 nelle à sa nature diuine & eternelle, éga-  
 le à la personne du Pere. Ainsi l'obeïf-  
 sance de Iesus Christ n'est pas, en ce  
 qu'estant Dieu il s'est fait homme,

comme

Comme vous cuidez. Ce n'est pas là  
 auoir pris forme de seruiteur, auoir  
 obei à Dieu son Pere. Nullement. Mais  
 auoir obei, auoir pris forme de serui-  
 teur : c'est en ce qu'estant homme, vni  
 personnellement à la Parole eternelle du  
 Pere, il s'est soumis à toute la misere  
 que l'homme, dont il a reuestu la nature,  
 auoit encouruë par son peché. Et que,  
 pour cette cause, il s'est rendu obeissant  
 iusques à la mort, voire la mort de la  
 croix. Or ce que le Fils de Dieu s'est  
 fait homme, n'estoit pas veritablement  
 chose à laquelle il fust obligé. Vous pou-  
 uez bien dire, pour le regard de cet acte,  
 que ç'a esté vne dispensation volontaire.  
 Mais aussi cet acte de l'assomption de  
 nostre nature, n'est pas son obeissance,  
 n'est pas l'execution de sa mediation.  
 Mais ce que le Fils de Dieu estant hom-  
 me, a pris forme de seruiteur, c'est qu'il  
 s'est soumis à nostre misere. Ce qu'il a  
 porté nostre malediction, ce qu'il a subi  
 la mort de la croix, c'est son obeissance,  
 c'est l'execution de la mediation. Et en  
 cela consiste son merite, en ce, qu'en ce  
 faisant, il a obei à la volonté du Pere,  
*Voici ie vien, il est escrit, que ie face, ô Dieu,*

*sa* volonté. Et le merite de cette obeissance ne consiste pas en ce qu'il n'y fust point obligé. Car encore qu'il ne fust point obligé de mourir, de porter nostre misere & nostre malediction pour soy-mesme, estant séparé des pecheurs : il estoit neantmoins obligé, entât qu'homme, d'obeir à la volonté du Pere, qui l'a enuoyé au monde afin de mourir pour nous. Et en ce regard il a deu soumettre sa volonté à la volonté du Pere. *Non point ce que ie veux, mais ce que tu veux, ta volonté soit faite.* Iesus Christ homme estoit obligé d'aimer le Pere sur toute chose. Il l'a aimé parfaitement. Par cét amour il a obeï à sa volonté, renonçant à sa volonté propre, pour faire celle de son Pere, qui l'auoit enuoyé au monde pour mourir pour nous. Certes l'obeissance de Iesus Christ est l'execution de sa mediation, au regard de ce qu'il a deu accomplir l'office de Mediateur ici bas. Il a rendu cette obeissance entant qu'inferieur au Pere. Il a esté inferieur au Pere entant qu'homme. Comme aussi il a esté Mediateur entant qu'homme. Et pourtant, dans les circonstances de l'obeissance de Iesus Christ à la volonté

du Pere, n'eschet point la consideration de l'vnité de son essence, & de l'egalité de sa diuinité à celle du Pere, pour dire, comme vous faites, que son obeissance a esté vne dispensation volontaire de toute autre nature que celle que rendent les enfans à leurs peres terriens. Car leur essence estant diuisee d'avec celle de leurs peres, ils ont peu estre inferieurs à leur authorité, & par ce moyen ont peu estre redeuables à leurs peres d'une suiection & seruitude, laquelle ne peut auoir lieu entre les personnes de la sainte Trinité, à cause de l'indiuise vnité de leur essence. Car, en ce discours, vous commettez encore diuerses fautes notables. La premiere est, que vous tombez manifestement dans l'erreur des Monothelites, qui attribuoient vne seule volonté à Iesus Christ homme, & à Iesus Christ Dieu: puis que vous faites qu'il a obeï au Pere en l'execution de l'office de Mediateur, entant qu'il est la secōde personne de la Trinité, vn en essence avec le Pere. Et cēt erreur est inseparable de l'opinion de ceux qui font Iesus Christ Mediateur formellement au regard de sa nature diuine & de sa nature humaine tout ensemble. Car l'obeissance de Iesus Christ

estant vn acte de sa volonté, qui s'est  
sousmise à celle du Pere: il faudra dire,  
que sa nature diuine & sa nature humaine,  
qui toutes deux auront accompli cét  
acte, n'auront eu qu'une volonté. Qui  
est l'heresie des Monothelites, faisans en  
Iesus Christ Dieu & homme vne seule  
volonté & vne seule operation. Con-  
damnée par toute l'Eglise.

L'autre erreur que vous commettez  
en disant, *que la suiection & la seruitude,*  
*qui rendroit Iesus Christ redevable à son*  
*Pere, ne peut auoir lieu entre les personnes de*  
*la sainte Trinité,* ( ce qui est certes tres  
veritable au regard de la nature diuine  
de Iesus Christ ) c'est que sans y prendre  
garde vous renuersez par ce moyen, se-  
lon vos maximes, toute l'obeissance &  
toute la mediation de Christ. Car si la  
Mediation de Christ luy appartient au  
regard de sa nature diuine ( comme  
vous voulez ) & si la suiection, qui le  
rend inferieur au Pere, ne peut auoir lieu  
entre les personnes de la sainte Trinité,  
comme il est veritable : il sera vray aussi,  
que la suiection & l'obeissance ne pour-  
ront auoir eu lieu au regard de Iesus  
Christ enuers son Pere. Car en ce cas

vous ne pouuez dire, que ç'aura esté vne dispensation volontaire. Le changement de termes n'y sert de rien. Si la seruitude, la suiettion, & l'obeissance, qui rendent le fils inferieur au pere, ne peuuent auoir lieu entre les personnes de la sainte Trinité ( comme vous le dites véritablement ) ce voile, dont vous la couurez, de dispensation volontaire, ne luy peut donner place. Car ce qui est impossible par la nature des choses, ne peut auoir lieu en quelque façon qu'on se l' imagine.

Le troisiésme erreur que vous commettez est au paralogisme que vous faites, quand vous dites, *que l'obeissance, que Iesus Christ a rendue à son Pere, est de toute autre nature que celle que rendent les enfans à leurs peres terriens.* Car il n'estoit pas question, en nostre propos, de comparer l'obeissance de Iesus Christ à Dieu son Pere, à l'obeissance des enfans à leurs peres terriens. Mais bien à l'obeissance que les fideles doiuent à Dieu, & que Dieu requiert d'eux. Or direz-vous, que l'obeissance de Iesus Christ à Dieu son Pere soit d'autre nature, que celle que les fideles doiuent à Dieu, & qu'il

requiert d'eux ? Si vous le dites, comment exhorterez vous les fideles, selon l'Euangile, à imiter Iesus Christ ? En quoy les ferez-vous conformes avec luy ? Or si vous estes obligé, par ces raisons, de recognoistre, que l'obeissance de Iesus Christ à Dieu son Pere est de mesme nature que celle que Dieu requiert de tous les fideles: recognoissez aussi, que l'obeissance que Iesus Christ a rendue à Dieu son Pere, il l'a rendue entant qu'homme, & par consequent entant que suiet & redeuable au Pere. Et par consequent, que si vous ne pouuez, sans vn insigne, ou plustost execrable blaspheme, dérober à Iesus Christ homme, Mediateur de Dieu & des hommes, l'honneur d'auoir meritè par son obeissance enuers son Pere: vous ne pouuez aussi, sans impieté, dérober à ses membres cét honneur & cette dignité, que luy-mesme leur confere par sa grace & par son Esprit autheur de leur obeissance. Ainsi mon argument demeure ferme & inébranlable contre vos solutions, cōme vn rocher cōtre l'escume des ondes, qui ne font autre chose que le blanchir & en rendre la veuë plus remarquable.

La fin, par où vous concluez, que les enfans estans donc inferieurs à leurs peres, ne peuvent meriter enuers eux, non plus que le suiet enuers son Roy, & l'esclauue enuers son maistre. Car plus celuy que nous seruons est esleué par dessus nous, plus nostre obligation enuers luy croist, & moins ainsi pouuons nous meriter enuers luy. Pour vous dire le vray, & sans flatterie, à donner à cette opinion le nom qui luy conuient, c'est la lie & le marc de l'imagination qui boult dans la teste de nos Docteurs, contre la doctrine des vrayes merites qu'ils ont ainsi reiettee sans cause, & sans en entendre la raison. Vous voulez que l'inferieur ne puisse meriter du superieur, & que le superieur seulement puisse meriter del'inferieur. Est-il possible que vous n'apperceuiez pas l'absurdité de cette maxime? Je feray que vous l'apperceuiez & que vous l'auoüiez. Vous auoüez que le merite est relatif au loyer ou à la recompense. Celuy qui merite, entre les hommes, merite recompense de celuy enuers qui il merite. Voulez-vous donc qu'il n'y ait que le superieur qui puisse meriter & receuoir recompense del'inferieur, &

qu'il n'appartienne qu'à l'inferieur de donner recompense au superieur, & non au contraire? Certainement vous reformerez, par cette doctrine, le monde vniuersel, en changeant les maistres en valets, & les valets en maistres. Tout cela vous vient de n'auoir pû comprendre la veritable raison du merite, que vous combattez sans la cognoistre. Vous l'aurez apprise de l'esclaircissement que i'en ay donné dans la conuiction de Monsieur Amyraut, depuis la page 124. iusques à 164. Et par tout ce que ie vous ay dit cy-dessus.

Or mieux informé d'oresnauant de la vraye raison des merites, qui sont merites que la seule grace de Dieu forme aux fideles, en les reformant à l'image du Seigneur Iesus, par où ils sont rendus agreables à Dieu & dignes du Royaume des cieus, pour l'esperance duquel ils exercent ici bas les œuures de patience & de charité, qui sont leurs merites: vous condamnez vous-mesmes tout ce que vous meditez en la page 22. en ces paroles, *Je m'estonne comment la Majesté de Dieu, & la profonde humilité en laquelle il nous faut estre enuers luy, ne vous*

vient deuant les yeux, que vous osiez faire  
 tenir à l'homme enuers Dieu vn langage  
 qu'on blasmeroit d'insolence & d'irreueren-  
 ce en vn suiet enuers son Prince, ou en vn  
 enfant enuers son Pere. Certes ie ne pense  
 pas que si vn de vos enfans, vous disoit  
 qu'il a meritè de vous le bien qu'il en recoit,  
 vous supportassiez son audace, & ne luy  
 remonstraissiez sa faute. Et pourtant ie ne  
 puis comprendre comment vous & les Do-  
 cteurs de l'Eglise Romaine pouuez approu-  
 uer ce discours en la bouche des hommes en-  
 uers Dieu, auquel nous sommes infiniment  
 plus redevables que les suiets à leurs Princes,  
 & les enfans à leurs peres. En toutes ces  
 paroles il n'y a rien de vray que ce que  
 vous dites, que vous ne pouuez compren-  
 dre la raison des merites que les Catholiques  
 approuuent. Mais vous auez tort de blas-  
 mer vne verité d'irreuerence & d'insol-  
 ence, pource que vous ne la pouuez  
 comprendre. Car en la comprenant vous  
 recognoistrez que ce blâme en vostre  
 bouche est vn blaspheme. La Maiesté  
 de Dieu, & l'humilité que nous luy de-  
 uons, n'empeschent point que nous n'a-  
 yons vne pleine confiance, & cōme le  
 S. Esprit parle *πληροφορίαν τὴν καὶ παρρησίαν*,

Une pleine persuasion & entière liberté de luy dire, que, par sa grace, il nous a rendus dignes & merittans de posséder l'héritage des saints. Et qu'à cet effect il nous a rendus agreables en la communion de son Fils bien aimé. En la conformité duquel, à laquelle il nous a reformez par son Saint Esprit, nous comparoisons deuant luy saints & irreprehensibles en charité. Tous les vrais fideles, tous ceux à qui Dieu fait la grace de combattre vaillamment & constamment, sous la croix de Christ, le bon combat de la foy, iusques au bout de leur course, & de la parachener dans le saint exercice de patience, de charité, & de pureté, peuvent & doivent tenir à Dieu ce langage, & dire tout haut, que selon sa iustice il leur rendra la couronne de iustice, laquelle il attendent deuoir estre rendue à leurs bonnes oeures, & à leurs merites. Où est la consolation du fidele, si vous luy ostez cette confiance? Est-il possible que vous ayez osé appeller *irreuerence*, & *insolence*, le seul & veritable sentiment de l'Esprit de Dieu en l'ame des fideles? La fumée de cette imagina-

tion de iustice imputée, vous a r'ellé  
 creué tellement les yeux, que vous ne  
 puissiez appercevoir cette belle lumie-  
 re de l'Euangile, de laquelle seule de-  
 pend la consolation, la paix, & la ioye  
 des fideles ? Non pour ce que Dieu  
 nous repute iustes encore que nous ne  
 le soyons pas en nous mesmes, comme  
 nos reformateurs se sont fait à croire.  
 Mais pour ce qu'il nous a rendus iustes,  
 saints, irreprehenfibles, & agreables  
 en la communion de son Fils bien-ai-  
 mé, pour nous rendre dignes du Roy-  
 aume pour lequel nous souffrons. Nul  
 ne cognoist la majesté de Dieu glorieu-  
 se, que celuy qui sent en soy-mesme  
 cette œuvre de sa vertu admirable, par  
 laquelle il nous reforme à l'image de  
 son Fils. Car c'est en cette œuvre, le  
 chef-d'œuvre de sa vertu, qu'il des-  
 ploye le soin de sa bonté, de sa sages-  
 se, & de sa puissance infinie. C'est l'œu-  
 re en laquelle les Anges, qui couurent  
 leurs faces de leurs aïles deuant la Ma-  
 jesté de Dieu, desirent regarder iusqu'au  
 fonds. C'est en cette œuvre, où la sa-  
 pience de Dieu, qui est diuerse en tou-  
 res sortes, s'est donnée à cognoistre aux

principautez & puiffances és choses cé-  
 lestes par l'Eglise. Par l'Eglise, di-ie,  
 qu'il a benite de toute benediction cele-  
 ste, qu'il a sanctifiée, qu'il a renduë sans  
 tache & sans macule, & irreprehensible  
 deuant luy. Nul ne peut donc cognoi-  
 stre ny admirer, comme il appartient,  
 la Maiesté de Dieu, que celuy qui pres-  
 che & qui celebre, par son sentiment &  
 son experience propre, l'effect de la gra-  
 ce de Dieu, la iustice & la sainteté in-  
 herente, son vray merite, qui seul le  
 rend capable de voir & de contempler  
 vn iour, avec rassasiement de ioye, cette  
 Maiesté glorieuse, & de participer à sa  
 gloire. Nul ne sçait encore que c'est de  
 la vraye humilité chrestienne, le deuoir  
 de laquelle oblige tous fideles à s'abaisser  
 sous le sentiment de la bonté & miséri-  
 corde ineffable de Dieu enuers eux, que  
 celuy qui en ressent l'effect, par lequel  
 Dieu l'a transporté, du royaume des te-  
 nebres, au royaume de sa merueilleuse  
 lumiere, pour le reformer à l'image de  
 son Fils, & le rendre saint, sans tache, &  
 irreprehensible deuant luy, d'vne iustice  
 & vraye sainteté inherente. Et nul  
 n'inuoque, ne recherche, & n'accepte en

vraye humilité, comme il appartient,  
 la grace de Dieu, pour viure, par la vertu  
 d'icelle, en ce present siecle, sobrement,  
 iustement & religieusement, que celuy  
 lequel abbatu sous la croix de Christ  
 mortifie par l'Esprit les faiëts du corps,  
 & se va de iour en iour renouuellant se-  
 lon l'image du nouuel homme, créé en  
 iustice & vraye saincteté. Nul n'est plus  
 humble que celuy qui sent le merite que  
 la grace de Dieu forme en luy, & qui de  
 cœur en rend graces à Dieu, auquel il en  
 attribué seul toute la louange. O trom-  
 peuse humilité ! ô fausse & peruerse  
 cognoissance de la Maieité de Dieu glo-  
 rieuse, de laquelle vous endormez la  
 conscience des hommes par vostre iu-  
 stice imputée ! Les plus meschans, à  
 vostre compte, seront les plus humbles.  
 Ceux en qui il y aura moins de iustice  
 & de saincteté, qui se feront moins ad-  
 uancez en la voye de iustice, de qui les  
 œuures seront les plus defectueuses, qui  
 chemineront le plus desordonnément,  
 & dont la vie sera plus souillée & plus  
 scandaleuse, seront les plus humbles,  
 pource qu'ils auront plus de besoin de  
s'attendre, au iour du iugement, à la

remission des pechez, & à la couuerture d'une iustice imputee. Bon Dieu ! Les preiugez ont-ils bien tant de puissance sur vostre esprit, que de le reboucher contre les raisons d'une verité si euidente ? Certainement ceux qui mesurent l'effect de la grace en eux à leur conuersation precedente, & qui trouuent par la comparaison des deux, une infinie distance de leur premier estat au subsequant, entendent, sans point de doute, la raison de l'humilité profonde en laquelle il faut que tous les vrais fideles soient tousiours enuers Dieu. Car ils disent avec l'Apostre, *Moy, qui auparauant estoye un blasphemateur, & persecuteur, & oppresseur, ay obtenu misericorde. Et la grace de nostre Seigneur en a d'autât plus abondé en moy avec foy & charité laquelle est en nostre Seigneur. Cette parole est certaine & digne entiere-ment d'estre receüe, Que Iesus Christ est venu au monde pour sauuer les pecheurs, desquels ie suis le premier. Mais pour cette cause misericorde m'a esté faite, afin qu'en moy le premier, Iesus Christ monstrast toute clemence, pour un exemplaire à ceux qui viendront à croire en luy en vie eternelle.*

Voyez l'effect de la misericorde de Dieu & de la grace de Iesus Christ en Sainct Paul ; & par cet effect, la difference de sa premiere conuersation à la suiuite. C'estoit auparauant vn infidele blasphemateur & persecuteur. Il ne celebre pas la misericorde de Dieu, & la grace de Iesus Christ, en ce qu'il s'attende d'estre couuert par elle de la iustice de Christ impute, & que l'acceptation de la remission de ses pechez le doiue rendre iuste & le faire reputer tel, deuant le iugement de Dieu, encore qu'il ne le fust pas. C'est vostre Euangile, que S. Paul ne cogneut ny n'enseigna iamais. Mais il la celebre, en ce que par elle il a esté rempli DE FOY ET DE CHARITE' ABONDAMMENT, qui est tout le contraire de ce qu'il estoit auparauant, *infidele, blasphemateur, & persecuteur*. Et qu'ayant, en cette sorte, esté rendu fidele & plein de la charité qui est en Iesus Christ, c'est à dire, accompli à toute bonne œuvre, il a esté fait patron & exemplaire des fideles à venir, selon qu'il leur dit luy mesme, *Soyez mes imitateurs, comme ie le suis de Christ*.

Dites, Monsieur, en conscience, croyez-  
 vous que l'Apostre, qui ne celebre point,  
 comme vous faites, l'effect de la miseri-  
 corde de Dieu à couvrir les defauts &  
 les imperfections de sa foy, & de sa cha-  
 rité, & de ses œuures, du manteau de la  
 iustice de Christ imputee, dont il n'y a  
 vne seule mention en tous ses escrits :  
 mais qui la celebre, comme ie fay, en ce  
 que d'infidele, blasphemateur, & perse-  
 cuteur, elle l'a rendu plein de foy & de  
 charité en telle abondance, qu'il a peu  
 estre proposé, pour patron, aux autres, de  
 l'effect admirable & diuin de cette gra-  
 ce, qui a operé en luy vn si grand change-  
 mēt: croyez vous, di ie, qu'il, n'ait point  
 entendu l'humilité profonde en laquelle  
 tous les fideles doiuent tousiours estre  
 deuant la Maiesté glorieuse de la face de  
 Dieu, par la grace duquel nous sommes  
 sauuez & rachetez de nostre vaine con-  
 uersation precedente. Gardez-vous  
 donc, au nom de Dieu, d'accuser l'A-  
 postre d'irreuerence & d'insolence, &  
 tous ceux qui parlent avec luy ce lāgage,  
 qui disent avec luy, que par la grace de  
 Dieu ils sont ce qu'ils sont, & que la gra-  
 ce de Dieu en eux n'a point esté vaine,

les

les ayant rendus capables & dignes de posséder l'heritage des saints. Mais, au contraire, fuyez & abhorrez cette doctrine, que vous avez defenduë iusques à present, qui constituë, par ces maximes, toute l'humilité Chrestienne, en vne vaine attente, que le vice & l'iniustice de ceux, qui seront demeurez dans leur souillure, sera toute couuerte, au iugement de Dieu, de la justice de Christ qui leur sera imputée, & qui les fera reputer iustes encore qu'ils ne le soient pas. Et, qui pis est, quand, pour leur rendre necessaire vne opinion si dangereuse, vous en allez cauant le precipice par la maxime qui luy adhere par necessité, & selon vos definitions, que nul ne peut suiure les preceptes de la loy de l'Esprit de vie, qui est en Iesus Christ, pour cheminer selon iceux, en telle sorte qu'il complaise à Dieu en toute bonne œuvre, qu'il soit parfait & accompli à toute bonne œuvre. Iusques là que nos reformateurs sont tombez en cét excez du mespris des bonnes œuvres des fideles, que de dire, que les meilleures qu'il facent sont tellement souillées, que si Dieu les examineroit selon sa iustice, il leur retri-

buëroit plustost punition que recom-  
 pense. Qui est arracher, du cœur des  
 fideles, la consolation, la paix & la ioye  
 que le Sainct Esprit forme en eux. Car  
 d'où vient nostre ioye, & comment est-  
 elle en nous l'œuvre du Sainct Esprit, si  
 nous ne sentons, que ce mesme Esprit a  
 rempli nos cœurs de vraye charité? Et si  
 nous ne sommes persuadez, que Dieu a  
 cette œuvre de son Sainct Esprit entie-  
 rement agreable. Et qu'elle est l'arrhe  
 de nostre esperance. Le seau dont nous  
 sommes scelez pour le iour de la re-  
 demption. La condition qui nous rend  
 capables de la gloire que nous atten-  
 dons. La robe nuptiale qui nous donne  
 entree pour estre assis au festin des nop-  
 ces de l'Agneau. La dignité qui nous  
 donne part à la possession de l'heritage  
 des enfans. Et finalement le merite des  
 bons soldats, auxquels la couronne de  
 iustice est reservee. Si cette esperance,  
 si cette confiance, assise sur les vrais me-  
 rites que la grace de Dieu forme aux  
 fideles, vous semble pleine d'irreue-  
 rence & d'insolence, vous pouuez accu-  
 ser tout l'Evangile d'estre vne doctrine  
 toute ouuerte d'irreuerence & d'info-

Ience. Mais ie suis trompé si ce blaspheme ne vous fait dresser à vous mesmes les cheueux en la teste. Quoy? vous semble il que ceulx là seuls soient vraiment humbles, qui croient que toutes les œuures des fideles sont tousiours defectueuses? Quis'attendent, qu'au Iugement de Dieu, tout ce qu'ils auront fait ne viendra point en compte. Que les fideles ne peuvent rien meriter enuers Dieu, à cause qu'ils ne peuvent faire aucunes œuures qui ne soient toutes souillées d'imperfections. Et pourtant qu'ils ont tous besoin d'estre couuerts de la iustice de Christ imputee, pour estre reputez iustes encore qu'ils ne le soient pas. Si telle est vostre foy, n'auoüez vous pas que vous recognoissez pour les humbles, ceux de qui les œuures sont plus souillées & plus defectueuses, & qui, pour cette cause, ont plus besoin d'estre couuertes de la iustice de Christ imputee? Or si c'est à ce prix que vous me voulez enseigner l'humilité, ie vous declare, que ie vous en baise humblement les mains. Et que ie fuiray de tout mon pouuoir, vne humilité si outrageuse à la pieté, & qui n'est

bonne que pour precipiter au fonds des enfers ceux qui s'endorment en sa fosse. La seule humilité chrestienne est celle, suiuant laquelle ie rengraces à Dieu, que sa misericorde m'a d'incredule, meschant, & peruers, que ie suis de ma nature & selon ma chair, en laquelle n'habite nul bien, rendu fidele, iuste, & saint, par la cognoissance & par l'affection que son Esprit m'a imprimée en l'entendement & au cœur, pour suiure ses voyes, & en icelles cheminer sous la croix de son Fils ( qui mortifie ma chair chaque iour ) dans la course de ma vocation supernelle. Dans laquelle ie recognoy, avec la mesme humilité, auoir continuellement besoin de la mesme grace qui aduance ce bon œuvre en moy, & qui le paracheuera iusques à la fin, & tant qu'elle m'ait rendu capable & digne d'empoigner la couronne qui m'est preparée. Telle est mon insolence, & telle la temerité quel'Euangile m'a apprise. Et quand vous seriez vn Ange du Ciel qui m'euangeliseriez autrement, ie vous dirois anatheme.

Mais que vous diray ie, ou que ne vous dirai ie point sur la pensèe que vous auez

de moy, de qui vous ne pensez pas, que si vn de mes enfans me disoit, qu'il a merit  de moy le bien qu'il en re oit, ie supportasse son audace, & ne luy remon trasse sa faute. Et pourtant que vous ne pouuez comprendre comment moy & les Docteurs de l'Egl. Rom. pouuons approuuer ce discours en la bouche des hommes enuers Dieu, auquel nous sommes infiniment plus re eables que les suiets   leurs Princes, & les enfans   leurs peres. Je vous respondray fort categoriquement, en vous remon trant l'affection d'vn pere enuers ses enfans mieux que vous ne l'auuez comprise, selon que vostre discours le t moigne. Et vous aduo erez que l'affection du pere, telle que ie vous la repr senteray, sera moul e sur l'exemplaire de l'affection de Dieu enuers nous. Et que, dans les circonstances de la relation du Pere au Fils, & du Fils au Pere, la vraye raison du merite se trouuera assise sur vn fondement in branlable, telle qu'est la raison des vrays m rites des fideles enuers Dieu. Le pere par l'affection naturelle de pere, employe son soin & son estude   rendre ses enfans gens de bien & honnestes gens. Pour ce faire il leur enseigne leur deuoir, il les

y adresse par corrections & chastimés, Meſlant le pardon & la ſeuérité pour encliner leurs affections à la reuerence & à l'amour qu'ils luy doiuent, & pour les faire cheminer en l'obeiſſance de ſes commandemens. Il excite en leur ame la crainte & l'eſperance, par les menaces & par les promeſſes de la peine & de la recompenſe qu'il leur propoſe. En toute cette diſpenſation paternelle, le pere n'agit que par le motif de ſa naturelle bonté. Il ne conſidere, en ce regard, aucun merite en ſon enfant. Ains pluſtoſt il paſſe, par ſa miſericorde & indulgence, par deſſus diuers defaults de deſobeiſſance, que ſon enfant commet bien ſouuent ſous la diſcipline paternelle. Mais quand le pere a fait en ſon enfant ce qu'il ſe propoſe. Lorsqu'il l'a rendu homme de bien & honneſte homme. Que l'effect de ſa diſcipline a imprimé en luy la reuerence & l'amour qu'il doit à ſon pere. Et que du mouuement de cette reuerence & de cét amour, procedent en luy toutes les œuvres par leſquelles il chemine en la complaiſance & en l'obeiſſance des volontez de ſon pere, iuſques à expoſer volontaire-

ment & gayement tout ce qu'il a au monde pour le seruice & pour l'honneur de son pere. Dites moy, Monsieur, ie vous prie, considerant l'obeissance & les œuures d'un fils ainsi morigené, seriez vous bien si fier, si inhumain, si barbare, & si denaturé, ayant vn tel fils, & receuant de luy vne telle obeissance & seruice, de dire qu'il ne merite rien? Et si vous luy faites du bien, s'il reçoit, pour son obeissance, le benefice que vous luy auez promis, ferez vous si iniuste, de dire qu'il ne le metite pas, & que ce que vous luy donnez n'est que de pure grace? Appliquez cette raison à vostre Theologie, & vous recognoistrez quelle elle est. En despouillant le fidele de son merite, vous reuestez Dieu d'affections si fieres, si inhumaines, & si denaturees, que les hommes mesmes, à qui on les attribueroit, rougiroient de honte. Ou pour mieux dire, vostre Theologie rempliroit le ciel & la terre d'ingratitude & de dureté, capable de démolir les fondemens de toute societé ciuile & religieuse. Apprenez donc encore vne fois pour toutes, Que Dieu vse de misericorde & de

grace enuers nous, quand il nous sanctifie: & de justice quand il rend la couronne au merite de la saincteté qu'il a mise en nous. Et sçachez que ce sentiment & ce langage, en la bouche de tout fidele, est si esloigné d'audace, comme vous le qualifiez: que le contraire est le plus iniurieux qui puisse estre proferé contre la sagesse & la bonté diuine. Et ie croy certes qu'ayant leu ceci, vostre conscience vous remord de ce que vous auez dit au contraire.

Vous voyez d'ici combien est friuole la consequence que vous fondez sur la maxime, que celuy qui est desia redeuable: comme le fils au pere de sa naissance & de son instruction: & le fidele à Dieu, de sa creation & de sa regeneration: ne peut plus meriter recompense pour les œuures agreables renduës à celuy à qui il est desia redeuable. Car puis que la raison du merite est fondee en la condition de l'œuure, comme il vous a esté dit cy dessus; & qu'en cette condition consiste sa proportion avec la recompense ordonnée: vous voyez que celuy qui dit, que l'œuure est bonne & agreable à Dieu, & celuy qui dit, qu'elle est meri-

toire, dit vne mesme chose. Si donc l'œuvre est bonne, si elle est agreable à celuy pour l'amour & en l'honneur de qui elle est faite, elle est meritoire de la recompense que la bonté & la iustice du legislateur en a establie. Et quand vous dites, que nous sommes redevables à Dieu de la grace par laquelle mesme nous faisons ces bonnes œuvres, vous dites tres-vray. Vous dites ce que les Catholiques disent avec vous. Vous dites ce que ie mets principalement pour le fondement de la cognoissance des vrais merites du fidele. Mais quand vous concluez de là, que les œuvres, que nous faisons par la grace, ne sont point meritoires: c'est nier, s'ensuyuant apporter aucune raison, la proposition cōtre laquelle vous disputez. Et par ce moyen presupposer pour veritable ce qu'on vous nie. Et quand vous dites page 21. *que vous aduouez que l'Apostre Tite 3. & 2. & 2. Tim. 1. exclud des causes du salut les œuvres qui ayent precedé la regeneration, pource qu'il n'y auoit que celles là qu'on pût en quelque sorte appeller meritoires, les autres estans des bien-faicts de Dieu, qui nous rendent redevables à Dieu, & non Dieu à nous: vous commettez encore vne double*

erreur. La premiere, en ce que vous confondez à vostre ordinaire ( comme ont fait tous nos reformateurs, pour donner couleur à la controuerse qu'ils ont formée, en ce suiet, contre les Catholiques ) les deux parties du salut. Car ce que l'Apostre exclud, en ces lieux, & en toutes les disputes de la iustification, nos œuures d'estre la cause du salut: c'est au regard de la premiere partie d'ice-luy. Et pourtant les œuures, dont il parle, sont les œuures de la loy, les œuures faites par le franc-arbitre, les œuures, comme vous dites, qui ont precedé la regeneration. C'est au regard de ces œuures là, qu'il dit par tout, que nous ne sommes point sauuez par nos œuures, pource que nos œuures ne preuiennent point le benefice de Dieu, qui nous sauue en nous regenerant, & en nous faisans iustes & saincts par la grace de son Fils en la communion d'ice-luy. La seconde erreur que vous commettez est en ce que vous cachez à dessein, à vostre lecteur, que lors qu'il s'agit du merite des œuures, leur merite n'est consideré qu'au regard de la seconde partie, qui est la gloire. Et pourtant

les œuvres que les Catholiques maintiennent meritoires de la gloire, sont les œuvres de la regeneration, les œuvres procedantes de la grace. Qui seules sont meritoires, pource qu'elles seules sont bonnes, agreables à Dieu, fructs, & effects de son Esprit, auteur de la sainteté & de la gloire, proportionnée l'une à l'autre en tous les fideles.

C'est par cette lumiere que vous dissiperez tous les prestigieux nuages que vous formez à vous mesmes & à vos disciples, des vains argumens que vous avez accoustumé d'induire de ce passage celebre de l'Epistre aux Ephes. chap. 2. que vous alleguez encore en la mesme page 21. *Vous estes sauvez par grace par la foy, cela non point de vous, c'est don de Dieu : non point par œuvres, afin que nul ne se glorifie. Car nous sommes l'ouvrage d'iceluy, estant creéz en Iesus Christ à bonnes œuvres que Dieu a preparées afin que nous cheminions en icelles.* Car quand l'Apôstre dit, *Vous estes sauvez*, il n'entend pas, vous obtenez la gloire éternelle, vous recevez la recompense de la couronne. Il parle de la premiere partie du salut, qui est la deliurance de la serui-

cude de peché, auquel nous estions dete-  
 nus, &, par luy, en la malediction de  
 Dieu, comme l'Apostre l'auoit exprimé  
 aux versets premiers du chapitre. *Et*  
*vous estans morts en vos fautes & pechez,*  
*ésquels autres fois vous auez cheminé suiuant*  
*le train de ce monde, selon le Prince de la*  
*puissance de l'air, qui est l'Esprit qui besoigne*  
*maintenant en efficaccés enfans de rebellion.*  
*Entre lesquels aussi nous tous auons conuer-*  
*sé autresfois és conuioitises de nostre chair,*  
*accomplissans les desirs de la chair & de nos*  
*pensées : & estions de nature enfans d'ire,*  
*comme aussi les autres. Du temps mesmes*  
*que nous estions morts en nos fautes, il nous*  
*a vivifiés ensemble avec Christ, par la grace*  
*duquel nous sommes sauuez. Vous voyez*  
*que le salut duquel il parle, est celuy que*  
*nous obtenons en cette vie par la grace*  
*de la regeneration & de la sanctification,*  
*qui nous transporte de l'estat de mort,*  
*auquel nous estions en nostre conuersa-*  
*tion precedente, en celuy d'une vie nou-*  
*uelle & spirituelle. En ce regard certes*  
*nul ne dit que nous soyons sauuez par*  
*nos œuures, mais de la pure grace de*  
*Dieu en Iesus Christ, qui est celle qui de*  
*pecheurs & souillez que nous estions,*

nous fait iustes & saincts. Nul Catholique n'a iamais dit, qu'en ce regard nous soyons sauuez par nos œuures. Leur imputer cela, c'est vne calomnie manifeste. Disputer contre eux, leur faire controuerse, comme si tel estoit leur sentiment, c'est vne supposition trop indigne d'une bonne conscience. Les definitions du Concile de Trente sont mesme diametralement contraires à telle doctrine, qui est la doctrine des Pharisiens, des Philosophes, des Pelagiens. Les Catholiques enseignent, que la seule grace de Dieu nous sauue, en nous donnant la foy operante par charité, par laquelle nous sommes rendus iustes & saincts. Et que ce don n'est preueni en nous d'aucune bonne œuvre, mais que toute bonne œuvre en prouient. Et qu'ainsi nous sommes sauuez de grace, non point par œuvre, afin que nul ne se glorifie en foy mesme de ce qu'il est saint & iuste, mais qu'il s'en glorifie en Dieu seul. Lequel nous regene & nous reforme. Duquel nous sommes l'ouurage, estās creez par luy à bonnes œuvres, qu'il a preparees afin que nous y cheminiōs. Mais nierez vous qu'à

bonnes œuvres que nous faisons par la grace de Dieu, Dieu ait luy-mesme establi la gloire pour recompense? Et qu'elles soient merites de cette gloire. Et que celuy qui fait les œuvres de l'Esprit de Dieu, qui ne chemine point selon la chair mais selon l'Esprit, mérite la couronne promise. Et qu'il doine l'esperer sur la confiance des bonnes œuvres que l'Esprit de Dieu a fait en luy, qui l'a scellé, pour le iour de la redemption, du cachet qui a imprimé en luy l'image, de la conformité à Iesus Christ. Qui-conque dispute contre cette doctrine Catholique, des merites œuvres de la grace de Dieu en nous, celuy là reuoque en doute la verité mesme que le Saint Esprit nous a reuelee en l'Euangile, & sur laquelle est appuyee toute nostre esperance, nostre consolation & nostre ioye. Si vous representiez donc, en cette naïueté, le sens de l'Apostre, & le sentimēt des Catholiques, y trouueriez vous quelque difference? Trouueriez vous, dans les paroles de l'Apostre, de quoy former debat contre les merites des fideles au regard de la gloire & de la recompense que Dieu a promise à

ceux qui ne cheminent point selon la chair mais selon l'Esprit? Je vous en fay maintenant juge. Et ie desire qu'apres l'esclaircissement, que ie vous donne de l'intention de l'Apostre en ces paroles, & de leur sens naïf, vous faciez jugement des deux Sermons derniers que Monsieur le Faucheur nous a faits sur leur explicatiõ. Direz vous pas, en vous rememorant ce qu'il y traitta, qu'il s'éloigna également du vray sentiment des Catholiques, comme de la naïue interpretation du sens de l'Apostre? Je fouhaite qu'il nous les donne au iour, afin que, par leur conference avec ce peu de lignes, où ie vous ay tracé le vif crayon de la verité que l'Apostre nous y enseigne, non vous seulement, mais le moindre de l'assistance qui l'escoutoit, soit capable de luy remonstrer, qu'au lieu des'arrester à vne solide edification des consciences, par la cognoissance de la doctrine de l'Euangile, qui est hors de toute controuerse, il s'est égaré en vne dispute qui n'a fondement qu'en la mesprise de nos reformateurs, à autoriser vne doctrine d'une pretenduë iustice imputée (de laquelle

neantmoins il n'osa seulement faire mention ) au lieu de la iustification véritable procedante de l'Esprit de Dieu, par le don d'une foy viuante & operante par charité, qui nous rend iustes, saints & irreprehensibles deuant Dieu, & dignes de la couronne, qu'il nous a promise. C'est ce que j'espere que vous & vos semblables entendrez mieux de formais que n'ont fait nos premiers reformateurs.

---

## CHAP. VII.

*Continuation de la refutation  
des raisons alleguées contre le  
merite des bonnes œuvres.*

**T**OUTE l'Escripture, & toute l'analogie de sa doctrine, renuersant cette imagination d'une iustice de Christ imputée pour faire trouuer iustes deuant Dieu ceux qui ne le sont pas en eux mesmes, établit, au contraire, comme le fondement certain

tain de la pieté, la iustification par la vraye iustice & saincteté inherente. Et par mesme moyen la dignité & le merite des bonnes œuures, que le Sainct Esprit fait en nous par la foy operante par charité, & auxquelles est promise & sera donnée la recompense de la couronne de justice. Comme vous le voyez par les raisons, par lesquelles i'ay maintenu la verité & la naiueté du sens des passages, ou que i'auois alleguez contre vous, ou que vous auez alleguez contre moy. Il me reste maintenant de vous monstrier, que les raisons que vous continuez d'employer, contre la raison des merites, sont de mesme alloy, aussi mal fondees & aussi faciles à confondre que les precedêtes.

En la page 44. vous dites, qu'il vous reste deux choses à considerer. L'une, si la saincteté, que Dieu produict en nous à raison de la mort & satisfaction de Iesus Christ, & laquelle s'exerce en vertus Chrestiennes, & en bonnes œuures, merite proprement la vie eternelle. L'autre, si elle est si parfaicte qu'elle puisse nous faire subsister deuant le Tribunal de Dieu comme irreprehensibles. Vous vous taillez ainsi l'examen de ces deux propositions, lesquelles neantmoins

ne sont, en effect, qu'une seule. Car si par nostre justice nous meritions, il est certain qu'il faut qu'elle nous rende irreprehensibles. Si elle nous rend irreprehensibles, il est certain que par elle nous meritions. Les raisons de l'une sont de necessité les raisons de l'autre. Elles ne peuvent estre diuerses. Or comme vostre discours, en toutes les parties de vostre dispute, est grandement perplex & confus, ayant dit ici, qu'il vous restoit à considerer ces deux choses, vous vous en retraçtez à l'instant, & dites, *qu'ayant traité la premiere cy dessus, vous n'adiousteriez que ce mot, à sçavoir, que l'obeissance que Iesus Christ a rendue à Dieu comme nostre pleige, n'estant pas seulement expiatoire de l'ine & malediction de Dieu, mais aussi meritoire du Royaume des Cieux, comme ayant consisté en un souverain amour de Dieu, elle ne peut nous estre reputée en expiation de nos pechez, & satisfaction pour nos peines, qu'elle ne nous soit aussi imputée comme meritoire du Royaume des Cieux.* Vous iugerez à loisir quelle satisfaction vous demeure de ce que vous en auez traité ci deuant. Pour l'heure vous ne touchez rien qui soit à propos

de la question par vous proposée. Vous vouliez examiner, si nostre sainteté merite proprement la vie eternelle: mais, par vostre ratiocination, vous conclüez, que Iesus Christ nous a merité le Royaume des Cieux par son obeissance. Dites moy, s'il vous plaît, l'obeissance de Iesus Christ, qui consiste ( comme vous dites fort bien ) en vn souuerain amour de Dieu, nous exempt e'elle de l'obligation d'aimer Dieu souuerainement? Croyez vous, que si au lieu d'aimer Dieu sur toutes choses, vous vous aimez vous mesmes sur toutes choses, vous heritez le Royaume des Cieux encore que Iesus Christ vous l'ait merité? Croyez vous que sans la sainteté vous entriez és lieux saints? Croyez vous que, si vous ne combattez deuëment, & si vous ne remportez la victoire, vous obteniez la couronne, encore que Iesus Christ vous ait merité le Royaume par son obeissance? Ie croy que vous m'aduouïerez, que l'vn est tellement sousordonné à l'autre, qu'il y a vne liaison necessaire entre les deux. Et mesme ie croy, que mieux instruit des raisons de nostre salut que vous n'auiez esté iusques à cette heure, vous con-

fesserez, que Iesus Christ nous a acquis la  
 grace de la remission de nos pechez & de  
 nostre absolutiō, afin que par cette grace  
 estans rendus iustes & saincts, obeissans à  
 la volonté de nostre Pere celeste, l'aimans  
 sur toutes choses, nous soyons rendus ca-  
 pables, dignes, & meritans la possession  
 du Royaume, lequel il nous a acquis par  
 son obeissance. Et qu'ainsi l'obeissance  
 de nostre Seigneur ne contrarie point à  
 la nostre, sa saincteté à nostre saincteté,  
 son merite à nostre merite. Et partant  
 que vous ne conclüez rien contre la rai-  
 son du merite de nostre saincteté, quand  
 vous inferez, que le merite de Iesus  
 Christ nous a acquis le Royaume des  
 cieux. Car il est vray qu'il nous l'a ac-  
 quis par son obeissance, afin que par no-  
 stre obeissance nous meritions de le pos-  
 seder. Et c'est ici que vous doit seruir la  
 distinction que ie vous ay donnée, &  
 que i'ay defenduë contre les caillations  
 de Monsieur Amyraut, du droit de  
 l'acquisition du salut, & du droit de la  
 communication ou de la possession d'i-  
 celuy.

Mais encore auez vous besoin d'estre  
 redressé en l'intelligence de la raison,

pour laquelle nostre Seigneur, par son obeissance, nous a deliurez de l'ire, & nous a merit  le Royaume. Ce que ie voy que vous n'avez point bien compris, quand vous dites, *que l'obeissance de Iesus Christ ne nous peut estre imput e en expiation de nos pechez, & satisfaction pour nos peines: qu'elle ne nous soit aussi imput e comme merit ire du Royaume des cieux.* Quand vous parlez de l'imputation de l'obeissance de Iesus Christ en expiation de nos pechez, vous entendez, qu'  cause de son obeissance nous sommes reputez iustes encore que nous ne le soyons pas, & en consequence faits heritiers, par cette mesme imputation, du Royaume celeste, comme nos reformateurs l'ont defini. Mais cette doctrine n'est pas celle du S. Esprit & des Apostres. L'obeissance de Iesus Christ nous a, par le merite de sa satisfaction   Dieu son pere, deliurez de l'ire, entant qu'  cause de luy Dieu fait misericorde & grace aux pauvres pecheurs, afin qu'ils se repentent, afin que par la foy, en la grande bont  & misericorde de Dieu, ils con oient vn amour veritable de Dieu, selon l'esperance propos e   tous ceux qui embrassent la croix de son Fils,

en laquelle nous a esté establie la cause  
 d'un si grand benefice. Ainsi le benefice  
 que Iesus Christ nous a acquis, pour ce  
 regard, par son obeissance & satisfaction  
 pour nos pechez, est commun à tous les  
 pecheurs. Desquels Dieu, à cause de son  
 Fils, ne veut point qu'aucun meure, mais  
 qu'ils se conuertissent & qu'ils vivent.  
 Mais cependant ceux à qui ce benefice  
 est acquis, ausquels il est proposé, ne sont  
 nullement iustifiez ny reputez iustes par  
 imputation, pour estre reputez heritiers  
 du Royaume. Il faut que cette grace  
 produise son effect en eux, afin qu'ils  
 soient vrayment iustes & saints, & par  
 là heritiers du Royaume celeste. Ainsi  
 l'obeissance, par laquelle Iesus Christ  
 nous a meritè le royaume des cieux, n'est  
 imputee ( pour parler avec vous ) c'est  
 à dire ne produit son fruct qu'à l'en-  
 droit de ceux, qui, en la mesme croix du  
 Seigneur, obeissent au pere comme luy,  
 d'une obeissance qui cōsiste en un souve-  
 rain amour de Dieu. Car pour regner  
 avec luy il faut que nous souffrions avec  
 luy. Pour viure avec luy, il faut que nous  
 mourions avec luy. Et pourtant le bene-  
 fice acquis par l'obeissance de Iesus

Christ en expiation des pechez, est bien proposé à plusieurs par la dispensation de la grace de Dieu, auxquels le benefice acquis, par son obeissance pour le droict du royaume des cieux, n'est point pourtant conferé. D'autant que plusieurs reiettent, par incredulité, & par le scandale de la croix, la grace de l'expiation de leurs pechez qui leur estoit presentee.

Comprenant ceci vous corrigerez d'une part, & retracterez de l'autre, ce que vous adioustez en suite: *Et si Messieurs de l'Eglise Romaine tiennent qu'à cause de l'obeissance de Iesus Christ nous sommes deschargez de satisfaire pour la peine eternelle des pechez, il faut aussi qu'à cause d'elle nous soyons deschargez d'acquies le ciel par le prix de nos œuvres. Car Dieu ne peut nous allouer cette rançon que selon la plenitude dont nostre pleige l'a payee.* Vous visez, ce me semble, en ce discours, d'une ciuilité mal reglee, & qui n'est pas vniforme. Le chef de l'Eglise Romaine c'est le Pape. Diriez vous donc, *Monsieur le Pape*, en parlant de luy? Je ne le cuide pas. Cependant si vous faites cét honneur aux membres, vous le deuez, par raison, au

chef. Nos reformateurs ne vous ont pas  
 appris ce langage. Voulez vous donc  
 estre ciuil & veritable tout ensemble ?  
 Dittes avec moy franchement, *les Catho-*  
*liques*. Or sçachez que nul Catholique  
 ne tient, qu'à cause que Iesus Christ est  
 mort pour nous, nous soyons simplemēt  
 deschargez de porter la peine eternelle  
 de nos pechez. Car plusieurs la porte-  
 ront pour lesquels Iesus Christ est mort.  
 Et ie sçay que par la grace de Dieu vous  
 croyez la mesme chose. Qui sont donc  
 ceux qui sont deschargez par l'obeissan-  
 ce de Iesus Christ, de porter la peine eter-  
 nelle de leurs pechez ? Tous ceux qui  
 sont en Iesus Christ, qui ne cheminent  
 point selon la chair mais selon l'Esprit.  
 Vous consentez encore, ie m'assure, à  
 cette verité. Mais ce qui vous trouble,  
 est, que vous confondez la raison de l'ire  
 de Dieu selon le iugement de la loy, de  
 laquelle Iesus Christ a fait, pour tous  
 hommes, la propiciation par sa mort :  
 avec la raison de l'ire de Dieu selon le ju-  
 gement eternel, de laquelle nul ne sera  
 exempt que ceux qui seront en la com-  
 munion de Iesus Christ. Ce que ie vous  
 ay assez amplement expliqué dans le iu-

gement de Monsieur Testard. Cela entendu vous concluez mal, *qu'à cause que l'obeissance de Iesus Christ nous a deschargez de la malediction, il faut aussi qu'à cause d'elle nous soyons deschargez d'acquérir le ciel par le prix de nos œuvres.* Ces termes, *acquérir le ciel*, sont ainsi couchez par vous très improprement & conformément au langage des ignorans. Certes nul Catholique ne croit ny ne dit, que le ciel luy soit acquis par le prix de ses œuvres. Il sçait & confesse, que le seul Sang & l'obeissance de Christ luy ont acquis & luy ont préparé la place qui luy sera donnée. Donnée, di-je, pour recompense, à cause qu'il aura esté lauë au Sang de Christ, c'est à dire, fait iuste & saint par la communion de son Sang & de ses souffrances, & à cause du merite de l'obeissance qu'il aura renduë, conforme à l'exemple que Christ luy a tracé en la sienne. C'est la seule obeissance de Iesus Christ qui a acquis le ciel & pour luy & pour nous. Pource que la seule obeissance du Fils de Dieu, qui s'est fait homme, pouvoit meriter, pour l'homme, la gloire qui est propre à Dieu. Et pourtant il l'a acquise pour luy entant qu'il est homme,

& ill'aacquise pour nous; pource qu'il s'est fait nostre chef en se faisant homme. Mais l'ayant acquise comme nostre chef, il faut que, pour nous la communiquer, il nous face ses membres, en nous reformant selon le nouuel homme en iustice & vraye sainteté. Ainsi c'est au prix de nostre iustice, vraye sainteté, & bonnes œuvres qu'est renduë la recompense de la gloire, que la grace de Iesus Christ nous a acquise. Gardez vous donc bien de croire ny de dire, quel'obeïssance de Christ nous a deschargez de payer le prix de l'obeïssance que nous deuons à Dieu en toutes bonnes œuvres, pour obtenir vie eternelle. Car c'est tout le contraire. Nous ne sommes point plus estroittement & plus necessairement obligez à ce deuoir, que par l'obeïssance de Iesus Christ en sa mort, qui nous est vn exemplaire proposé afin que nous en suiuiions ses traces. Et certes si vous perseveriez en vne si estrange maxime, & si vous sousteniez quel'obeïssance de Iesus Christ nous a deschargez de payer à Dieu le prix de la nostre, pour obtenir vie eternelle: vous rameneriez la plus detestable doctrine, & la plus ennemie de

toute pieté qui puisse sortir du puits de l'abyfme. Car fi vous mettez en l'esprit des hommes qu'ils font deſchargez, par l'obeiffance de Chriſt, d'obeir à Dieu, pour obtenir vie eternelle, vous arrachez de leurs cœurs tout motif de pieté. Et vous renuerſez manifeſtement toute l'œconomie que Dieu nous a propoſée en ſes promeſſes, pour nous rendre obeiffans à ſa volonté. Vous me direz que voſtre intention, & celle de nos reformateurs, a eſté bien éloignée de cette penſée. Ie le recognoy avec vous. Mais tant y a que les termes, où vous pouuez reduire voſtre intention, ſont touſiours tres-dommageables & nuifibles à la pieté. Vous voulez dire, que l'obeiffance de Ieſus Chriſt nous a deſchargez d'obeir pleinement. En ſorte qu'encore que nous n'obeiffions pas pleinement à la volonté de Dieu, nous n'heriterons pas moins la vie eternelle, pource que Ieſus Chriſt nous l'a acquiſe, & qu'elle nous eſt donnée en conſideration de ſon ſeul merite, & non de noſtre obeiffance. C'eſt la doctrine, ſur l'oreiller de laquelle, nos reformateurs ne ſçauroient ſe defendre qu'ils n'ayent endormi le vice de pluſieurs perſonnes. Leſquelles ſe repo-

sent, ainsi trompees par cette maxime en la securité que leur donne cette vaine confiance du merite de Iesus Christ tres-mal entendu. Car quoy que par les exhortations à pieté, à iustice, & à sainteté ( par où vous tâchez de les reueiller, les y induisant par l'obligation qu'ils ont d'aimer Dieu puis qu'il les a tant aimez ) vous essayez de les reueiller de cette securité, vous ne pouuez plus pourtant les y exciter comme il appartient. Le venin que vous leur auez versé est trop narcotique & trop doux à la chair. Si quelqu'un croit qu'au moment qu'il a creu ( comme vous le dittes vous-mesmes en la page 46. ) il est iustifié par l'imputation de l'obeissance de Iesus Christ, en consequence de laquelle luy sera donné le royaume des cieux, & tout aussi bien à celuy qui est moins iuste qu'à celuy qui est plus iuste : il est necessaire qu'autant soit cōtent le moins iuste que le plus iuste. Or celuy qui est content ne cherche plus rien. C'est donc en vain que vous exhortez au trauail, celuy qui croit auoir desja obtenu la fin de son labour. Celuy qui estime qu'il a la vie eternelle, pource qu'il croit que l'o-

beïssance de Iesus Christ la luy a ac-  
 quise, ne demandera plus, que ferai-  
 ie pour obtenir la vie eternelle? Ne  
 voudra plus rien faire. Faites si bien  
 que vous voudrez, les hommes ne se per-  
 suadent que par les ressorts que Dieu a  
 mis en leur nature. Nous faisons toutes  
 choses pour la fin. La fin obtenue nous  
 ne voulons plus rien faire. Ainsi vos ma-  
 ximes sont tout ensemble repugnantes à  
 la nature, & à la parole de Dieu auteur  
 de la nature. Et de faict vous estes tom-  
 bez d'un precipice en vn autre. Ensci-  
 gnant que le moins iuste herite la vie  
 eternelle, comme le plus iuste, & que l'o-  
 beïssance de Iesus Christ nous a deschar-  
 gez de rendre à Dieu vne parfaite obeïf-  
 sance, pour obtenir vie eternelle : vous  
 cauez la fosse plus auant, & adioustez,  
*qu'il n'est pas mesmes possible à celuy qui est*  
*appelle à la communion de Iesus Christ de*  
*rendre à Dieu vne pleine & parfaite obeïf-*  
*sance.* Cela estant, chacun, en l'estat qu'il  
 chemine, croit qu'il ne peut faire plus  
 qu'il fait. N'est-ce pas arracher du cœur  
 tous les veritables motifs à la pieté? Re-  
 cognoissez-le, Monsieur, & n'ayez point  
 de honte de vous retracter d'une maxi-

me si pernicieuse, *Que l'obeissance de Christ nous a deschargez de payer à Dieu le prix de la nostre pour obtenir vie eternelle.* Et certes i'espere que vous le ferez, d'autant plus, que vous y estes obligé, si vous voulez perscuierer en la recognoissance que vous auez faite de la verité, *qu'il faut, en celuy à qui Dieu donne la vie & la gloire, vne condition, qu'il le rende capable de la recevoir, & que vous recognoissiez pour cette condition, ouire la foy, la iustice & la sainteté.* Si c'est vne condition nous n'en sommes donc pas deschargez. Nous en sommes chargez au contraire. Voyez comme vos maximes s'entrefont la guerre. Et qu'il ne faut que vos propres armes pour vous défaire.

Vous auez encore besoin d'estre redressé sur ces paroles, *que Dieu ne nous peut alioüer cette rançon, que selon la plénitude dont nostre pleige l'a payée.* Nostre rançon, c'est la mort de Christ. Or nous ne sommes pas deliurez & sauuez par cette rançon, tout-chauffez & tout-vestus, comme on parle. Il faut que nous soyons deschauffez & despoüillez du viel homme. Et c'est l'effect, en nous, de nostre rançon, qui est la mort de Christ, afin

que nous soyons chauffez de la preparation de l'Euangile de paix, & reuestus du nouuel homme creé en iustice & vraye saincteté. Et, en cette sorte, nous obtenons, par nostre rançon, la premiere partie du salut dès cette vie, qui nous rend capables & dignes de la gloire en l'autre. Ne vous imaginez donc pas, que nostre rançon, qui est la mort de Christ, soit vne chose purement imputatiue. Car Christ est doublement nostre rançon, c'est à sçauoir, au regard de Dieu sous l'ire duquel nous estions detenus. L'effect de sa rançon est pour ce regard hors de nous; c'est à sçauoir, en ce qu'il a satisfait à l'ire, laquelle il a changée pour nous en la benediction du Pere celeste. Sa mort est aussi dite nostre rançon au regard du peché & de la seruitude du diable. L'effect de sa rançon est, pour ce regard, en nous. Car mourans en Christ & avec luy, nous sommes racheptez de la seruitude du peché & de la domination de Satan. Au premier égard, la rançon de Christ nous est imputée. Au second elle nous est appliquee. Or quand vous dites, *que Dieu ne nous peut alloüer cette rançon, que selon la plenitude dont nostre pleige l'a*

*payee*, vous ne considerez cette rançon qu'entant qu'elle nous est imputée. Vous constituez l'effect de la plenitude de nostre rāçon en la seule imputatiō. Mais elle consiste en application. Car ceux là seuls participent à la vie que Christ leur a acquise par sa rançon, à qui sa mort est applicquee, & qui communiquent à icelle.

Du mesme erreur procede la mauuaise application que vous faites de ces paroles de l'Apostre aux Hebricux 10. *Aussi l'Apostre dit, que nous auons liberté d'entrer és lieux saincts par le Sang de Iesus.* Il le dit voirement, mais vous n'entendez pas ce qu'il dit. Le Sang de Christ, qui nous donne liberté d'entrer aux lieux saincts, est le Sang que nous beuons au calice de benediction qui est la communion au Sang de Christ. Car, par la communion de ce Sang, nous paruenons à la participation de l'Esprit qui nous sanctifie. Or ceux là seuls qui sont sanctifiez ont la liberté d'entrer aux lieux saincts où Dieu habite. Car sans la sainteté nul ne verra Dieu Vous ne pouuiez rien alleguer de plus contraire à vostre iustice imputée.

Vostre derniere raison est vn abbregeé  
&

& comme la quinte essence du mal-entendu de nos reformateurs en cet article de controuerse. *Adioustez*, dites vous, *qu'au moment que nous sommes par la foy incorporez à Iesus Christ, nous sommes adoptez en luy, & par consequent constituez heritiers de Dieu.* Or l'heritier n'a plus à acquérir l'heritage par prix, mais seulement à ne pas dechoir par desobeissance du droit d'heredite. Si par la foy vous entendiez l'obeissance de foy, par laquelle nous embrassons la croix de Christ, pour estre enseuelis avec luy au Baptisme en sa mort, afin qu'en l'esperance de sa gloire nous resuscitions en nouueauté de vie, pour ne plus cheminer selon la chair, mais selon l'Esprit, & par l'Esprit mortifier les faicts du corps; (qui est ce que l'Apostre entend tousiours par la foy qui est operante par charité) vous diriez vray, quand vous dites, que par la foy nous sommes incorporez en Iesus Christ, & adoptez, & constituez heritiers de Dieu. Car telle est la doctrine de l'Euangile. Et, en ce cas, vostre conclusion seroit contre vous-mesme. Car encore quel'heritage nous ait esté acquis par la mort de Christ, lors que nous estions enfans d'ire;

neantmoins nous n'en pouuons estre mis en possession que lors que nous sommes faits enfans de Dieu, & que nous sommes regenez & faits nouuelles creatures, selon l'homme nouveau créé en iustice & vraye saincteté. Or ainsi la iustice procedante de la foy, estant celle qui nous fait enfans, & par consequent heritiers, est en effect le merite & la dignité à laquelle l'heritage du royaume est donné. Qui est la conclusion de la doctrine des Catholiques contre la vostre. Selon laquelle vous vous persuadez, suiuant les termes de vostre ratiocination, qu'au moment que quelqu'un croit que ses pechez luy sont remis, & que Dieu le reputé iuste par l'obeissance de Christ imputée, encore qu'il ne le soit pas: il est, par cet acte de la foy, incorporé en Christ. Il est enfant de Dieu. Il est heritier né du Royaume des cieux. Si apres cela il est plus ou moins iuste, plus ou moins sainct, plus ou moins addonné à bonnes œuures, cela ne fait rien, pour luy donner, ou pour luy oster, la qualité de membre de Christ, d'heritier du Royaume des cieux. Tellement que, selon vos maximes, il peut bien estre, que celuy, qui

n'est point encore sanctifié, soit neant-  
moins iustificié. Car, selon vous, celuy  
qui croit que par la mort de Christ ses  
pechez luy sont remis, est au mesme mo-  
ment iustificié. Mais vous ne dites pas,  
ny n'oseriez dire, qu'il soit au mesme  
moment sanctifié. Et si vous le disiez,  
la conscience de vos iustifiez vous dé-  
mentiroit. Ainsi, puis que celuy, qui, se-  
lon vostre sens, est iustificié, c'est à dire,  
reputé iuste encore qu'il ne le soit pas, à  
cause qu'il croit que par la mort de Christ  
ses pechez luy sont remis, est au mesme  
temps fait membre de Christ, enfant de  
Dieu, heritier du royaume des cieux :  
vous voyez que par vostre doctrine vous  
faites les paillards, les larrons, les meur-  
triers, &c. membres de Christ, enfans  
de Dieu, heritiers du royaume des cieux.  
Car, ou vostre maxime est fausse, ou la  
conclusion en est necessaire. Aussi ne  
pouvez-vous nier, que ceux qui sont  
couverts de tous vices les plus enor-  
mes, & qui en ont le cœur plein, ne puis-  
sent croire, que Iesus Christ est mort  
pour eux, & que par sa mort leurs pe-  
chez leurs sont remis. C'est chose ve-  
ritable selon l'Euangile, & necessaire se-

lon sa dispensation. Car c'est aux pe-  
 cheurs, voire mesmes aux plus grands,  
 que la grace de Christ est annoncee, &  
 que la remission de tous leurs pechez est  
 proposee. Si vous dites, pour reduire  
 vostre maxime à vn sens plus conforme  
 à l'Euangile, Que la remission des pechez  
 est proposee au pecheur, moyenant qu'il  
 se repente; & que nul ne doit croire que  
 ses pechez luy soient remis qu'à condi-  
 tion qu'il se repente & qu'il renonce au  
 peché : vous renuersez vous mesmes vo-  
 stre maxime, & dépecez la trame de vo-  
 stre doctrine. Car par ce moyen ses pe-  
 chez ne luy seront point remis, & il ne  
 sera point iustifié, au moment qu'il aura  
 creu, mais lors seulement qu'il aura pro-  
 duit les fruiçts conuenables à repentan-  
 ce & au renoncement de soy-mesme. Et  
 ainsi nul ne sera iustifié qu'il ne soit pre-  
 mierement sanctifié, qui est tout le con-  
 traire de vostre maxime. Nul ne sera  
 fait membre de Christ, ny enfant de  
 Dieu, ny heritier du royaume des cieux,  
 qu'apres qu'il aura esté sanctifié. Qui est  
 la doctrine Catholique, selon laquelle  
 estre iustifié & estre sanctifié est vne  
 mesme chose.

Quand vous dites, *que l'heritier n'a plus à acquerir l'heritage par prix, mais seulement à ne pas decheoir par desobeissance du droit d'heredité*, vous commettez vn manifeste paralogisme, & vous enuolepez en vne contradiction euidente. Car vous voulez que l'heritier soit fait heritier en vertu de la foy. Et en ce regard vous opposez la foy à l'obeissance des œuvres de iustice. Et soustenez que le fidele est iustificié par la foy seulement, en consequence de la iustice de Christ, qui, par le moyen de sa foy, luy est imputée : mais non par la iustice inherente qui produit les œuvres de la saincteté. Tel estant l'heritier que vous figurez, il est certain qu'il ne peut cesser d'estre heritier tant qu'il aura la foy. Et puis qu'il est heritier au moment qu'il a la foy, selon vous, auant qu'il soit sanctifié : vous ne pouuez dire, que la desobeissance aux commādemens de Dieu le face decheoir du droit d'heredité, non plus que l'obeissance aux commādemens de Dieu ne luy a pas donné ce droit, mais la foy seule. Il n'en peut dechoir que par incredulité, & non par aucune desobeissance aux commandemens de Dieu. C'est vostre ma-

nifeste paralogisme, argument de la contradiction euidente qui est entre vos maximes. N'admirez vous pas en combien de mesprises importantes nos reformateurs sont tombez sur cette matiere? N'ayans peu comprendre le sens de l'Apostre en la raison de nostre iustification par la foy, ils n'ont compris, ny que c'est que la foy. Ny quel est son effect à nous iustifier. Ny que c'est qu'estre par la foy incorporé à Christ. Ny que c'est qu'estre adopté & fait enfant de Dieu par la foy. Ny que c'est qu'estre fait par la foy heritier du royaume des cieux. Ils n'ont rapporté la foy & son effect à autre chose qu'à l'acte de croire que Iesus Christ est mort pour nous, & à s'appliquer, comme ils ont estimé, la iustice & l'obeissance de Iesus Christ qui en consequence nous soit imputee. Au lieu que la foy, par laquelle le pecheur embrasse l'assurance de la remission de ses pechez en la mort de Iesus Christ, soumet necessairement, par ce mesme acte, le fidele à la croix en laquelle Iesus Christ est mort. Afin que mourant avec luy à ce present monde, la consolation du S. Esprit, qui est communiquee au

fidele par l'esperance de la gloire, où Iesus Christ est entré par sa mort estant resuscité à vie, sanctifie son cœur. Ce qui se fait en eleuant toutes les affections à l'amour de Dieu sur toutes choses. Car par ce moyen le fidele resuscite en vne nouvelle vie, qui s'exerce en l'obeissance aux commandemens de Dieu, & qui produit, par le S. Esprit, toutes bonnes œuvres de iustice agreables à Dieu. S'ils eussent ainsi compris, que c'est que la foy & son effect, ils n'auroient pas brisé le tissu de cette belle chaine d'entre la foy & la charité, pour raison de laquelle la foy est appelée par l'Apostre, *operante par charité*, qui est la seule foy qui nous iustifie. Ils n'auroient pas, par mesme raison, distingué formellement, comme ils ont fait, la iustification de la sanctification. Ils auroient compris, que la foy ne nous iustifie pas par autre raison, ny en autre maniere, qu'elle nous sanctifie. Ils auroient compris, que la iustification n'est pas plus differente de la sanctification, que la iustice de la saincteté. Ils auroient compris, que nous sommes incorporez en Christ par la foy, en ce que, par l'obeis-

fance d'icelle, estans fousmis à la croix,  
 en laquelle Iesus Christ est mort pour  
 nous, nous mourons par elle avec luy,  
 nous luy sommes faits conformes &  
 ses membres par la communion de ses  
 afflictions, pour estre rendus participans  
 de la vertu de sa resurrection, & de la  
 consolation de son Esprit, afin d'aspirer  
 tousiours aux choses celestes, & de che-  
 miner comme bourgeois des cieux en la  
 terre. Ils auroient compris que nous  
 sommes faits enfans de Dieu par la foy,  
 pource que par l'acte de son obeïssance,  
 qui nous fousmet à la croix du Seigneur,  
 receuans la forme de ses membres, nous  
 sommes animez par son Esprit, qui nous  
 regenere par l'esperance viue de l'herita-  
 ge celeste qui nous est reserué és cieux.  
 Ils auroient compris, que nous sommes  
 faits par la foy heritiers du Royaume des  
 cieux, pource qu'estans par la foy faits,  
 en cette maniere, enfans de Dieu, non  
 engendrez de la chair & du sang, & de la  
 volonté de l'homme, mais par le Sainct  
 Esprit sous la croix de Iesus Christ, qui  
 mortifie nostre chair & toutes nos volon-  
 tez, nous reuestons la volonté sainte  
 que son Esprit nous donne, pour com-

plaire à Dieu, & luy obeir en toute bonne œuvre de patience & de charité, par laquelle estans sanctifiez nous sommes rendus capables & dignes de posseder la couronne de gloire incorruptible, qui ne se peut contaminer ny flestrir. C'est ainsi qu'il falloit entendre la raison de la foy & de son effet à nous incorporer en Christ, à nous rendre enfans de Dieu, à nous faire heritiers du Royaume des cieux. Si nos reformateurs eussent, en cette maniere, compris l'analogie des raisons de nostre salut en la croix de Christ, comme elle nous est declarée en l'Evangile, ils ne se fussent iamais departis de la doctrine catholique de la iustification & des merites du fidele. Ils n'eussent iamais formé vne controuerse si mal fondee. Ils n'eussent iamais introduit ce nouveau dogme d'une iustification par vne iustice imputee, qui fait reputer le pecheur iuste encore qu'il ne le soit pas en foy mesme. Ils n'eussent iamais, pour l'appuyer, establi des maximes si alienes de la verité de l'Evangile, comme sont celles qu'ont fait naistre, dessous leur plume, les consequences de ce dogme. Qu'au moment que le pecheur a creu, que ses pechez luy

„ sont remis, Dieu le reputé iuste encore  
 „ qu'il ne le soit pas en soy mesme. Que  
 „ la iustice & la saincteté inherente ne sont  
 „ pas celles pour lesquelles Dieu reputé le  
 „ fidele iuste, mais la seule iustice de Christ  
 „ imputée. Que la couronne de iustice &  
 „ l'heritage du royaume des cieux ne sont  
 „ pas donnez au fidele pour la iustice & la  
 „ saincteté que l'Esprit de Dieu ait formé  
 „ en luy, mais pour la seule iustice de  
 „ Christ qui luy soit imputée. Que nul  
 „ fidele ne peut estre iuste & sainct selon la  
 „ perfection de iustice & de saincteté que  
 „ l'Euangile luy recommande. Que toutes  
 „ les meilleures œuures des fideles sont  
 „ souillées & pleines de defauts & de man-  
 „ quemens. Que nonobstant quelque de-  
 „ faut & manquement, que le fidele ressen-  
 „ te en soy mesme, de la iustice & de la  
 „ saincteté que l'Euangile requiert de luy,  
 „ il doit estre assuré qu'il est enfant de  
 „ Dieu, & qu'il heritera la vie eternelle,  
 „ pource qu'il croit que ses pechez luy sont  
 „ remis. Que cette assurance est le fon-  
 „ dement de la consolation, de la paix, &  
 „ de la ioye des fideles. De toutes lesquel-  
 „ les maximes vous ne sçauriez trouuer la  
 „ moindre preuue dans l'Escripture, ny en

paroles expressees ny en consequence  
 qu'on en puisse déduire. Mais les oppo-  
 sées y sont expressement & formelle-  
 ment contenuës. Car qui n'a appris dans  
 l'Escripture, que la consolation, la paix &  
 la ioye des fideles est l'œuvre du Saint  
 Esprit, qui respand la charité en leurs  
 cœurs ? Qui n'a appris dans l'Escripture,  
 Que tous ceux qui sont iustifiez par la  
 foy ont paix ? Qui ne sçait donc inferer  
 de là, que nul n'est iustifié que celuy en  
 qui l'Esprit a versé sa paix par l'effusion  
 de la charité dans son cœur. Et par con-  
 sequent que la sanctification, qui consi-  
 ste en ce que nos cœurs soient pleins de  
 l'amour de Dieu, n'est point formelle-  
 ment differente de la iustification. Et  
 qu'ainsi, pour estre iustifié, il faut que  
 la iustice & la sainteté, consistante en la  
 parfaite charité, qui est l'accomplisse-  
 ment de la loy, soit accomplie en nous.  
 Au nom de Dieu, Monsieur, donnez  
 gloire à la verité de l'Evangile, que nos  
 reformateurs ont fait profession de choi-  
 sir pour fondement de leur dessein, en la  
 réformation qu'ils ont entreprise. Je  
 sçai que cette verité fait vne vehemente  
 impression à vostre conscience. *Placito-*

*ne etiam pugnabis amori.* Ne contristez point l'Esprit de Dieu. Aduoüez franchement la mesprise de nos reformateurs. Departez vous de leurs maximes mal establies. Rangez vous à celles que les Catholiques ont retenues, comme l'Eglise les a receuës de la bouche & de la plume des Apostres. Entrez, par cette porte, avec moy, dans la voye de la reünion avec eux. Seruez d'exemple, en vn si saint & si necessaire dessein, au troupeau que Dieu vous a commis. Si vous desirez de cœur la vraye & vniuerselle reformation de l'Eglise, c'est le seul moyen de l'obtenir. La vraye reformation consiste en la pratique de la pieté, de la charité, de la iustice, de la sainteté, des vertus chrestiennes, & de toutes les bonnes ceuures agreables à Dieu, qu'il nous a preparees en la communion de la croix & de l'Esprit de son Fils, afin que nous y cheminions. Nous ne pouuons en auoir l'impression en l'ame, pour la pratiquer en nostre vie, qu'en suiuant cette doctrine de la verité que ie vous remonstre. Cessez donc de la combattre. Soufmettez vous à son obéissance. Rompez la trame de tous

les argumens contentieux qui vous ont fait iusques ici débattre, avec perplexité & mal-entendu, les maximes que les Catholiques, c'est à dire, toute l'Eglise depuis les Apostres iusques à nostre reformation, en ont définie & retenue. Donnez lieu à ce que, par nostre consentement & par vne recognoissance ingenuë, que nous ferons de cette verité, seule victorieuse sur tous nos sentimens, & sur tous nos interests : son intelligence & son amour fructifie également en l'esprit de tous les peuples, non moins dans la communion catholique, que dâs la nostre. Iusques à ce qu'il plaise à Dieu nous augmenter la grace, qu'ayant dissipé les nuages qui nous fillent les yeux sur les autres controuerses, comme sur celle ci, nous puissions paruenir à vne reünion entiere, & à vne reformation accom-  
plic.

## CHAP. VIII.

*Consideration des tesmoignages  
des anciens, pour recognoistre  
leur sentiment touchant les  
vrais merites du fidele.*

**P**OUR ne rien omettre de tout ce qui vous peut oster les empeschemens à ce consentement ingenu de la verité, ie considereray encore avec vous ce que vous alleguez pour me faire voir, comme vous dittes, combien ie me messpren en la creance des anciens. Certes i'admire vn peu en vous cette confidence, que vous osiez mettre en auant la creance des anciens, comme conforme aux definitions de nos reformateurs, ou diuerse de celles des Catholiques. Ie dirois à vn autre que vous, qui voudroit entrer avec moy en cette lice, que cette hardiesse l'accuseroit de n'auoir iamais leu les Peres. A vous, qui les auez leus, ie vous aduoue que

ie ne ſçay que dire, pour le reſpect que  
 ie veux rendre à voſtre ingenuité. Je  
 louë neantmoins voſtre prudence en  
 l'eſtat de la queſtion ſur lequel vous ap-  
 pellez les Peres à teſmoins. Car vous  
 vous eſtes bien gardé de les appeller  
 à garants ſur la maxime, Que toute  
 noſtre iuſtice conſiſte en la remiſſion  
 des pechez : ou que nous ſommes re-  
 putéz iuſtes par la iuſtice de Chriſt im-  
 putée, encore que nous ne le ſoyons pas  
 en nous meſmes : ou, que les bonnes  
 œuures des fideles, qui procedent de  
 la iuſtice que l'Eſprit de Dieu forme  
 en eux, ne ſoient point merites de la  
 gloire qui leur eſt donnée pour re-  
 compenſe : ou que ces bonnes œuures  
 ne peuuent auoir le nom de merites,  
 à cauſe qu'elles ſont toutes fouillees &  
 pleines de defauts & de manquemens.  
 car c'eſt ſur ces theſes que la contro-  
 uerſe s'agit entre les Catholiques &  
 nous. En conſcience pourriez-vous biẽ  
 produire, de quelques Peres, des temoi-  
 gnages conformes à ce que vous enſei-  
 gnez là deſſus, contraire à ce qu'en-  
 ſeignent les Catholiques. Vous ſça-  
 nez trop mieux que vous ne le pouuez.

c'est pourquoy omettant le vray estat de la question, vous egarez l'esprit de vostre lecteur en vne dispute qui n'a nul veritable fondement, ny en ce que les Catholiques disent, ny en ce que ie di avec eux. Car voici comme vous raisonnez, pour me redresser en la mesprise que ie commets, à vostre dire, sur la creance des Anciens. *Quand vous voulez monstrer, dites vous, que la remuneration des merites ne contreuient point à la grace, & alleguez pour toute raison, que les Peres disent, que les merites promeuuent de la grace & sont dons de Dieu, vous n'alleguez qu'une partie de leur creance, & omettez ce qui contient la nostre, & qui bien consideré ne laisse entre eux & nous sinon la difference du mot, c'est à sçauoir, que cette remuneration ne se fait pas pour la valeur & condignité de l'œuvre, mais par la bonté & misericorde de Dieu, tant en ce qu'il a promis de remunerer les bonnes œuvres des fideles, qu'en ce qu'il pardonne les pechez & manquemens qui se trouuent en leur obeissance. Si ie n'allegue qu'une partie de la creance des Anciens, & si i'omet l'autre, le vice que ie commets, en ce cas,*

n'est

n'est pas vne mesprise, mais vne fausseté digne de reproche. Or ie vous défie de rapporter aucun endroit de mes escrits, où i'aye représenté à demi la créace des Anciens, soit en alleguant leurs témoignages, soit en l'explicquant par mes paroles. Si ie suis coupable de ce crime, faites vostre deuoir de m'en conuaincre. Cependant vous confessez, que les Peres disent, que les merites prouiennent de la grace, & sont dons de Dieu. Ie vous demande donc, pourquoy ne le confessez vous pas avec eux? Pourquoy ne reconnoissez vous, avec toute l'Eglise qu'ils ont instruite, que les fideles ont des merites que la grace de Iesus Christ forme en eux? Et qu'à ces merites, qui sont leurs bonnes œuvres, Dieu donne la remuneration de la gloire. Car vous auouez maintenant, que quand i'allegue ceci des Peres, ie rapporte vne partie de leur créance. En quelle autorité vous estes vous departis de cette partie de leur créance? Pour quelle cause l'auiez vous reiettee? Est elle erronnee, scandaleuse, iniurieuse à la grace de Dieu, contraire à sa parole? Si elle l'est, comment dites vous que la difference

d'entre eux & vous n'est que du mot ? Si elle ne l'est point, pour quelle raison la condamnez vous ? De quel droit auez vous fait, pour ce regard, controuerſe avec les Catholiques, qui ont retenu cette creance ? Je croy qu'en la perplexité de répondre à ces questions, vous vous trouuez pris dans vos propres filets. Mais de quel iugement encore auez vous peu eſcrire, *que n'alleguant qu'une partie de la creance des Anciens, j'omet ce qui contient la vostre ?* Croyez vous donc, qu'ils ayent soufflé d'une meſme bouche le froid & le chaud, qu'ils ayent meſlé le faux avec le vray, les tenebres avec la lumiere ? Qu'ils ayent enſeigné que les bonnes œuvres des fideles, que le S. Eſprit forme en eux, ſont merites de la gloire eternelle, ce que vous reiettez en la doctrine des Catholiques : & que tout enſemble ils ayent creu avec vous, que la gloire eternelle n'eſt donnee au fidele pour aucun merite, que pour le merite de la juſtice de Chriſt qui luy eſt imputee, d'autant que les bonnes œuvres des fideles ne peuuent ny ne doiuent eſtre appellees merites, à cauſe qu'elles ſont touſiours tellement ſouillees

& meslees de tant de defauts, de m<sup>a</sup>que-  
mens & d'imperfections, qu'elles ont  
toutes besoin de pardon & de misericor-  
de, & que la recompense qui leur est  
donnee est purement gratuite. Car tel-  
le est la doctrine de nos reformateurs, &  
celle que vous mesmes taschés encore ici  
de defendre parmi diuerfes variations  
& contrarietez à vous mesmes. Car  
vous m'au<sup>e</sup>z accordé le fondement de la  
doctrine des Catholiques & de tous les  
anciens en cette question. C'est à sçauoir,  
que vous recognoissés que la iustice &  
la saincteté des fideles est la condition  
necessaire qui les rend capables de la  
gloire. Que si vous perseueriez constam-  
ment en cette verité & en toutes ses  
consequences, il seroit tres vray de dire,  
que vous ne differeriez plus que du mot  
touchant les merites du fidele, & qu'en  
effect vous en recognoistriez la chose.

Mais que vous dirai-je sur la creance  
que vous mesmes nous representez,  
comme estant celle des Anciens ? Sinon  
que vous n'au<sup>e</sup>z compris ny leur creance  
ny celle des Catholiques, qui n'ont dif-  
ference quelconque. Ou que vous la dis-  
simulez à dessein, & sous couleur des

termes de pardon & de misericorde qu'ils employent sur le sujet de la remuneration mesme: vous supposez à vos lecteurs, qu'ils en ayent exclus la raison du merite que les Catholiques enseignent. Pour cét effect vous la representez ainsi, *Que la remuneration ne se fait pas pour la validité & condignité de l'œuvre, mais par la bonté & misericorde de Dieu, tant en ce qu'il a promis de remunerer les bonnes œuvres des fideles, qu'en ce qu'il pardonne les pechez & manquemens qui se trouuent en leur obeïssance.* Sur quoy j'ay trois choses à vous dire. La premiere, que si vous trouuez cette proposition ainsi assortie & composée, soit en mesmes termes, soit en equivalens, en aucun ancien, ie veux bien que vous ne blasmez de n'entendre pas leur creance.

La seconde, que vous monstrez vous mesmes que vous n'entendez, ni la creance des Catholiques, ni des Anciens; quand vous supposez, que la consideration de la bonté & de la misericorde de Dieu, en la remuneration des bonnes œuvres des fideles, leur oste la qualité de merites. Selon les Anciens la bonté &

la misericorde de Dieu interuiennent en la remuneration à cause de la promesse. Dieu, par sa bonté, grace, & misericorde, leur ayât establi, acquis, procuré, & préparé, par Iesus Christ, vn si grand prix à leurs bônes œuures; & luy mesme encore, par sa grace & misericorde, les ayant erecz à bonnes œuures, pour les rendre dignes de receuoir le prix qu'il leur a promis & proposé. Si vous ignorez que telle soit la doctrine des Catholiques, comme des Anciens, vous ne sçauriez vous excuser du blasme de temerité, en ce que vous condamnez leur doctrine que vous n'entendez pas. Si vous le dissimulez, tout le monde vous accusera de fraude & de mauuaise foy en cette dispute. Or voici la definition que ie vous ay representee ci-dessus du Concile de Trente. *Et pourtant à ceux qui font de bonnes œuures iusques à la fin, & qui esperent en Dieu, il leur faut proposer la vie eternelle, & comme vne GRACE promise MISERICORDIEVSEMENT par Iesus Christ aux enfans de Dieu; & comme vn LOYER, qui, par la promesse de Dieu mesme doit estre fidelement rendu à leurs bonnes œuures & à leurs merites.*

Vous voyez donc que les Catholiques  
 veulent que la vie eternelle soit *grace &  
 misericorde*, à cause qu'elle a esté promi-  
 se de Dieu misericordieusement & par  
 grace. Comme ils veulent encore que  
 ce nom luy appartienne, pource que la  
 iustice & la saincteté des fideles, à qui  
 cette recompense est renduë, prouient  
 en eux de l'Esprit de Dieu & de sa grace,  
 comme le mesme Concile le definit en  
 ces termes, *Ainsi la propre iustice que nous  
 auons n'est point reputée comme si elle estoit  
 propre de par nous mesmes, & nous n'igno-  
 rons point ni ne reiettons la justice de Dieu.  
 Car la iustice qui est dite nostre, parce que  
 nous sommes iustifiez par elle inherente en  
 nous, elle mesme est iustice de Dieu, pource  
 que Dieu l'essand en nous par le merite de  
 Christ.* Telle est l'intention & telle est  
 la raison de tous les Anciens & des Ca-  
 tholiques aujourdhuy, quand ils ensei-  
 gnent, qu'en la remuneration interuient  
 la consideration de la bonté & miseri-  
 corde de Dieu, & que la vie eternelle  
 doit estre estimee *grace & misericorde*.  
 Et vous verrez de faict, qu'en tous les  
 lieux que vous alleguez des Anciens ce  
 qu'ils disent, ne se peut rapporter à au-  
 tres sens.

La troisieme chose que i'ay à vous dire est, què le pardon que Dieu fait aux fideles des pechez & manquemens qui se trouuent en eux, n'est pas considéré en la remuneration, comme interuenant en l'estimation des œuures qui sont remunerées, & auxquelles la recompense de iustice est rendue: qui est ce que vous estimez. Mais il est considéré comme interuenu en la cause qui a produit les bonnes œuures que Dieu remunere en eux. Vous croyez que toutes les œuures des fideles sont fouillees, & qu'en elles l'amour de soy mesme partage avec l'amour de Dieu, que l'affection de la chair y est meslee avec l'affection de l'esprit. Et pourtant qu'il faut que Dieu, au lieu de les auoir agreables, comme faites selon sa volonté & ses commandemens, vse enuers elles de pardon, & les supporte en sa misericorde. Qui est bien la plus grande ignorance qui puisse estre commise en la doctrine de l'Euangile. Car si l'œuure est bonne, elle est de l'Esprit de Dieu, la chair n'y peut auoir de part. Si elle participe de la chair, elle ne vaut rien, & ne peut estre dite bonne œuure. Car il n'y a point de com-

munition entre Christ & Belial, entre la lumiere & les tenebres. L'esprit & la chair combattent l'un contre l'autre, il n'y a iamais d'accord ny de composition entre eux. Ou la chair est maistresse & produit l'œuvre, qui en ce cas est œuvre de la chair, qui ne peut nullement plaire à Dieu. Ou l'Esprit de Dieu est maistre & produit l'œuvre, qui en ce cas est l'œuvre de l'Esprit & toute agreable à Dieu. Car, selon la parole de nostre Seigneur, *nul ne peut servir à deux maistres, il aimera l'un & hayra l'autre. Nul ne peut faire vne œuvre qui soit enſemble ſervice à Dieu, & ſervice au diable, qui plaiſe tout enſemble à Dieu & au diable, qui ſoit bonne & pleine de defauts & de manquemens, qui participe de l'amour de ſoy meſme & de l'amour de Dieu. Certes nulle œuvre telle, s'il y en auoit, ne pourroit eſtre appellee merite de la vie eternelle, mais bien merite de la condamnation eternelle. Car celui qui aime biens, pere, mere, freres, & ſœurs plus que moy, dit le meſme Seigneur, n'eſt pas digne de moy.* Ce ne peut donc eſtre à telles œuvres que Dieu rende la couronne & la recompense en ſupportant

leurs defauts & pardonnant à leurs manquemens, comme vostre Theologie vous a fait croire. Les œuvres auxquelles Dieu rend la recompense promise en sont toutes dignes, pource que l'Esprit de Dieu les a produictes, comme ie vous l'ay monstre cy dessus, depuis la page 200. iusques à la 209. Mais en la production de toute bonne œuvre le fidele a lieu de recognoistre & de celebrer la misericorde de Dieu, qui l'assiste par son S. Esprit, afin de surmonter, en la mortification de la croix de son Fils, la chair qui ne produiroit en luy que tout mal. Or l'effect de nostre mortification dépend de la remission des pechez que Iesus Christ nous a acquise en sa croix. Tellement que le fidele ne peut celebrer ses bonnes œuvres & ses merites, qu'il ne se rememore, en mesme temps, & qu'il ne celebre la grace du pardon & de la remission des pechez que Dieu luy a donnee par le merite de Iesus Christ, afin qu'à luy seul soit renduë toute la gloire du bien qui est en nous. C'est ainsi que la remission des pechez interuient en la consideration de nos bonnes œuvres, & de la recom-

penſe qui leur ſera renduë au dernier iour. Mais nullement, comme vous allez vous figurant, pour pardonner au manquement de ceux, qui, au lieu de vaincre, auront defailli dans le combat, qui, au lieu d'accomplir les œuvres du Seigneur en patience & en charité, auront accompli les deſirs de leur chair. Enſeigner aux hommes vne telle miſericorde de Dieu au dernier iour, c'eſt renuerſer la grace ſalutaire de l'Euangile, qui conſiſte toute à nous induire de viure en ce preſent ſiecle ſobrement, iuſtement & religieusement, pour obtenir la vie eternelle pour la fin de nos œuvres. Certainement vous attachez, par voſtre doctrine & par ſes conſequences, le plus dangereux oreiller ſous la teſte des pecheurs, où ſe puiſſe endormir la nonchalance de leur vice. Et apres cela vous ne ſouffrirez pas que ie vous aduertisse & vous reprenne d'vne ſi manifeſte & ſi pernicioſe ignorance de l'Euangile.

Ces choſes ainſi explicquées vous recognoiſtrez par les propres textes que vous alleguez, que la creance des Anciens eſt en tout conforme à la do-

ctrine des Catholiques, & qu'elle n'a rien de commun à vos sentimens en ce que vous differez des Catholiques. Voici le premier passage que vous alleguez de Gregoire premier sur le septiesme pseaume pœnitentiel. *Fai moy oïr dès le matin ta misericorde qui est eternelle. Car la misericorde de Dieu est d'eternité en eternité sur ceux qui le craignent. Que si cette felicité là des Saints est misericorde, & ne s'acquiert pas par merites, où sera ce qui est escrit, Tu rendras à chacun selon ses œuvres? S'il est rendu selon les œuvres, comment estime-t-on qu'il y ait misericorde? Ces paroles (où vous pensez voir quelque ombre de vostre sentiment) ne contiennent pas vne definition de la verité, mais le doute d'une question. De la resolution de laquelle se recueille la naiueté de son sentiment. Par l'explication duquel il nous apprend comment le merite & la misericorde se rencontrent en la consideration de la recompense de la vie eternelle. Il respond donc, *Mais autre chose est rendre selon les œuvres, & autre chose rendre à cause des œuvres mesmes. Car en ce qu'il est dit selon les œuvres, est entendue la qualité des œuvres, en sorte que**

de qui les bonnes oeuvres apparoiſtront, à celui-là ſoit faiçte la retribution de la gloire. Voyez-vous comme par ſa ſolution il coupe la gorge à voſtre dogme d'une juſtice imputée, qui couure les defauts des oeuvres des fideles pour les faire paroître dignes de la vie eternelle, encore qu'elles ne le ſoient pas de leur qualité propre. Car il prononce au contraire, que Dieu a tellement eſgard à la qualité meſme des oeuvres, qu'à ceux-là ſera retribué la gloire de qui les bonnes oeuvres apparoiſtront. C'eſt bien le rebours de vos oeuvres defectueuſes, auſquelles, au lieu de retribution, il eſt beſoin de pardon & de miſericorde. Cependant, quoy que la raiſon de la retribution ſoit la qualité des oeuvres, S. Gregoire ne veut pas, que la felicité rendue ſoit ditte acquiſe par nos oeuvres & par nos merites : mais que l'acquiſition en ſoit attribuée à la ſeule miſericorde de Dieu. Qui eſt la meſme choſe que ie vous ay remōſtrée tant de fois par la diſtinction entre l'acquiſition & la communication du ſalut. Car encore que la communication en ſoit faite à la qualité des oeuvres qui apparoiſtront bonnes, quand le feu

du iugement de Dieu les examinera? neantmoins l'acquisition n'en procede que de la bonté & misericorde de Dieu en Iesus Christ, qui a establi, par sa promesse, vn si grand & si riche loyer à l'obeissance de ses enfans, & qui surpasse infiniment, en sa condition, toute la matiere de leurs œeures. C'est ce qu'adiouste S. Gregoire aux paroles dont vous continuez l'allegation. *Car quant à cette bien-heureuse vie là, en laquelle on vit de Dieu & avec Dieu, nul labour ne luy peut estre égalé, nulles œeures ne luy peuvent estre comparées, veu, sur tout, que l'Apostre dit, que les souffrances du temps present ne sont point condignes de la gloire future, qui sera reuelée en nous.* Iugez, ie vous prie, combien vous vous trompez vous-mesmes & autrui, quand vous supposez, en ces paroles, la conformité de sentiment avec le vostre. Car S. Gregoire veut bien, à la verité, qu'il y ait disproportion entre les bonnes œeures des fideles, & entre la gloire qui leur est donnée. Mais il ne veut pas, comme vous, que cette disproportion viene de ce que leurs œeures

soient souillées & defectueuses, & qui  
 ayent besoin de pardon & de miseri-  
 corde à cause de leurs manquemens.  
 Cela est autant esloigné de son discours,  
 que la terre du ciel. Ains parlant de  
 toutes bonues œuvres, sans exception,  
 il dit expressement, *nulles œuvres ne luy*  
*peuvent estre comparées.* Ce qui est tres-  
 veritable de quelques bonnes & par-  
 faictes œuvres que les fideles facent.  
 Dont la raison est, en la matiere de  
 leurs œuvres. D'autant que la matie-  
 re en est toute des choses de cette vie,  
 & perissables. Comme aux œuvres de  
 patience, dans les souffrances des fide-  
 les, il ne s'agit que de la perte des  
 biens de ce monde, de cette chair & de  
 sa vie caducque. Et tout de mesme aux  
 œuvres de charité, où il ne s'agit aussi  
 que de donner de ces choses terrienes,  
 vn verre d'eau froide, s'il y escher. Ce  
 qui n'est rien au prix des biens du mon-  
 de à venir, de leur gloire spirituelle, &  
 de la vie eternelle, durant laquelle nous  
 possederons cette gloire. Toutesfois  
 il y-a proportion entre les œuvres &  
 la gloire, au regard de la forme de

l'obeïſſance. Pource que les fideles quittent tout ce qu'ils ont icy bas pour l'amour de Dieu, & renoncent à eux meſmes pour aimer Dieu ſur toutes choſes. Pour cette cauſe, par proportion & rapport, Dieu les eſleue ſur toutes choſes, & leur donne ſa gloire. C'eſt ce que noſtre Seigneur declare à ſes Diſciples, Luc 18, 21. *Et Pierre luy dit, Voici, nous a iours tout delaiſſé & i'a uons ſuiui. Et il leur dit, En uerité ie vous di, qu'il n'y-a pas vn qui ait delaiſſé ſa maiſon, ou parens, ou freres, ou femme, ou enfans, pour l'amour du Royaume de Dieu, qui ne recoiue beaucoup plus, en ce temps-ci, & au ſiecle à venir la vie eternelle. En tout cela vous n'y voyez ny pied ny main, comme on dit, de l'opinion de voſtre iuſtice imputée, qui doit couvrir les defauts des bonnes œuvres des fideles pour leur oſter la raiſon de merite, & pour donner à la recompenſe le ſeul nom de miſericorde, & non de iuſtice, comme vous pretendez par vos nouuelles maximes, incogneuës à toute l'antiquité. Mais ce qu'il y-a de plus conſiderable en l'allegation que vous*

nous faites de S. Gregoire, qui coupe la gorge à vostre opinion, c'est que vous auez obmis, d'un bout à l'autre, la raison, qui suivoit en ses paroles, pour laquelle la vie eternelle doit estre appellée misericorde. Qui est la raison mesme que ie vous en ay expliquée, à sçauoir, pource qu'elle est donnée aux œuures que la seule misericorde de Dieu forme en nous. Lisez-en icy l'excellent discours de S. Gregoire, si d'auenture vous ne l'auiez encor leu, & si celuy, qui vous a fourny ce passage, vous en a dérobé la veüe à dessein, afin que ie ne vous en impute la faute. Ce sont les paroles qui suivent immediatement celles que vous auez alleguées. *On peut aussi bien encore nommer à bon droit Misericorde, la gloire future, pour raison qu'elle est donnée pour recompense de ces œuures, auxquelles personne ne paruiens qu'estant preuenü par la misericorde de Dieu. D'où il est dict aux Pseaumes, Dieu est mien, sa misericorde me preuiendra. Car s'il n'eust fait les vaisseaux d'ire, vaisseaux de misericorde, une conuersation sainte n'auroit fait difference d'aucun d'avec*  
*cette*

cette masse de perdition, une iustice propre ne deliureroit personne de la peine de mort eternelle. C'est donc chose constante qu'à ceux auxquels il dōne misericordieusement en cette vie de faire de bōnes œuvres, il octroye à ceux-là plus misericordieusement d'estre remunerez du fruit multiplié au centuple en la beatitude eternelle. Cette est la grace, que l'Apostre declare deuoir estre donnée aux saints de Dieu, grace pour grace. En sorte qu'à ceux auxquels est donnée de Dieu la grace de la sanctification, à ceux là aussi pour cette raison soit donnée à l'aduenir la grace de la felicité eternelle. Si vous auez leu ces paroles dans le discours de ce grand Pape, comment m'auez vous accusé de n'alleguer qu'une partie de la creance des Peres; quand, pour monstrec, par leur autorité, que la remuneration des merites ne contreuiant point à la grace, j'allegue pour toute raison, (comme vous parlez) que les Peres disent que les merites prouiennent de la grace, & sont dons de Dieu? Voyez-vous pas que le témoin, que vous produisez, depose discrettement pour moy contre vous? Qu'il

n'appelle la vie eternelle grace , que pource qu'elle est donnée en consequence de la promesse que Dieu a faite en sa grace à l'homme pecheur , & laquelle est rendue pour recompense aux œuvres qui prouiennent de la grace ? Ce qui est la pure doctrine Catholique, que ie defen contre vous. Mais nullement, pource que Dieu pardonne aux defaux des œuvres des fidesles , & qu'il supporte misericordieusement les manquemens dont elles sont meslees, quand il les remunere, & qu'à cet effect il les couure de la iustice de Christ imputée. Qui est l'imagination que vous tafchez de defendre , & que vous feignez estre vne partie de la creance des Peres , qui n'y ont iamais pensé , mesme en songe.

Certes, Monsieur, ie ne puis assez admirer vostre confidence, que vous ayez voulu interposer ce grand Pape pour iuge du differend d'entre nous. Si vous voulez vous en rappotter à luy , nostre contestation sera bien tost vuidée, vous serez bien tost Catholique en cette partie. Tenez-vous donc ferme en ce, à

quoy v<sup>ous</sup> estes paruen<sup>u</sup>. Ne variez point. Escoutez son autorité, & vous y soufmettez. Vous apprendrez icy breuement de sa bouche toute la doctrine de l'Eglise, touchant les v<sup>ra</sup>ys merites du fidele que la grace de Dieu forme en luy. Et apres cela vous aurez ( comme i'espere ) la bouche close pour disputer iamais à l'encontre par le tesmoignage des anciens. Voicy comme il parle au liure 11. de son exposition morale; sur le chapitre 28. de Iob. chap. 25. apres auoir montré au chapitre precedant, par diuerses authoritez de l'Apostre, que la grace de Dieu ne trouue rien de bien en nous, & qu'elle y fait tout le bien qui y est. Mais il y en a quelques vns, dit-il, qui se vantent d'estre sauuez par leurs forces, & qui se glorifient d'estre rachetez par leurs merites precedens, L'assertion desquels se trouue certainement contraire à soy mesme. Pource qu'en se disant innocens, & rachetez, ils aneantissent en eux le nom mesme de redemption. Car quiconque est racheté, est deliuré sans doute de quelque captiuité. D'où est-ce donc que celuy-cy, quel qu'il puisse estre, est racheté, si auparauant il

n'a esté captif sous la coulpe. Il est donc manifeste que quiconque a ce sentiment est fort éloigné du bon sens. Car en effect, la grace d'en haut ne trouue pas le merite dans l'homme, afin qu'elle y vienne: mais elle l'y fait apres qu'elle y est venue. Et Dieu venant vers nostre cœur indigne, se le rend digne en y venant. Et fait en nostre cœur un merite qu'il remunere, luy qui n'y auoit rien trouué que ce qu'il deuoit punir. Tel est le vray merite de grace, que l'Eglise celebre, à la grande gloire de Dieu, & à la consolation de tous les fideles, par la bouche de ce grand successeur de saint Pierre. Telle est la doctrine Catholique, que vous deuez embrasser, si vous voulez estre Catholique. Et sans la confession de laquelle vous ne pouuez estre Catholique.

Le passage, qu'en secōd lieu, vous rap-  
portez de S. Basile, seruira seulemēt de  
cōuiction, que la cause que vous defen-  
dez est destituée de toute assistāce, du cō-  
sentement des anciens. Vous dites dōc,  
que sur le Ps̄aume 114. S. Basile nous pro-  
pose la conduite de Dieu enuers nous, soit  
pendant cette vie, dans les travaux, soit

apres cette vie , par le repos eternel. Et que  
 de la premiere il dit, que Dieu ioint enuers  
 nous ses compassions à ses iugemens. Et là  
 dessus , vous alleguez de luy ces paro-  
 les, que c'est plustost par l'amour qu'il nous  
 porte , que par retribution d'egalité qu'il  
 nous assiste. Je ne sçay si vous avez leu  
 le passage en l'original, mais ie sçay bien  
 que quand vous le reuerrez icy , vous  
 trouuerez qu'on ne peut rien produire  
 ny de plus éloigné, ny de plus contrai-  
 re à vostre pensèe. De plus éloigné.  
 Pource que S. Basile ne traicte point  
 pour tout du dernier iugement de  
 Dieu , où vous pretendez qu'il vsera  
 de misericorde en reputant iustes,  
 par la iustice de Christ imputée,  
 ceux qui ne l'auront pas esté en eux  
 mesmes. Et que par l'imputation de  
 la iustice de Christ, il pardonnera aux  
 defaux , & supportera les manquemens  
 de la saincteté, en ceux qui n'auront  
 point accompli les œuures de patien-  
 ce, & de charité, que l'Euangile nous  
 ordonne, & où la communion de Christ  
 nous appelle. Mais S. Basile traicte des  
iugemens desquels Dieu vse enuers nous

en la vocation de sa grace, en laquelle il dit que Dieu conioint tousiours sa misericorde avec ses iugemens. C'est en expliquant ces paroles du Prophete, *Le Seigneur est misericordieux & iuste*. Sur quoy saint Basile fait cette remarque. *L'Ecriture conioint par tout la iustice de Dieu à ses compassions, nous enseignant, que ny la misericorde de Dieu n'est point sans son iugement, ny son iugement n'est point sans sa misericorde. Mais quand il fait misericorde il depart la mesure de ses compassions selon son iugement à ceux qui en sont dignes. Et quand il iuge, il met en auant son iugement ayant egard à nostre infirmité. Nous faisant sentir sa vengeance plus tost par l'amour qu'il nous porte, que par une retribution d'egalité. Auez vous leu ce texte tout du long en l'original? Estimez-vous donc que à *u'bre* *da* signifie ici, assister, cōme vous l'auiez traduit, pour faire croire que S. Basile parle de la recompense des bonnes œuures, quand il denie la retribution d'egalité. Au lieu que à *u'bre* *da* signifie en ce lieu venger, punir, chastier, *ulcisi*, *pœnam*, *reposcere*. Comme ces mots ausquels il se*

rapporte , vous le monstrent necessai-  
 rement, *ἐπάγει τὴν κρίσιν*. Car quand Dieu  
 aduance ses iugemens sur quelqu'un,  
 cela ne s'appelle pas l'assister , mais le  
 chastier. Or S. Basile nous remonstre,  
 que les chastimens de Dieu en cette vie,  
 procedent de l'amour qu'il nous porte,  
 & qu'ils sont accompagnez de miseri-  
 corde. Mais que fait cela pour faire croi-  
 re que le iugement, par lequel Dieu ren-  
 dra , au dernier iour à chacun selon ses  
 œuvres , sera selon misericorde , & non  
 selon iustice , comme l'ont voulu nos re-  
 formateurs, & comme Monsieur Amy-  
 raut veut faire croire que vous le deuez  
 dire ? Mais j'espere que vous aurez de-  
 formais autre sentiment.

Que si ie voulois retorquer le passa-  
 ge de S. Basile contre vous , i'y trouue-  
 rois bien plus d'auantage pour la defen-  
 se des merites que vous pour le contrai-  
 re. Car vous voyez, qu'en la dispésation  
 de la misericorde de Dieu , il y adioint  
 l'effet de son iugement , pour dire qu'il  
 ne le depart *qu'à ceux qui en sont dignes*.  
 Ce qui est la façon de parler de tous les  
 Grecs, & de l'eschole d'Origene. De qui

S. Basile, entre autres, auoit puisé ses principales lectures. Car Origene, & les Grecs qui l'ont suivi, ont donné, à l'inclination du franc arbitre, quelque chose de préalable pour recevoir la grace. Et vous n'ignorez pas que S. Augustin confesse, qu'avant ses disputes contre Pelagius il auoit eu cette opinion, & l'auoit inserée dans ses escrits. Mais que depuis il s'estoit apperceu & departi de cette erreur, cōme attribuant quelque bien à l'homme qui ne soit effect de la grace. Or il est certain que les anciens ont parlé ainsi innocemment, non pour exclure la necessité de la grace, comme faisoit Pelagius. Mais seulement pour remarquer quelque difference en la disposition de ceux auxquels la dispensation de la grace est adressée avec different succez. Dequoy ie traiteray amplement en son propre lieu. Mais tant y-a que pour le sujet present, la discussion de cette question n'est point necessaire. Car ie ne recognoy, avec S. Augustin, & avec toute l'Eglise catholique, autres vrais merites que ceux que la grace de Dieu forme en nous.

Le secōd lieu que vous produisez de ce Pere, est tiré de l'Homelie sur le mesme Pscaume, en ces termes, *Le repos eternel est reserué à ceux qui ont en cette vie legitimement combattu, & il leur est rendu, non pas selon qu'il est deu à leurs oeuvres, mais selon la grace de Dieu qui donne largement, & qui est donnée à ceux qui ont esperé en luy.* Il n'y a vn seul mot de cette misericorde, qui, selon vous, en la remuneration, pardonne les defauts de ceux qui n'ont pas combattu legitiment. Mais vous y auez en termes formels, tout le contraire, *qu'à ceux-là seuls qui ont legitimement combattu en cette vie, est reserué le repos eternel.* Or ie vous demande, les soldats qui ont deuement & legitiment combattu, qui se sont portez vaillamment en la bataille, & qui ont gagné la victoire, attendent-ils, que leur recompense soit vn pardon. Et s'ils auoient fuy, s'ils auoient esté vaincus, & s'ils demandoient pardon, espereroient ils recompense? Pouuez-vous introduire vne plus manifeste confusion entre des choses diametralement opposees, Mais si vous rapportez toutes les paro-

les entieres de celieu, la contrariet  de  
 S. Basile   vostre sentiment, sera encore  
 plus manifeste. Il explique ces paroles  
 du Pseume. *Mon ame, retourne en ton  
 repos, pource que le Seigneur t'a bien fait,*  
 l  dessus, il dit, *Le bon champion accom-*  
*mode pour soy, & s'approprie le discours*  
*plein d'exhortation & de consolation,   la*  
*fa on de S. Paul, qui dit, i'ay combattu le*  
*bon combat, i'ay parachev  la course, i'ay*  
*gard  la foy. Au reste la couronne de justice*  
*m'est reserv e. C'est ce que le Prophete dit  *  
*foy-mesme, puis que tu as SUFFIS AM-*  
*MENT ACCOMPLI la carri re de cer-*  
*te vie, retourne desormais en ton repos, d'au-*  
*tant que le Seigneur t'a fait du bien. Car le*  
*repos  ternel est reserv    ceux qui ont legiti-*  
*ment combattu dans le cours de leur vie.*  
 Il ne se peut rien de plus formel pour  
 la verit , laquelle ie vous remonstre. La  
 couronne est donn e   ceux qui ont le-  
 gitimement combattu. Ceux qui com-  
 battent legitimement, sont ceux    
 qui Dieu depart sa grace. La couron-  
 ne est donn e aux vrais merites. Les  
 vrais merites sont ceux que Dieu fait  
 en nous par sa grace. N'est-ce pas le sens

que S. Basile tire du Prophete, & de S. Paul? Pourquoy refusez-vous donc de recognoistre, avec les Catholiques, & avec toute l'Eglise, ces vrais merites que la grace de Dieu fait en nous? Ouy, mais la recompense est plus grande que ce que nos œuvres meritent, & ce qui leur est deu. Soit. D'accord de la these. Les Catholiques n'en disputeront point avec vous. I'en ay expliqué le sens, & la raison cy dessus. Que fait cela dās nostre controuerse? Que fait cela pour vostre iustice imputée? Pour vostre recōpense donnée en consideration du pardon, nécessaire (selō vous) pour les mesmes œuvres qui sont recōpensees? Mais sçachez que la grace & la liberalité de Dieu, cōsidérée en la recōpense, n'est pas mesurée par l'imperfectiō des œuvres, auxquelles elle soit renduë, comme ayant besoin de pardon: mais par la condition de leur matiere qui les rend beaucoup inferieures à l'excellence de la gloire donnée.

Ainsi vous vous abusez ouuertement en tous ces lieux, quand vous en inferiez,  
*Que telle estant l'inegalité de nos œuvres à la remuneration, reste qu'elle se fasse par la*

*bonté de Dieu qui l'a promise, & par la misericorde de Dieu qui en pardonne les defauts.* Le premier membre de vostre conclusion est bien vray: mais le second est faux. Le premier est conforme à ce que les Peres disent. Le second y est contraire. Il est vray que la remuneration se fait par la bonté de Dieu qui l'a promise. Et cette bonté de Dieu se peut bien mesme appeller misericorde, pour ce qu'elle a esté promise au pecheur: mais pour le faire iuste, & pour luy rendre la recompense, quand il seroit fait iuste. Quand Dieu a promis, il ne deuoit rien. Nous estiõs indignes de tout bien. Mais quand il rend ce qu'il a promis, il rend à ceux qu'il en a fait dignes, & de qui les merites sont ses dons. C'est la doctrine des Catholiques, & de toute l'Eglise, conforme aux passages que vous alleguez de S. Augustin, & de S. Bernard. Tel est ce que vous rapportez du premier ser. 26. des paroles de l'Apostre. *Et choses que nous auons desia, loüons Dieu comme liberal donateur. Quant à celles que nous n'auons pas encore, nous l'auons pour DEBITEUR.* Car il s'est fait debiteur, nō

*en receuant quelque chose de nous, mais en  
 promettant ce qui luy a pleu. Remarquez,  
 il s'est fait debiteur, par où il vous renuoye  
 à l'origine de la promesse, & non à l'e-  
 xecution. Car au regard du premier, il  
 est certain que nous n'auions rien don-  
 né à Dieu. C'est luy qui nous donne le  
 premier. Nous l'auons pour liberal do-  
 nateur. Nos merites sont les dons. Et  
 pourtant, eu égard à l'origine de la pro-  
 messe, par laquelle il s'est fait debiteur,  
 nous ne luy auons rien donné pour l'y  
 obliger. C'est ce que S. Augustin dit en  
 cemesme lieu, peu de paroles apres. Nous  
 ne luy auons donc rien donné, nous ne pou-  
 uons en aucune façon, sous ce nom, exiger  
 rien de Dieu comme de nostre debiteur, veu  
 principalement que l'Apostre nous dit, Qui  
 luy a donné le premier, & il luy sera rendu.  
 Mais quand il s'agit de l'exécution de la  
 promesse, lors que nous attendons la  
 couronne qui doit estre rendue à nos  
 bonnes œuures, & à nos merites que  
 Dieu fait en nous par sa grace, nous  
 pouuons l'exiger de Dieu comme de no-  
 stre debiteur, selon que dit le mes-  
 me Saint Augustin en la ligne suiuar*

te, Nous pouvons donc exiger de Dieu en cette sorte, & luy dire, Ren ce que tu as promis, pource que nous auons faict ce que tu nous as commandé. Et c'est toy qui l'as faict, nous ayant aidé en nostre travail. Si vous le croyez, & si vous le confessez ainsi, vous estes Catholique. Sinon les Peres ne sont pas pour vous. Aussi peu S. Bernard que S. Augustin, de qui celuy-là est disciple perpetuel en cette doctrine. Telsmoin le passage que vous citez de luy au traitté de la grace & du franc-arbitre. *La couronne que S. Paul attend est couronne de iustice. Non de la sienne, mais de celle de Dieu.* Vous vous abusez, & vostre lecteur, si vous debitez ces termes, *non de la siene, mais de celle de Dieu*, en autre sens qu'en celuy de S. Augustin & de S. Bernard. Non de la iustice procedâte de nos propres forces, mais de celle que Dieu forme en nous. Ce qui suit est la pure doctrine Catholique, opposée à la vostre. *Car c'est chose iusie qu'il rende ce qu'il doit.* Or vous ne voulez pas que Dieu nous remunere, ny selon sa iustice, ny pource qu'il le doit. Et

pour cette raison niez-vous le mérite , que Sainct Bernard confirme par raison contraire. Demeurez en d'accord, vous n'avez plus rien de quoy vous disputiez avec les Catholiques. Car au reste tout ce que S. Bernard adiousté est hors de controverse entre nous, *Et il doit ce qu'il a promis : & cette est la iustice que l'Apostre prend, à sçavoir la promesse de Dieu.* Voila pour la premiere partie de ma conclusion fondée en la doctrine des Peres, commune à tous les Catholiques, & diametralement opposée à la seconde partie que vous en voulez inferer.

Car vous ne trouuerez en nulle part de leurs écrits , pour destruire la raison du mérite ( comme vous pretendez ) que l'inegalité de nos œuvres avec la récompense promise, consiste en ce que la misericorde de Dieu pardonne les defauts des œuvres mesmes qu'il remunere. Le lieu que vous rapportez de Sainct Augustin au liure de *Corrept. & grat.* chap. 13. dont vous pensez brauer, vous fera le procez sur le champ , & vous

fera voir vostre condamnation toute  
 escrite. Donc le nombre des Sainctz par  
 la grace de Dieu predestiné au Royaume  
 de Dieu, la perséuerance luy estant aus-  
 si donnée iusques à la fin, sera conduit  
 là tout entier, & là maintenant tres-en-  
 tier sera gardé sans fin tres-heureux,  
 ayant pour soy la misericorde de leur Sau-  
 ueur, soit lors qu'ils sont conuertis, soit  
 lors qu'ils combattent, soit lors qu'ils  
 sont couronnez. Car que la misericorde  
 de Dieu leur soit aussi lors necessaire,  
 l'Escripture sainte le tesmoigne, où le  
 saint David dit à son ame, touchant  
 le Seigneur son Dieu, qui te couronne  
 en compassion & en misericorde. L'A-  
 postre saint Iacques dit aussi, iugement  
 sans misericorde à celuy qui n'a point  
 fait misericorde: où il monstre qu'aussi  
 en ce iugement, auquel les iustes seront  
 couronnez, & les iniustes condamnéz, les  
 vns doiuent estre iugez avec misericorde,  
 les autres sans misericorde. Pour raison  
 dequoy aussi la mere des Maccabées dit  
 à son fils, à fin qu'en cette compassion-là  
 ie te recoiue avec tes peres. Car lors que le  
 iuste iuge, comme il est escrit, seerra en  
 son

*Son throsne, aucun mal ne resistera deuant  
 luy. Qui est-ce qui se glorifiera d'auoir le  
 cœur chaste? ou, qui se glorifiera d'estre  
 net de peché? Et pour cette cause la mise-  
 ricorde de Dieu est aussi necessaire là, par  
 laquelle celuy-là sera rendu heureux au-  
 quel le Seigneur n'a point imputé le pe-  
 ché, &c. C'est iusqu'où vous auez allegué  
 les paroles de S. Augustin, cachant la sui-  
 te sous vn &c. de mauuaise note. En  
 quoy vous auez doublemēt abusé vostre  
 lecteur. Premieremēt, quand vous auez  
 traduit, par laquelle celuy sera fait heu-  
 reux à qui Dieu n'imputera point les pe-  
 chez. Par où vous voulez faire croire que  
 la misericorde de Dieu aura lors lieu,  
 selon S. Augustin, en ce que la remune-  
 ration sera donnée à nos œuures en tant  
 que Dieu leur pardonnera leurs defauts.  
 Et par consequent qu'elles ne peuuent  
 estre reputées merites. Mais S. Augu-  
 stin n'a pas dit, *imputabit*, mais *imputa-  
 uit*, *n'imputera*, mais *n'a imputé*, au pas-  
 sé & non au futur. Ne voulant pas en-  
 tendre que la non-imputation du peché  
 auroit lors lieu, mais qu'elle a eu lieu en  
 cette vie à l'égard de ceux qui ont esté*

rendus saincts. Car la non-imputation du peché est la grace mesme & la misericorde, par laquelle la foy operante par charité, qui les a sanctifiez & rendus iustes, leur a esté donnée. Et pour ceste raison la gloire qui leur est rendue est apellée misericorde. Non pour oster à leur saincteté la qualité de merite, mais pour monstrier que leur merite est don de Dieu. Vous eussiez fait voir cette verité à vostre lecteur, si vous eussiez voulu continuer l'allegation des paroles de S. Augustin, qui decident toute la question d'entre nous, & que vous auez eclipsées sous vn &c. qui est la seconde faute que vous auez commise, que vous me permettez de releuer par ce supplement. *Mais alors cette mesme misericorde sera aussi donnée PAR VN IVSTE IUGEMENT, aux merites de leurs bonnes œuvres. Car lors qu'il est dit, que iugement sans misericorde sera pour celuy qui n'a point fait misericorde; il est rendu mani este qu'en ceux, en qui se trouuent les bonnes œuvres de misericordes, iugement leur est rendu en compassion. Et que par ce moyen cette misericorde mesme est*

rendue aux merites de leurs bonnes œuvres. Il n'en est pas ainsi maintenant, lors que n'ayant aucunes bonnes œuvres, mais plusieurs mauvaises precedentes, sa misericorde preuient l'homme, afin qu'il soit deliuré des mauvaises, & qu'il a faites, & qu'il auroit faites, s'il n'estoit regeneré par la grace de Dieu, & qu'il auroit souffertes eternellement, s'il n'estoit deliuré de la puissance des tenebres, & transporté au Royaume du fils bien aimé de Dieu. Toutefois pource que la vie eternelle mesme, qui pour certain est rendue comme D'EVE aux œuvres, est dite grace de Dieu par ce grand Apostre, veu que la grace n'est point reduë aux œuvres, mais donnée gratuitement, il faut, sans aucune doute, confesser que la vie eternelle est pour cette cause appellée grace, pource qu'elle est rendue à ces merites que la grace a cōferéz à l'homme. Et de fait nous l'entendons fort bien pour la grace que nous lisons en l'Euāgile, grace pour grace, c'est à dire, pour ces merites que la grace a cōferés. Ferez-vous maintenant actoire à quelqu'un, que par l'autorité de saint Augustin, & des autres Peres, vous combattez la croyance des Catholiques tou-

chant les merites que la grace de Dieu forme en nous, & que vous soustien-  
drez la vostre au contraire ? Croyez  
moy, Monsieur, cette entreprise ne vous  
reüssira pas. Et pour y paruenir, vostre  
&c. sous lequel vous cachiez cette belle  
lumiere de la naïueté de leur croyance,  
n'estoit, sous vostre plume, ny de bon-  
ne grace, ny de bonne foy.

Auons-nous quelque autre interrest  
que de cognoistre la verité, & de luy  
donner gloire ? Or pour acheuer de vous  
conduire iusques au bout de la voye de  
l'un, & pour vous obliger, Dieu aydât, à  
l'autre, ie m'en vay vous faire entendre,  
micux que vous n'avez fait iusques à  
cette heure, la raison de la perfection  
de iustice que l'Euangile requiert des  
fideles en la communion du Seigneur  
Iesus. Où vous verrez que la iustice & la  
saincteté des fideles, subsistera au iuge-  
ment de Dieu, deuant lequel ils compa-  
roistront saints, sans tache, & irrepre-  
hensibles par vne vraye iustice & sain-  
cteté inherente, & non par aucune iusti-  
ce imputée. Et ie me promets de vous  
contraindre d'auoüer, que quand vous

dites, que vous n'avez peu lire en mon  
 escrit cette proposition qu'avec estonne-  
 ment & horreur, ces paroles vous sont  
 eschappees pour n'auoir iamais enten-  
 du, en ce poinct, comme il appartient,  
 la doctrine de l'Euangile, non plus que  
 tous nos anciens reformateurs. De qui  
 la mesprise a esté en ce sujet aussi pre-  
 iudiciable à la pieté, que nuisible à l'es-  
 fect de la reformation par eux entre-  
 prise. Qui a deu estre conduite, & in-  
 stituée dans l'vñion de l'Eglise, sur les  
 fondemens de la pureté & de la vraye  
 vie Apostolique. Non commencée par  
 la diuision, occasionnée du mal-entendu  
des principales veritez de l'Euangile.

## CHAP. VIII.

*De la perfection de la iustice, & de la sainteté des fideles, selon l'Euangile, qui les rend irreprehensibles au iugement de Dieu, pour receuoir la couronne de leurs merites, œuvres de la grace de Dieu en eux.*

**L**E principal chef de mon esclarcissement amiable avec vous, tendoit à vous faire comprendre l'erreur le plus dangereux que nos reformateurs ont commis en cette controuerse, & la plus capitale mesprise qui leur a fait dènier le merite des fideles. Car la fin de tout l'Euangile estant de rendre les hommes, de pecheurs qu'ils sont naturellement, & amoureux d'eux-mesmes, & desobeissans à iustice, par consequent perdus & miserables: fideles, iustes, saints, aimans Dieu sur toutes choses, & obeis-

sans à sa volonté, pour estre bien-heureux, & pour posseder, en vie eternelle, la gloire que Dieu leur a preparée : il est certain que quiconque se fouruoye en la premiere partie, dechet de la seconde. Quiconque destourne le fidele de la iustice & vraye sainteté, à laquelle l'Euangile l'appelle: celuy-là luy fait perdre le but & la fin de la vie eternelle, que l'Euangile ne propose qu'aux fideles, iustes, & sanctifiez. C'est la raisõ qui m'a meu principalement à vouloir entrer, avec vous, en cet esclarcissement, pour vous faire comprendre les causes & les consequences de l'erreur auquel nos reformateurs sont tombez, en deniant le merite de la iustice, & des bonnes œuures des fideles. Car la principale cause de leur achoppement est venue de ce qu'ils se sont imaginez, & qui pis est, qu'ils ont decidé, comme article de la doctrine Chrestienne, qu'encore que Dieu nous donne son S Esprit, nous ne pouuons accomplir ses commandemens, ny paruenir en cette vie à aucune iustice & sainteté parfaicte qui puisse meriter la couronne. Les tenebres

ne sont pas plus contraires à la lumière que cette doctrine est contraire à l'Evangile. On ne peut introduire aucune maxime en la Religion Chrestienne, qui fasse plus de preiudice à la pieté, & qui en ruine dauantage tout l'edifice. Tant que vous prescherez aux hommes que Dieu les repoute iustes à cause qu'il leur impute la iustice de son fils. Et qu'ils auront la couronne de gloire en consideration de ce que Dieu les repoute iustes de cette iustice imputée, encore qu'ils ne le soient pas en eux mesmes. Tant que vous leur prescherez qu'ils ne peuuent paruenir en cette vie à aucune iustice & sainteté, qui soit digne de la couronne de gloire, & qui puisse subsister au iugement de Dieu, pour ce que, quoy que Dieu dōne son S. Esprit aux fideles, toutes les meilleures œuures, qu'ils font par son Esprit, sont si deffectueuses qu'elles ont toutes besoin de pardon. Tant que vous prescherez cette doctrine aux hommes, & que vous leur emplirez l'esprit de cesentimēt, vous les destournerés de la droicte voye de iustice. Vous les decouragerez de tendre à la perfection de

iustice que l'Euangile nous recomman-  
 de sur toutes choses, en leur faisant croi-  
 re que c'est chose impossible. Vous leur  
 en osterez aussi le soin & l'affection, en  
 leur persuadant, qu'encore qu'ils n'y  
 parviennent pas, ils ne lairront pas d'e-  
 stre reputez iustes par le moyen d'une  
 iustice estrangere qui leur est imputée.  
 Ainsi en les égarant de la vraye voye de  
 iustice & de saincteté, vous leur ferez  
 perdre le chemin de la vie, & de la gloire  
 eternelle. C'est le sujet pour lequel ie  
 vous ay remonstré, en mon amiable es-  
 claircissement, Que le mal de cœur, &  
 la compassion que i'ay de la mesprise de  
 nos reformateurs en cette cause, m'af-  
 fectionne avec plus d'ardeur, à deraci-  
 ner toute cette opinion de l'esprit des  
 nostres, pour leur faire cognoistre, en  
 la voye de reünion avec les Catholiques,  
 combien la contestation qu'ils ont for-  
 mée avec eux sur ce sujet mal à propos,  
 cause, par ses consequences, de retarde-  
 ment en l'aduancement de la pieté, & en  
 s'allentit l'estude au cœur de ceux qui  
 sont imbus de telle opinion de la iusti-  
 ce & de la saincteté des fideles. En suit,

te dequoy ie vous ay proposé sommairement les principales raisons qui peuuent vous faire apperceuoir l'erreur euident de vostre mesprise, les ayant deduites depuis la page 25. iusques à la 36. de l'escriit sommaire que ie vous adressay.

I'attédois de vous, M<sup>o</sup>sieur, que vous les examineriez avec ordre & ingenuité, dequoy vous vous estes entierement abstenu. Et au lieu de le faire, vous auez confondu, à dessein, ou autrement, tout l'estat de la question & de la cognoissance de la verité en laquelle ie vous auois adressé. Et pour rendre cette verité plus odieuse, & moy pareillement à vos lecteurs, *Vous me dites page 23. que vous aduouez n'auoir peu lire sans fremir en la page 29. de mon traicté, quand en definissant la saincteté laquelle ie veux s'accomplir dans le fidele en cette vie, ie dy qu'elle rend le fidele capable de soustenir le feu de la face & du iugement de Dieu. Et en la page 49. vous repetez la mesme chose, en disant, Que vous ne pouuez assez vous estonner que ie sois venu iusqu'au poinct de maintenir que nostre iustice inherente nous rende irreprehensibles & capables de souste-*

*voir le feu de la face de Dieu, & de son iugē-*  
*ment.* A quoy ie vous respon, que ie ne  
 me puis assez estonner, que vous ayez  
 leu les demonstrations sommaires que  
 ie vous en auois représentées, que vous  
 les ayez dissimulées comme vous auez  
 fait, & qu'apres cela vous me represen-  
 tiez vostre conscience, qui en est con-  
 uaincuë, pleine d'estonnement, & de  
 frenissement sur l'affirmation d'vne  
 verité, en laquelle gist le fondement de  
 l'Euangile. I'espere neantmoins que ce  
 que i'escriray icy pour la confirmation  
 obtiendra de vous, qu'ayant plus meu-  
 rement consideré toutes les circonstan-  
 ces & dependances de ce chef de doctri-  
 ne, & de l'erreur qui vous en couure  
 encore la verité, vous flechirez les ge-  
 noux deuant Dieu, pour luy deman-  
 der pardon de ce que vous l'auiez ainsi  
 combattue, & reiettee avec outrage.  
 Et luy rendrez graces de tout vostre  
 cœur, de ce que sa lumiere vous aura  
 deueloppé des tenebres qui vous enui-  
 ronnent. Je suiuray l'ordre de mon es-  
 claireissement.

## CHAP. IX.

*Inconuenient de la doctrine qui rend la iustice & la sainteté des fideles imparfaicte.*

**I**E vous auois en premier lieu touché pour inconuenient de vostre doctrine, Que ce n'est pas merueille, si ceux qui en ont imbu l'opinion, n'atteignent point en effect la perfection de iustice que l'Euangile nous recommande, & si leur iustice & sainteté est aussi imparfaite qu'ils s'en accusent. A cela vous respondes deux choses pag. 51. La premiere, *Que s'il faut venir aux exemples, on ne void pas que ceux qui croient la perfection de leur iustice, soient plus gens de bien, & plus craignans Dieu, que ceux qu'on oblige à s'humilier continuellement deuant Dieu comme pauvres pecheurs : au contraire les plus hūbles sont ceux que Dieu assiste continuellement de son Esprit. Car Dieu fait grace aux hūbles, & resiste aux orgueilleux.*

Cette responce a presque autant de vices que de periodes. Premièrement elle ne foud point l'argument qui cote l'inconuenient de vostre doctrine. Car il demeure vray, que quiconque est imbu de l'opinion qu'on ne peut paruenir à la perfection de iustice & de saincteté, ne s'estudiera iamais d'y paruenir, & par consequent n'atteindra iamais qu'à vne iustice & saincteté defectueuse. Tellement que ce n'est pas merueille, si de tous ceux, qui ont cette opinion, la saincteté est aussi imparfaicte qu'ils s'en accusent. L'argument demeure donc veritable. Vous ne le pouuez nier. Or ne pouuez-vous retorquer le semblable contre la doctrine qui enseigne que le fidele doit & peut, par l'ayde du sainct Esprit, atteindre à vne iustice, & saincteté parfaicte. Car ceux qui sont ainsi enseignez de leur deuoir, & du pouuoir que fournit la grace de l'esprit de Dieu, de qui depend toute bonne donation, & tout don parfaict: seront excitez & encouragez par là de trauailler à leur salut, avec crainte & tremblement, scachans que c'est Dieu

qui fait en eux, & le vouloir & le parfaire. Ainsi s'ils cheminent par cette voye ils y paruiendrôt. Alleguer contre cela, que ceux qui enseignent cette doctrine ne la suiuent pas, c'est, comme on parle, trourner la truye au foin, & abuser le monde. Car nous traictons icy la cause, non des hommes, mais de la verité. Il s'agit entre nous de sçauoir, quelle doctrine est celle qui fait les vrays Chrestiens, ou la Catholique, ou la vostre. Il ne s'agit pas de sçauoir si ceux qui enseignent la vraye doctrine la suiuent & la pratiquent. Ainsi vostre responce, en cette partie, procede manifestement de cholere, & non de iugement. Ne pouuant defendre vostre erreur, vous vous attaquez au vice des hōmes, dōt le reproche, s'il est vray, ne touche point la doctrine, qui est veritable & sainte. Et sur ce sujet, ie vo<sup>9</sup> diray ce que nostre Seigneur remonstroit aux Iuifs, *Les scribes & les Pharisiens sont assis en la chaire de Moyse, faites les choses qu'ils vous diront, mais n'enseignent point leurs œuures.* Or i'auois conioint vostre doctrine à l'experiance du mal qu'elle

fait en la vie de ceux qui la suivent, pour  
 ce que la cause en est de nécessité en la  
 doctrine mesme. Et toutefois i'ayois, au  
 mesme lieu, fait apologie pour les secta-  
 teurs de vostre doctrine, en qui, gra-  
 ces à Dieu, elle ne produit pas l'effect  
 pernicieux qui suit de ses consequen-  
 ces, pource que les exhortations à sain-  
 cteté, tirées de la parole de Dieu & des  
 leçons qu'elle nous donne, meilleures  
 que les consequences de vos maximes,  
 leur sont fréquemment reiterées en vos  
 exhortations. Ce qui empesche que le  
 venin de vos fausses hypotheses ne fas-  
 se son effect, cōme il feroit sans cet anti-  
 dote. Et en cela consiste le fruit de ce que  
 la parole del'Euāgile est réduite familiere  
 parmy nous. Le seul & immuable fon-  
 dement de la reformation qui a deu e-  
 stre embrassée. Et qui ne consiste point  
 aux definitions qu'il a pleu à Luther &  
 aux autres d'introduire, contre cette pa-  
 role de Dieu, par lesquelles, comme ie  
 vous l'ay remonstré au mesme lieu  
 ils ont beaucoup alteré la vertu de la  
 science de la croix, qui auroit produit  
 (en retenant la pratique de la doctrine

Catholique, par eux mal entendue) l'expérience d'une iustice & sainteté, qui seroit recogneuë pour cette iustice & sainteté parfaite en patience & en charité, à laquelle est promise la couronne & le Royaume.

L'autre vice de vostre responce est en ce que vous opposez le sentiment d'humilité au sentiment de la conscience de ceux qui enseignent, que le deuoir & le pouuoir des fideles, par la grace de Iesus Christ, est d'estre parfaits & accomplis à toute bonne œuvre. En conscience osez-vous bien faire cette iniure à l'Apostre S. Paul, de qui vous recognoissez ici les termes & les paroles, que de luy reprocher l'orgueil, & vn sentiment contraire à celuy de l'humilité Chrestienne, quand il se glorifie au Seigneur, *De sçauoir auoir disette, & de sçauoir aussi estre abundant.* C'est à dire, de sçauoir patienter en aduersité, & de sçauoir vser de continence & de charité en prosperité, en quoy la parfaite sainteté consiste, adioustant pour cet effect, *ie puis toutes choses en Christ qui me fortifie.* Imputerez-vous cette bon-  
ne &

ne & sainte confiance en la grace de Dieu, à manque d'humilité, ou à quelque orgueil ? Certes si vous le croyez ainsi, vous ne sçavez que c'est de l'humilité Chrestienne, ny de la loüange que le fidele doit rēdre à Dieu pour l'œuvre de sa grace en luy. Je vous l'ay remonstré desia diuerses fois, mais il ne vous sera point grief d'entendre repeter vne leçon si necessaire. L'humilité ne cōsiste pas au sentiment du peché habitant en nous. Autrement ceux qui seroient naturellement les plus grands pecheurs seroient estimez les plus humbles. L'humilité consiste à recognoistre la grace de Dieu enuers nous, & à luy donner gloire de tout le bien qui est en nous. Plus donc l'effect de la grace de Dieu sera grand en nous, & plus la raison de nostre humilité sera grande. Plus nous nous sentirons aduancez en la perfection de iustice & de sainteté, & plus profonde sera l'humilité, par laquelle nous en rendrons graces à Dieu, & ocelebrerons sa loüange. Voulez-vous sçauoir la mesure de la profondeur de la vraye

humilité Chrestienne? C'est la distance de la terre au ciel. Car alors est vrayement profonde l'humilité, par laquelle nous rendons graces à Dieu de son don inenarrable, quand nous nous sentons tellement rachetez & mis en liberté des liens de nostre vaine conuersation precedente, en laquelle nous cheminions, selon le train de ce monde, à tout abandon de dissolution: que nous nous sentons paruenus à vne conuersation sainte de bourgeois des Cieux, complaisans à Dieu, & le glorifiant en toutes bonnes ceuures. Tous ceux qui sont tels sont vrayemēt humbles. Le commencement de cette humilité est bien à la verité en ceux qui, comme le pauvre peager repentant, frappent leur poitrine, & demandent à Dieu, *sois propice à moy qui suis pecheur.* Mais ce n'est là que le commencement de l'humilité. Elle est bien plus profonde, lors que le pecheur rend graces à Dieu de ce qu'il a obtenu la grace de sa propitiation accomplie. Et qu'il remercie Dieu & celebre sa gloire, de ce qu'il l'a viuisié, & ressuscité, & fait

seoir ensemble avec Iesus-Christ ez lieux celestes. Voudriez-vous tenir tousiours le fidele en l'estat du commencement de la repentance, comme le peager que vous nous proposez pour modele del'humilité Chrestienne? Estimez vous donc que ceux qui sont aduancez en la perfection de iustice, & qui y sont paruenus, ayent perdu l'humilité? C'est bien mal-entendre la science de la croix. Aussi est-il vray que par vôtredoctrine de iustice imputée, & de iustification consistâte en la seule remission des pechez (qu'on ne vous peut arracher des poulmons) vous auez destruit & brisé cette belle trame del'Euangile, qui est en la doctrine de la croix. Laquelle lied'vn lien indissoluble la propitiation de Iesus-Christ, comme la cause, avec l'effect de nostre sanctification ou iustification. Selon l'imagination de vos hypotheses, vous estimez induire les pecheurs à vne grande humilité, s'ils croient que par la propitiation, que Iesus-Christ a faite pour nous en la croix, tous leurs pechez leur sont pardonnez, & qu'au mesme

instant ils sont reputez iustes deuant  
 Dieu, & capables de posseder l'herita-  
 ge de la gloire eternelle. C'est ce que  
 vous appelez la iustification. Et vous  
 voulez qu'au sentiment de cette iusti-  
 fication consiste l'humilité des fideles.  
 Mais cōme cette iustification est ima-  
 ginaire, aussi est l'humilité qui en de-  
 pend. Certes la propiciation de Iesus-  
 Christ a bien acquis la remission des  
 pechez à tous les pecheurs. Et cette  
 grace est offerte à tous. Mais, pour pro-  
 duire son efficace, il faut qu'elle agisse  
 selon les conditions de la forme en la-  
 quelle elle est presentee, suiuant la de-  
 termination du bon plaisir de Dieu,  
 qui est de sauuer les hommes par la pre-  
 dication de la croix. Et pourtant ceux  
 là croient par cette grace offerte,  
 qui embrassent la communion de la  
 croix de leur Sauueur. Non ceux  
 là qui croient seulement que Ie-  
 sus Christ, en la croix, leur a ac-  
 quis la remission de tous leurs pechez.  
 Cette foy incomplete, (en la de-  
 finition de laquelle consiste la premie-  
 re fausseté de l'hypothese de nos refor-

mateurs en cette matiere ) n'est pas la  
 vraye foy iustificante. La foy complet-  
 te est celle de ceux qui croient que Je-  
 sus Christ, en sa croix, a fait la propi-  
 ciation de tous nos pechez, afin qu'en  
 l'obeissance de cette croix & par no-  
 stre soumission à sa communion nous  
 soyons deliurez & repurgez du peché  
 qui regne en nos membres. Cette est  
 la foy complete. La vraye foy iusti-  
 fiante, qui engendre la iustice & la  
 vraye sainteté en no<sup>9</sup>. Or il est impossi-  
 ble que ceux qui ont cette foy ne soiēt  
 hūbles: car ils sōt humiliez so<sup>9</sup> la croix  
 de Christ. Il est impossible que ceux  
 qui n'ont point cette foy soient hum-  
 bles. Et pourtant plusieurs peuuent  
 croire que Iesus Christ leur a acquis la  
 remission de tous leurs pechez (qui est  
 vostre definition de la foy iustificante,  
 cōme vous voulez que la iustification  
 cōsiste en la seule remissio<sup>n</sup> des pechez)  
 Et neantmoins tels croyans n'en seront  
 pas plus hūbles, mais tres-orgueilleux,  
 presomptueux, & superbes, comme  
 sont plusieurs de vos iustifiez de iusti-  
 fic imputee, & qui n'ont aucune vraye

iustice en eux, ny aucune vraye humilité. Il est impossible que cette vraye foy soit produite en autres qu'en ceux, en qui l'humiliation, & le resentiment du doit de Dieu, frappant le pecheur pour ses pechez, prepare la matiere propre à l'efficace de la grace, qui est en la croix de Christ. Car ainsi cete humiliation, & cet ancantissement deuient au fidele, la communion à la croix du Seigneur. Tous les superbes, qui estâs gorgez de l'aïse de ce monde, se moquent ou se scandalisent de la croix de Christ, reiettent aussi, de necessité, la grace de la foy que l'Euangile leur annonce & leur presente en la croix de Christ. Plusieurs d'entr'eux accepteroient bien volontiers la remission de leurs pechez, & la promesse de la vie eternelle, & croïoient aisément que leurs pechez leur sont pardonnez, & qu'ils sont repûtez iustes deuant Dieu, par la iustice de Christ qui leur est imputée, & qu'ils sont capables, pour cette raison, de la gloire eternelle. Tout cela ne heurte point le sens de la chair. Ils consentiroient de bon cœur d'estre

ſauuez par cette voye. Mais quant à la vraye foy iuſtifiante, non de iuſtice imputée, mais de vraye iuſtice inherente, il faut qu'elle embraffe la communion de la croix, le renoncement au monde, le crucifiment de la chair, la mortification du vieil homme, la communion des afflictions & des ſouffrances du Seigneur. Il faut auſſi de neceſſité, que tous ceux qui ont cette foy ſoient vrayment humbles. Et par là ie croy que vous comprenez que la vraye humilité Chreſtienne depend de ma doctrine. Et que la voſtre n'engendre qu'une vaine & fauſſe humilité.

Selon cela, quand vous dites, *que les plus humbles ſont ceux que Dieu aſſiſte continuellement de ſon S. Eſprit*, vous parlez contre vous, Car Dieu ne donne pas ſon S. Eſprit aux hommes, pource qu'ils croyent que Ieſus Chriſt eſt mort pour eux, & que tous leurs pechez leur ſont remis, & qu'ils ſont reputés iuſtes par la iuſtice & obeiſſance de Chriſt qui leur eſt imputée, encore qu'ils ne ſoyent pas iuſtes en eux

mesmes. C'est bien la maniere dont vous definissez ceux à qui Dieu enuoye son S. Esprit. Mais non celle que les Apostres & le S. Esprit luy mesme nous ont enseignée. Voicy comment le S. Esprit est donné, & qui sont ceux auxquels il est donné ? Le S. Esprit est enuoyé des Cieux, par la vertu de la Resurrection & de la gloire de Iesus Christ, à tous ceux qui en sont abbatu sous la croix du Seigneur, par leur renoncement à ce present siecle, & à l'esperance & à l'affection des choses terriennes, à tous ceux qui sont morts avec Iesus-Christ au monde, à tous ceux qui embrassent la communion de ses afflictions & de sa souffrance, à tous ceux qui mangent sa chair, & qui boient son sang icy bas, vrayment, reellement, corporellement. Le saint Esprit leur est enuoyé pour consolateur, formant en leur ame vne esperance viue & invariable des biens celestes, qui leur sont preparez là haut avec Iesus-Christ, à la dextre de Dieu. Car tous ceux qui ont ceste esperance se sanctifient eux-mesmes, deuiennēt

vrayment iustes & saincts, par vn amour de Dieu sur toutes choses, & par vne charité & dilection vrayment fraternelle enuers leurs prochains. D'autant que se recognoissans appelez, en Iesus-Christ, à vne mesme communion les vns avec les autres, tant d'afflictions & de souffrances icy bas: comme de ioye & de gloire là haut, ils communiquent en patience, & en charité, avec pureté, aux afflictions & necessitez les vns des autres, ne faisans rien à autrui que ce qu'ils voudroient leur estre fait. Voila comment le S. Esprit est donné, & qui sont ceux à qui il est donné, & ce qu'il fait en ceux à qui il est donné. Ce sont ceux-là qui sont vrayment humbles. Et non pas vos iustifiez de iustice imputée. Lesquels se recognoissans en effect pleins de vices & d'ordure, ne laissent pas de croire, & de dire, que Dieu les repute iustes encore, qu'ils ne le soient pas. Et par cette foy imaginaire, ils presument encore qu'ils sont les esleuz de Dieu, que Iesus-Christ n'est mort que pour eux absolument,

qu'ils ne peuuent iamais dechoir. Et qu'encore qu'ils ne puissent paruenir à aucune iustice & saincteté que tres defectueuse & imparfaicte, neantmoins ils ne peuuent māquer d'obtenir la vie & la gloire eternelle, pource qu'ils sont couuerts de la parfaicte iustice de Christ. Car ce sont là les belles maximes que les pensees de nos reformateurs ont enchainees. Crachez, Monsieur, sur ceste dangereuse doctrine, qui ignore la vertu de la croix de Christ, en laquelle seule consiste la vraye humilité, & la raison de la vraye saincteté Chrestienne, parfaicte & accomplie, que le saint Esprit communique à tous ceux qui mangent vrayment la chair, & boient vrayment le sang de Christ en toute leur vie.

Vostre seconde responce est, *Que sans s'en faut que la doctrine de l'imperfection de la iustice rende le fidele lasche à son denoir, qu'elle l'oblige à combattre continuellement ses defauts, & à s'auācer à la perfection laquelle il n'a pas atteint. Ce qui appert de S. Paul qui allegue pour raison du soin qu'il auoit pour sa sanctifi-*

*cation qu'il ne se reputoit point encore ac-*  
*comply Philipp. 3. Quant à moy ie ne me*  
*repute point encore auoir apprehendé &c.*  
 Toutes vos responses deguisent tou-  
 siours l'estat de la chose que vous vou-  
 lez vous mesmes defendre. Nostre  
 question n'est pas de sçauoir, si aussi-  
 tost qu'un homme est fidele il est par-  
 faict. Nous sommes d'accord que la  
 saincteté a ses progres & ses accrois-  
 semens. Et la perfection de iustice &  
 de saincteté cōsiste en persuerance. Et  
 pour ce regard nul n'est accompli qu'il  
 n'ait perseueré iusques à la fin. La vie  
 du fidele est vn combat perpetuel, la  
 chair, le monde, satan, luy liurent con-  
 tinuellement des assauts. Il faut qu'il  
 combatte & qu'il vainque par l'Esprit  
 de Christ qui est en luy, qui est plus  
 fort que l'esprit du monde. Pourtant  
 il est escrit que celuy qui est debout  
 regarde qu'il ne tombe. S'il veut ne  
 tomber point, il faut qu'il embrasse la  
 croix de son Sauueur, qu'il communi-  
 que à ses afflictions & souffrances. Et  
 la vertu de l'Esprit de grace, qui se  
 parfaict en infirmité, le soustiendra,

à ce qu'il paruienne à la perfection.  
 C'est ainsi qu'on y tend, & qu'on y ar-  
 rive. En cet exercice s'occupe le soin  
 du fidele. Mais ce n'est pas là ny nostre  
 question ny vostre doctrine. Elle est  
 tout au contraire. Car vous enseignez  
 que le fidele ne peut paruenir à la per-  
 fection. Qu'encore que Dieu luy ait  
 donné son S. Esprit pour faire ses co-  
 mandemens, il ne les peut pourtant ac-  
 complir Or c'est l'impression que vous  
 mettez en l'esprit du Chrestien par cette  
 doctrine, qui le rend lasche à son deuoir.  
 Car quicquoy croit ne pouuoir parue-  
 nir à quelque fin, perd courage. Il  
 deuient lasche & nonchallant, comme  
 battant l'air, & s'occupant à vn travail  
 qui ne luy réussira pas. Que respondes  
 vous? Pouuez vous nier qu'une telle  
 doctrine n'arrache du cœur du fidele le  
 soin de paruenir à la perfection de sain-  
 cteté, à laquelle il croit, par vostre in-  
 struction, ne pouuoir atteindre? Et  
 vous coupez-vous pas la gorge à vous  
 mesme, quand vous dites, *que la do-*  
*ctrine de la justice imparfaite oblige le*  
*fidele à combattre continuellement ses de-*

*faits, à s'avancer à la perfection laquelle  
il n'a pas atteint. Si par la doctrine de la  
iustice imparfaicte vous entendez, se-  
lon la question d'entre nous, la doctri-  
ne qui enseigne que la iustice du fide-  
le est tousiours imparfaicte & pleine de  
defauts, & qu'elle ne peut estre autre  
en cette vie, & qu'elle a tousiours be-  
soin de pardon mesme apres cette vie:  
n'est il pas manifeste, que ceste doctri-  
ne recule le fidele de s'aduācer à la per-  
fection, laquelle il croit ne pouuoir at-  
teindre? Celuy est insensé qui trauail-  
le à obtenir ce qu'il croit estre hors de  
sa puissance. Comment le fidele s'estu-  
diera t'il de s'avancer à la perfection  
laquelle il n'a pas atteint, s'il croit, que  
comme il ne l'a pas atteint, aussi ne la  
peut il iamais atteindre? Cōment cet-  
te croyance l'oblige t'elle à combattre  
continuellement ses defauts, s'il croit  
ne les pouuoir surmonter? S'il croit  
que quoy qu'il fasse sa saincteté sera  
tousiours defectueuse & imparfaicte.  
Et, comme vous parlez, qu'il n'aura ia-  
mais, en cette vie, que quelque peu de  
saincteté. Certes en cela vous em-*

ployez l'exemple de S. Paul fort mal  
 à propos pour vostre pretentiō. Car  
 en quel lieu de ses escrits auez-vous  
 leu, que la iustice & la saincteté des  
 fideles est tousiours imparfaicte, plei-  
 ne de defauts & de manquemens, &  
 qu'elle a tousiours besoin de pardon,  
 quand il s'agit de la remunerer de la  
 recompense promise ? Produisez-  
 moy, si vous pouuez, quelque sen-  
 tence de ses escrits qui resente ce  
 dogme. Ce sont pensees aussi éloi-  
 gnées des inspirations de l'Esprit de  
 Dieu, qui parloit par S. Paul, que le  
 Ciel est loin de la terre. Toute la do-  
 ctrine de S. Paul, au contraire, est  
 doctrine de perfection. Car en cela  
 consiste la vertu & l'effect de l'Euan-  
 gile, d'auoir amené à perfection ce  
 que la loy n'auoit peu parfaire. C'est  
 pourquoy, quand vous combattez  
 pour l'imperfection de iustice, vous  
 n'alleguez iamais que des autoritez  
 du vieil Testament. Vous ne trouuez  
 rien ez escrits des Apostres qui fa-  
 uorise vostre opinion. Car, sous le  
vieil Testament, la grace, qui estoit

communiquée, ne rendoit les fideles  
qu'enfans. Au lieu que la grace, qui  
est communiquée sous le nouveau,  
les rend hommes faits & parfaits.  
Non seulement en cognoissance,  
comme vous vous imaginez encore,  
mais aussi en vertu & en œuvre du S.  
Esprit, qui espend en leurs cœurs la  
charité de Dieu, en laquelle consiste  
l'accomplissement de la loy:

Or quand l'Apostre dit, *Qu'il n'a-  
voit pas encore apprehendé, & qu'il n'e-  
stoit pas encore accompli*, il parle de la  
continuité de sa course & de son  
combat qui n'estoit pas encore para-  
cheué. Et pour ce sujet, combien que  
la sainteté, à laquelle il estoit parue-  
nu, fust parfaite, comme on parle-  
roit aux escholes *secundū intentionem*,  
elle ne l'estoit pas *secundū extensionem*.  
Elle estoit parfaite pource qu'il ai-  
moit Dieu sur toutes choses. Mais el-  
le n'estoit pas accomplie, pource qu'il  
falloit qu'il perseverast iusques à la  
fin en cet amour de Dieu sur tou-  
tes choses, afin d'apprehender le  
prix proposé de vie éternelle. Or des

paroles de l'Apostre resulte vn argument necessaire contre vostre doctrine, comme ie l'ay remonstré en la conuiction de M. Amyraut. Car puis que ce qui estoit à l'accomplissement de S. Paul estoit la fin de sa course & de son combat, il s'ensuit qu'il a esté accompli en iustice, & en saincteté, quand sa course & son combat ont esté acheuez. Et par consequent que sa iustice & sa saincteté n'a point esté defectueuse pour auoir besoin de pardon ou de couuerture de quelque iustice imputée, afin d'obtenir la couronne seulement par misericorde. Car tout au contraire, il se confie tellement en l'accōplissement de sa justice & de sa saincteté, consommée par la fin de sa course & du bon combat de la foy, qu'il s'assure qu'en consequence la couronne luy seroit rendue par le iuste Iuge.

Quand vous aurez ainsi cōsideré la difference, ou pour mieux dire, l'opposition de la doctrine de S. Paul à la vostre, auoiez-vous pas qu'il y a du venin, ie ne di pas caché, mais tout manifeste

manifeste en vostre doctrine ? Venin qui oste la vie & l'accroissement au nouuel homme, qu'il empesche de paruenir à la perfection. Vous faites croire à vn homme, qu'en consequence de la remission des pechez que Iesus-Christ nous a acquise par son sang, Dieu le reputé iuste encore qu'il ne le soit pas. Au lieu d'enseigner les Chrestiens, suiuant l'Euangile, que Iesus-Christ leur a acquis par sa mort la remission de tous leurs pechez, & que la grace leur en est offerte & donnée par l'Euangile, non pour les faire reputer iustes ne l'estans pas : mais afin de les rendre en effect iustes & saints, en renouant à toutes mondaines conuoitises, & viuans en ce present siecle, sobrement, iustement & religieusement. Vous leur enseignez, qu'ils sont iustifiez par la seule remission des pechez, & reputez iustes deuant Dieu aussi tost qu'ils ont creu que leurs pechez leur sont pardonnez en vertu de l'effusion du sang de Christ, encore qu'ils ne soient point iustes ny saints en eux-mesmes

Et que, pour raison de cette seule iustice qui leur est imputee, ils sont capables de la gloire. Mais non pour aucune iustice & saincteté inherente, laquelle ne peut iamais estre parfaite, mais tousiours manque & defectueuse. N'apperceuez-vous pas maintenāt le venin de vostre doctrine? Ne voyés vous pas, que celuy qui croit estre iuste d'une iustice imputee qui seule le rend capable de la vie & de la gloire eternelle, ne s'estudiera iamais, cōme il faut, à la vraye iustice & saincteté inherente, parfaite & accōplie, qui seule, en effect, l'en rend capable. Mesme tant qu'il croit, comme vous luy persuadez, ne pouuoir iamais atteindre à la perfection. Et certes, ce qui arriue en ceci aux Disciples, au regard de l'effect, est premieremēt auenu aux Docteurs, au regard de la cause. Car cōme ils ont estimé que les fideles ne peuuēt paruenir en cette vie à aucune vraye iustice & saincteté parfaite: aussi ne se sont-ils point estudiez d'en chercher, cōme il faut, la voye pour l'enseigner à leurs Disciples. Or

cette voye cōsiste en la vraye sciēce de la croix, laquelle ils n'ont nullemēt biē comprise. Car ils n'ont point cōsideré, ny expliqué comme il appartient, les vrayes raisons de la croix, & de sa vertu, & de son effet salutaire. Lequel procede, de ce que la croix nous est actuellement communiquée. Dautant que la remissiō de nos pechez, acquise par Iesus-Christ en sa croix, nous en ayant rendu l'vsage salutaire, la communication d'icelle nous deliure de la seruitude du peché, & de Satan, par le crucifiment de la chair, & du mōde en la mortification du vieil hōme. En quoy s'acōplit, par la vertu du S. Esprit, cōmuniqué au fidele en cette cōditiō, nostre veritable iustification & sanctification. Qui ne sont point deux actes de differente raison, mais qui ont pareille relation ensemble que la iustice & la sainteté, dōt elles sont l'infusiō de l'habitude au Chrestien. Nos reformateurs, au cōtraire, par la distinctiō qu'ils ont faite entre la iustificatiō & la sãctificatiō, cōtre la doctrine des Apostres, retenue par to<sup>9</sup> les Peres, ont obscurci la raisō de

la science de la croix & de son vſage.  
 Ayant reduit ſon effect à la ſeule imputa-  
 tion de la ſatisfaction de Jeſus Chriſt.  
 Il ne ſe peut dire, quel preiudice cette  
 imagination leur a apporté à l'intelli-  
 gēce del'Euāgile. Ils ont, par ce moyē,  
 obſcurci, dans leurs cōmentaires, la rai-  
 ſō des plus beaux textes des eſcrits des  
 Apoſtres. C'eſt par là auſſi, qu'ils ont ſi  
 fort éloigné leur eſprit de l'intelligēce  
 de la raiſō des Sacremēs, & en general  
 & en particulier. C'eſt par cette hypo-  
 theſe, que *māger la chair & boire le ſang  
 de Chriſt*, leur eſt la meſme choſe que  
*croire en luy*. Et que le Sacrement du  
 corps & du ſang de Chriſt ne leur eſt  
 autre choſe, que la figure du corps & du  
 ſang, nō le corps & le ſang meſme. Bref  
 on ne peut dire cōbien ce manquemēt  
 de nos reformateurs, ſur ce chef de la  
 doctrine Chreſtienne, s'eſtend loin au  
 detrimēt de ſa cognoiſſance en toutes  
 ſes parties. Et le tout reuiēt à ce point,  
 que la raiſon d'inſtruire les fideles en la  
 vraye pieté, iuſtice, & ſaincteté en a e-  
 ſté merueilleuſemēt alteree. Ne ſoyez  
 point falché, Monſieur, que ie vous y

redresse, & qu'en vous y redressant, ie diminué peut-estre la gloire & la louange que vous attribuez à nos reformateurs. Ne cherchons point la gloire des hommes, mais celle de Dieu seul. Tout homme est menteur, & sujet à errer. Ne soyons point serfs des hommes.

Vous ne direz plus aussi, cōme ie pēse (ainsi que vous faites en la mēme pag. 52.) *que c'est en ma doctrine, que le venin d'orgueil, qui est tant detestable à Dieu, est tout euident, à sçauoir celui du Pharisien qui se confioit en soy mēme d'estre iuste.* Car en quelle cōsciēce pouuez vous dire, que le vray fidele, qui rend graces à Dieu, & qui se glorifie en luy, de ce qu'il l'a fait nouuelle creature, créé en iustice & vraye saincteté, est rempli de l'orgueil du Pharisien? Ne croyez-vous pas que celui qui parle ainsi rēdra compte à Dieu de la calōnie qu'il fait à l'Euāgile? Car ie n'insisteray pas icy dauantage en la refutation que i'en ay déjà faicte cy dessus. Seulement dirai-ie, sur ce qui suit en vos paroles, *que quand vous obligez l'hōme de se mettre tousiours en l'estat du pauvre peager, qui frappoit sa*

poitrine, Et disoit, O Dieu ! sois propice à moy qui suis pecheur, le mal que vous luy procurez, c'est qu'il descende iustifié en sa maison, comme le peager. Quand vous obligez l'homme de se mettre tousiours en l'estat du pauvre peager, vous ne l'obligez pas beaucoup. Quoy ? voulez vous dōc, que depuis le premier moment de la cōuersion & de la repētāce, tel qu'est l'estat de ce pauvre peager, il n'y ait plus de progrez ny d'auancement pour le fidele en iustice & sainteté ? Certes vous le voulez, & le faites par vostre doctrine, qui ne cōnoist autre iustice ny sainteté du fidele, que tousiours imparfaite, & telle que ie recognoi volontiers qu'estoit celle de ce pauvre peager. Tels sont aussi tous vos iustifiez par la iustice que vous pretendez imputée. C'est toujours à recōmēcer. Ils sōt tousiours au commēcemēt. Et en leur faisať croire qu'ils serōt reputez iustes deuāt Dieu, pource qu'ils serōt couuerts d'une iustice estrangere, & non pour aucune iustice inherente en eux, comme ne la pouuans auoir parfaicte : ils se contentent de cette imparfaicte,

telle qu'auoit le peager en ce premier  
 estat de sa cōuersion. Mais vous ne pre-  
 nez pas garde, que le mal que vous leur  
 procurez est plus grād que vous ne pē-  
 iez. Car vous estimez qu'ils descendēt  
 iustifiez en leur maison. Ne cōsiderant  
 pas que nostre Seigneur ne dit pas ab-  
 solument, que le peager descēdit iusti-  
 fié en sa maison. Mais seulement par  
 cōparaizon, *qu'il descendit iustifié plustost*  
*que l'autre.* Non qu'absolument il fust  
 iustifié par ce premier acte de repen-  
 tance, qui n'est que la preparation à la  
 iustification. Mais en comparaison du  
 Pharisien, qui n'auoit aucune prepara-  
 tion à la iustification, nostre Seigneur  
 dit, *qu'il descendit iustifié plustost que luy.*  
 Ainsi quand vous voulez que les fide-  
 les demeurent tousiours en l'estat du  
 peager, vous les abusez en leur faisant  
 croire qu'ils sont iustifiez. S'ils ne pas-  
 sent plus outre, s'ils en demeurent là,  
 leur iustificatiō n'est point accomplie.  
 Les fideles iustifiez ont le cœur plein  
 de paix & de ioye, pource que Dieu re-  
 gne en eux, par la charité que le S. Es-  
 prit y a respāduë. Ce que n'auoit point

encore ce pauvre peager. Entendez par ceci combien vous estes loin de la pleine intelligence de l'Euangile.

## CH A P. X.

*Obiections contre l'imperfection de la iustice des fideles, maintenues invincibles.*

**P**OUR vous faire voir, que vostre doctrine de la iustice & sainteté des fideles, si imparfaicte & defectueuse, qu'elle ne puisse estre reputée pour merite & pour dignité, qui les rende en eux mesmes capables de la possession de la gloire, est du tout insoustenable, & opposee à la doctrine de l'Euangile: Je vous en auois allegué quelques passages exprez & formels. Côme sont entr'autres les paroles de l'Apostre Eph. 1. 4. *Que Dieu nous a benits de toute benediction spirituelle es choses celestes, comme il nous auoit eleuz deuant la fondation du monde, pour estre saints & irréprehensibles deuant luy en charité. Et en l'Epistre aux Coloss. 1. 21. 22. où il nous dit, que nous qui estions autrefois alienez de Dieu & ses*

*ennemis en nostre entendement en mau-  
 uaises ceuures, Christ nous a maintenant  
 reconciliez au corps de sa chair par la mort,  
 pour nous représenter deuant Dieu saints,  
 sans tache & irreprehensibles deuant luy.*  
 Je vous auois allegué cestextes qui vo<sup>s</sup>  
 parlent formellemēt de la saincteté des  
 fideles & de sa perfection, aux mesmes  
 termes que ceux que vous dites vous  
 auoir fait fremir en mes paroles. Qui  
 est la mesme chose que si vous disiez,  
 que l'Euangile vous fait horreur. Car  
 quand i'ay dit que la saincteté, sans la-  
 quelle nul ne verra Dieu, rend le fidele  
 sans tache & irrepreché sible deuāt luy,  
 & partāt capable de soustenir le feu de  
 sa face & de son iugemēt, i'ay employé  
 les propres paroles del' Apostre. Croyés  
 vous pas, qu'vne saincteté sans tache &  
 irrepreché sible, soit capable de soustenir  
 le feu de la face de Dieu & de son iuge-  
 ment ? Certes vous ne le pouuez nier.  
 Car quand vous dénietz à la saincteté  
 des fideles, de pouuoir subsister deuāt  
 le iugemēt de Dieu, vous le faites sur le  
 presupposé qu'elle est pleine de defauts  
 & de māquemens, qu'elle n'est ny sans

tache ny irreprehensible. Si donc elle est sans tache & irreprehensible, cōme l'Apostre la qualifie, elle subsistera de uāt la face de Dieu & en son iugemēt. Il ne faut, à vostre bonne conscience, que vostre bon sens, pour luy faire recueillir cette cōsequence. Quād mesme l'Apostre ne l'auroit pas exprimee en disant, *irreprehensibles deuant Dieu.* Car *deuant Dieu* est autant cōme de uāt le feu de sa face & de sō iugemēt.

Or sçauoi-ie bien les defaites, où nos gens, pleins de l'imagination qui les empesche de voir la verité en ce sujet, ont accoustumé de recourir. Leur response à ces passages est, qu'ō les doit entendre, non de la saincteté à laquelle les fideles sont appelez en cette vie, & qu'ils peuvent atteindre: mais de la saincteté à laquelle ils paruiendrōt en la vie future. Preuoyant & preuenant cette response de vostre part, ie me suis proposé deux choses. La premiere, de vous faire voir, que quand elle seroit admissible, elle ne destruit pas moins vostre imaginatiō, que les fideles comparoissans au iuge-

ment de Dieu ont besoin, pour estre rendus dignes & capables de la gloire, d'estre couuerts de la iustice de Christ imputee, à cause des manquemens & de l'imperfection de leur iustice & saincteté. La seconde a esté de vous faire voir, que cette respõse n'est nullement admissible ny veritable. Pour le premier, la consequence en est euidée. Car puis que vous accordez, que la iustice & la saincteté des fideles se parfait depuis qu'ils sont recueillis au Ciel, & qu'elle est alors sãs tache & irreprehensible: il s'ẽsuit, que lors qu'eux mesmes comparoistront au dernier iour deuant le iugement de Dieu, leur iustice & leur saincteté sans tache & irreprehensible sera capable de soustenir le feu de la face de Dieu & de son iugement, sans auoir besoin qu'aucune iustice estrangere couure ses defauts & manquemens qui ne seront plus. Et par mesme raison leur iustice & leur saincteté ainsi accõplie, est vn merite & vne dignité qui les rend capables de recevoir le prix & la couronne de gloire eternelle. Ce qui suf-

Et pour establir, contre vous, le me-  
rite de la sainteté des fideles. Voila  
côme i'ay disputé contre vostre res-  
ponse prevenüe aux passages alleguez,  
sur le presupposé qu'elle fust admissible.

A cela vous replicquez deux choses.  
La premiere, *Que ie ne considere pas,*  
*qu'on ne sera point iugé au iour du iuge-*  
*ment par l'estat auquel on a esté apres cette*  
*vie, mais par celui auquel on a esté pendant*  
*la vie, & par les choses qu'on a faites en la*  
*aerre en son corps, c'est pourquoy il est dit,*  
*que chacun rapportera en son corps selon*  
*qu'il aura fait ou bien ou mal.* Mais vous  
mesmes ne considerez pas, que mon  
argument est basti sur vostre presu-  
posé, & non pas sur mon intention,  
ny sur mon affirmation. C'est vous  
qui affirmez, que la sainteté des fide-  
les sera autre, lors qu'ils cōparoistrōt  
au dernier iour, pour estre iugez, que  
lors qu'ils sont sortis de cette vie.  
Vous voulez, selon vostre response,  
que la sainteté des fideles soit lors  
parfaite & accomplie, sans tache &  
irreprehensible. Laquelle en cette vie  
n'auoit esté que defectueuse & pleine

de manquemens. Or c'est ce presupposé vostre qui destruit entierement la raison du iugement de Dieu, qui se fera au dernier iour, lors que chacun remportera en son corps selon qu'il aura fait ou bien ou mal. Et la conclusiō de mon argumēt ne contrarie à la raison du iugement dernier, qu'ëtant que ma conclusion depend de vostre presupposé. Ce qui vous fait voir, que vostre response en effect n'est ny veritable ny admissible. Pour vous le rendre plus notoire, ie vous demande, si cet accomplissement de iustice, & cette perfection de saincteté aux fideles apres le depart de cette vie, est vn benefice qui leur soit conferé en consequence de la remission des pechez que Iesus Christ leur a acquise, comme vous le recognoissez au regard du commencement de la sanctification en cette vie? Ou si ce benefice de parfaite saincteté leur est conferé en l'autre vie, apres le depart de celle cy, comme guerdon ou recompense? Si ce benefice est vne grace consecutiuë de la remission des

pechez, ce n'est autre chose qu'une cō-  
 tinuatiō de nostre sâctification cōmē-  
 cee. Par le moyen de quoy le fidele se  
 trouuera parfaictement iuste & parfai-  
 ctemēt saint en soy mesme, auparauāt  
 qu'il comparoisse au iugemēt de Dieu,  
 pour receuoir la recōpense de la gloire.  
 Cela estant, vous avez donc tort (vous  
 qui reconnoissez que la iustice & la sain-  
 cteté est vne cōdition necessaire au fi-  
 dele pour le rendre capable de la gloire)  
 de requerir aucune couuerture à sa iu-  
 stice & sainteté, cōme defectueuse &  
 imparfaite, lors qu'il cōparoistra au iu-  
 gemēt de Dieu, pour en receuoir la cou-  
 ronne. Car alors, selō vostre presupposé,  
 il n'y aura plus d'imperfection ny de  
 deformité en sa iustice & sainteté. Et  
 selon vostre mesme presupposé, le iuge-  
 mēt de Dieu, par lequel il rēdra à cha-  
 cū selon ce qu'il aura fait en son corps,  
 soit biē ou mal, ne seroit nullemēt con-  
 forme à sa sagesse. Si tant est, que lors  
 que Dieu rēdra la couronne à la sainte-  
 té du fidele (qui selon vous est vne cō-  
 dition necessaire pour l'en rēdre capa-  
 ble) il regardoit la sainteté incomplet-  
 te de cette vie, & non la sainteté ac-

cōplie depuis. Et si, pour subuenir aux défauts de la sainteté imparfaite de ceste vie, il couuroit le fidele de la iustice imputée de son fils: puis que le fidele aura lors en soy vne sainteté parfaite, qui n'aura point besoin de couuerture. Aussi les paroles, que vous alleguez de l'Escripture, contredisent manifestement à vostre intention. Car si chacun reçoit en son corps selon qu'il aura fait ou bien ou mal, il est euidēt que nous ne receurons pas la recompēse selon le bien d'une iustice imputée que nous n'aurons pas faite. Vous ne pouuez riē apporter de plus formellemēt contraire à vostre doctrine.

Que si, pour accorder vostre supposition de l'accomplissēmēt de la iustice du fidele apres cette vie, avec la raison du iugement de Dieu, qui nous iugera selō ce que nous aurōs fait en ce corps, vous respondiez, que ce benefice est au fidele vne récompense & vne partie de sa courone: il faut que contre l'Escripture vous introduisiez vn autre iugemēt de Dieu, que celui du dernier iour. Car la recompēse & la couronne presupose necessairement vn iugement. Or par le

iugemēt de Dieu au dernier iour, nous  
serons iugez en nostre corps, comme  
portent les paroles par vous alleguees.  
Mais ce benefice de iustice accomplie,  
selon vous, ne sera point donné aux  
fideles en leurs corps, mais deuant la re-  
surrection. Ainsi il faut que vous intro-  
duisiez vn autre iugemēt de Dieu, que  
celuy dont l'Escripture nous parle. Ce  
qui vous fait voir que tout ce que vous  
presupposez en vostre doctrine, pour en  
soustenir les premieres hypotheses  
fausses, vous recule tousiours de plus en  
plus de la simplicité de la verité que le  
S. Esp. a laissée à l'Eglise par les Apost.

Vostre seconde response à mon ob-  
iection est, *que ie cōba, en cela, tous les Do-  
cteurs de l'Eglise Romaine, qui tiennent  
que le temps du merite, n'est point, celuy au-  
quel nous sommes voyageurs, & tiennent que  
ny les Anges ny les SS. ne meritent point  
dans le Ciel, bien que leur sainteté soit tres  
parfaite. En cela vous cōmettez la mes-  
me inaduertāce qu'en vostre response  
precedēte. Ne considerāt point que ce  
n'est pas mon affirmation qui contrarie  
à l'opinion des Docteurs de l'Eglise Ro-  
maine,*

maine, mais seulement vostre presupp<sup>o</sup>se, dont ma conclusion dependoit. Car ie soustien, avec tous les Docteurs Catholiques, que la iustice & la sainteté des fidelles, qui sera remunerée au iour du iugement, doit estre parfaicte & accomplie en cette vie: & qu'elle l'est en effect, selon la vocation de l'Euangile, en la grace & en la cōmunion du Seigneur Iesus, à laquelle nous sommes appelez. Et que pour cette cause nostre iustice & sainteté en cette vie, est vrayement merite de la gloire future, comme les Catholiques la qualifient. Aussi est-il tres-vray, que comme le merite & la recompense sont reciproques, & que la recompense n'est donnée qu'aux œuvres faites en cette vie, durant la course & durant le combat: aussi n'y a-t'il que ces œuvres, auxquelles la couronne est rendue, qui ayent raison de merite. En quoy les Docteurs Catholiques l'ont bien défini.

Après vous auoir monst<sup>r</sup>é de la sorte, que quand vostre presupp<sup>o</sup>se, de la iustice & sainteté des fidelles accomplie apres cette vie, seroit admissible,

pour le sens des passages alleguez ; cela  
 n'empescheroit pas que la raison du  
 merite n'eust lieu, & qu'elle n'exclust la  
 necessité de la couverture d'une iustice  
 imputée : ie vous ay fait voir en suite,  
 que ce presupposé ne peut estre admis.  
 Et qu'aux passages alleguez, il faut ne-  
 cessairement entendre, par la Saincteté  
 sans tache & imprehensible, celle que  
 les fideles atteignent en cette vie. Voici  
 „ qu'elle a esté ma raison, Si la saincteté  
 „ des fideles n'est accomplie en cette vie,  
 „ nul fidele au départ de cette vie ne verra  
 „ Dieu. Car, *sans la saincteté, nul ne verra*  
 „ *Dieu, & nulle chose souillée n'entrera au*  
 „ *Royaume des Cieux.* Et par consequent  
 „ si la saincteté des fideles ne s'accomplit  
 „ qu'apres le départ de cette vie, il faut de  
 „ necessité establir vn tiers lieu, où les fi-  
 „ deles soient repurgez du reste de leurs  
 „ souillures, & de leurs defauts, afin que  
 „ leur saincteté estant parachevée, ils puis-  
 „ sent estre admis au Ciel deuant la face  
 „ de Dieu. Ce qui n'est autre chose que  
 „ confirmer le purgatoire, que nos Re-  
 „ formateurs ont tant combattu. Voire,  
 „ qui plus est, en introduire la necessité,  
 „ non pour vne partie seulement, mais

pour tout le nombre des fideles. Cette raison, quelque semblant que vous faciez, vous serre de si pres, que vous ne vous en pouuez defendre. Car elle vous a tellement reduit à l'estroit, qu'elle vous a fait quitter les armes, dont tous nos Docteurs ont accoustumé de defendre leur cause, pour recourir à vne nouvelle meditation, qui ne vous est pas moins inutile. Tous ceux qui auroient voulu demeurer dans l'hypothese de nos Reformateurs, auroient respondu, que ce qui rend les fideles capables de voir la face de Dieu au départ de cette vie, est la couuerture de la iustice de Christ imputée, qui les fait trouuer iustes deuant Dieu, encore qu'ils ne le soient pas en eux-mesmes. Et ie m'estonne que vous, disputant pour la necessité de cette couuerture, qui doit couvrir, au dernier iour, la defectuosité de la sainteté des fideles, afin que la gloire leur soit donnée, ne vous seruiez encore de ce manteau pour leur mettre sur les espauls au partir de cette vie. Afin que sous l'abry d'iceluy, ils puissent aussi voir en repos la face de Dieu en l'attente du dernier iour. Qui vous a meu-

de leur vouloir attribuer vne iustice & sainteté parfaite incontinent apres le départ de cette vie, & dans le moment mesme qu'ils en sont sortis ? Est-ce que vous n'avez peu foudre autrement les passages, où le S. Esprit nous dit, *que sans la sainteté, nul ne verra Dieu, & que nulle chose souillée n'entrera au Royaume des Cieux.* Mais tous nos Reformateurs iusques à vous ne se sont pas grandement formalisez de ces passages. Ayans en main le poignard de leur iustification gratuite par l'imputation d'une iustice estrangere, qui fait trouuer pur & saint ce qui est plus souillé en soy-mesme. A ce coup vostre conscience ne vous a peu permettre de vous moquer si ouuertement de la parole de Dieu. Vous avez donc voulu chercher d'autres défaites, pour defendre la these, où vous maintenez que les fideles ne paruenient, ny ne peuuent, ny ne doiuent paruenir a vne iustice parfaite en cette vie.

Voicy donc quelle est vostre response. *Ma response est, dites-vous, que la racine des conuoitises mondaines, qui sont opposées à l'esprit, estant en la chair, &*

de là ayant occupé le cœur, & obscurci l'entendement, dès que l'ame que Dieu a sanctifiée par son esprit, est séparée de cette chair, il n'y a plus rien en elle qui trouble l'œuvre de l'esprit ; outre que Dieu, qui opere comme il luy plaist, fait alors abonder sa vertu en l'ame : & par ainsi ce qui auoit esté commencé en elle de la regeneration se parfait. Or le moment de cette separation est celuy de la mort. Surquoy vous nous pourriez, en la mesme maniere dont vous disputez contre nous, disputer contre le moment de la mort, pour ne la point trouuer. Car vous diriez, si la mort aduient, c'est, ou pendant la vie, ou apres la vie. Non pendant la vie, car pendant que l'homme vit, il ne meurt point : non apres la vie, car lors il est desia mort : & partant ne meurt pas : doncques il ne meurt point. Examinons de point en point ce que vous dites, pour voir ce qu'il y a de bien & de mal. Or vous y trouuerez, que ce que vous dites bien, destruit vostre these, & que ce que vous dites mal, la descouure fausse. Ce que vous dites que la racine des conuoitises mondaines est en la chair, est vray & bien dit, si vous l'entendez bien. C'est à

dire, si vous entendez par là, que l'affection que l'ame a naturellement pour la chair, est la racine de toutes les convoitises mondaines, & des desirs que l'homme a pour les choses de cette vie. Dont la vehemence s'estant emportée, par la seduction de Satan, à transgresser le Commandement de Dieu, le peché qui consiste en l'amour de soy-mesme par dessus Dieu, s'en est formé en la volonté de l'homme. Ce qui l'a corrompuë & l'a renduë inhabile à tout bien. Car c'est ainsi que le cœur a esté occupé par la convoitise, & que l'entendement en a esté obscurci.

Vous adioustez, *qu'aussi tost que l'ame est separée de cette chair, il n'y a plus rien en elle qui trouble l'œuvre de l'esprit.* Pour raison dequoy vous attribuez à la separation de l'ame d'avec la chair l'extirpation du peché. Tout cela est particulier à vostre meditation, & me ressent vn peu plus la Philosophie de Socrate, que la Theologie de S. Paul. Que direz-vous donc, non seulement des fideles, mais de tous les hommes? Si la separation de l'ame d'avec la chair extirpe le peché, s'ensuiura-t'il pas que toutes les

ames des hommes séparées du corps, sont vuides de peché? Car, selon vostre meditation, la racine du peché estant en la chair, la chair estant aneantie, & l'ame en estant séparée, il s'ensuiura que cette ame séparée sera deliurée du peché. Et la consequence en sera vniuerselle pour toutes les ames séparées. Ce qui seroit en vn mot abolir toute la doctrine Chrestienne, & la grace de Nostre Seigneur Iesus-Christ. Si vous dites que cét effet n'aura lieu que dans les ames où l'œuvre de l'esprit a commencé, comme vous le donnez à entendre: ie vous demanderay la raison pour laquelle la separation de l'ame donnera lieu à l'accomplissement de l'œuvre de l'esprit, & vous n'en trouuerez aucune. Car l'œuvre de l'esprit est la charité, c'est l'amour de Dieu sur toutes choses. Si donc l'esprit n'a peu faire que le fidele durant sa vie ait aimé Dieu plus que soy-mesme, & plus que sa propre chair, c'est à dire qu'il ait aimé Dieu sur toutes choses: dites-moy, pourquoy l'ame estant séparée, l'affection enuers la chair, qui estoit en elle lors de son départ, ne continuera-t'elle en regrets &

en desplaisirs d'auoir perdu ce que, selon  
 vous, elle aimoit encore plus que Dieu?  
 Pour qu'elle cause l'esprit de Dieu, don-  
 né au fidele durant sa vie, qui, selon vous,  
 n'a pas surmonté en l'ame cette affe-  
 ction dominante enuers sa chair, l'estein-  
 dra-t'il en vn moment apres la separatiõ  
 de l'ame? le vous defie d'en alleguer au-  
 cune raison qui vous semble à vous-  
 mesme pertinente. Vous recognoissez  
 que l'affection naturelle de l'ame en-  
 uers sa chair, est celle qui a donné occa-  
 sion à la seduction de l'erreur, pour en-  
 gendrer, en la voloté de l'homme, l'amour  
 de soy-mesme par dessus celuy de Dieu.  
 Et que l'ame, estant entachée du peché,  
 demeure tousiours vicieuse, iusqu'à ce  
 que la grace de l'esprit de Christ, donné  
 au fidele en la communion de sa Croix,  
 l'en deliure. C'est pourquoy les ames  
 des infideles, serues de peché pour cét  
 amour dominant, qu'elles ont enuers  
 leur chair, estant separées de leur chair,  
 ne sont pas moins vicieuses. Car ce  
 mesme amour demeure en elles, qui pro-  
 duit, par la perte de leur chair, & de  
 tous les biens qu'elles aimoient, le re-  
 gret, le desplaisir, l'impatience, & le

desespoir, que l'Eſcriture appelle, *Le ver  
qui ne meurt point, & le feu qui ne s'eſteint  
point.* Or poſez, comme vous faites,  
que l'eſprit de Chriſt donné au fidele  
n'ait point ſurmonté en leur ame, cette  
affectiō dominante enuers leur chair,  
& qu'il n'ait point produit en elles la  
charité & la dilection de Dieu ſur per-  
tes chſes : ſ'enſuiura-t'il pas que la meſ-  
me proportion du degré de vice ( telle  
qu'il vous plaira l'eſtablir ) demeurera  
en l'ame du fidelle ſeparée, comme en  
l'ame de l'infidelle. Et la meſme pro-  
portion de regret, de deſplaiſir, d'impä-  
tience, & de deſespoir, pour auoir per-  
du, ce que, ſelon vous, elle aimoit plus  
que Dieu. Dites-moy vne raiſon pour-  
quoy l'eſprit donné au fidele iuſques à  
ſon départ de ce monde, & qui iuſques  
alors n'a peu ſurmonter en luy l'amour  
de ſoy-meſme, l'eſteindra à l'inſtant que  
l'ame ſera ſeparée du corps.

Je voy bien par voſtre diſcours, que  
voſtre eſprit s'eſt trouué en peine ſur  
cette penſée. Car n'en pouuant trouuer  
aucune raiſon, vous auez eu recours à  
vne autre ſoultion. C'eſt pourquoy vous  
dites, pour quelque ſupplément à ce que

vous trouuez defaillir en vostre raisonnement precedent, Outre que Dieu, qui opere comme il luy plaist, fait alors abonder sa vertu en l'ame: & par ainsi ce qui auoit esté commencée en elle de la regeneration se parfait. Aduoñiez que quand on porte sa pensée aux choses de Dieu, *παι' ο' υ' λεγω' τα*, outre les limites de l'Escripture, & de la tradition laissée à l'Eglise par les Apostres, on s'emporte bien loin. Je voudrois bien que vous voulussiez produire quelque texte de l'Escripture, qui vous ait appris, que Dieu fait abonder sa vertu en l'ame incontinent apres la separation du corps par où la regeneration commencée se parfait. Pardonnez-moy, Monsieur, si ie vous di, qu'en cette meditation vous avez peu pensé à la vraye raison par laquelle nostre regeneration se commence, s'accroist, & s'accomplit. Vous dites que Dieu opere comme il luy plaist. Dieu ne nous a-t'il donc point reuelé en sa parole comment il luy plaist operer en l'œuvre de nostre regeneration. N'avez-vous pas appris de l'Apostre cét Oracle qui luy fut respondu. *Ma grace te suffit, car ma vertu se parfait en infirmité.* Et n'avez-vous pas

appris la leçon que l'Apostre s'en fait à  
 luy-mesme, & qu'il nous donne à tous  
 en son exemple, quand il adioust, *Je me  
 glorifieray donc plustost tres-volontiers en  
 mes infirmitéz, afin que la vertu de Christ  
 habite en moy. Et pourtant ie pren plaisir  
 en infirmitéz, en iniures, en necessitez, en  
 persecutions & angoisses pour Christ; car  
 quand ie suis foible, adonc ie suis fort.* Cet-  
 te vertu de Christ habitant en nous, &  
 qui se parfait, est nostre regeneration.  
 Or elle se forme & se parfait en la com-  
 munion de la Croix de Christ, par la-  
 quelle le monde nous est crucifié, & nous  
 au monde. C'est ainsi qu'il plaist à Dieu  
 operer pour nostre regeneration. Car le  
 bon plaisir du Pere a esté de sauuer les  
 croyans par la folie de la Croix. Et pour-  
 tant, ceux qui sont en Christ, c'est à dire  
 en la communion de la Croix, ont cru-  
 cifié la chair avec ses conuoitises, pour-  
 ce qu'ils reçoient l'abondance de l'e-  
 sprit, par lequel ils mortifient les faits du  
 corps. Or le dernier exercice de la  
 Croix, & le plus grand de tous, est la  
 mort. Et pourtant c'est en ce dernier  
 acte que se consomme & parfait la re-  
 generation du fidele. Si en ce dernier a-

Et l'homme n'est parfaitement regeneré, s'il ne renonce à l'amour de soy-mesme, de sa chair, & du monde, par vn amour de Dieu, plus grand en luy que l'amour de toute autre chose, iamaïs cette vraye charité, en laquelle la parfaite saincteté consiste, n'aura place en luy. C'est folie d'en attendre la perfection apres la separation physique de l'ame d'avec la chair. C'est abuser le monde de le repaistre d'une esperance telle, qui n'a fondement quelconque, ny en la doctrine de l'Euangile, ny en l'analogie de ses raisons. C'est ignorer, en vn mot, la science de la Croix de Christ. Et certes rien ne vous fait disputer contre la perfection de la saincteté des fideles en cette vie, que pour ce que vous n'avez point compris, comme il appartient, les raisons de la vraye science de la Croix, qui est toute la doctrine de l'Euangile. Et ce que ie me suis proposé de vous faire mieux entendre, & mieux prescher que vous n'avez fait iusques icy. Dont ie recognoy desia, graces à Dieu, quelque fruit en vos presches, & en vos exhortations ordinaires.

Le dernier point de vostre response

ne conuient, ce me semble; ny à nostre discours, ny à vostre raisonnement. Je ne sçay pas pourquoy vous inferez qu'on peut disputer contre le moment de la mort par la mesme raison que ie conclu: Que si le fidele ne reçoit en ce siecle, la saincteté qui le rend capable de voir la face de Dieu au départ de cette vie, il faudra establir vn temps entre deux & vn tiers lieu, où les ames séparées du corps se purgent de leur souillure. Quelle similitude trouuez-vous entre le moment de la mort, qui separe l'ame du corps, & entre la perfection de l'habitude de saincteté, qui se forme en l'ame du fidele? Ne peut-on pas dire que cette habitude se parfait durant la vie de l'homme? Celuy qui parle ainsi presuppofe-t'il, en l'vne ou en l'autre des parties de son discours, quelque chose d'absurde? Nenny certes. Pourquoi! Pource que l'ame, qui est le suiet où l'habitude de saincteté se forme, subsiste, & durant la vie, & apres la vie de l'homme. Et pourtant les actes par lesquels cette habitude est formée, se pourroient continuer apres la vie, pource que l'ame qui

en est le ſuiet, ſubſiſte apres la vie. Mais  
 celuy qui argumente, comme vous pre-  
 ſuppoſez, que la mort aduient, ou pen-  
 dant la vie, ou apres la vie, dit choſe ma-  
 niſteſtement abſurde & impertinente.  
 Car la mort n'eſt pas quelque habitude  
 d'un ſuiet. C'eſt la fin & le terme de la  
 durée du ſuiet. C'eſt pourquoy celuy  
 qui dit que la mort aduient durant la  
 vie, dit choſe abſurde & incompatible.  
 Pour ce que la vie ne dure plus quand  
 la mort aduient, veu que la mort n'eſt  
 meſme autre choſe que la fin de ſa du-  
 rée. Et pareille encore eſt l'abſurdité  
 de celuy qui dit, que la mort aduient a-  
 pres la vie. Car cet *apres la vie* denote  
 vne durée de temps, incompatible &  
 contradictoire avec le moment de la  
 mort, qui a fini le temps de la vie. Ainſi  
 les deux parties du dilemme de celuy qui  
 poſe le moment de la mort, ou durant la  
 vie, ou apres la vie, ſont abſurdes & fauſ-  
 ſes. Mais les deux parties du dilemme de  
 celuy qui dit, que la perfection de l'habi-  
 tude de ſaincteté, peut auoir lieu, ou du-  
 rant la vie, ou apres la vie, n'eſt en rien  
 abſurde, ny incompatible avec la verité.

Et par consequent ma conclusion subsiste inuincible, que si la sainteté, qui rend le fidele capable de voir la face de Dieu, n'est parfaite en cette vie, il faut qu'après cette vie il y ait vn temps entre deux & vn tiers lieu, où cette perfection s'accôplisse auant que le fidele voye la face de Dieu. Car toute habitude ne se peut former qu'en temps. Faites ce temps tant bref qu'il vous plaira, ce sera toujours vn temps depuis la separation de l'ame d'avec la chair. Que s'il faut disputer sur la briefueté, ou sur la durée du temps necessaire à paracheuer, après la mort, la sainteté cômencée durât la vie, c'est où ie croy que vous vous trouuerez bien empesché. Les raisons de ceux qui soustiendront cōtre vous, qu'il faut plus & moins de temps, pour paracheuer la perfection de l'habitude de sainteté, en ceux en qui elle a esté plus ou moins aduancée en cette vie, auront beaucoup plus de poids & de fondement, que celles par lesquelles vous voudriez defendre l'egalité de temps, pour parfaire le plus & le moins de sainteté aux vns ou aux autres. Je ne dispute pas maintenant

Et les raisons de ceux qui soustiennent,  
 qu'il y a vn temps entre deux, & vn tiers  
 lieu, où doiuent estre purgées les ames  
 de ceux qui n'ont accompli, en leur vie,  
 la saincteté necessaire pour voir la face  
 de Dieu, sont conformes, ou non, à l'ana-  
 logie de l'Euangile. Mais ie di quelles  
 sont inuincibles au presuppposé que vous  
 faites, que la saincteté necessaire pour  
 voir la face de Dieu, ne se parfait en au-  
 cun fidele durant cette vie. Ce qui est  
 introduire, non pour quelques-vns seu-  
 lement, mais pour tous les fideles vni-  
 uersellement, la necessité d'estre purgez  
 de leur souillure, & de paracheuer leur  
 saincteté apres cette vie, pour voir la fa-  
 ce de Dieu, & auant qu'ils y soient ad-  
 mis. Car quand vous nous dites, que  
 cét accomplissement de saincteté se pa-  
 racheue au moment de la separation de  
 l'ame & du corps, on vous dira que vous  
 estes le premier qui ayez mis en auant  
 cette pensée ; que vous ne sçauriez  
 authentifier de la moindre parole de  
 l'Escripture, ny d'aucune raison ti-  
 rée de l'analogie de la Foy. Tous nos  
 Reformateurs qui disputent contre  
 la

le purgatoire, disent qu'il n'y a point d'autre purgation de nos pechez que le sang de Christ. Et, par cette purgation, ils entendent l'imputation de son obeissance, par le merite de laquelle tous nos pechez nous soient pardonnez. Or cette imputation se fait, selon eux, au moment que chaque fidele croit. Pource qu'en ce moment Dieu le reputé iuste encore qu'il ne le soit pas. Et, en consequence de cette iustice imputée, il est rendu capable de voir la face de Dieu & de iouir de la beatitude eternelle, lors qu'il est retiré de cette vie. Mais non en consequence d'aucune iustice & sainteté. La perfection de laquelle n'est necessaire, selon ce dogme, ny en cette vie, ny au moment de la separation de l'ame & du corps, pour voir la face de Dieu. Estant assez que le fidele ait, en sortant de cette vie, comme il a eu des le moment qu'il a creu, les espaules couuertes du manteau de la iustice de Christ imputée, quelque peu ou prou de sainteté, ou quelque peu ou prou de souilleure qui soit en luy. C'est ainsi qu'ils

ont entendu que le sang de Iesus-Christ nous purge de tout peché. Et c'est sur ce fondement qu'ils disputent contre la doctrine du purgatoire. Mais vous vous estes detraqué de leurs sentiers. Vous vous en estes frayé vn nouveau. Vous voulez, que la iustice & la sainteté parfaite soit nécessaire au fidele pour voir la face de Dieu. Cependant, avec eux, vous ne voulez pas que la sainteté puisse estre parfaite en aucun fidele en cette vie. Vous ne voulez pas aussi cōsentir avec ceux qui establisent la nécessité d'un purgatoire apres cette vie, lequel il vous faudroit eslargir afin de le rendre vniuersel pour tous les fideles. Pour euitier donc la nécessité d'un purgatoire pour tous les fideles, vous introduisez vn nouveau dogme en la religion. Qu'au moment de la separation de l'ame & du corps, la sainteté parfaite s'accomplit en tous les fideles, en quelque haut ou bas degré de sainteté auquel ils fussent paruenus durant la vie. Vous sçavez que sur la doctrine de l'Estat des morts apres cette vie, & en attendant

le iugement dernier, les Catholiques & toute l'Eglise, ont tousiours retenu & pratiqué la priere pour tous les fideles trespassez, Apostres, Martyrs, & tous autres, comme attendans tous le iugement & la couronne qui doit estre donnee en ce iour-là apres la resurrection. Sur le sujet des prieres ainsi pratiquées par l'Eglise, priants Dieu continuellement, mesme en l'exercice du sacrifice solennel, *Qu'il ait memoire de ceux qui reposent au sommeil de paix*, vous sçavez qu'il s'est meu vne question, Quel besoin les fideles ont, & quelle ayde ils reçoivent, des prieres de l'Eglise? Vous n'ignorez pas, que là dessus les Docteurs sont entrez en la distinction & en la difference qu'ils ont fait entre l'estat de saincteté auquel les fideles differemment paruenus sortent de cette vie. Vous sçavez ce que saint Augustin escrit au traitté qu'il a fait du soin qu'on doit auoir des morts. Qu'il y en a de qui les bons merites sont tels, que l'ayde de nos prieres n'est pas necessaire pour leur soulagement, d'autres de qui les mauuais me-

rites sont tels, que nos prières ne leur  
 33 peuvent de rien servir. Et d'autres fi-  
 33 nalement, de qui les merites sont tels,  
 33 qu'ils ont acquis par eux que les suffra-  
 33 ges & prieres de l'Eglise leur seruent.  
 33 Et pour cette raison luy mesme di-  
 stingue ailleurs les hommes entrois  
 classes. Il appelle les vns *Omnino malos*,  
*tout à fait mauvais*. Ce sont ceux pour  
 qui les prieres de l'Eglise ne seruent  
 de rien. Les autres, *Omnino bonos*, *tout*  
*à fait bons*. Ce sont ceux pour qui les  
 prieres de l'Eglise ne sont point ne-  
 cessaires. Et les tiers finalement, *non*  
*omnino malos, neque omnino bonos*. Ny  
*tout à fait mauvais*, ny *tout à fait bons*.  
 Ce sont ceux pour qui il estime que les  
 prieres de l'Eglise sont necessaires &  
 utiles. Cette distinction, & la conclu-  
 sion qui la suit, sont fondees tât en cet-  
 te proposition, *que nul sans la sainteté*  
*ne verra Dieu* : qu'en cette opinion, *que*  
*la sainteté de quelques fideles n'est pas*  
*parfaite en cette vie, mais seulement com-*  
*mencee*. Car puis qu'illa faut parache-  
 uer, il est besoin de prier Dieu pour  
 eux afin qu'ils en obtiennent l'accom-

plissement, & que Dieu pour cet effect leur continue la remission de leurs pechez. Je ne dispute pas, si telle a esté la fin & la raison de la priere pour les morts instituee en l'Eglise par les Apostres. Car il est bien certain que l'Eglise a receu & a pratiqué tousiours l'usage de prier pour ceux de la parfaicte saincteté lesquels elle ne doute nullement, c'est à sçauoir des Apostres & des Martyrs. Ce qui monstre que la fin de sa priere n'a pas esté l'accomplissement de la saincteté de ceux pour qui elle prie, mais leur recommandation pour le iour du couronnement. Mais, quoy qu'il y ait, c'est bien raisonner, posé qu'il y ait des fideles imparfaicts en saincteté au depart de cette vie, non dignes pourtant, pour l'aduancement qu'ils y ont desia receu, d'estre exclus du Royaume des Cieux: que pour eux il soit besoin de prier Dieu, qu'il paracheue ce qu'il a commencé en eux. Et de croire, à cet effect, qu'il faut vn temps entre deux, & vn lieu, par consequent, où ils soient detenus, auant qu'ils voyent la

face de Dieu. Vous donc, qui reconnoissez la verité de cette maxime, *que sans la sainteté nul ne verra Dieu*, & qui enseignez, qu'en cette vie nul fidele ne parvient à vne sainteté parfaite, pourquoy disputez-vous contre le tiers lieu, cōtre le purgatoire, où par quelque espace de tēps cesames a demy sanctifices, paracheuēt de se purger de leur souilleure? Pourquoy ne le iugez vo<sup>r</sup> pas necessaire? Si vous dictes, que vous ne trouuez rien en l'Escripture qui fauorise l'opinion du Purgatoire: y trouuerez-vous quelquetefmoignage qui fauorise d'auantage vostre opinion nouuelle, que la sainteté des fideles, pour peu qu'ils en ayent eu en cette vie, est parfaite en vn instant, au moment de la separation de l'ame & du corps? Dire que le Purgatoire contrarie à la purification du sang de Christ, par où vous entendez la remission des pechez, c'est sans raison & contre l'intention de ceux qui defendent le Purgatoire. Car ils respondent, qu'en consequence de la remission des pechez acquise

par le Sang de Christ, les peines de Purgatoire ne sont point eternelles, lesquelles le seroient, sans que la remission des pechez acquise par le Sang de Christ est appliquee à ceux qui y sont detenus. Voire que la grace de la remission des pechez, acquise par le Sang de Christ, est ce qui leur rend ces peines salutaires, expiatoires, & Purgatoires, lesquelles autrement leur seroient peines de perdition, de vengeance, & de damnation eternelle. Certes si vous entendiez ou expliquiez selon son sens veritable, ce que l'esprit de Dieu nous enseigne en l'Euangile, que le sang de Christ nous mettoye de tout peché, ou qu'il a fait par son Sang la purgation de nos pechez, non seulement en le rapportant au seul pardon & à la seule remission qu'il nous en a acquise enuers son Pere par l'effusion de son Sang, mais principalement à la vertu qui est en la Communion de ce Sang, par laquelle nous mourons à peché en la mortification de nostre chair, afin que par la communion de son esprit

nous viuions en nouueauté de vie : alors vous cognoistriez , que nostre sainteté s'aduance à mesure que nous beuons, de iour en iour, le Sang du Seigneur , & que nous mangeons sa chair, non par imputation , mais reellement , veritablement , & corporellement. Et qu'en cette participation veritable le consolateur d'en haut, éleuant nos cœurs vers les choses qui y sont , nous sanctifie continuellement , iusqu'à ce qu'il en parachèue l'œuvre à la fin de la course & du combat , lors que nous remettons nostre depost entre les mains de Dieu , qui nous le gardera fidelement iusques à la iournée de Christ, en laquelle il nous rendra la couronne. Si vous entendiez ainsi l'Euangile, vous ne seriez pas fort en peine pour les peines que doivent craindre ou attendre ceux qui meurent ainsi au Seigneur. Vous ne disputeriez point aussi contre la nécessité de la perfection de iustice & de sainteté que doivent auoir tous ceux qui desirent, au depart de cette vie,

voir la face de Dieu.

Or tout ainsi que ma raison precedente demeure inuincible, & qu'en niant que la saincteté des fideles s'accomplisse en cette vie, vous estes obligé de poser vn temps & vn lieu où elle se paracheue en l'autre vie: vous ne pouuez non plus satisfaire aux raisons, par où ie vous monstre, que vostre accomplissement de saincteté ne peut auoir lieu apres cette vie. Mes raisons sont, que la saincteté consiste ici en obeissance, & que l'obeissance presuppose vn commandement. Ce qui est euident pour la conformité que nostre saincteté doit auoir à celle de Iesus-Christ, lequel obeyssant au commandement & à la volonté du Pere, a accompli vn parfait amour de Dieu sur toutes choses, & vne parfaicte charité enuers nous, en renonçant à soy mesme pour la gloire de son Pere, & pour nostre salut, & en se donnant soy mesme à la mort. Ie vous demande donc quelle est l'obeissance pareille, & quel est le commandement sem-

blable, que les ames separee du corps  
 puissent accomplir, pour parfaire la sainte-  
 tete que les fideles n'ont peu parfaire  
 en cette vie? Si les fideles, en cette  
 vie, ne pouuans paruenir à vne sainte-  
 tete parfaite, se sont par consequent  
 aimez soy-mesme plus que Dieu, s'ils  
 ont tant aymé leur propre vie & leur  
 chair qu'ils n'ayent peu, pour la  
 gloire de Dieu & pour l'amour de  
 leurs freres, renoncer aux conuoiti-  
 ses d'icelles. Et que mesme, en mou-  
 rant, leur ame, en qui l'amour de  
 soy-mesme surpassoit l'amour de  
 Dieu, n'ait peu quitter sa chair, ce  
 monde, & ses plaisirs, qu'avec regret  
 & torment: ie vous demande, com-  
 ment en l'autre vie cette ame obeira-  
 t'elle au commandement de Dieu, de  
 renoncer à l'amour de sa chair & du  
 monde, lors qu'il ne s'agit plus de  
 depouiller sa chair & le monde, où  
 elle ne conuerse plus? Comment ob-  
 tiendra t'elle, par cette voye, la  
 perfection qu'elle n'a pas eue, en  
 cette vie, d'une saintete conforme  
 à celle de Christ. C'est l'objection

que ie vous ay faiçte, & à laquelle vous auez deu satisfaire. A cela vostre response est pag. 37. *Que la saincteté consistant à aymer Dieu de tout son cœur: si cet amour est parfait, aussi est la saincteté.* Or cet amour est parfait au moment que l'ame, en laquelle l'esprit de Dieu a commencé de le produire, est depouillée de la conuoitise charnelle laquelle la troubloît. Et quand à ce que vous demandez, où sont contenus les commandemens faits à l'ame au depart de ceste vie, ie di que le commandement d'aimer Dieu, n'est pas necessairement fait au dehors, veu qu'on s'y sent obligé naturellement. Et secondement que les Saincts dans le Ciel aiment Dieu par la perfection de leur inclination, non plus par la loy & commandement.

Si vous auez creu auoir satisfait par cette response à mon obiection, ie feray, par ma reплика, que vous ne le croitez plus. Je suis d'accord avec vous de vostre premiere proposition, *Que la saincteté consiste en l'amour de Dieu de tout nostre cœur.* Et que si cet amour est parfait, nostre saincteté est parfaite. Sur vostre assomption ie requier que vous

nous disiez, pour quelle raison l'ame,  
 en laquelle l'esprit de Dieu a commen-  
 cé de produire son amour, mais impar-  
 fait, & qui tient plus de la conuoitise  
 charnelle (c'est à dire qu'elle aime plus  
 sa chair que Dieu) estant separée de sa  
 chair par la dissolution de la mort, est  
 depouillée de l'amour qu'elle auoit à sa  
 chair? Dites nous pourquoy l'ame, qui  
 aimoit mieux sa chair que Dieu, en la  
 quittant, & qui, par consequent, eust  
 bien voulu n'en estre point separée.  
 Qui n'en est separée qu'avec grand re-  
 gret & grande douleur. Qui a plus de  
 tristesse de quitter sa chair que de  
 ioye d'aller à Dieu. Et en qui l'Esprit de  
 Dieu n'auoit produit qu'un amour de  
 Dieu imparfait, inferieur à celuy de  
 sa chair. Dittes nous, ie vous prie, com-  
 ment, au moment qu'elle est separée,  
 est elle pleinement sanctifiée? Com-  
 ment l'amour de Dieu est-il par-  
 fait en elle? Comment est elle  
 despouillée de la conuoitise char-  
 nelle qui la troubloit? Est ce la separa-  
 tion mesme qui produit cet effect?

Est-ce en vertu d'elle ? Si cela est, pareil effect aura lieu en toutes les ames separees. La conuoitise de la chair qui les troubloit, ne les troublera plus. L'amour de soy-mesme ne dominera plus en elles. Tous les morts seront biẽ heureux. Il n'y aura personne de damné. C'est à peu pres la Theologie, qui veut s'autoriser sur les fondemens de la quadrature du cercle, aussi diuinement trouuée. Je suis bien certain que vous ne l'approuuez pas. Direz-vous que l'Esprit de Dieu, qui auoit commencé la saincteté imparfaicte en ces ames auant la separation, l'accomplit apres qu'elles sont separées ? Mais cela n'est autre chose que de remettre en auant la matiere mesme sur laquelle ie vous ay fait mes obiections. Ce n'est pas les foudre. C'est là dessus que ie vous di, que si l'Esprit de Christ, qui a commencé la saincteté aux fideles, est celuy qui la paracheue, il en fera la perfection par la mesme voye qu'il en a fait le commencement en cette vie. Or l'œuure de l'Esprit de Dieu dans les fideles, est l'obeïssance à la volonté de

Dieu, semblable à celle de Christ à la  
 volonté de son Pere. C'est que nous  
 souffrions & mourions avec luy. C'est  
 que nous souffrions & mourions pour  
 sa gloire, comme il a souffert & qu'il  
 est mort pour nostre salut. Je vous de-  
 mande donc. A vous qui voulez que  
 nostre sainteté, nostre amour envers  
 Dieu, c'est à dire nostre obéissance à  
 sa volonté en souffrant & mourant  
 avec son fils, n'ait pas esté accomplie  
 & parfaicte par le saint Esprit dans les  
 fideles icy bas. Voulez vous qu'après le  
 trespas, après la separation de l'ame &  
 du corps, il leur reste encore de souffrir  
 & de mourir avec Iesus-Christ? C'est  
 pour cela que ie vous ay demandé, où  
 sont contenus les commandemens  
 faits à l'ame au depart de cette vie,  
 pour l'obéissance que nous devons à  
 la volonté de Dieu, en laquelle nostre  
 amour envers luy sur toutes choses, &  
 nostre parfaicte sainteté consiste.  
 Mais vous ne m'avez peu entendre. Ne  
 comprenât pas, qu'il n'y a point de plus  
 grand commandement, ny d'obéis-  
 sance plus parfaicte, que celle de met-

tre nostre ame pour l'amour de Christ,  
de souffrir avec luy. C'est en cela que  
consiste le merite du fidele, qui gist en  
sa conformité avec Iesus-Christ. Car  
le merite est en la charité, laquelle  
combat ici bas par foy & par esperance.  
Le merite n'est plus où la charité se  
repose en la iouissance. C'est pourquoy  
le merite n'est qu'en cette vie, & non  
en l'autre, où est la couronne & la  
recompense du merite.

Et quant à la response, que vous  
auiez cherchée, pour eluder la necessité  
du commandement, en l'obeissance  
duquel ie vous requerois que vous  
nous monstrassiez que l'esprit de Dieu  
paracheue, en l'ame du fidele separee,  
la sainteté imparfaite en la vie pre-  
sente: vous ne respondes rien pour  
la solution de la demande. Car quand  
vous dictes, *que le commandement d'ai-  
mer Dieu n'est pas necessairement fait au  
dehors, veu qu'on s'y sent obligé naturelle-  
ment*: Ce n'est rien dire quand mesme  
ce que vous dites seroit vray. Mais ie  
vous di moy, que le commandement  
fait ici à l'homme d'aimer Dieu est neces-

fairement fait au dehors. Pour ce  
 que le commandement d'aimer Dieu,  
 est de l'aimer plus que nous mesmes,  
 plus que nostre chair, plus que toutes  
 choses; à quoy l'homme ne se sent  
 nullement obligé naturellement.  
 Temoin ce que le premier homme  
 nous en a fait cognoistre par son  
 exemple. Car s'il eut senti naturelle-  
 ment qu'il est obligé d'aimer Dieu  
 plus que soy-mesme, & plus que sa  
 chair, iamaïs il ne se seroit porté à  
 desirer de se faire égal à Dieu, en  
 assouuissant la conuoitise de sa chair,  
 par la transgression de la defense de  
 Dieu, & par le mespris de sa menace.  
 Le sentiment de cette obligation  
 d'aimer Dieu plus que soy-mesme, &  
 plus que sa chair, & plus que toutes  
 choses, n'estoit nullement imprimé  
 naturellement en l'ame de l'homme.  
 Ce sentiment ne vient point de la  
 nature, mais du seul esprit de Dieu  
 en l'homme, par la grace de Iesus-  
 Christ. Ce que vous en dictes vient de  
 la mesme inaduertance, qui a causé  
 l'erreur de ceux qui ont fait de la  
 pureté

& de l'integrité naturelle, en laquelle Adam a esté créé de Dieu, vne habitude de iustice, & de saincteté parfaite. Qui est vne fausseté premiere, laquelle a engendré, en l'esprit de ses auteurs, & de ceux qui les suivent, beaucoup de trouble & de confusion dans les principes & dans les hypotheses de la Theologie. Or le commandement fait à l'homme d'aimer Dieu de tout son cœur, plus que soy-mesme, plus que sa chair, plus que toutes choses, afin d'accomplir toute iustice & vraye saincteté, est necessairement fait au dehors. Pour ce que sa chair & les choses qui luy appartiennent, par le renoncement desquelles ce commandement s'exécute, sont externes. La raison de l'obeissance, par laquelle le fidele exécute ce commandement, est bien interne à la verité & nō externe. Pour ce qu'elle depend, non du principe externe de l'obeissance, qui est le frâc-arbitre & l'affection de la chair: mais du principe interne qui est l'affection de l'esprit. Car c'est l'esprit de Dieu qui graue en nos cœurs ce comman-

dement, que le vieil homme ne cognoist point, que l'homme animal ne comprend point, dont le premier Adam n'a iamais eu de sentiment naturel, qui est d'aimer Dieu plus que nous mesmes, plus que nostre chair, plus que ce monde, plus que toutes choses. La matiere du commandement estant donc le renoncement à nous mesmes, à nostre chair, & à ce monde, par la communion de la croix de Chr. en laquelle nous sommes crucifiez à ce monde & ce monde à nous, le commandement est externe. Mais pour ce que le saint Esprit forme en nous, par l'esperance de la gloire de Christ, la ioye & la delectation que nous recevons au milieu de nos plus griefues tribulations, mesme en la mort: la forme du cōmandement imprimee en nostre ame, c'est à dire l'obeissance de cœur à iustice, laquelle est accomplie en l'execution de ce commandement, est interne. Car en l'execution de ce commandement consiste la vraye circoncision du cœur, la parfaite charité, l'amour de Dieu sur toutes choses, &

de nostre prochain comme de nous  
mesmes. Ainsi ce que vous dictes, que  
ce commandement n'est pas fait à  
l'homme au dehors, n'est pas veritable.  
Il est donné au dehors, mais il est ac-  
complí au dedans. En cela different  
des commandemens singuliers de la  
loy, qui sont faits au dehors, & accom-  
plis aussi au dehors, par le mouuement  
du cœur dont le principe est externe  
& charnel, c'est à sçauoir l'affection  
des biens & des plaisirs de cet-  
te chair. Or il a esté necessaire que  
ce commandement, qui a esté  
donné à l'homme pour le faire, de pe-  
cheur iuste, de vicieux & abandonné  
à l'amour de soy-mesme, saint & es-  
pris de l'amour de Dieu sur toutes  
choses, fust donné au dehors. Afin que  
le fidele depouillast l'homme exte-  
rieur, & qu'en le depouillant il fust re-  
nouuélé en l'homme interieur, qui  
se parfait à mesure que l'homme ex-  
terieur se dechet, par la destruction  
de cette chair.

Sur cela vous entendrez, que ce que  
vous dictes en second lieu, que les

*saincts dans le Ciel aiment Dieu par la perfection de leur inclination, non plus par loy & commandement est bien veritable. Mais qu'il ne fait rien contre ce que ie vous auois dit, qu'il est necessaire qu'il y ait vn commandement pour parfaire, par son obeissance, la sainteté imparfaicte en l'ame du fidele mort. Car puis qu'il s'agit de scauoir, comment les fideles imparfaitement iustes & saincts au depart de cette vie, (comme vous voulez) sont menez à la perfection de iustice & de sainteté en l'autre: il est necessaire que vous disiez, quel est le cōmandement, en l'obeissance duquel ils accomplissent la iustice & la sainteté, en eux commencee. Si ce commandement & cette obeissance sont les mesmes que ceux par où la sainteté a esté commencee en l'homme, il faut dire qu'apres cette vie les fideles doiuent encore souffrir & mourir avec Christ. Si cela vous desplaist, & s'il vous semble absurde ( comme il est vray semblable ) vous ne deuez pas trouuer mauuais, que ie vous demãde, quel est*

donc ce commandemēt & cette obeissance, en laquelle la iustice & la sainteté des fideles, commencee en cette vie, est accomplie en l'autre. Car de me dire, *que les saints aiment Dieu au Ciel par la perfection de leur inclination.* C'est respōdre hors de propos de la demande. Il s'agit de sçauoir, non comment ceux qui sont parfaits obeissent, mais comment ceux, dont la sainteté est imparfaicte en cette vie, l'accomplissent apres cette vie, en obeissant à la volonté de Dieu. Pour cela il est nécessaire que vous respondiez, quelle est la volonté de Dieu, & quelle est l'obeissance qu'ils luy doiuent rendre. Et non pas respondre, comme vous faictes, *que les saints dans le Ciel aiment Dieu par la perfection de leur inclination, non plus par loy & commandement.*

Que si ie vous auois demandé encore, pourquoy les Saints dans le Ciel aiment Dieu, non par loy & commandement, mais par la perfection de leur inclination, ie sçay que vous seriez empesché de me respondre. Est-ce

donc, que l'obeissance au commande-  
 ment & à la loy de Dieu repugne à l'e-  
 stat de ceux qui obeissent par la perfe-  
 ction de leur inclination? Est-ce la rai-  
 son de l'opposition que vous faiçtes  
 entre l'une & l'autre? Il est necessaire  
 que vous le presumiez ainsi. Puis que  
 vous opposez, pour ce regard, l'obeis-  
 sance de ceux qui aiment Dieu en cette  
 vie, suiuant son commandement & sa  
 loy, comme ayans vne iustice impar-  
 faite: à ceux qui dans le Ciel aiment  
 Dieu par la perfection de leur inclina-  
 tion, non plus par loy & commande-  
 ment. Mais si tel est vostre sens & vo-  
 stre opinion, vous faiçtes vne merueil-  
 leuse offense à la saincteté de Iesus-  
 Christ. Lequel, en cette vie, a obei à  
 la volonté du Pere, & au commande-  
 ment qu'il a receu de luy, de mettre sa  
 vie pour ses brebis. Ce qu'il a fait  
 neantmoins par la perfection de son  
 son inclination. Ce qui vous doit ap-  
 prendre que l'obeissance au comman-  
 dement de Dieu, & la perfection de  
 l'inclination par laquelle on y obeit, ne  
 se contredisent point de leur nature.

Pour quelle raison donc est-ce que les Saints dans le Ciel aiment Dieu, non par l'obeissance à quelque loy ou commandement qui leur soit donné, mais par la perfection de leur inclination? C'est ce qui merite bien d'estre expliqué.

Toute loy & commandement est accompagné de la promesse d'un bien qui en doit suivre l'exécution en celuy qui obeit. La promesse forme l'esperance en l'esprit de celuy à qui le commandement est donné. Ainsi quiconque obeit au commandement donné, le fait pour l'esperance du bien promis & proposé à l'obeissance. L'esperance suppose donc vne promesse, la promesse vne loy & commandement dont elle est condition. Mais quand l'esperance est accomplie, quand l'esperance du bien promis a passé en possession & en iouissance, alors cesse la raison de la loy & du commandement. La matiere presentee à l'exercice de l'amour, qui se produit & se manifeste par l'obeissance au commandement, n'a plus de lieu. Pour ce que la cause de

l'amour est remplie par la possession du bien, laquelle oste tout exercice & toute agitation à l'affection. Ce qui peut estre fort biē comparé à la nature du feu, lequel estant ici bas a besoin de matiere & est en perpetuel mouuement. Mais lors qu'il a obtenu son lieu naturel, il y est en repos, sans agitation & sans besoin de matiere. Ainsi en est il de l'amour des fideles enuers Dieu, & de l'obeissance qu'ils rendent à ses commandemens par cet amour, tandis qu'ils sont ici bas. Car iusqu'à ce qu'ils possèdent la plenitude de leur biē, leur amour a besoin d'une matiere qui l'exerce. Cette matiere sont les commandemens Euangeliques, dont l'exécution s'accomplit par la tolerance de la croix & de son exercice selon patience & charité.

Consideron maintenant vostre response, à l'argument tiré des paroles de l'Apostre Eph. 4. pour la parfaicte saincteté des fideles en cette vie, lesquels il dit, *paruenir en homme parfait à la mesure de la parfaicte stature de Christ.*

Mon argument est clair. Les fideles paruiennent par le miniftre de l'Euāgile en homme parfait à la meſure de la parfaite ſtature de Chriſt. Or le miniftre de l'Euangile, par lequel eſt accomplie l'œuvre de cette parfaite ſtature, a lieu en cette vie. Donc l'œuvre de cette parfaite ſtature eſt accomplie en cette vie. Pour éluder la neceſſité de cet argument inuincible, vous y apportez deux ſolutions. La premiere eſt, *Qu'il s'agit d'une perfection qui conſiſte en la cognoiſſance des dogmes, mais non d'une perfection en ſanctification. Et que cela paroift par ces paroles, afin que nous ne ſoyons plus enfans flottans demenez çà & là à tout vent de doctrine.* Continuez l'allegation de ces meſmes paroles ſelon leur ſuite, & vous y trouuerez voſtre cōdamnation toute eſcrite. *Ains afin que ſuiuans verité avec charité nous croiſſions EN TOVT en celuy qui eſt le cheſ à ſçauoir Chriſt.* Puis que l'Apoſtre adiouſte la charité à la verité, ne conioint-il pas la ſanctification à la cognoiſſance des dogmes? Puis que la perfection dont

il parle consiste aussi en charité, n'est elle pas perfection en sanctification? Puis qu'il dit que nous croissons *en tout, en toutes choses*, τὸ πᾶντα, comment dittes vous, qu'il ne s'agit que de la cognoissance des dogmes? Vous sçavez quel Euangile est le *mystere de pieté*. Mystere à cause de la sublimité de sa cognoissance, que Dieu seule reuelce aux hommes par son Fils & par son Esprit. *De pieté*, à cause que l'effet de cette cognoissance, est, en l'ame de tous fideles, le souuerain amour de Dieu sur toutes choses. Comment separez vous donc, en la parfaicte stature de Christ, la sanctification de la foy, pour reduire cette perfection, τὸ πληρωμα τοῦ Χριστοῦ, l'accomplissement de Christ en nous, à la seule cognoissance des dogmes? Certes si la proportion de la charité n'accompagne la cognoissance, c'est vne cognoissance de Dieu & de son Euangile faussement ainsi nommee. Vous sçavez par cœur ces belles paroles de l'Apostre saint Iean 1. Epist. 2. *Celuy qui dit qu'il cognoist Dieu, & n'aime point son frere, est menteur. Par cela sçauons*

nous, que nous l'auons cognu, si nous gardons ses commandemens. Qui dit, ie l'ay cognu, & ne garde point ses commandemens, il est menteur, & verité n'est point en luy, &c.

L'appuy que vous auez voulu chercher à vostre solution, dans les paroles que vous alleguez de l'Epistre aux Hebreux chap. 5. ne tesmoigne autre chose, que la preoccupation qui vous en a derobé encore le sens. La où vous deuiez, dit l'Apostre, estre maistres, veu le temps, vous auez derechef besoin qu'on vous enseigne les rudiments du commencement des paroles de Dieu. Et vous estes deuenus tels que vous auez encore besoin de lait, & non point de viande ferme. Car quiconque use de lait, ne sçait que c'est de la parole de iustice, car il est enfant. Mais la viande ferme est pour ceux qui sont desia hommes faiets, à sçauoir ceux qui pour y estre habituez, ont les sens exerciez à discerner le bien & le mal. Cette differéce que fait l'Apostre entre les enfans & les hommes faiets, regarde également l'aduancement de la pieté & de la sainteté, comme de la foy

& de la cognoissance. Celuy qui est enfant, defaut en l'un comme en l'autre. Celuy qui est homme fait, est parfait en l'un comme en l'autre. Les enfans sont ceux qui sont encore charnels, & qui cheminent à la façon des hommes. Les parfaits sont ceux qui sont spirituels, & qui cheminent selon le Seigneur. Vous avez deu apprendre la raison de cette difference de Saint Paul 1. Cor. 3. *Mais de moy, freres, ie n'ay peu parler à vous comme à spirituels, mais comme à charnels. Je vous ay donné du laiët à boire & ne vous ay point donné de la viande. Car vous ne la pouuiez encore porter. Mesme maintenant ne le pouuez vous encores, pource que vous estes encores charnels. Car comme ainsi soit qu'il y ait entre vous eueic, & contentions, & partialitez, n'estes vous pas charnels, & ne cheminez vous pas à la façon des hommes ? Vous voyez vne manifeste distinction, que l'Apostre fait ici entre les fideles appelez à la cognoissance de Iesus Christ. Dont les vns sont encore enfans, encore charnels, encore*

cheminans à la façon des hommes. Aufquels il oppofe ceux qui font hommes faicts, fpirituels, & cheminans comme le Seigneur a cheminé. Je voudrois feulement que vous obte-  
 niffiez de vofre confeience, qu'elle vous dift, fi l'Apoftre n'entend pas que ces deux degrez de fideles ont lieu en cette vie? Ou fi vous croyez que tous les fideles, en cette vie, font toujours encore charnels, enfans, cheminans à la façon des hommes? La vocation de tous les fideles ne les appelle t'elle pas, en cette vie, à l'eftat d'hommes faicts, de fpirituels, & cheminans comme le Seigneur a cheminé? Si vous obtenez de vofre confeience de prononcer ce qui en eft, vous terminerez la controuerfe. Voyez vous pas que vous ne fçauriez eftablir la raifon de la difference entre les enfans & les hommes faicts, entre les charnels & les fpirituels, entre ceux qui cheminent à la façon des hommes, & ceux qui cheminent comme le Seigneur a cheminé: que vous ne recognoiffiez aux

hommes faits, spirituels, & cheminans comme le Seigneur a cheminé, la perfection de la iustice & sainteté, opposée à l'imperfection de ceux qui sont encore charnels, enfans, & cheminans à la façon des hommes? Car quand vous voulez arguer, selon le dogme de nos reformateurs, toutes les bonnes œuvres des fideles, d'imperfection, de defaut, & de souillure, vous dittes qu'elles sont telles, pource qu'elles sont tousiours meslees du principe de la chair. Si cela est, tous les fideles seront donc tousiours encore enfans, charnels, & cheminans à la façon des hommes. Il n'y en aura aucun d'hommes faits, de spirituels, & cheminans comme le Seigneur a cheminé. L'Apostre, par consequent, aura eu grand tort de reprocher aux Corinthiens d'estre encor ce que tous les fideles sont tousiours en cette vie. Et de n'estre pas ce que nuls fideles ne peuuent estre en cette vie.

Vostre seconde solution estoit, *que quand il ne s'agiroit pas simplement de ceux qui sont hommes faits,*

quant à la cognoissance des dogmes, mais aussi de ceux qui le sont quant à la sanctification, vous maintenez que leur stature n'est pas dite parfaite, qu'à comparaison de ceux qui sont moins aduancez, & non pas absolument. Cette défaite a derechef son contredict aussi formel, dans les paroles de l'Apostre, que la precedente. Oyez ce qu'il dit, *Tant que nous paruenions TOUS en l'vniuersité de la foy & de la cognoissance du Fils de Dieu, en homme parfait, à la mesure de la parfaite stature de Christ.* Il parle de tous. Il veut que tous y paruiennent. Encore qu'il y ait distinction de conditions & de vocations entre les fideles. Encore qu'il y ait difference entre les membres du corps de Christ. Il veut neantmoins que chaque membre paruienne à la mesure de la parfaite stature de Christ. Ainsi cette parfaite stature, dont il parle, n'est point dite, par l'Apostre, par comparaison entre quelques vns qui paruiennent à cette mesure, & entre d'autres qui n'y paruiennent pas. Vous ne pouuiez rien dire plus

formellement contraire aux paroles  
 & à l'intention de l'Apostre, qui  
 confond vostre distinction par le  
 terme vniuersel de TOVS. Mais  
 quand mesme il y auroit lieu à vos-  
 tre comparaison, il s'ensuiuroit, tout  
 au contraire de ce que vous raison-  
 nez, que la parfaicte stature de Christ  
 deuroit estre entendue ici parfaicte  
 absolument en ceux qui l'obtiennent.  
 Car le terme de perfection est la  
 mesure de la stature de Christ. Tous  
 ceux donc qui paruiennent à cette  
 mesure sont parfaits. Mais apres auoir  
 ainsi maintenu toutes mes raisons, pour  
 la parfaicte iustice & saincteté des fi-  
 deles en cette vie contre vos solutions:  
 il faut maintenant refuter les obie-  
 ctions que vous auez tasché d'apporter  
 au contraire.

CHAP.

## CHAPITRE XI.

*Refutation des obiections contre la parfaite iustice & sainteté des fideles en cette vie, où est aussi destruit le fondement sur lequel la necessité de leur imperfection est appuyée.*

**L**Es obiections que vous faites contre la iustice & la sainteté parfaite des fideles en ceste vie, & les raisons sur lesquelles vous fondez la necessité de leur imperfection sont contenues aux pages 21. 22. & 46. 48. 49. 50. de vostre escrit. A la refutation desquelles ie donneray le present chapitre pour vous deliurer de tout empeschemens sur ceste matiere. Vostre premiere obiection en la page 21. est ceste-cy : *Nous ne pouvons pretendre meriter enuers Dieu par nos bonnes œuvres, pour ce que nous y meslons de nostre part tant de defauts & de manquemens, dont nous auons à demander pardon à Dieu, veu que la chair conuoite continuellement contre l'esprit. Tellement qu'il*

n'y a aucune bonne œuvre en laquelle il n'y ait quelque chose de sa contradiction, selon que dit l'Apostre, Gal. 5. La chair convoite contre l'esprit, & l'esprit contre la chair, & ces choses sont contraires l'une à l'autre, tellement que vous ne faites point ce que vous voudriez. Les defauts & manquemens que vous commettez en l'intelligence de la doctrine de l'Evangile sur ce sujet, sont en grand nombre. Le premier de tous est, que vous ne discernez point, en cet argument, la distinction qu'il faut faire en la difference qu'il y a entre la perfection de la sainteté que nous pouons appeller primitive ou originelle, & entre la perfection de la sainteté que nous pouons appeller derivative ou communiquée. La sainteté primitive ou originelle est celle qui à son existence ensemble, & par nature, & selon le temps, avec l'existence du sujet auquel elle est, ayant sa cause du principe mesme & des causes de l'estre du sujet. La sainteté derivée ou communiquée est postérieure au sujet, infuse ou acquise depuis son existence, n'ayant sa cause ny du principe, ny des causes de l'estre du sujet. Telle est

la perfection de iustice & de sainteté  
 que le Saint Esprit forme aux fideles en  
 ceste vie. Car ce n'est pas vne perfection  
 primitiue ou originelle. Il n'y a eu que  
 Iesus-Christ qui à eu ceste perfection.  
 Non seulement entant qu'il est Dieu  
 eternal avec le Pere, mais aussi entant  
 qu'il est hōme. Ceste sainteté n'appar-  
 tient qu'au second Adam, qui a esté fait  
 en esprit viuiifiant. Le premier Adam  
 qui a esté fait en ame viuante, ne la pas  
 eue. Car encore qu'il ait esté crée entier  
 & droit, non corrompu, quoy que cor-  
 ruptible, il n'a pas esté crée iuste & saint,  
 & n'a point eu la sainteté primitiue par  
 le principe & par les causes de son estre.  
 Car ainsi il auroit esté incorruptible, nō  
 suiet à peché, ny a estre entaché de vice,  
 comme a esté le second Adam, lequel  
 aussi a esté saint de sa nature, & à ceste  
 cause conceu du Saint Esprit. Tous  
 les hommes nez du premier Adam,  
 corrompu & vicié par le peché, & sous la  
 cōdamnation de la peine, sont aussi cor-  
 rompus, vicieux & pecheurs de leur natu-  
 re. L'amour d'eux-mesmes regne en eux.  
 Ils n'ont iustice ny sainteté aucune que  
 celle qui leur est communiquée par la

grace, & qui deriue en eux par la vertu  
 de leur Chef, qui est Iesus-Christ: lequel  
 seul est saint dès son origine. Car sa chair  
 formée du Saint Esprit, au ventre d'une  
 Vierge sanctifiée par le mesme Es-  
 prit, n'ayant point receu, en sa concep-  
 tion, sa cause par l'œuvre de l'homme,  
 n'a rien eu en elle de ce principe vicieux,  
 qui forme naturellement toutes les  
 œuvres de l'homme. L'amour de Dieu  
 sur toutes choses a tousiours & perpe-  
 tuellement dominé en luy. Sa iustice  
 & sa sainteté a esté parfaite dès l'ori-  
 gine. Pource qu'il a esté conçu du S.  
 Esprit, il a esté conçu sans peché, & il a  
 receu l'Esprit sans mesure pour le com-  
 muniquer à ses membres. Dont est que,  
 selon que parle le Prophete, & que l'A-  
 postre aux Hebrieux l'applique, il a esté  
 dit de luy: Tu as aymé iustice & as hay  
 iniquité, & pourtant ô Dieu! ton Dieu  
 t'a oint d'huyle de liesse par dessus ceux  
 qui participent de toy. Ainsi la sainte-  
 té primitiue & originele, qui est la sour-  
 ce de celle qui est respandue en tous  
 ceux qui en sont rendus participans, est  
 particuliere à Iesus-Christ, & n'a peu  
 appartenir qu'à luy seul.

De là appert que ceux - là se trompent grandement, qui attribuēt à la sainte Vierge d'auoir esté conceuë sans péché, & d'auoir eu vne sainteté originelle. Car en ceste opiniō, qui n'a fondemēt ny en l'Escripture, ny en l'analogie de la foy, ny en la tradition Apostolique, & qui est du cru de quelques Docteurs particuliers, non de la definition de l'Eglise, ceux qui la soustiennent tombent auentuellement dans le contraire de leur intention. Pource que leur intention estāt de magnifier par-là & d'exalter d'autāt plus la gloire de la bien-heureuse Vierge par-dessus les autres membres de l'Eglise, ils l'excluent mesme du corps de l'Eglise, & luy ostent l'hōneur d'en estre partie, tant leur raisonnement est mal conceu. Car il est certain que toute l'excellēce & toute la gloire des Saints est en l'Eglise, & dans le corps de l'Eglise, qui est le corps & l'accomplissement de Christ, cōme parle l'Escripture. Or toute l'Eglise est composée, où de son Chef, où de ses mēbres. Il n'y a que l'excellence & la gloire du Chef qui est originele, & qui à sa source en luy-mesme. Pour ce que c'est luy qui la communique à ses membres. C'est la

raison pour laquelle il à fallu que le Chef de l'Eglise, qui à deu estre hōme, pour ce que l'Eglise est composée d'hommes, fust aussi Dieu, qui eust sa vie en soy-mesme, qui eust en soy & par soy la vie, l'excellence & la gloire, qu'il deuoit communiquer à son corps. C'est pourquoy l'Apostre nous dit aux Colossiens ; *Que Iesus-Christ qui est le Chef du corps de l'Eglise, est deuant toutes choses, & que toutes choses subsistent par luy. Que toutes choses qui sont és Cieux & en la terre, visibles & inuisibles, ont esté créées par luy, qu'il est le premier né ; c'est à dire, le Seigneur ; de toute creature, & l'Image de Dieu inuisible.* Car telle deuoit estre la condition du Chef de l'Eglise, afin que son estre, son excellence & sa gloire ne luy estant communiquée que du Pere, avec lequel il est essentiellement vn : il fist part de sa sainteté & de sa gloire aux hommes, que le Pere luy donne pour en faire ses membres, & pour composer le corps de l'Eglise, selon le bon plaisir du Pere, qui a esté que toute plénitude habitast en luy. Ainsi la qualité de Chef essentiel de l'Eglise ne peut appartenir qu'à Iesus-Christ seul. Car nous ne par-

lons point icy de la qualité de Chef ministériel. Tel qu'est chaque Euesque en chasque Eglise, chasque Metropolitain en chasque prouince, chaque Exarque, Primat ou Patriarche en chasque Diocese; & l'Euesque de Rome en l'Eglise vniuerselle visible. Car au regard de ceux qui sont appelez Chefs de l'Eglise en ceste qualité, l'Eglise n'est point appellée leur corps, ny les fideles leurs membres. Pour ce qu'ils ne sont pas Chefs essentiels. qu'ils ne communiquent pas la vie, la saincteté, ny la gloire aux fideles. Mais seulement sont Ministres du Sainct Esprit, par lequel la vie, la saincteté, & la gloire est communiquée à l'Eglise & à tous ses membres, & qui procede du Pere & du Fils. C'est donc au seul Chef essentiel de l'Eglise à qui appartient d'auoir, & mesme entant qu'homme, vne saincteté originele. Pour ce qu'estant Sauueur & autheur de salut à tous ceux qui sont sanctifiez, il faut qu'il ait eu ceste saincteté en soy-mesme, de par soy-mesme, & en son origine. Or la saincte Vierge n'est pas le Chef de l'Eglise. Ce seroit vn blaspheme de luy attribuer ceste qualité, de

la donner à d'autre qu'à Iesus - Christ. Puis donc que ceux qui attribuent à la sainte Vierge vne sainteté originele, n'ont pas intention de luy donner la qualité de Chef de l'Eglise, d'Auteur de salut : ils font contre leur intention propre, quand ils luy ostent cependant celle de membre de l'Eglise. Et que, par ce moyen, en l'arrachant tout à fait du corps de l'Eglise, ils la priuent de toute l'excellence & de toute la gloire qui appartient aux Saints, laquelle n'est qu'au corps de l'Eglise, & en ceux qui en sont membres. Or ie di qu'ils ostent, à la bien-heureuse Vierge, la qualité de membre de l'Eglise, en luy attribuant vne sainteté originele, & non deriuée par la communication du Chef. Car tous ceux qui n'ont point la vie par la communication du Chef ne sont point membres du corps. Or si la sainte Vierge a esté sainte de son origine: conceuë sans peché, exempte du peché originel; elle n'a point sa sainteté par la participation de I. C. Car Iesus-Christ n'est point venu pour appeler les iustes, mais les pecheurs à repentance. Il est mort pour sauuer les pecheurs. Sa mort est

le prix & la rançon de ceux qui ont peché. Il ne communique son esprit sanctifiant & viuifiant qu'à ceux qui participent à sa chair. Et ceux-là seuls participent à sa chair pour lesquels il est mort. Car il a donné sa chair à la mort pour la vie du monde. Et pourtant tous ceux qui mangent sa chair sont appelez à souffrir & à mourir avec luy, pour viure & regner avec luy. Or si la sainte Vierge n'a point eue de peché, elle n'a point mesme deu, ny souffrir de maux, ny mourir. Car souffrant ou mourant sans peché, comme Iesus-Christ à fait, elle auroit souffert & seroit morte pour autrui, comme Iesus-Christ à souffert, & est mort pour nous. Autrement sa souffrance & sa mort contreuiendroient à la justice de Dieu, qui ne peut exiger d'aucun la peine du peché, qu'il ne soit ou coupable, ou pleige du coupable. Or nul ne dit que la sainte Vierge ait esté nostre pleige, nostre mediatrice. Car il y a vn seul Dieu & vn seul mediateur entre Dieu & les hommes, à sçauoir Iesus-Christ homme. Comme aussi, pour mesme raison, on ne peut dire quelle soit nostre Dame,

nostre Royne. Car il est escrit qu'il y a  
 vn seul Dieu & vn seul Seigneur. En  
 somme, comme on ne luy peut attribuer  
 l'excellence & la gloire du Chef de l'E-  
 glise, on ne peut luy en deferer d'autre,  
 que celle qu'elle à en qualité de membre  
 de l'Eglise. Or tout membre de l'Eglise  
 participe de la saincteté du Chef, par la  
 mesme voye, par laquelle le Chef luy  
 communique le salut. Car Iesus-Christ  
 est le Sauueur de son corps. Tous ceux  
 qui sont de son corps sont sauuez. Or  
 il est venu pour sauuer les pecheurs.  
 Tous ceux qui sont donc sauuez, & qui  
 participent au salut, sont pecheurs. Il  
 n'y a donc aucun membre de l'Eglise, ap-  
 partenant au corps de Christ, qui ne soit  
 rendu participât de la saincteté, comme  
 estant de sa nature & en soy-mesme pe-  
 cheur auparauant. Quiconque exclu-  
 roit la sainte Vierge de ceste condition,  
 luy osteroit la qualité de membre de l'E-  
 glise, & la priueroit de la gloire qui ap-  
 partient aux membres de l'Eglise. Et  
 comme ainsi soit qu'elle ne peut auoir la  
 gloire du Chef: celuy qui conçoit vne  
 telle saincteté de la Vierge, l'exclud tout  
 à fait du corps de l'Eglise, & la fraude de

toute gloire. Tellement que , sans y penser, il luy fait, entant qu'en luy est, le plus grand outrage qu'on luy scauroit faire, en voulant l'exalter sans mesure & sans raison. Si ceux qui ont conceu ceste opinion, que la saincte Vierge a esté conceuë sans peché, eussent bien entendu les raisons de l'analogie de la Foy & de nostre salut, ils eussent cogneu l'absurdité de leur pensée. Car ils eussent veu qu'ils deuoient dire, par mesme raison, qu'elle a esté conceuë du Saint Esprit sans œuure d'homme, comme nostre Seigneur en a esté conceu. Veü qu'il n'y a qu'un premier Adam, & un secõd Adam. Le premier Adam, lequel, cõme il est dit, a esté fait animal, en ame viuante. Et le secõd Adam qui a esté fait spirituel, en esprit viuifiant. Le premier Adam, par le mouuement de sa vie animale, & de son ame viuante, a esté rendu pecheur, par la deception de Satan, qui induisit son entendement à croire au mensonge, & sa volonté a transgresser le commandement de Dieu, en obeyssant à sa conuoitise charnelle. De là tous les hommes qui sont nez d'Adam par la generation naturelle, ont en

leur chair, la semence du mesme vice, qui est ce que nous appellons le peché d'origine. Et pourtant il faut que ceux, qui veulent exempter la sainte Vierge de ce mesme peché, denient sa naissance de la generation naturelle d'Adam, & la fassent semblable à la naissance de Iesus-Christ, le second Adam spirituel fait en esprit viuifiant. Il ne se peut dire combien ceste opinion conuainc ses Auteurs de grande inauertance en la Theologie.

Cela soit dit par occasion sur l'observation qu'il faut faire pour la difference d'entre la perfection d'une sainteté originelle, qui n'appartient & n'a peu appartenir qu'à Iesus-Christ seul : d'auec la perfection de la sainteté deriuée & & communiquée, & laquelle prend son commencement en la creature corrompue, & par diuers progresz & accroissements paruient à la fin d'une condition parfaite. Or ceste derniere espee de perfection ne suppose donc pas, que ceux, en qui elle est requise, ou en qui elle se trouue, soyent dits sans peché, ou estre exempts de peché. Ains au cōtraire elle ne peut estre en aucun, qu'en ce-

luy qui est pecheur de sa nature. C'est pourquoy, quãd, pour impugner la perfection de la sainteté Euangelique, que l'Euangile requiert & forme en tous les fideles par la vertu de l'Esprit de Christ qui est en sa parole, vous argumẽtez des paroles de Saint Iean : *Si nous disons que nous n'auons point de peché, nous nous seduisons nous mesmes, &c.* Et par la raison de la remission des pechez à laquelle tous les hommes doiuent recourir: vous vous abusez infiniment. Car la perfection de la sainteté Euangelique suppose necessairement, & le peché en tout homme, & la remission des pechez pour tout homme. Dautant qu'elle ne prend son commencement que dans le pecheur, & ne s'y forme, n'y croist & ne s'y accomplit, que par la grace de la remission des pechez, qui nous est donnée en la Croix de Christ, & qui produit son fruit & son effect par la vertu & par la communion d'icelle.

Le second manquement que vous commettez, en vostre raisonnement, contre la perfection de la sainteté des fideles, est en ce que vous dites: *Que nous meslons de nostre part, beaucoup de*

defautes & de manquemens dans les œuvres de sainteté. Car vous presumez, en ce faisant, qu'une bonne œuvre peut estre tout ensemble engeance de la chair & de l'esprit; & que la convoitise de la chair, & l'affection de l'esprit concourent ensemble en la production d'une mesme œuvre, que vous appelez œuvre de sainteté. C'est chose estrange que vous ayez conçu, de ceste façon, la doctrine de l'Evangile. Et que vous appliquiez à ce sens les paroles que vous alleguez de l'Apostre. En quoy gist le troisieme & principal manquement de vostre objection. Nos traducteurs François, seruans à l'opinion que vous defendez, ont, en ce passage, traduit ces mots, *ὡς μὴ ἀπὸ δέλπου τῶν ταπεινῶν*, tellement que vous ne faites point les choses que vous voudriez. Au lieu qu'il falloit traduire: *Afin que vous ne faciez point les choses que vous voudriez*. Comme aussi Beze, en sa traduction Latine, la bien rendu. Encore qu'en ses notes il encline à donner ce sens aux paroles de l'Apostre: *Que le combat de la chair & de l'esprit empesche les regenez de parfaire le bien qu'ils voudroient*. Ce qu'il rapporte à la mesme

intention que celle qu'il donne au discours que fait le mesme Apostre au chapitre 7. aux Romains, parlant de l'homme sous la loy, que Beze & la pluspart de nos Reformateurs ( mais non toutes-fois tous ) prennent pour vn homme regeneré & conduit du Sainct Esprit. Laquelle fausse interpretation du sens de l'Apostre, a esté vne pierre d'achoppement, qui en a fait trebucher plusieurs en la cognoissance du vray estat de saincteté des regenez par la grace de Iesus-Christ. Car s'imaginans que S. Paul, en ce lieu-là, parle de soy-mesme, & en sa personne de tous les regenez, ils se sont fait croire, que les plus regenez sont en tel estat, qu'il leur conuient à tous de s'approprier ces paroles. *Je n'approuue point ce que ie fay, car ie ne fay point ce que ie veux, mais ce que ie hay. Or si ie fay que ie ne veux point, ie consen à la loy qu'elle est bonne. Maintenant donc ce n'est plus moy qui fay cela, mais c'est le peché habitant en moy : car ie sçay qu'en moy, c'est à dire en ma chair, n'habite point de bien : car le vouloir est bien attaché à moy; mais ie ne trouue point le moyen de parfaire le bien; car ie ne fay point le bien que ie*

*veux, ains ie fay le mal que ie ne veux point. Que si ie fayce que ie ne veux point, ce n'est plus moy qui le fay; mais le peché qui habite en moy. Je trouue donc ceste loy en mes membres, c'est que quand ie veux faire le bien, le mal est attaché à moy: car ie pren plaisir à la loy de Dieu, quant à l'homme de dedans; mais ie voy vne autre loy en mes membres, bataillant contre la loy de mon entendement, & me rendant prisonnier à la loy de peché, qui est en mes membres. Ceux qui ont introduit le dogme que vous defendez, de l'imperfection de iustice en tous les fideles, ayans estimé que l'Apostre parle icy, sous sa persône, non de ceux qui sont sous la loy; mais de ceux qui sont sous la grace, & qui sont regenez par elle: se sont persuadez que le sentiment de l'ame de tous les fideles doit estre conforme à ces paroles. Car qui est l'homme; disent-ils, qui se croye plus regeneré que S. Paul; Et de la vient, que ceux qui sont ainsi instruits, faisans profession de suiure l'Euangile, quoy qu'ils paillardent, qu'ils commettent adultere, qu'ils derobent, qu'ils tuent, & que leur vie, la pluspart du temps suiue le train des conuoitises de  
la*

la chair , ils ne laissent pas de se croire aussi bien regenez que S. Paul. Car ils disent , ie ne fay point ce que ie veux, mais ie fay ce que ie hay. Ce n'est point moy qui fay cela , mais le peché habitant en moy. C'est que la loy qui est en mes membres, bataillant contre la loy de mon entendement , me rend prisonnier à la loy de peché. Il ne se peut dire combien ce sens des paroles de l'Apostre si mal interpretés , à fait fouruoyer de personnes hors des sentiers de iustice & de sainteté que l'Euangile nous enseigne. N'entendans point que ceux qui sont tels , & qui parlent de la sorte, & qui expriment ainsi le sentiment de leur conscience , n'ont cogneu que la loy , & ne cognoissent point l'Euangile. Ne sçauent que c'est de la loy de l'esprit de vie qui est en Iesus-Christ , qui nous affranchit de la loy, du peché, & de la mort. Et que par l'impressiõ , qu'elle fait en nos ames, nous ne cheminons plus selon la chair, mais selõ l'esprit. Par vne mesme erreur , nos reformateurs n'ont pas cogneu le sens du passage que vous alleguez du 5. aux Galates. Où ils se sont imaginé que la contrariété, que l'Apo-

stre nous represente de la conuoitise de la chair à l'affection de l'esprit, est l'estat de la conscience de tout homme regeneré, qui se sent perpetuellement ainsi agité de mauuais & de bons desirs. Et dont les mauuais encore surmontent les bons. Tellement, disent-ils, que nous ne faisons point les choses bones que nous voudrions faire. Certes il y a eu manque de lumiere en ceux qui ont donné les premiers ce sens à ces paroles. Car ils n'ont point cogneu l'intention de l'Apostre. Lequel en cete Epistre, comme en celle aux Romains, a principalement pris à tasche de nous faire entendre la difference de l'estat de ceux qui sont sous la loy, d'avec ceux qui sont sous la grace de Iesus-Christ. Car ceux qui sont sous la loy, cheminent de necessité selon la chair. Mais ceux qui sont sous la grace, cheminent selon l'Esprit. Or il y a pareille opposition entre la loy & la grace, qu'entre la chair & l'esprit. C'est pourquoy l'Apostre ayant fait cete exhortation aux fideles Vers. 16. *Or ie vous di, cheminez selon l'esprit, & n'accomplissez point la conuoitise de la chair :* Il leur remonstre Vers. 17. (tout au con-

traire du sens que vous attribuez à ses paroles) que la conuoitise de la chair & l'affection de l'esprit sont opposées l'une à l'autre: en sorte qu'elles ne se peuvent accoupler ensemble, & qu'elles produisent tousiours œuures tout à fait contraires. Tellement que celuy qui fait les œuures de la chair, ne fait point les œuures de l'esprit. Il ne chemine point selon l'esprit. C'est pourquoy il clost ce verset par cette admonition. *Afin que vous ne faciez point les choses que vous voudriez*, c'est à dire, celles où l'affection naturelle de vostre chair s'enclinerait. Gardez-vous de les faire. Car si vous les faites vous ne cheminez point selon l'esprit. Vous estes encore sous la loy, vous n'estes point sous la grace. C'est pourquoy il adioust vers. 18. *Or si vous estes conduits par l'Esprit vous n'estes point sous la loy.* Et pourtant il oppose en suite les œuures de la chair, aux fruiets de l'esprit. Or les œuures de la chair, dit-il, sont manifestes, lesquelles sont, adultere, paillardise, souilleure, insolence, idolatrie, empoisonnement, inimitiez, noisies, despits, courroux, contentions, diuisions, heresies, enuies, menteries, yuron-

gneries, gourmandises, & choses semblables. Desquelles ie vous predi comme aussi i'ay predit, que ceux qui commettent telles choses n'heriteront point le Royaume de Dieu. Mais le fruiet de l'esprit est charité, ioye, paix, esprit patient, benignité, bonté, loyauté, douceur, attrempance. Contre telles choses ne s'adresse point la loy. Vous voyez donc, que, selon le sens de l'Apostre, la contrariété de la conuoitise de la chair à l'affection de l'esprit, ne se rencontre pas en la conscience des regeneratez par la grace de Iesus-Christ, pour en conclure, comme vous faites, que toutes leurs œuvres de sainteté sont meslées de defauts & de manquemens. Mais que tout au rebours, cette contrariété vous fait voir, qu'aux œuvres de sainteté, qui sont les œuvres de l'esprit, il n'y a aucun defaut ny manquement, pour ce que la chair ny peut auoir de part, à cause de l'antipathie de l'un à l'autre. Car là où l'esprit vit & regne, ce qui n'est que dans le vray & vif sentiment de la Croix de Christ, la chair est morte. Qui est la mesme raison que l'Apostre adioust au vers. 24. suivant. Or ceux qui sont de Christ ont crucifié

la chair avec les affections & conuoitises d'icelle. Direz-vous, apres cela, que de ceux que la grace de Iesus-Christ a regeneré sous sa Croix, par la vertu de son Esprit, les œuvres de sainteté, que son esprit produit en eux, soient pleines de defauts & de manquemens par le meslange des conuoitises de la chair ? Ou si vous le dites encore, direz-vous quel l'Apostre le die avec vous ? Si vous cognoissez la fin de la vocation des fideles en Iesus-Christ, vous entendez la raison de la necessité de la iustice & de la sainteté parfaite de leurs œuvres, auxquelles ils cheminent par son esprit. A quoy se rapporte la consequence de ce precepte que l'Apostre adiouste. *Si nous viuons par l'esprit cheminons aussi en esprit* vers. 25. Croyez-vous maintenant que les paroles, par vous alleguées de l'Apostre, fauorisent vostre opinion, qu'il n'y a aucune bonne œuvre en laquelle il n'y ait quelque chose meslée de la contradiction de la chair contre l'esprit ? Ains ne recognoissez-vous pas que la contradiction de l'un à l'autre est la cause que leurs œuvres ne peuvent iamais estre meslées ensemble ?

Ce que vous adioustez en suite, page 22. du 28. d'Exode, qu'*Aaron* portoit l'*inniquité* des *sainctes offrandes* des enfans d'*Israel*, à sçauoir, dit la glose que vous y donnez, à cause des défauts qu'ils y commettoient, est vn argument dont le sujet n'a rien d'approprié à la consequence que vostre raisonnement en deduit, quand vous dites, Or les *sainctes oblations* des enfans d'*Israel* estoient figures de nos bonnes œuvres, desquelles nous auons à requérir que *Iesus-Christ* nostre grand sacrificateur expie les défauts & manquemens, tant s'en faut que nous deuions pretendre du merite de leur perfection. Je recognoy que ce que Dieu ordonne en ce lieu à *Moyse*, qu'*Aaron* eust sur le deuant de sa Tiare vne lame d'or, en laquelle estoit graué LA SAINCTETÉ A L'ETERNEL, qu'il porteroit tousiours sur son front, est vn type representatif de la veritable saincteté, qui est sur le chef, & en la personne de *Iesus-Christ* nostre souuerain Sacrificateur. Par le merite & par la vertu de laquelle toutes nos œuvres, & toutes les oblations que nous faisons à Dieu, sont sanctifiées. Mais la maniere de la sanctification de

nos œuvres n'est pas, comme vous voulez; l'imputation de la iustice de Christ, mais bien la vertu de son sacrifice, dépendant, de la sainteté qui est en la personne. Par laquelle vertu toutes nos œuvres sont rendues vraiment saintes, pour ce que l'iniquité en est ostée. Car l'iniquité de nos œuvres, de celles mesmes que nous ferions conformément à la loy de Dieu, consiste en la fin de l'amour de nous-mesmes, à laquelle nous les rapportons naturellement. Or Iesus-Christ a redressé nos œuvres à la fin de l'amour de Dieu & de sa gloire par son oblation, par laquelle il nous a sanctifiez, & moyennant laquelle il nous appelle à sa communion. Et ainsi il en a osté l'iniquité, & les a rendues agreables à Dieu son Pere. Car il faut traduire le terme Hebreu נָסָא *Nasa* par *oster* & non pas simplement pour *porter*. Afin que vous ne vous figuriez pas, que nos œuvres soient sanctifiées, quoy que souillées en elles-mesmes, pour ce que Iesus-Christ en a porté l'iniquité; c'est à dire, la peine de nos pechez. Iusques icy nos reformateurs ont bien appelé cela *iustification*. Mais ils ne l'ont encore osé

nommer *sanctification*. Et ils ont bien parlé d'une iustice imputée, mais ils n'ont encore osé dire, au regard de la sainteté, qu'elle nous soit imputée. Ny interpreter la sanctification, pour une imputation de sainteté à celui qui n'en auroit point en soy-mesme, ou qui n'en auroit point assez. Mais tout vous est bon, pour defendre la these que vous avez entreprise. Ne vous figurez pas que Dieu ait agreables des œuvres qui soient souillées en elles-mesmes. Nulles œuvres ne luy sont agreables, qu'elles ne soient vraymens bonnes & saintes. Iesus - Christ a rendu nos œuvres, nos oblations, nos sacrifices, nos prieres, nos aumosnes, tous les exercices de nostre patience & de nostre charité, agreables à Dieu, pour ce qu'il les a sanctifiées par le sang de son sacrifice, en la communion duquel nous les rapportons à la seule gloire de nostre Pere celeste, qui en produit tous les mouvemens en nous par son saint Esprit. C'est ainsi qu'il en a osté l'iniquité pour les rendre agreables à son Pere. Ce que le type d'Aaron representoit, en ce que la sainteté, par laquelle Dieu l'auoit consacré

à foy , & dont il portoit le tiltre & le caractere sur le front , sanctifioit les offrandes que le peuple offroit par luy. Mais en cela le type differoit de la verité, d'autant qu'Aaron ne pouuoit communiquer aucune vertu au peuple pour estre sacrificateurs avec luy. Car ils n'estoient sacrificateurs qu'en luy. Mais Iesus-Christ n'est pas seulement nostre sacrificateur, entant qu'il a offert son sacrifice pour nous. Mais, en nous le communiquant, il nous rend tout ensemble sacrificateurs avec luy , & en nous faisant participans de sa sainteté , rend toutes nos offrandes & nos œuvres agreables à Dieu son Pere.

Après que vous auez compris par tout ce que dessus , la raison de nostre vraye sanctification, qui est vne mesme chose en substance avec nostre iustification, selon la doctrine Catholique , mal entendüe , & plus mal contestée par nos reformateurs : ie n'auray pas de peine à vous faire aduoüer que tout ce que vous auez discoursu depuis la page 46. iusques à la 51. sur la question, *Si la iustice inherente en nous est si parfaite, que par elle nous puissions subsister deuant le tri-*

*bunal de Dieu*, ne merite autre chose que d'estre effacé par la continuité d'un trait de plume. Et afin que vous en cognoissiez la raison, & que ie vous oblige peremptoirement à vous retraicter de cette opinion mal entendüe, d'une iustice imputée qui couure nostre iustice imparfaicte : ie vous représenteray, le vice de vos fondemens en toutes les parties de vostre discours, comme i'ay fait en toute la suite du discours precedent

Il est aisé, dites-vous, de recognoistre qu'obtenant une double iustice de Iesus-Christ, l'une tres-parfaicte qui est l'obeissance qu'il a rendüe à Dieu pour nous, laquelle nous auons monstré estre imputée : l'autre qui est residente en nous avec les defauts qui produit la resistance continuelle que la chair fait à l'esprit, il faut que nous subsistions devant Dieu par celle qui est tres-parfaicte & à toute espreuue. Mais vous auez appris maintenant, que l'obeissance tres-parfaicte que Iesus-Christ a rendüe à Dieu son Pere pour nous, est imputée vniuersellement à tous les hommes. Comme aussi il a rédu cette obeissance pour tous les hommes, estant mort pour tous. Car l'imputation de l'o-

beïſſance de Ieſus - Chriſt n'eſt pas vn  
 acte de l'intelligence de Dieu , par le-  
 quel il reputé iuſtes ceux qui ne le ſont  
 pas en eux-mesmes , comme vous vous  
 eſtes imaginé. Mais c'eſt vn acte de la  
 bonté & de la miſericorde de Dieu, par  
 lequel il pardonne , & propoſe à tous  
 la remiſſion des pechez par l'Euangile,  
 pour les amener à la foy , & à la repen-  
 tance en la communion de ſon fils , afin  
 qu'ils ſoient rendus par elle vraiment  
 iuſtes & ſaincts , pour heriter la vie eter-  
 nelle. Il n'y a point d'autre cauſe ny  
 d'autre raiſon de l'imputation de l'obeïſ-  
 ſance de Ieſus - Chriſt. Vous avez auſſi  
 appris , que la iuſtice & la ſaincteté re-  
 ſidente en nous, & que l'eſprit de Dieu y  
 forme, n'a point les defauts que vous vo<sup>us</sup>  
 imaginez que produit la reſiſtance con-  
 tinuelle de la chair. Pour ce que l'eſprit,  
 qui no<sup>s</sup> eſt donné, eſt plus fort que l'eſprit  
 de ce monde. Pour ce que ceux qui ont  
 receul Eſprit de Chriſt , mortifient par  
 cét eſprit, les faits du corps. Pour ce que  
 ceux qui ſont en Chriſt & qui chemi-  
 nent ſelon l'Eſprit , ont crucifié la chair  
 avec les affections & les conuoitiſes d'i-  
 celle. Tellement qu'il n'y a, en ceux qui

sont en Iesus-Christ, aucune repugnance de la chair, que l'Esprit de Christ ne surmonte en eux. Ce qui fait que les bonnes œuvres de Justice & de sainteté, qu'ils produisent par cét esprit, ne sont point souillées des defauts de la repugnance de la chair. Ains au contraire, en cela se monstre la bonté de leurs œuvres, & la vertu de l'Esprit de Christ qui les forme, qu'elles se font avec la victoire de l'Esprit par dessus la chair, & en ce que le fidele, en les faisant, soumet sa volonté propre à la volonté de Dieu. Ainsi le vice des fondemens de vostre ratiocination estant tout manifeste, comme establis sur le contraire des principes de l'Evangile, vous reconnoissez que vostre conclusion tombe en la mesme condamnation. Et que c'est n'est pas voir les vrayes raisons de l'Evangile, de dire, *Qu'il faut que nous substituions devant Dieu par la Justice de Christ imputées qui est tres-parfaite & à toute espreuve.* C'est vn des pires dogmes qui puisse estre introduit en la vie Chrestienne, capable de la vraye iustice, corrompre l'usage qui doit estre entretenu en la communion des Saints. Car la

raison de la vie Chrestienne depend d'entendre, que comme Iesus-Christ a rendu à Dieu l'obeyssance d'une Iustice tres-parfaite & à toute espreuve, aussi appeller il ses fideles en sa communion, & leur donne son mesme esprit, afin qu'ils rendent à Dieu l'obeyssance d'une Iustice parfaite & à toute espreuve.

Pour expliquer & pour confirmer la maniere en laquelle vous avez conceu vn dogme si mal assis, vous adioustez, *Nous disons donc que Dieu ayant absous le fidele par l'imputation du sang de Iesus-Christ au moment de sa conuersion, luy continuë ceste mesme imputation tout le cours de sa vie, quand par foy & repentance le fidele recourt à luy: tellement que le fidele cheminant en la crainte de Dieu; mais chop pant neantmoins souuent par son infirmité, le sang de Iesus-Christ le purge de tout peché par l'imputation que Dieu luy en fait. Comme S. Iean nous l'enseigne au premier de sa premiere, quand il dit: Si nous cheminons en lumiere comme Dieu est en lumiere, nous auons communion avec luy, & le sang de son Fils Iesus-Christ nous nettoye de tout peché. Votre comme est mal comme. Car ce que*

dit S. Iean, & ce que vous dites ne se res-  
semble en rien. S. Iean ne dit pas, si  
nous cheminons en lumiere, & que par  
nostre infirmité nous choppons neant-  
moins souuent, nous auons communion  
avec Dieu & le sang de son Fils Iesus-  
Christ nous nettoye de tout peché.  
Comme vous dites, si le fidele chemi-  
nât en la crainte de Dieu choppe neant-  
moins souuent, le sang de Iesus-Christ  
le purge de tout peché. S. Iean nous  
auroit dit, que parler cōme vous faites,  
ou comme vous le voulez faire parler,  
est la plus euidente contradiction de  
langage qu'on puisse commettre. Quoy?  
pensez vous qu'un homme, qui chemi-  
ne en lumiere, choppe? ou que celuy qui  
choppe chemine en lumiere? Celuy qui  
choppe, choppe contre la charité. Car  
la charité est l'accomplissement de la  
Loy. Or escoutez ce que dit saint Iean  
en la mesme Epistre que vous citez ch.  
2. vers. 9. & 10. *Qui dit qu'il est en lu-  
miere & hait son frere, il est en tenebres  
iusques à ceste heure. Qui ayme son fre-  
re, il demeure en lumiere, & IL N'Y A  
POINT D'ACHOPPEMENT EN LVY.*  
Pourriez vous estre plus opposez con-

traires? Voyez Monsieur, que cheminer en lumiere & chopper, sont choses contradictoires. S. Iean vous dit encore, aux paroles que vous citez, *Que celuy qui chemine en lumiere a communion avec Dieu.* Et vous voulez que celuy qui choppe ait communion avec Dieu. Ne sçavez vous pas que celuy qui choppe est en tenebres? Et n'auiez vous pas leu au verset precedent celuy que vous citez, *Si nous disons que nous auons communion avec luy, & nous cheminons en tenebres nous mentons, & ne nous portons point en Verité.* Ne pensez donc pas que vous trouuiez dans saint Iean quelque conuenance de doctrine avec l'idée que vous vous figurez d'un fidele qui chemine en lumiere, & qui par son infirmité peche neantmoins souuent, & puis couure tous ses pechez du manteau d'une iustice imputée, que vous appelez la purgation de nos pechez au sang de Christ. Ce n'est pas ainsi que saint Iean nous enseigne que le sang de Iesus-Christ nous purge ou nettoye de tout peché. Le sang de Christ nous nettoye de tout peché, pource qu'il l'arrache & le fait mourir en nous. Son effect n'est pas une iustice

imputée, mais vne iustice inherente. Et cela n'arriue qu'à ceux qui cheminent en lumiere. Car quiconque boit le sang de Christ & en est nourri, quiconque avec ioye & en glorifiant Dieu, communique aux souffrances de son Fils, celui là reçoit son Esprit, qui par sa lumiere le conduit en toute verité, accomplit toute charité en luy, & il a ainsi communion avec Dieu & avec ses freres. Si vous entendez ce que ie vous di, comme il est bien facile à entendre, vous entendrez mieux que vous ne faisiez les paroles par vous alleguées de S. Iean. Où vous voyez aussi qu'il met l'effect du sang de Christ, qui est le nettoiyement du peché, en ceux qui cheminent en lumiere. Pour vous monstrier que ceste purgation est nostre sanctification, & la production des œuvres de lumiere en nous. Toute differente de vostre iustification imputatiue.

Mais outre que vostre doctrine contredit manifestement à celle de S. Iean, par où vous auiez creu la confirmer: vostre propre discours contredit encore à vostre doctrine. Car vous voulez maintenant que pour estre absous de Dieu,

pour

pour estre couuert de la iustice de Christ imputée, pour estre réputé iuste deuant Dieu, le fidele recoure à luy par foy & repentance. Qu'appellez-vous, recourir à Dieu par repentance? N'est-ce pas faire fruiçts dignes de repentance? Les fruiçts de repentance ne sont-ce pas les bonnes œuures? Vous voulez donc que le fidele fasse les bonnes œuures auant que d'estre iustificié, auant que d'estre réputé iuste. Pourquoi dites vous donc, selon la doctrine de nos reformateurs, qu'il n'est point iustificié par ses œuures? Pourquoi opposez vous, en la iustification, les œuures à la foy, puisque vous y requerez à ceste heure la repentance prealable? Par la foy iustificante vous entēdez, selon la doctrine de nos reformateurs, l'acte du fidele acceptant la remission gratuite de ses pechez. Au regard dequoy la foy n'est point des œuures. Car l'homme peut bien accepter ainsi la remission de ses pechez, sans aucune bonne œuvre prealable. Mais la repentance est des œuures. Car nul ne se repend veritablement, qu'au lieu d'ennemi qu'il estoit de Dieu aupara-  
uant en son entendement en mauuaises

œuvres, il ne deuienne ami de Dieu et son entendement en bonnes œuvres. Dont est que la repentance est appelée *un tel changement d'entendement*, c'est à dire des pensées & des affections du cœur. Car, comme vous sçauiez, l'entendement, en l'Escripture, signifie le cœur. Ce que les Philosophes appellent, *l'entendement pratique*, celuy qui dirige nos actions à la vertu ou au vice. Ainsi, puisque vous requerez maintenant que le fidele recoure à Dieu par foy & repentance, pour estre iustifié: vous voulez que la iustice inherente, & les bonnes œuvres soient prealables en luy pour estre iustifié. Et par là vous condamnez tous nos reformateurs, qui veulent que le fidele soit iustifié par la seule foy sans les œuvres. Certes pour vous seruir de l'autorité de saint Iean, en vous imaginant que la purgation de nos pechez par le sang de Christ se fait par imputation, il vous à fallu supposer à ce coup, que les bonnes œuvres sont prealables pour estre iustifié. Car S. Iean dit, *Si nous cheminons en lumiere*. Or cheminer en lumiere, c'est faire les bonnes œuvres que Dieu a préparées afin que nous y

cheminions. Ainsi les bonnes œuvres, & nostre sanctification seroient prealables pour estre iustifié, selon vous, par l'imputation du sang de Christ. Qui est le contraire de la definition de nos Reformateurs, qui mettent en ordre la iustification deuant la sanctification, distinguans l'une de l'autre formellement.

Il y a encore en vostre discours vne autre chose digne de remarque. Vous dites que Dieu absout le fidele par l'imputation du sang de Christ au moment de sa conversion, & qu'il luy continuë cette mesme imputation dans le cours de la sanctification. Selon vostre intention, vous deviez plustost dire dans le decours de la sanctification. Car, par vostre doctrine, l'absolution ou imputation du sang de Christ est donnée à l'acte de la foy, non à l'acte de la charité ou de la sanctification. Le iustifié choppe neantmoins souvent par son infirmité. Ces choppades, ces tresbuchemens s'appellent ils le cours de la sanctification, ou le decours? Je pense qu'on les nommeroit mieux le decours. Or selon vous, quand le fidele ayant bronché vient à recourir

à Dieu par foy & repentance, Dieu lors luy continuë l'absolution & l'imputation du sang de Christ. Si le fidele perseueroit tousiours à faire de bien en mieux, en s'aduançant dans le cours de sa sanctification, il n'auroit d'oc pas à faire, que l'absolution & l'imputation du sang de Christ, receuë au moment de sa conuersion, luy fut reïterée. Ce n'est qu'au cas qu'il choppe, & qu'il se releue. Ce n'est qu'au cas qu'il reuiene en l'estat auquel il a esté au momēt de sa cōuersion. Appelez-vous donc cela le cours de sa sanctification? Pour moy ie l'appelle le decours. Car ne court pas, selon mon aduis, qui retrograde. Certes Monsieur il a fallu, ou vne merueilleuse inaduer-tance, ou vne estrange hardiesse, en ceux qui les premiers ont establi ce dogme, qui ne se soustient, ny par les fondemens de l'Escriture, ny par l'autorité des Anciens, ny par la coherence de ses maximes. Et il faut encore, ou vne merueilleuse stupidité, ou vne estrange opiniastrété en ceux qui le voudront dorefnauant defendre, apres qu'ils auront veu icy comme ie vous redresse en toutes vos mesprises, & éga-

remens de la doctrine de l'Euangile. Laquelle nous enseigne, que Dieu fait grace au pecheur pour l'amour de Iesus-Christ, au nom duquel il luy dōne la remission de ses pechez, afin qu'il se conuertisse & qu'il viue. Et qu'il lui fait cette grace, qui est l'absolutiō, & si vous voulez, l'imputation du sang de Christ, non seulement au moment de sa conuersion (cōme vous dittes) mais mesme deuant sa conuersion. Car la grace le preuient, & c'est elle qui est cause de sa conuersion qui s'ensuit. que cette grace encore luy est continuée en tout le cours de sa vie, afin que sa iustification ou sanctification commencée, aille tous les iours croissant, iusqu'à ce qu'il paruienne en homme parfait, à la mesure de la parfaite stature de Christ. Et qu'y estant paruenue, il y perseuere iusques à la fin. Car cette grace de la remission de nos pechez au sang de Christ, est celle par laquelle Dieu a changé nostre malediction en benediction, nos peines du peché, en medecine contre la corruption de nostre nature, afin que toutes nos souffrances deuiennent en nous, qui par foy embrassons le benefice de son Fils,

l'usage & l'exercice de la croix, à mortifier en nous le vieil homme; afin que, par la descheance de cettuy-cy, le nouvel homme naisse, croisse, & se fortifie par le renouvellement du saint Esprit, qui nous est communiqué des Cieux, en l'esperance de sa gloire. C'est ainsi que Dieu nous donne de z le commencement, & qu'il nous continuë iusques à la fin, la grace de la remission de nos pechez au sang de son Fils, en tout le cours de nostre sanctification; non pour nous reputer iustes, sans l'estre, mais pour nous faire vraiment & actuellement iustes.

C'est par cette lumiere que vous verrez maintenant, au passage par vous allegué de saint Iean, ce que vous n'y pouuez appercevoir, & tout le contraire de ce que vous me commandez que i'y voye, quand vous adioustez pag. 47. *Voyez, il propose le sang de Iesus-Christ, nous purgeant de nos pechez, non seulement au moment de nostre conuersion, mais dans le cours de la sanctification. Il est vray. Mais cette purgation de nos pechez par le sang de Christ, continuée dans le cours de la sanctification, est*

pour parfaire nostre sanctification commencée, non pour nous iustifier par iustice imputée, mais bien inherente. C'est pour cette raison que nous auons besoin d'implorer à tout heure le pardon & la grace de la remission de nos pechez. Et de reconnoistre en nous le besoin de cette grace par la reconnoissance & la confession du peché, qui habite naturellement en nostre chair. Afin que, par l'aide de cette grace, nous mourions continuellement à peché, pour viure à iustice. C'est pour cette cause que saint Iean, dont vous continuez l'allegation pag. 47. adiousté, non pour autoriser vostre iustification imputée, mais pour nous exhorter à la perfection de la sanctification commencée : *Si nous disons que nous n'auons point de peché, nous nous seduisons nous mesmes, & Verité n'est point en nous. Si nous confessons nos pechez, il est fidele & iuste pour nous pardonner nos pechez, & nous nettoyer de toute iniquité.* Ne pensez plus, que pardonner nos pechez, & nous nettoyer de toute iniquité, soit de simples actes de l'intelligence de Dieu à nous reputer iustes, encore que nous

ne le foyons pas. Quand l'Escriture dit, que Dieu nous pardonne nos pechez, elle exprime l'effect de cette grace en nous, par laquelle Dieu, appaisé enuers nous, y produit l'effect de la croix de son Fils, pour la mortification du péché, abolissant en nos ames l'empire d'iniquité, par l'esprit de gloire, donné à tous ceux qui participent à la croix, & pour estre renouvellez en nouveauté de vie.

Ayant raisonné sur des fondemens si mal assis, vous concluez, pag. 47. par le mesme mal-entendu de la doctrine del'Euangile: *Que combien que Dieu reconnoisse & aggrée ce que le fidele a de sainteté, & le remunere de la vie eternelle: C'est non cette sainteté-là, mais le sang de Iesus-Christ, qui fait subsister le fidele deuant Dieu comme irreprehensible. Trouuez bon encore, ie vous prie, que ie vous interroge ici, sur les consequences de vos maximes? Si Dieu aggrée la sainteté qu'a le fidele, & s'il la remunere de la vie eternelle, est-ce à cause de la sainteté mesme, ou à cause qu'elle est couverte de la iustice de Christ imputé? Si c'est à cause de la sainteté*

mesme, & pour l'amour d'elle; pourquoy niez vous que cette saincteté, que Dieu agrée pour l'amour d'elle, & qu'il remunere de la vie éternelle à cause qu'elle luy agrée, ne puisse subsister devant son iugement comme irreprehensible? S'il la remunere à cause qu'elle est couverte de la iustice de Christ imputée: pourquoy attribuez-vous, ce que Dieu l'agré & la remunere, à la saincteté, puis que cela n'appartient qu'à la couverture de la iustice imputée, qui seule, par vostre maxime, la rend digne d'amour & de recompense? Ne pouuez vous comprendre, qu'il n'y a pas plus de raison d'estre agreable à Dieu, & d'estre digne de remuneration, que de subsister irreprehensible devant luy? Selon vous, la saincteté des fideles est en diuers degrez, mais la recompense est pareille à tous. Pourquoi cela? vous me respondrez, Pource que tous sont également iustifiez, quoy qu'inegalement sanctifiez. Ainsi la saincteté des fideles, selon vous, est autant agreable à Dieu & reçoit autant de recompense, estant moindre que plus grande. D'autant que sa couverture couvre tous

ses defauts quels qu'ils soient. Ce n'est donc point la saincteté qui est agreable, ny qui reçoit la recôpense, mais la seule iustice de Christ imputée. Et certes telle est la doctrine naïue de nos reformateurs. Ainsi vous sortez de leurs vrayz fondemens, quand vous dites que Dieu agrée ou remunere nostre saincteté.

La raison que vous alleguez pour la necessité de vostre iustice imputée, est celle qui monstre dauantage combien mal vous auez conceu la doctrine de l'Euangile en cette partie capitale. Car *Dieu ne peut agir, dites-vous, comme Pere remunerant nos oeuvres & passant par dessus nos imperfections, en blessant sa iustice, ains il faut tousiours que sa iustice, voire considerée selon sa rigueur, soit satisfaite.* Quand vous dites que Dieu ne peut agir comme Pere qu'il n'agisse aussi selon sa iustice, si vous entendez, comme vous faites, iustice qui punit le delit, vous dites choses contradictoires & incôpatibles. Car quand Dieu est Pere & iuge tout ensemble de ses enfans, alors il est leur iuge non punissant, mais iuge pour retribuer à la iustice, à la saincteté, à la dignité, & au merite de leurs

bonnes œuvres, que son esprit à produire en eux, la recompense qu'il leur a promise. Et lors sa iustice execute envers eux les effets de l'affection de Pere. C'est ainsi que Dieu iugera les fideles au dernier iour. Mais au regard de la iustice que Dieu exerce pour punir les offenses, la qualité de iuge est diametralement opposée en Dieu à la qualité de Pere. Or ce iugement de Dieu s'exerce, ou selon la loy, ou selon l'Evangile. Selon la loy, sur tous ceux qui l'ont transgressée. Selon l'Evangile sur tous ceux qui ont reietté sa grace, & qui ont foulé aux pieds le sang de l'alliance. Le iugement de Dieu selon la loy s'exerce en cette vie, & pour les peines de cette vie. Le iugement de Dieu selon l'Evangile, s'exercera en l'autre vie, & pour les peines eternelles. Le iugement de Dieu selon la loy, a esté exercé sur Iesus Christ pour tous les pecheurs pour lesquels il est mort. Pour cette cause, ce qui est peine sous la loy aux hommes, sçauoir la misere, la souffrance, & la mort, est deuenu instrument de grace à tous les fideles par la communion de la Croix que le Fils bien-aimé de Dieu a

portée, en laquelle il a obtenu remission des pechez à tous ceux pour lesquels il est mort. Et pourtant ceux qui souffrent en cette vie estans tous sous la loy, comme sont tous les hommes naturellement, & auparauant que d'auoir la cognoissance du Fils de Dieu, & d'estre venus à la foy en luy, portent la peine du iugemēt de la loy. Ceux qui souffrent ayās la foy en Iesus Ch. crucifié, & portēt sa Croix, se rejoüissent & se glorifiēt au milieu de & toutes leurs tribulatiōs, qui leur sont autant d'exercices pour leur sanctification, & pour glorifier Dieu en l'esperance de la gloire qu'ils attendent de luy. Ceux qui reiettent la grace de Dieu en cette vie, foulans aux pieds le sang de l'alliance, & lesquels, apres auoir cogneu que Iesus est le Fils de Dieu qui les a racheptez, apres auoir esté illuminez, & apres auoir gousté le don celeste, & auoir esté participans du S. Esprit, & auoir gousté la bonne parole de Dieu, & les puissances du siecle auenir, retombent derechef en incredulité : ceux-là pechent contre le S. Esprit. Et il est autant impossible qu'ils soient renouellez à repentance, comme il est impossi-

ble que Iesus-Christ, qui est assis en sa gloire, soit derechef pour eux crucifié & exposé à opprobre. A ceux qui sont tels, toutes les peines que Dieu leur enuoye en cette vie sont aussi effect de son iugement selon la loy, mais avant-coureur de celuy qu'ils doiuent receuoir, selon l'Euangile, pour les peines eternelles. Ainsi Dieu est tousiours iuge punissant, vers tous ceux qui sont hors de Iesus-Christ. Soit en cette vie, soit hors cette vie. Mais pour tous ceux qui sont en Iesus-Christ, qui sont paruenus à la participation de sa grace, par l'efficace de laquelle ils ne cheminent plus selon la chair, mais selon l'esprit, il n'y a plus aucune condamnation. Dieu n'est plus leur iuge punissant, ny en cette vie, ny hors cette vie. Il est leur Pere. Il est leur Pere en cette vie, & fait tousiours acte de Pere enuers eux, en leur distribuant le pain celeste, la grace de son Fils en la communion de sa chair & de son esprit, pour parfaire iusques à la fin le bon œuvre de leur sanctification. Il est leur Pere hors cette vie, pour remunerer, & selon sa bonté, & selon sa iustice, la sainteté qu'il leur a donnée, en la com-

munion de la gloire qu'il leur a promise. Telle est toute l'œconomie de Dieu, laquelle il exerce envers les hommes, & comme il est leur iuge, & comme il est leur Pere. Ainsi quand Dieu agit comme Pere, il ne blesse jamais sa iustice. Car où il fait misericorde en conuertissant l'effect du iugement de la loy en instrument de sa grace, à cause que Iesus-Christ a satisfait à sa iustice selon le iugement de la loy. Et lors la misericorde de Dieu est employée pour sanctifier l'homme. C'est ce qui se fait en cette vie, iusqu'à ce que par la mort l'effect de la grace soit consommé & accôpli. Apres cette vie, Dieu, comme Pere, resuscitera, en sa misericorde, de la misere de la poudre & de la mort, les corps de ses fideles, afin de leur retribuer, & comme Pere, & comme iuste iuge remunerant, le bien qu'ils auront fait en leur corps. Comme iuge punissant il excitera aussi du repos de la terre les corps de ceux qui comparoistront en son iugement, pour recevoir les peines eternelles de ce qu'ils ont obeï à iniustice, & qu'ils n'ont pas receu la dilection de verité pour estre saueez.

Sur cela vous satisferez vous mesme aisément à ce que vous dites, *Qu'il faut donc vne obeïssance à l'espreuue de cette iustice rigoureuse, exempte par consequent de defect, pour iustifier l'homme, puis qu'à nous estre iustificié est subsister deuant le tribunal de Dieu comme irreprehensible.* Car l'obeïssance des fideles, qui ont embrassé la communion de la Croix de Christ, & qui par l'esprit ont mortifié les faits du corps, est à l'espreuue de la iustice de Dieu, qui, selon l'Euangile, couronnera les fideles, ou condamnera les infideles, selon toute rigueur. Et par mesme moyen vous refuterez vous mesmes l'argument que vous me defiez de refuter, ou vous dites, *La iustice & la saincteté qui a des defects reprehensibles, ne nous fait pas subsister deuant Dieu, ne nous iustifie pas comme irreprehensibles. Or la iustice inherente en nous a des defects reprehensibles.* Donc, &c. Car la iustice inherente en nous, accôplie & parfaite par la victoire de nostre foy qui surmonte le monde en la Croix de Christ, n'a point de defects reprehensibles. La seule chose qui vous abuse est que vous confondez le progres de la iustice & de la sain-

Eteté, avec son accomplissement. Car il  
 est bien certain que le fidele au progrez  
 de sa regeneration peut broncher & tō-  
 ber dans la course & dās le cōbat. Mais  
 ces cheutes ne fōt pas partie de sa sainte-  
 té, pour dire qu'elle est imparfaite. Ains  
 en ce qu'il se releue & qu'il surmonte, &  
 qu'il obtient la victoire sur le peché,  
 cōsiste sa sainteté & sa iustice, laquelle  
 est lors vraye iustice & vraye sainteté,  
 sans querien luy defaille pour estre dite  
 telle. Vous sçauiez que tandis que le fi-  
 dele est dans la course & dans le com-  
 bat, il est exposé à diverses tentations.  
 Pour raison dequoy l'Apostre veut que  
 nous soyons armez des armes de Je-  
 sus-Christ pour resister au mauuais iour.  
 Car ce n'est pas pour neant que luy mes-  
 me crie, *Que celuy qui est debout regarde*  
*qu'il ne tombe.* Si donc quelque grande  
 tentation surprend le fidele moins pre-  
 paré. Soit qu'estant deuenue lasche en la  
 course de sa vocation, il ait destourné  
 son col du joug de la Croix, & ses yeux  
 de la contemplation des biens celestes,  
 en rabbaissant son cœur aux choses de  
 la terre. Si cela luy aduenant, il delaisse  
 ses premieres œuures, & tōbe en peché:

il est necessaire que pour parfaire sa regeneration, la grace de Dieu le releue. Car Dieu, qui ne delaisse point le bon œuvre qu'il a commencé en nous, vsant de misericorde, le continuë iusques à la fin. Et pourtant selon les moyens qu'il en a ordonnez en son Eglise, dont l'usage se rapporte à l'exercice de la Croix, il le rapellera, par repentance, au chemin de sa premiere course. Et lors le fidele ayant recouru à la confession de sa faute, & obtenu la grace de la remission de ses pechez, & l'augmentation de foy, & le renouvellement du saint Esprit, reprendra nouvelle force, pour combattre & pour surmonter toutes tentations. Et pour continuer de cheminer en bonnes œuvres de iustice par patience & par charité, sobrement, iustement, & religieusement. Ainsi le fidele durât sa course va cōtinuellement combattant contre le peché, par la mortification de sa chair dans laquelle le peché habite. Et si quelques fois le peché l'abbat, il se releue, & le surmonte par la vertu de la grace qui luy est donnée en la communion de la chair & de l'Esprit de Christ. Ainsi sa iustice & sa sain-

Eteté va s'accomplissant par la victoire  
 sur le peché. Victoire, qui depend de la  
 perseuerance finale, dont le dernier &  
 principal acte est en la mort de ceux qui  
 meurent au Seigneur. Et lesquels avec  
 ioye & paix remettent entre ses mains  
 leur depost, pour reposer au sein d'ice-  
 luy, iusqu'à ce qu'en la derniere iour-  
 née ils le recouurent en gloire, pour re-  
 gner avec luy eternellement, selon ses  
 promesses, & selon leurs œuvres & leurs  
 merites. Telle est la iustice & la sainte-  
 té des fideles que ie di parfaite & accom-  
 plie en cette vie durant la course & le  
 combat. Iustice & sainteté irreprehen-  
 sible, quand elle sera examinée au iuge-  
 ment de Dieu, selon la regle de la loy  
 del'Esprit de vie qui est en Iesus-Christ,  
 qui la faite & formée au cœur du fidele.  
 Et en laquelle ne comparoistront lors  
 aucuns defauts ny imperfections, pour  
 ce que toutes celles qui sont aduenues  
 au fidele au cours de sa vie, ont esté ef-  
 facées par le sang de Christ qu'il a beu  
 continuellement, & en la communion  
 duquel il a receu l'Esprit qui la sanctifié  
 de iour en iour. C'est l'estat auquel ie di  
 que le fidele comparoissant au iuge-

ment de Dieu, recevra en son corps, selon la iustice de Dieu, la couronne promise à ses bonnes œuvres & à ses mérites.

Après l'argument, duquel i'espere que vous vous mocquerez à cette heure vous mesmes, vostre plume a pris l'effor. Et en s'egarrant du droit fil de vostre discours, elle s'attaque à vne obiection que i'ay faite ailleurs. En laquelle ie conclu, comme vous dites, Que si nous auons esté constituez pecheurs & iniustes en Adam, par vne iniustice & corruption inherente: il s'ensuit que nous sommes constituez iustes en Iesus-Christ par vne iustice & sainteté inherente, selon ces paroles de l'Apostre, Rom. 5. vers. 19. *Comme par la desobeissance d'un seul homme plusieurs ont esté rendus pecheurs, ainsi par l'obeissance d'un seul plusieurs seront rendus iustes.* Cette necessité resulte des termes de comparaison, & ainsi. Car par la desobeissance d'Adam nous n'auons pas esté rendus pecheurs & iniustes d'une iniustice imputée. pour estre reputez iniustes & pecheurs, encore que nous ne le soyons pas en nous-mesmes. Mais nous

auons esté rendus pecheurs & iniustes d'une iniustice inherente par le peché habitant en nous. Puis qu'il en est de mesme ( par les termes comparatifs de l'Apotre ) au regard de l'effect qui produit en nous l'obeissance de Iesus-Christ, il s'ensuit que par son obeissance nous sommes rendus iustes d'une iustice inherente, qui nous fait vrayment iustes en nous-mesmes. Et non d'une iustice imputée qui nous face reputed iustes encore que nous ne le soyons pas. Voyon maintenant, ie vous prie, comment vous refusez cette raison. Vous dites, *Que pour estre iustes deuant Dieu il faut auoir vne iustice parfaite. Car nous pouuons bien estre rendus pecheurs deuant Dieu par quelque iniustice que ce soit, mais nous ne pouuons pas estre absous deuant luy par quelque iustice que ce soit.* Aux trois periodes de vostre responce, vous commettez trois fautes. Que ie vous feray cognoistre l'une apres l'autre. Et en ce faisant ie vous deliureray l'esprit d'un des plus grands empeschemens qui ait embrouillé nos reformateurs sur cette matiere.

Il est vray, que pour estre iustes de-

uant Dieu il faut auoir vne iustice parfaite. Et pour estre saints deuant Dieu, i faut auoir vne saincteté parfaite. Mais vostre erreur est en ce que vous estimez que la iustice, par laquelle le fidele est renouuellé en nouueauté de vie par la grace de Iesus Christ, n'est pas vne iustice parfaite. Et que la saincteté, par laquelle il est sanctifié, n'est pas vne saincteté parfaite. Dites moy, ie vous prie, en quel lieu des escripts des Apostres, ( qui seuls nous ont annoncé la voye de perfection en Iesus - Christ ) ont-ils trouué que la iustice & la saincteté, que l'Esprit du Seigneur Iesus forme au fidele, en creant en luy le nouuel homme à l'image de Christ en iustice & vraye saincteté, ne soit pas parfaite? Voyez bien ce que ie vous demande. Monstrez-le moy par quelque definition Apostolique. Vous rougirez quand vous chercherez dans leurs escripts vne chose à laquelle ils s'ont par tout si formellemēt cōtraire. Nos reformateurs, & vous qui les suiuez, vous estes fait croire, que l'homme ayant esté vne fois pecheur, quoy que de pecheur il soit par apres fait iuste, ne peut plus estre

neantmoins réputé parfaictement iuste. Et de là vient vostre maxime, *Que nous pouuons bien estre rendus pecheurs deuant Dieu par quelque iniustice que ce soit, mais que nous ne pouuons pas estre reputex iustes par quelque iustice que ce soit.* C'est de ce principe qu'ils ont basti leur distinction, entre la iustice Legale, & la iustice Euāgelique. Desquelles ils veulent que la Legale soit parfaicte, & l'Euangelique imparfaicte. Ignorance en la Theologie s'il y en a aucune. Car en distinguant de la sorte, ils n'ont cogneu la definition, ny de la iustice legale, ny de la iustice Euangelique. Vous l'avez apprise, comme i estime, de diuers endroits de mes escrits. Mais pour satisfaire à vostre response, ie vous la représenteray encore icy plus particulièrement.

L'vne & l'autre iustice, est l'amour de Dieu sur toutes choses, auquel la loy & l'Euangile appellent & obligent l'homme, mais diuersement. La diuersité en est au moyen par lequel l'homme y est appelé. Le moyen a deux parties, le precepte & la promesse. Au regard du precepte, le moyen par lequel la loy amene l'homme à la iustice, sont les commande-

mēs singuliers par lesquels l'homme est  
 adressé en l'usage des choses de cette  
 vie selon la volōté de Dieu. Au regard de  
 la promesse, c'est l'abondance & la com-  
 modité de la iouissance des choses qui  
 regardent le bien de la vie presente. En  
 l'Euangile, au regard du precepte, le  
 moyen par lequel le fidele est amené à  
 la iustice, c'est la Croix de Christ. *Char-  
 gesur toy ma Croix & me sui. Soi baptisé  
 au nom du Seigneur Iesus. Mange sa chair  
 & boi son sang.* Au regard de la promes-  
 se, c'est la vie & la gloire immortelle.  
 Le Royaume des Cieux. La puissance,  
 la force & l'empire que Iesus-Christ ob-  
 tient la haut sur toute chose à la dextre  
 du Pere. Apprenez d'ici la diuersité qui  
 est entre l'une & l'autre iustice. Et vous  
 verrez, d'autres yeux que vous n'avez  
 peu faire iusques à present, qu'elle est la  
 plus parfaicte des deux. L'obeissance  
 des commandemens singuliers, qui ad-  
 dressent l'homme en l'usage des choses  
 de cette vie, est la voye à l'amour de  
 Dieu sur toutes choses, si l'homme pour  
 l'amour de Dieu s'abstient des choses  
 defendues, ou accomplit celles qui luy  
 sont commandées. Car en ce faisant

l'homme aime Dieu plus que les choses en l'usage desquelles consiste le plaisir de sa vie. Mais pour ce que cette vie & son plaisir consiste en la durée de la chair, & en la iouissance des choses commodés & agreables à ses desirs, qui luy sont aussi proposées en la promesse de la Loy : de là resultent necessairement deux considerations. L'une est que quand l'homme chemineroit en tous les commandemens de la loy, & qu'il les accompliroit pour l'obeissance qu'il doit à Dieu, l'amour de Dieu, qui s'engendreroit par là en son ame, regleroit bien l'amour de soy-mesme & de sa chair, mais ne l'engloutiroit pas, & ne l'esteindroit pas. Veu qu'au contraire l'amour qu'il porte à Dieu, a pour sa fin la conseruation du bien qui est l'objet de l'amour qu'il porte à soy-mesme & à sa chair. Et pourtant les commandemens de la loy n'obligent point l'homme à renoncer à soy-mesme, n'y a mourir pour l'amour qu'il porte à Dieu. Cét exercice de l'homme ne se trouue que dans les commandemens de la grace. L'autre consideration est, que par la desobeissance d'Adam la mort estant venuë au

môde, par le sentiment & par la crainte de la mort, en tout l'homme né d'Adam, l'amour de foy mesme & de sa chair s'est tellement enflammé, que la fumée de ce feu, s'il faut ainsi dire, c'est à dire, les conuoitises charnelles esteignent, en son entendement, la lumiere du iugement, qui le deuoit regler selon la volonté de Dieu. Tellement qu'au lieu de s'abstenir des choses defenduës, ou de faire les commandées, il transgresse perpetuellement les commandemens de la loy. Ou s'il s'abstient des choses defenduës, ou s'il fait les commandées, c'est, non par l'obeissance qu'il doit à la volonté de Dieu, & pour l'amour d'iceluy. Mais pour le seul amour qu'il porte à foy-mesme. C'est la raison pour laquelle tout homme né d'Adam, corrompu du vice originel, ne peut plus paruenir à la iustice qui est par la loy. C'est la cause de l'impuissance de la loy qui est foible en la chair. Et pour raison dequoy nul homme ne fera iustifié deuant Dieu par les œuures de la loy. Non pas pource qu'il ne s'en puisse bien trouuer quelques-vns qui puissent obseruer les commandemens de la loy. Mais

pource que telle obseruation des com-  
 mandemens n'engendre point en eux  
 la iustice agreable à Dieu, d'autāt que l'a-  
 mour de soy-mesme & de leur chair do-  
 mine tousiours en eux. Telle estoit la iu-  
 stice de la loy de Paul Pharisien, en la-  
 quelle il estoit sans reproche. Mais estāt  
 fait fidele & ayant cogneu l'excellence  
 de la iustice qu'il auoit obtenuē par l'Es-  
 prit de Dieu par la foy en Iesus-Christ,  
 il reputoit cette siene iustice preceden-  
 te pour fiente & soüillure. Et certes  
 quand Adam luy-mesme, au lieu de  
 transgresseur qu'il est deuenue dès le pre-  
 mier pas du chemin, seroit paruenue à la  
 iustice qui est par la loy, & à l'amour de  
 Dieu qui est selon icelle, ce n'auroit esté  
 qu'une enfance, vne iustice basse, & vn  
 amour foible, au prix de la iustice & de  
 l'amour de Dieu, auquel le fidele par-  
 uient en la communion du Seigneur Ie-  
 sus. Car le precepte de l'Euangile, de  
 charger la Croix, d'estre baptisé au nom  
 du Seigneur Iesus, de manger sa chair  
 & de boire son sang, de souffrir & de  
 mourir avec luy, ne nous regle pas main-  
 tenant ny ne nous determine pas quel-  
 ques commandemens singuliers pour

l'usage de ce monde. Mais crucifie tout ce monde entier pour les fideles. Et leur oste tout d'un coup toutes les promesses des biens de cette vie pour gages de l'amour de Dieu, & pour fin de la felicité qu'ils attendent. C'est pourquoy l'Evangile propose aux fideles, la haine du monde, angoisse au monde, affliction, tribulation, persecution. En l'exercice desquelles l'homme exterieur, le vieil homme, (c'est à dire, cette chair & les affections de l'ame qui regardent les desirs & les plaisirs de la chair dans les objets des choses externes & sensibles) se va destruisant & aneantissant de iour en iour, iusques à ce que la mort le consume. Et d'autre part les promesses de l'Evangile proposent au fidele les biens eternels & inuisibles qui nous sont maintenant cachez en Iesus-Christ. En l'esperance desquels le S. Esprit forme en l'ame des fideles des affections vraymēt iustes & vrayment saintes par lesquelles ils glorifient Dieu par patience en toutes leurs aduersitez, & par charité en toutes leurs prosperitez, aimans Dieu sur toutes choses, plus qu'eux-mesmes & leur propre vie, estans remplis de

ioye & de paix, quand ils faut qu'ils la laissent pour la gloire de son nom, ou pour aller à luy en quelque façon qu'il les appelle. Pour ce qu'alors se consume en eux & reçoit son accomplissement, l'homme interieur & inuisible, c'est à dire, l'esprit & les affections de l'ame qui regardent, en Iesus-Christ, & en l'obiet de sa gloire, les desirs & les plaisirs d'une vie spirituelle & eternelle, qui apparoiſtra lors que Iesus-Ch. viendra des Cieux pour nous rendre nostre deſpoſt, & le couronner de sa gloire. Tel est la difference de la iustice qui est selon la loy, & de l'amour de Dieu qui est selon la loy, d'auec la iustice qui est selon l'Euangile, & de l'amour de Dieu qui est selon l'Euangile. En la premiere desquelles l'homme estant adreſſé par la loy y chemine par son franc-arbitre. Mais en la seconde l'homme estant adreſſé par l'Euangile ny peut cheminer que par la conduite du S. Esprit. C'est ce que nos reformateurs n'ont iamais bien compris.

Vous maintenant le comprenant, apperceuez, comme i'espere, le vice des maximes que vous nous donnez,

*Que nous pouuons bien estre rendus pecheurs  
 deuant Dieu par quelque iniustice que ce  
 soit ; mais que nous ne pouuons pas estre ren-  
 dus iustes deuant luy par quelque iustice que  
 ce soit. Car entendant la vraye differen-  
 ce de la iustice de la loy, & de la iustice  
 del'Euangile, vous cognoissiez que ny  
 l'vne ny l'autre de vos maximes n'est  
 veritable selon la iustice de l'Euangile,  
 qui est la seule iustice vrayment parfai-  
 te. Car le fidele, qui a bien mangé &  
 qui a bien beu la chair & le sang du Sei-  
 gneur, comme S. Augustin parle. Qui  
 chemine selon l'Esprit. Qui a crucifié la  
 chair avec ses conuoitises. Qui laisse les  
 choses qui sont en arriere, qui tend à cel-  
 les qui sont en auant. Courant & s'ad-  
 uançant vers le prix de sa vocation su-  
 pernelle, tresbuche quelquesfois en sa  
 course, & se releue, comme il a esté  
 dit. Mais de là il ne s'ensuit nullement,  
 que les pechez que le fidele commet en  
 cette sorte, & par lesquels il a contristé  
 l'Esprit de Dieu durant son combat,  
 après la victoire obtenuë, & la course &  
 le combat paracheuez, le fassent repu-  
 ter pecheur, ou l'empeschent d'estre  
 réputé iuste deuant Dieu, quand il com,*

paroistra en son iugement pour rece-  
 uoir la couronne. Car il est lors réputé  
 iuste pour ce qu'il a vaincu. Et il a vain-  
 cu pour ce qu'il auoit en luy l'Esprit du  
 Seigneur Iesus. Et il auoit l'Esprit du  
 Seigneur Iesus, pour ce qu'il a mangé  
 sa chair, & qu'il a beu son sang. Car en  
 mangeant la chair & en beuuant le sang  
 de Iesus Christ chaque iour en son Egli-  
 se, le S. Esprit forme en luy l'habitude  
 de iustice, par laquelle il est rendu vi-  
 ctorieux sur le peché, & pour laquelle il  
 est réputé vrayment iuste deuant Dieu.

La raison que vous adioustez de vo-  
 stre maxime, n'est pas mieux digerée  
 que vostre maximemesme, quand vous  
 dites, *Car le moindre peché est capable de*  
*condamner, mais non la moindre iustice*  
*d'absoudre. Il en faut vne parfaicte pour ce-*  
*ci, afin que le iugement de Dieu soit veri-*  
*table, selon que l'Apostre monstre Rom. 2.*  
*qu'il est selon verité enuers tous.* Considé-  
 rez comme vous vous enfermez vous-  
 mesmes. Vous dites qu'il faut vne iusti-  
 ce parfaicte pour absoudre. Mais vous  
 ne voulez pas, par vos maximes, que  
 la iustice Euangelique, qui est formée au  
 fidele par la grace de l'Esprit de Christ,

soit parfaicte, ny qu'elle puisse estre re-  
 putée telle, pour ce que ce mesme fide-  
 le est coupable de la transgression de la  
 loy de Dieu. Pour cela voulez-vous, que  
 la iustice parfaicte, qui est capable d'ab-  
 soudre, soit la iustice de Iesus-Christ  
 imputée au fidele. C'est lelixir de tout  
 vostre raisonnement. Et vous voulez  
 que cela soit ainsi, afin que le Iugement  
 de Dieu soit veritable. Selon que l'A-  
 postre dit Rom. 2. *Qu'il est selon Verité  
 enuers tous.* Auiez vous le lieu de l'Apo-  
 stre deuant les yeux, ou y pensiez vous?  
 Vous souueniez-vous pas, qu'en ce iu-  
 gement, que l'Apostre dit estre selon  
 verité, il declare nommément, *Que  
 Dieu y rendra à chacun selon ses œuvres.*  
 Rendre selō ses œuvres est-ce absoudre  
 ou reputer iuste en consequence d'une  
 iustice imputée, ou d'une iustice inherē-  
 te? Qu'en dites-vo<sup>us</sup>? Vous mordrez vous  
 pas les levres, de m'auoir prouqué à  
 cette autorité de l'Apostre, & d'auoir  
 dégainé ce glauiue qui coupe net la gor-  
 ge à vostre dogme? Car au lieu que vous  
 concluez, *Que si Dieu nous absoluoit &  
 iustificoit comme irréprehensibles, à raison  
 d'une iustice & sainteté, en laquelle il y a*

*des defauts reprehensibles , son iugement ne seroit pas selon verité : retournez la proposition , & la chance tournera contre vous. Puis que le iugement de Dieu , par lequel il rend à chacun selon ses œuvres , lesquelles appartiennent à la iustice inherente , est selon verité : la iustice inherente absout le fidele & le iustifie comme irreprehensible. Car autrement le iugement de Dieu , selon vous mesmes , ne seroit pas selon verité. Refutez maintenant cét argument si vous pouuez , afin que ie vous rende vos termes avec plus de raison.*

Mais ie ne me contenteray pas d'auoir destruit la conclusion de vostre syllogisme , & d'en auoir ainsi retorqué la raison contre vous. Je veux encore vous remontrer le vice de vos propositions , & de vos maximes. Quand vous dites , *Que le moindre peché est capable de condamner.* Car quād vous parlez ainsi sans aucune distinction & indefiniment , vous vous abusez & ne dites pas verité. Selon la iustice Legale , cela est vray. Pour ce qu'en la iustice Legale , l'homme ne paruiet à l'habitude de iustice que par l'observation des cōmandemens singuliers de

de la loy, qui doiuent estre pour cet effect accomplis par vne perpetuelle teneur d'obeissance. Tellement que celuy qui faut en vn, est coupable de tous. Le moindre peché est capable de condamner. Pour cetteraison Adam a esté condamné pour la premiere transgression qui luy est aduenüe. La raison de cela est, que l'habitude du vice, c'est à dire, l'amour de soy-mesme par dessus celuy de Dieu, s'est contracté en Adam, par les causes de sa transgression premiere. Et par ce moyen vne seule transgression la fait decheoir du but de la iustice à laquelle il estoit appellé. Et à laquelle l'homme ne peut plus paruenir estant vne fois entaché du vice, & tombé, par mesme raison, sous l'ire de Dieu, & dans la peine denoncée au peché. C'est la cause pourquoy tous les hommes qui sont nez d'Adam, & qui naissent, en cette sorte, corrompus dés l'origine, ne peuuent, sous la loy, acquerir l'habitude d'aucune iustice agreable à Dieu. Car, comme vous scauez trop mieux, il n'est pas de la iustice agreable à Dieu, & des bonnes oeuvres qui luy plaisent, comme de la

iustice & des vertus, dont les Philosophes establisent les regles. Le Philosophe ne cognoist point que la vertu consiste à aimer Dieu plus que soy-mesme. Au contraire, il veut & enseigne, qu'on face toutes choses pour l'amour de soy-mesme. Et par mesmeraison, de tout le bien que fait l'homme, & de toute la vertu qui est en luy, il n'entend en attribuer la gloire qu'à soy-mesme & à son franc-arbitre. Pour ce que la fin de la felicité que l'homme se propose naturellement, n'excede point les termes de la nature, de laquelle l'homme est Seigneur par sa creation, & dont l'usage est assueté à son franc-arbitre. Et c'est la raison vniuerselle, pourquoy la iustice, qui est par les œuvres de la loy, n'a autre principe que le franc-arbitre de l'homme. Je di la iustice mesme qui seroit vraye iustice selon la loy, telle qu'auroit eue Adam, si, en son integrité, pourchassant la iustice qui est par la loy, il fut parueniu à la fin de la loy de iustice, obeissant au commandement de Dieu. Mais l'homme corrompu, en l'estat que tous naissent d'Adam, ne peut plus paruenir à aucune iustice agreable à

Dieu. Pour ce qu'en la sapience que  
 Dieu a reuelée en la nature, ne cognois-  
 sant point Dieu par sapience, il se fait  
 soy-mesme semblable à Dieu. Il se met  
 en la place de Dieu. Il fait toutes cho-  
 ses pour l'amour de soy-mesme, au lieu  
 de les faire pour l'amour de Dieu.  
 Pourtant quelques œuvres qu'il fa-  
 ce selon la loy, elles ne peuvent plaire  
 à Dieu. Il est impossible, que par les  
 œuvres de la loy il soit iustifié deuant  
 Dieu. Le Philosophe definira la tem-  
 perance vne volonté constante de  
 s'abstenir des voluptez & des delices qui  
 tendent à l'excez. La force, vne vo-  
 lonté constante de resister aux aduersi-  
 tez, & d'opposer vn courage ferme aux  
 dangers auxquels on se trouue. La iusti-  
 ce, vne volonté constante de rendre à  
 chacun ce qui luy appartient; & ainsi  
 des autres vertus. Il ne requiert ny n'en-  
 seigne point, que la volonté del'hom-  
 me, ainsi affectée, se propose pour sa  
 principale fin, l'amour de Dieu & sa  
 gloire. Mais la sapience de Dieu reue-  
 lée en sa loy, met cette fin pour la prin-  
 cipale partie de la definition de la ver-  
 tu, & de toute bonne œuvre agreable

à Dieu. Elle veut que la fin, qui en est aussi le principe, *τὸ ὅ πᾶς, ἀρχὴ*, soit d'aimer Dieu sur toutes choses. Or il est impossible à l'homme, en l'estat auquel il naist, sous l'ire de Dieu, enfant d'ire, comme parle l'Ecriture, assuietti à la mort, mort en ses fautes & pechez, d'aimer Dieu sur toutes choses. Pour ce qu'à l'homme, selon la nature, sa fin & sa beatitude, c'est la vie, son souuerain mal, c'est la mort. Il ne peut aimer Dieu plus que sa vie, puis qu'il ne peut aimer la mort. Il ne peut donc aimer Dieu plus que sa vie, plus que soy-mesme, plus que toutes choses. Il aime sa vie, soy-mesme, & toutes choses plus que Dieu. Et par consequent, il peche contre la loy de Dieu en toutes ses œuvres, auxquelles il a pour fin l'amour de soy-mesme. De là vous entendez pour quoy c'est, que nul homme ne peut estre iuste deuant Dieu, selon la iustice legale. Et pourquoy, selon la loy, le moindre peché est capable de condamner l'homme. Ce qui ne fait pas que la iustice de la loy soit plus parfaite ou plus exacte que la iustice de l'Euangile. Ou qu'en l'vne Dieu considere, *τὸ ἐκρίβο σίχαυ*, &

en l'autre non, comme nos Reformateurs se font accroire. Car au contraire, celle de l'Euangile est beaucoup plus parfaicte, comme ie le vien de dire. Et Dieu, en l'examinant, ne considerera pas moins exactement l'obseruation du commandement Euangelique, de porter la Croix de son Fils, de souffrir avec luy, de mourir avec luy. Car à ceux-là seuls, qui auront obtenu ainsi la victoire, sera donnée la couronne.

Vous commettez vne pareille inadvertance au second membre de vostre maxime, où vous dites, *que nous ne pouuons pas estre absous deuant Dieu par quelque iustice que ce soit.* Car, selon la iustice legale, & la raison d'icelle, nul homme vne fois tombé en transgression, ne peut plus estre iuste, par la demonstration que i'en vien de donner. Aussi ce n'est pas la loy qui propose à l'homme la repentance, & le renouvellement à iustice, c'est la grace. Et la fin de la loy à l'homme transgresseur, est le commencement de la grace. Car la fin de la Loy, à l'homme transgresseur, c'est la mort. Or par la grace de Iesus-Christ, qui a gousté la mort pour

tous, Dieu nous a establi, en la communion de sa mort, l'assurance de la remission de nos pechez, & la deliurancce de route malediction, & la promesse de la vie & de la gloire, en laquelle Iesus Christ est entré par sa mort, estant resuscité des morts. Or nous sommes appelez & amenez à la cômunion de la mort de Christ, par la foy de la verité, laquelle nous propose les promesses de la grace, & de la benediction qu'il nous a acquise par sa mort. Tellement que par la foy en la mort de Iesus-Ch. nous aimons la mort mesme. Nous aimons la mort, pour ce qu'elle est l'entrée à la vie, & à la gloire qui nous est preparée. Nous aimons la mort & ses dependances, les afflictions, & les tribulations de la vie. Aimans ces choses & nous resjouissans mesmes en Dieu, quand elles nous arriuent: nous aimons Dieu plus que nostre vie, plus que nous mesmes, plus que toutes choses. La dilection de Dieu est espendue en nos cœurs par le saint Esprit. La vraye iustice est formée en nous. Et cette est la iustice de Dieu, qui est par la foy. Or estans ainsi renouelez à iustice par la

foy en Iesus-Christ, & par l'esperance  
 viue de la gloire que nous obtiendrons  
 ayans eu communion à sa mort : vous  
 voyez qu'il est necessaire, que par cet-  
 te mesme iustice nous soyons absous  
 deuant Dieu, de toute l'iniustice legale,  
 que nous auions contractée, en l'amour  
 de ce present monde & de nous-mes-  
 mes. Tellement que tous ceux lesquels  
 auant qu'estre amenez à la foy du  
 Fils de Dieu, ont esté paillards, adul-  
 teres, raiisseurs, meurtriers, & remplis  
 de toute autre sorte de vices, s'ils en sont  
 lauez, sanctifiez, & iustifiez par la foy au  
 sang de Iesus-Christ, & par son Esprit;  
 & que cheminans selon Esprit ils par-  
 uiennent à la resurrection des morts: ils  
 sont absous deuant Dieu de toutes leurs  
 iniustices precedentes. Or au regard de  
 cette vraye & parfaite iustice Euange-  
 lique, ce que vous disiez, *que nous som-*  
*mes rendus pecheurs deuant Dieu par quel-*  
*que iniustice que ce soit*, n'est nullement  
 veritable. Car s'il arriue au fidele de  
 tomber en quelques pechez au cours de  
 sa vie, dans le combat, desquels il se re-  
 leue par la vertu de l'esprit, lequel il re-  
 goit de iour en iour, en la communion

de la chair & du sang du Seigneur, ( par où il est renouvelé , iusqu'à ce que sa sanctification soit parfaite , ) ils ne sont plus capables de le faire reputed pecheur deuant Dieu. Ils ne viendront plus en compte , pour ce que son Sauueur les a expiez par son sang , par la communication duquel il a esté sanctifié. Car le Seigneur a porté la peine de tous les pechez que le fidele commet en sa vie contre la loy. Le iugement en a esté exercé en la personne de Iesus-Christ. Et la raison de la peine, que Christ en a portée en la Croix , est ce qui rend à present aux fideles ces mesmes peines exercices de salut , pour les renouveler à repentance , & pour parfaire leur sanctification en tout le cours de cette vie. C'est pourquoy la punition n'en sera plus exercée au dernier iour en ceux qui sous la Croix de Christ auront obeï à iustice , ayans embrassé la dilection de la verité pour estre saueuz. Il n'y a plus de condamnation pour ceux qui sont en Iesus-Christ , lesquels estans paruenus à la loy de iustice , & ayans esté renouvellez par l'Esprit de sanctification , comparoistront au iugement de Dieu, saints,

sans tache, & irreprehensibles, pour recevoir, selon leur merite, la couronne de iustice que Dieu leur a promise.

Telle est donc la iustice que nous obtenons, & dont nous sommes remplis par le moyen de la foy, & de la connoissance de Iesus-Christ, *qui nous a esté fait de par Dieu, sapience, iustice, sanctification, & redemption.* Pource que par la sapience que Dieu nous a manifestée en luy, il engendre en nos entendemens la foy, qui nous fait adherer au precepte Euangelique, de nostre mortification sous la Croix, par l'esperance de la participation de sa gloire. Par où son esprit, qui nous est donné, forme en nos ames le veritable amour de Dieu & de nos prochains, auquel est accomplie la vraye iustice & sainteté. Par l'habitude de laquelle nos ames sont affranchies de la servitude de corruption. Et par laquelle encore, selon l'efficace & la puissance de l'esprit de Christ qui la forme, nos corps au dernier iour, se releueront de la poudre, & seront transformez en l'image de sa gloire, pour regner avec luy eternellement. C'est le sens de l'A-

postre quand il dit, *que Iesus-Christ nous a esté fait de par Dieu, sapience, iustice, sanctification & redemption.* Et toutes les gloses de nos reformateurs, qui cherchent ici l'equiuoque de leur iustice imputée, sont alienés de son intention.

Telle est la iustice parfaite de l'Euangile, que nous obtenons par la manifestation de la grace de Iesus-Christ. En comparaison de laquelle, celle où paruenoient les fideles sous les ombres de la loy, estoit beaucoup moindre & imparfaite. Pour ce qu'en eux, conduits par la pedagogie de la loy, l'amour de Dieu sur toutes choses, auquel gist l'habitude de la vraye iustice, ne consistoit pas au renoncement de ce monde, & au despouillement de la chair. Mais il consistoit en la recognoissance que tous les biens de ce monde & de cette chair, donne lors à l'homme pour argument de l'amour de Dieu & de sa benediction, procedoient de sa seule bonté & puissance. Mais maintenant, sous l'Euangile, l'amour de Dieu sur toutes choses consiste au renoncement de ce mode, & au depouillemēt de la chair, & à viure en ce monde, comme morts au

monde. Et pourtant la charité des fideles sous Iesus-Christ est beaucoup plus parfaite. Les commandemens del'Euan-gile nous en enioignent vn exercice beaucoup plus parfaict, que ceux de la loy. Selon que nostre Seigneur luy-mesme, par les premieres predications, où il instruisit ses Disciples de cette difference, le leur declara, par l'opposition de la parole de la loy à la sienne. Car il auoit esté dit aux Anciens sous la loy, *œil pour œil, & dent pour dent. Tu aimeras ton prochain, & haïras ton ennemi.* Mais Iesus-Christ nous donne ce commandement nouveau. *Ne résistez point au mal, ains si aucun vous frappe en la ioüe droite, tournez-luy aussi l'autre. Aimez vos ennemis, benissez ceux qui vous maudissent, faites bien à ceux qui vous haïssent, & priez pour ceux qui vous courent sus & vous persécutent, afin que vous soyez PARFAITS comme vostre Pere qui estés Cieux est parfaict.* C'est ce que fait en nous l'admirable Sapience que Dieu nous a manifestée en la Croix de son Fils, en laquelle il nous a descouuert les causes du bon plaisir, par lequel il nous a ordonné à la possession de son Royaume. Car ayant

establi, en sa Croix, la raisõ du merite de sa gloire, il à fondé la foy par laquelle nous l'embrassons & nous y soufmettons avec ioye. Et nous y soufmettans avec ioye, par l'esperance de la couronne qui nous est preparée apres le combat & la victoire? ny le desir de la vie presente, ou des choses qui concernent ses delices, ny l'apprehension de la mort, ou des choses qui nous y conduisent, ne dominēt plus en nous. C'est ainsi que s'arrache de nostre cœur toute passion & toute haine. Et que la patience & la vraye charité y trouuent place. Ainsi le fidele apprend, sous la Croix de Iesus-Christ, l'obseruation du nouveau commandement qu'il nous a donné, d'une charité parfaicte, qui s'estende mesme à l'amour de nos ennemis. Telle est la iustice de l'Euangile, plus parfaicte que celle de la loy. Telle est la raison de la perfection de iustice, qui constituē le vray merite du fidele, selon lequel il comparoistra au iugement de Dieu sans tache & irreprehensible. Telle est la demonstration de la doctrine Catholique en cet argument, que nos Reformateurs n'ont pas comprise, & qu'ils ont trop precipitamment condamnée.

La conclusion que vous recueillez de vostre discours precedent, touchant la double iustice que vous attribuez au fidele en la communion de Iesus-Christ; & que vous voulez faire rencontrer en opposition avec vne double iniustice, dont vous voulez semblablement rendre les hommes coupables en la communion d'Adam, est donc bastie sur toutes hypotheses fausses, quand vous dites: *Doncques ayans deux iustices de Iesus-Christ, l'imputée qui est tres-parfaitte, & l'inherente, qui est imparfaitte pendant que nous sommes en cette vie: il faut que nous subsistions deuant Dieu par celle-là. Bien que des deux iniustices que nous auons d'Adam (à sçauoir l'imputée, en tant que l'acte de sa desobeissance nous est imputé, & l'inherente, en tant que la corruption est passée en nous par generation) l'une & l'autre soit capable de condamner. Il est faux que nous ayons aucune iustice de Christ imputée, qui nous rende parfaitement iustes deuant Dieu, encore que nous ne le soyons pas. Vous ne sçauriez trouuer de cette iustice imputée vne seule parole en l'Escripture. C'est le songe de nos Reformateurs. Il est faux que nous ayons*

autre iustice, qui nous face repouter iustes  
 deuant Dieu, que la iustice inherente,  
 appellée dans toute l'Ecriture, iustice  
 de Dieu, & iustice qui est par la foy, pour  
 ce que Dieu la forme en nous par son es-  
 prit, & qu'elle procede de la foy en Je-  
 sus-Christ crucifié; Il est encore, que  
 nous ayons deux iniustices en Adam:  
 l'une imputée, en consequence de la-  
 quelle Dieu repoute les hommes pe-  
 cheurs, encore qu'ils ne le soient pas en  
 eux-mesmes. Il est faux que nous ayons  
 en Adam autre iniustice, que l'inheren-  
 te, qui est la corruption vniuerselle en  
 tous les hommes. Il est faux que l'acte de  
 la desobeïssance d'Adam nous soit im-  
 puté, en sorte que nous en soyons repu-  
 tez iniustes, sans l'estre en nous-mesmes.  
 L'acte de la desobeïssance d'Adam nous  
 est imputé par la condamnation qui l'a  
 suivie, laquelle du chef est tombée sur la  
 race, & laquelle par mesme moyen, a  
 assuietti tout le genre humain à la serui-  
 tude du peché & du Diable, par la crain-  
 te de mort, qui de là en auât est deuenüe  
 naturelle à tous mortels. Il est faux, en  
 fin, qu'aucune autre iniustice soit capa-  
 ble de condamner l'homme au iuge-

ment de Dieu, que l'iniustice inherente de la corruption originelle. Laquelle, en tous ceux qui perissent, qui viennent en aage de cognoissance, passe en rebellion contre la grace de Dieu, par la puissance du Dieu de ce monde, qui opere avec efficace en eux. Le nuage de toutes vos fausses hypotheses ainsi retiré, vous voyez maintenant, qu'en la comparaison que fait saint Paul, de la maniere en laquelle nous sommes rendus iustes par l'obeissance de Iesus-Christ, avec la maniere dont nous auons esté rendus iniustes par la desobeissance d'Adam, il faut de toute necessité entendre par la iustification dont parle l'Apostre, celle dont la raison formelle est la vraye iustice inherente que la grace de Iesus-Christ forme aux fideles. Qui est aussi le seul sens auquel l'Apostre traite de la iustification en toutes ses Epistres: Et certes cette comparaison d'Adam, par lequel nous sommes faits iniustes avec Iesus-Christ, par lequel nous sommes faits iustes ou iustifiez, vous sera deormais, comme i'espere, vne demonstration inuincible de la verité dans vostre conscience, pour vous

y faire acquiescer sans résistâce. Car vous voyez que vous ne pouvez chercher aucun esgard ny aucun rapport entre l'un & l'autre, si la comparaison n'est bastie sur le fondement de la iustice inherente, que nous auons en Iesus-Christ, à l'iniustice inherente que nous auons en Adam: Et partant, c'est frustratoirement que vous dites pour la fin : *Il suffit, pour la comparaison, que l'Apostre fait entre Adam & Iesus-Christ, qu'il y ait de la conuenance & du rapport entre leurs effets a plusieurs egards, quoy que non pas en tous vniuersellement.* Car il n'y en auoit aucun, si, comme la desobeissance d'Adam, ayant attiré sur luy & les siens le iugement de Dieu selon la loy, a fait regner au monde le peché : aussi l'obeissance de Christ, qui a subi le iugement de Dieu selon la loy, ayant acquis pour luy & les siens vne redemption eternelle, n'auoit fait regner au monde la iustice des siecles : c'est à dire, la vraye iustice eternelle & immuable.

## CHAP. XII.

*Conference des paroles de Sainct Iehan 1. Ep. 1. 6. & chap. 3. vers. 6. où est explicquée la raison de la parfaicte justice qui rend le fidele irreprehensible deuant Dieu.*

**V**OUS auez produict diuerfes fois, comme vn puissant bouclier de vostre opinion de la iustice imparfaicte des fideles en cette vie, ces paroles de l'Apostre Sainct Iehan 1. Ep. chap. 1. vs. 6. *Si nous disons que nous n'auons point de peché, nous nous seduisons nous-mesmes, & verité n'est point en nous.* Ausquelles i'ay respondu cy-dessus. Mais ie m'estonne qu'ayant interest de chercher la verité & de la suiure, vous ne vous estes aussi proposé ces paroles du mesme Apostre en la mesme Epistre

chap. 3. Vsl. 6. *Quiconque demeure en luy ne p che point ; quiconque peche ne l'a point veu & ne l'a point cognu.* Item vers. 8. *Quiconque est né de Dieu ne fait point de peché. Car la semence d'iceluy demeure en luy & ne peut pecher, pource qu'il est né de Dieu.* Item chap. 5. vers. 18. *Nous sçavons que quiconque est né de Dieu ne peche point, mais qui est engendré de Dieu se contregarde soy-mesme, & le malin ne le touche point.* L'Apostre parlant ainsi d'une part, & ainsi de l'autre, ne se contredit point, comme vous sçavez. Or ces paroles, par où il nous représente les fideles en vn estat auquel ils ne pechent point, & ne peuuent pecher, nous definissent assez clairement, ce me semble, vne iustice parfaite des fideles en cette vie. Considerant donc, comme il falloit, le sens de l'Apostre, vous auez deu recognoistre, que ce que les fideles ne peuuent dire sans mensonge, qu'ils sont sans peché, ne contreuient point à ce qu'ils ayent en cette vie vne telle habitude de iustice parfaite, qu'on puisse dire d'eux qu'ils ne pechent point & qu'ils ne peuuent pecher.

Vous deuiez seulement chercher la raison del'vn, & la raison de l'autre; & par ce moyē la verité, que vous combattez, se seroit facilement d'elle mesme rendue maistresse de vostre sentiment. Je vous l'expliqueray donc en peu de paroles, & en ce faisant ie vous feray entendre la raison de la parfaicte iustice qui rend le fidele irreprehenfible, deuant Dieu, outre ce que ie vous en ay desia dit au chapitre precedent.

Nul fidele n'est sans peché. Nul homme ne le peut dire de soy. S'il le dit, il est menteur, & verité n'est point en luy. Celuy qui seroit sans peché n'auroit point besoin de la grace de Dieu en Iesus Christ. C'est pourquoy les Pelagiens, qui nient la necessité de la grace, ont voulu aussi oster le peché originel, & la corruption vniuerselle de toute chair. Or tout homme a besoin de la grace de Iesus Christ pour auoir la foy qui est le principe de la vraye iustice. Et tout fidele a besoin de la continuation de la mesme grace pour estre iustifié & sanctifié, & pour perseuerer iusques à la fin en la vocation sainte à laquelle il est

appelle. Il est donc constant, puis que le fidele a tousiours besoin de la grace de Iesus Christ iusques à la fin, qu'il ne peut iamais dire qu'il n'a point de peche. Car s'il le disoit, il seroit menteur, & verité ne seroit point en luy. Il n'auroit point en son ame le sentiment de la verité de l'Euangile. Mais d'autre part s'il est ainsi, que celuy qui demeure en Iesus Christ, qui est né de Dieu, & engendré de Dieu, ne peche point, ne fait point de peché & ne peut pecher: pourquoy ne pourra-t'on dire, de ceux qui sont tels, qu'ils n'ont point de peché? La solution n'est pas mal-aisée. Car *auoir peché*, au dire del' Apostre, n'est pas auoir l'habitude de peche regnât en l'ame. Quand il dit, *Si nous disons que nous n'auons point de peché*, il n'entend pas que nous disions que nous auons en nous l'habitude du peché qui nous reduise en l'estat auquel l'Apostre represente l'homme sous la loy & hors de la grace Rom. 7. Car, en ce cas, il se contrediroit à soy mesme quand il dit, que celuy qui est né de Dieu ne peche point & ne peut pecher. Tout de mesme que si saint

Paul, au lieu allegué, parloit d'un homme regeneré par la grace, il contrediroit à soy mesme, quand il dit d'une part, *Je suis charnel vendu sous peché.* Et quand il dit au chap. 6. precedent, *Peché n'aura point de domination sur vous, pource que vous n'estes point sous la loy, mais sous la grace.*

Mais nul homme fidele, quelque regeneré qu'il soit, ne peut dire, qu'il n'a point de peché, pour deux raisons. L'une, pource qu'en soy, dès sa naissance, & iusques à ce que la grace de Iesus Christ l'ait sanctifié, & que le S. Esprit, par l'effusion de la dilection de Dieu & du prochain en son ame, y ait formé l'habitude de iustice, il a eu l'habitude du peché. Il est donc en la categorie de ceux auxquels l'Apostre disoit, *Telle chose estiez vous autresfois, c'est à sçavoir, pail-lards, idolatres, adulteres, &c.* Et de soy mesme, *Moy qui auparavant estoy un blasphemateur, persecuteur, & oppresseur.*

La seconde raison pour laquelle nul fidele ne peut dire qu'il n'a point de peché, est pource qu'il a tousiours en soy la matiere du peché, encore que la forme

de l'habitude en soit destruite par la grace de Iesus Christ. Car la matiere du peché c'est la chair, & les affections naturelles vers les choses qui seruent à l'entretien & au plaisir de la chair. C'est ce que l'Ecriture appelle le vieil Adam. Or tant que le fidele vit en ce monde, l'estre de ce vieil Adam subsiste en luy materiellement. Et c'est par la matiere du vieil Adam que le diable nous liure tous ses assauts. Auxquels, pour resister, nous auons continuellement besoin de l'Esprit de Iesus Christ qui nous subuienne. Afin que par sa vertu nous puissions, sous la croix de Christ, (dont nostre foy embrasse la communion) repousser les dards du malin les plus enflammez. Ainsi nul fidele ne peut dire qu'il n'ait point de peché. Et ce d'autant plus, que dans le combat il arriue quelquesfois que les dards du malin nous frappent, lors que nous prenons moins garde à nous. Et que nous ne munissons pas, comme il appartient, du rampart de la croix de nostre Seigneur. Car alors nous tombons en quelque peché, & contristons le Saint Esprit. C'est pourquoy le fidele doit

toufiours r'allumer en luy le don de la foy par prieres affiduelles. Afin que, par cette lumiere de la foy, il puiſſe, au trauers des tenebres de ce ſiecle, dans leſquelles ſatan ſ'environne, pour nous faire la guerre, euit ſes traits, eſtant à l'abri de la croix de ſon Sauueur, & viuant avec ioye & delectation dans la communion de ſes ſouffrances.

Or nul entre les fideles ne pouuant donc, pour ces raiſons, dire avec verité, qu'il n'a point de peché, ne laiſſe pas de iouir veritablement en foy de la ioye que luy donne le ſentiment de la grace de Dieu, par laquelle il a eſté regeneré, né, & engendré de Dieu, demeurant en noſtre Seigneur. Auquel eſtat ayant l'habitude de la vraye iuſtice qui eſt par la foy, par laquelle il embrasse la communion de la croix de Chriſt, & reçoit en icelle, par l'eſperance viuë de ſa gloire, l'Eſprit Saint, qui le conſole & le fortifie : il ſurmonte le monde, & le prince du monde, qui eſt le diable, & les œuures du diable qui ſont le peché. Lequel n'a plus de domination ſur luy, pource qu'il eſt mort,

avec Iesus Christ au monde. Car ce que  
 le fidele est encore dans ce monde , &  
 environné de sa chair, & que le diable,  
 par les armes du monde & de la chair  
 luy fait continuellement la guerre, tout  
 cela, di ie, fait que le fidele ne peut dire  
 qu'il n'a point de peché, duquel il a esté  
 esclaué selon sa nature, & contre lequel  
 il a tousiours à combattre durant sa vie.  
 Mais pource qu'en la croix de son Sau-  
 ueur ce monde & sa chair ont esté cruci-  
 fiez, estant dans la communion d'icelle,  
 il est environné d'un bouclier, contre  
 lequel toutes les armes du diable se bri-  
 sent. Et dans la communion de sa croix,  
 il reçoit l'Esprit sainct de Christ qui le  
 console par l'esperance celeste, qui le  
 remplit de ioye & de paix au milieu de  
 toutes les tribulations de la vie, qui le  
 confirme & le fortifie pour resister au  
 mauuais iour. Car cet Esprit est plus  
 fort en luy que celuy du monde. Pour-  
 tant le fidele combattant ainsi contre le  
 monde, sa chair, le diable, & le peché,  
 obtient la victoire sur eux, en laquelle  
 consiste l'habitude de iustice parfaite,  
 qui le rend sainct, sans tache, & irrepre-

hensible deuant Dieu. Pource qu'en ce faisant *il garde le commandement sans macule & sans reprehension.* Comme S. Paul le recommande à son Disciple Timothee, & en sa personne à tous les fideles. C'est à dire le commandement dont Christ nous a donné & la loy & la vertu en sa croix. En laquelle, combattans le bon combat de la foy, nous apprehendons la vie eternelle. Car la ferme esperance de la vie eternelle fait faire au fidele, par la vertu del'Esprit de Christ, cette belle confession que luy mesme a fait deuant Ponce Pilate, en laquelle il a manifesté le parfait amour qu'il porte au Pere. C'est aussi en souffrant ici bas & en mourant avec luy (dont nous faisons la confession & la protestation solennelle dès l'entree de nostre communion avec luy par le Baptisme) que nous accomplissons ce commandement nouveau que Christ nous a donné, de la dilection parfaite enuers Dieu & nos freres. Ce sont les raisons pour lesquelles S. Iehan nous dit, que celuy qui est engendré de Dieu, & qui demeure en Christ, ne peche point, & ne peut pecher.

Mais afin de vous imprimer la demonstration de ces raisons plus auant dans l'esprit, ie iuge à propos de vous les expliquer plus particulièrement. Afin de vous faire voir en quoy consiste ceste iustice & saincteté, qui rend le fidele sans macule, & sans reprehension deuant Dieu en la iournée de nostre Seigneur Iesus Christ. Comme l'Apostre le denonce à son Disciple. Par où i'espere que vous fremirez vous-mesmes, de ce que vous auez fremi d'horreur, en lisant, en mon escriit, les mesmes termes que vous lisez ici de l'Apostre. Et vous recognoistrez, que vostre estonnement ne vous venoit d'ailleurs que du peu d'intelligence que vous auez eu iusquesicy en la vraye science de la Croix. Laquelle n'a esté à nos Reformateurs, offusquez de l'imagination de leur iustice imputée, par maniere de dire, qu'une lettre close. Car en reduisant toute la science de la croix, comme ils ont quasi fait, au seul benefice de la remission des pechez, acquise par icelle: cette admirable vertu de la Croix de Christ à mortifier

en nous le vieil homme, afin qu'en la destruction d'iceluy, le nouveau y soit engendré par l'esprit de Christ, ne ressonne pour la plus-part du temps, en vos bouches, que sur le bord des lèvres. Et passe en l'esprit de vos Auditeurs legerement, & comme vn son sans intelligence. Au lieu que ce doit estre la matiere perpetuelle de toutes vos exhortations. Comme elle est le champ de la plus copieuse & de la plus sublimé, & de la plus veritable eloquence, qui puisse entrainer les consciences des hommes captiues à l'obeissance de sa persuasion: non en paroles attrayantes de la sapience humaine, mais en demonstration de l'esprit, & de la puissance de Dieu.

Quand l'Apostre nous dit que celuy qui est né ou engendré de Dieu, & qui demeure en Christ, ne peche point, & ne peut pecher, il nous represente les causes de l'estat auquel le fidele obtiēt & entretient continuellement, au cours de sa vie, l'habitude de la parfaicte iustice & sainteté. Ces causes sont celles de la conformation du nouvel

homme, & de l'accomplissement & entretien d'iceluy. A quoy le fidele parvient par la vertu de la parole de grace, qui habite plantureusement en son ame, & dont l'effect en est accompli par l'usage des Sacremens en luy. Car ayant par Foy reconnu & creu, que Iesus est le Christ le Fils de Dieu auteur & heritier de la benediction eternelle du Pere, qui a porté la malediction des pecheurs, pour les rendre participans de sa benediction, le fidele, suivant cette Foy, reçoit le Saint Baptesme. Auquel, plongé dans l'eau sanctifiée par le Sang du Seigneur, il se soumet en humilité & en patience, à la communion de ses afflictions & de sa mort, renonçant au monde & à ses delices, au Prince de ce monde, & à sa pompe. Il fait de cœur & de bouche cette solennelle protestation, & cette belle Confession, que nostre Seigneur a faite deuant Ponce Pilate, pour la garder inuiolablement iusques à ce qu'il en ait accompli la verité en toute sa vie, par tous les exercices des tribulations, & par le dernier combat de

la mort. Or pour estre confirmé en cette resolution sainte, & pour estre armé de cette pensée, que la foy de la mort de Christ forme en son entendement, c'est à sçauoir, que celuy qui a souffert en chair a desisté de peché: il est, par l'imposition des mains, & par l'Onction sainte, couuert de la protection d'enhaut, & fortifié de l'Huile delieffe, dont le consolateur, qui est l'Esprit Saint du Seigneur Iesus, remplit sa conscience, par l'esperance de la mesme gloire en laquelle Iesus, le chef & consommateur de nostre foy, est entré par sa mort, estant resuscité desmorts. Par où aussi le fidele resuscite en nouveauté de vie. Afin que le temps, qui reste en chair, il ne viue plus selon les conuoitises des hommes, mais selõ la volonté de Dieu. Car le fidele, estant ainsi mort avec Christ, est resuscité ensemble avec luy, par l'esperance de la vie, laquelle est maintenant cachee avec Christ en Dieu iusqu'à ce qu'il apparaisse des Cieux. Et ayant le cœur plein de cette foy, & de cette esperance, il n'a plus sa pensée

ny son affection vers les choses de la terre, mais vers celles d'en haut. Tellement que les affections de la chair, lesquelles auparavant auoient vigueur en ses membres, & qui se manifestoient en toutes les actions de sa vie, sont mortes, & esteintes en luy désormais. Il ne vit plus au monde pour seruir aux passions de paillardise, de souillure, de conuoitise, d'auarice, d'ambition, & des autres vices qui regnent en tous ceux qui sont rebelles à la foy de la verité de l'Euangile. Mais toutes ses pensees & ses affections sont attachees à la meditation & à l'obeissance de la volonté de Dieu, & sont incessamment tournees vers toutes choses veritables, honnestes, iustes, saintes, aimables, de bon nom, de vertu & de louange. Il pense continuellement à ces choses, lesquelles il a apprises, & qu'il contemple par l'Euangile en la face de Christ, qui luy en a laisse le patron & le modele. C'est ainsi que le fidele né & engendré de Dieu, ne peche point, & ne peut pecher. C'est ainsi qu'il obtient l'habitude de Iustice & de sainteté parfaite, sans macule, & sans reprehension.

Mais ce n'est pas assez, que le fidele  
 naisse & soit engendré de Dieu de la  
 sorte pour vne seule fois. Il faut qu'il  
 soit nourri pour estre entretenu con-  
 tinuellement en cet estat. Car il faut  
 aussi qu'il demeure en Christ. Il faut  
 qu'il perseuere iusques à la fin. Com-  
 ment donc est ce que le fidele demeu-  
 rera en Christ pour ne pecher point?  
 Le Seigneur nous l'a luy-mesme en-  
 seigné clairement, quand il nous dit,  
*Celuy qui mange ma chair & qui boit mon*  
*sang demeure en moy & moy en luy.* Car  
 Iesus-Christ n'a pas versé son sang seu-  
 lement afin que nous croyons que par  
 l'effusion d'iceuy nos pechez nous  
 sont pardonnez. Qui est la seule raison  
 que vous nous representiez cy dessus  
 de l'effusion du sang de Christ. Il faut  
 que nous beuuiions tous les iours ce  
 sang qu'il a respandu, afin que nous  
 soyons rendus iustes & saincts, & ca-  
 pables de l'immortalité qui nous est  
 promise en sa gloire. Ce seroit en vain  
 que nostre foy se repaistroit de la co-  
 gnoissance & de l'assurance que Iesus  
 Christ a respandu son sang en remission

de nos pechez, si nous ne beuuiõs  
 réellement ce sang precieux, pour en  
 recueillir le fruiet salutaire. Afin que  
 le peché, qui regne en nostre corps  
 mortel, meure en nous, & que par l'e-  
 sprit saint, qui nous est communiqué  
 ensemble, au breuuage de ce precieux  
 sang, nous viuions à iustice. C'est ce que  
 saint Augustin en peu de paroles ex-  
 cellentes & notables, & que vous pou-  
 uez lire sur le commencement de sa  
 responce aux articles qui luy estoient  
 faussement imposez, a dignement ex-  
 primé en ces termes: *Poculum immor-  
 talitatis, quod confectum est ex infirmitate  
 nostra & virtute diuina, habet quidem in  
 se quod omnibus proſit, sed si non bibitur non  
 proſicit.* C'est à dire, (pour ceux qui ne  
 l'entendent pas en sa langue,) La Cou-  
 pe d'immortalité, qui est faicte enemble de  
 nostre infirmité & de la vertu diuine, a bien  
 en soy de quoy profiter à tous: mais si on ne  
 la boit elle ne profite point. Il faut donc,  
 pour cet effect que nous mangions la  
 chair du Seigneur, & que nous beuuiõs  
 son sang continuellement en l'Eglise.  
 Ce que font tous les fideles au saint  
 Sacre-

Sacrement de l'Eucharistie, auquel ils participent chaque iour au sacrifice & à l'oblation du Corps & du Sang du Seigneur, par laquelle ils sont sanctifiez. C'est en l'usage de ce saint Sacrement, & de ce sacrifice continuel, que le fidele, demeurant en la Communion de Iesus-Christ, paracheue en soy l'habitude de sainteté pour ne pecher point : Car certainement celuy qui tous les iours, en l'Eglise de Dieu, mange la chair & boit le sang de Christ dignement, & qui en cette maniere demeure en luy, ne peche point, & ne peut pecher, pour deux causes. L'une, pour ce que d'une part il accomplit les œuvres d'humilité & de patience. Et l'autre, pour ce que d'autre part, il accomplit les œuvres de continence & de charité: Car tel est en luy le fruit & l'effect de l'oblation du Corps & du sang de Christ, à laquelle il participe. Celuy qui communique dignement à un si grand sacrifice, patient humblement en toutes adversitez avec ioye & paix, & use sobremēt de sa prosperité, communiquant libe-

ralement à toutes les necessitez des Saincts. Or celuy qui patiente humblement a despoüillé hors de soy toute cholere, vengeance, & malignité, enuie, jalousie, médisance. Il supporte ceux qui l'ont offensé, & leur pardonne. Il est reuestu des entrailles de misericorde, de benignité, d'humilité, de douceur, d'esprit patient. Celuy qui communique les fruiets de sa prosperité, pour subuenir aux necessitez des Saincts, selon le sentiment que luy en imprime en l'ame la vertu de la participation qu'il a au sacrifice & au Sacrement du corps & du sang du Seigneur: il adresse l'usage de ses dons & de ses bienfaits pour le salut & la sanctification de ceux à qui il donne. Il ne leur communique pas son bien en insolences, en couches, en debauches, en gourmandises & yuongneries, & en autres voluptez charnelles. Mais il le depart à ceux qui en ont besoin, & lesquels, dans leur necessité, glorifient Dieu, pour le benefice qu'ils en reçoient. A quoy les excite celuy qui le distribue de la sorte, se rendant

luy-mesme, par ce moyen, instrument  
 de la gloire de Dieu en l'ame des pau-  
 ures affligez. Et en cette maniere ce  
 qu'il donne, il le donne à Christ en ses  
 membres. Or celuy qui communique  
 de la sorte ses biens à ses freres, est des-  
 pouillé de tout orgueil & ambition, de  
 toute auarice, & de toute souillure.  
 D'orgueil, pour ce qu'en donnant à  
 moindre que soy, il recognoist qu'il  
 leur doit. Car en leur dōnant il les ho-  
 nore en qualité de freres, pour lesquels  
 Iesus-Christ est mort. D'ambition, car  
 il ne met point sa confiance en sa puis-  
 sance ny en ses richesses, pour s'esleuer  
 par violence ou par outrage sur les au-  
 tres. Ains plus Dieu luy donne en ce  
 monde de biens, de grandeur, de  
 puissance, & d'autorité: & plus ayant  
 ce fruiet sauoureux du sacrifice de  
 Christ en son ame, il a le mesme sen-  
 timent qui a esté en Iesus-Christ. Le-  
 quel estant en forme de Dieu, n'a  
 point reputé que sa dignité infinie, qui  
 le rend égal à Dieu son Pere, deust estre  
 le suiet de quelque dominatiō violen-  
 te pour la destruction de ses freres.

Mais il s'est donné soy-mesme pour eux, & leur a donné tout ce qu'il a possédé. Ainsi fait aussi le fidele qui mange sa chair, & qui boit son sang dignement. D'avarice, car pour employer les biens qu'il possède à la gloire de Dieu, avec actions de graces, & en reconnaissance que c'est Dieu qui luy fournit abondamment toutes choses, pour en user, il faut que son cœur soit bien esloigné d'en acquérir la possession, par fraude ou mauuaises pratiques, en circonuenant autrui, ou par violence, ou par cruauté, en desirant ou procurant la mort de quelqu'un. Mais pour auoir des biens dont sa conscience, avec repos, en puisse, d'un cœur net, rendre graces à Dieu, pour les consacrer à sa gloire : il n'en recherche la possession que par les voyes que luy en ouure le cours legitime de l'ordre establi aux choses humaines, & les occupations honestes dont l'exercice soit conioint avec le seruice & l'utilité du prochain. De souillure, car tous les biens dont le fidele iouit, estans journellement consacrez, pour la fin

de la gloire de Dieu, & de l'edification de ses freres, par l'oblation pure du Corps & du Sang du Seigneur: il se contregarde d'en vser en plaisirs illicites, & en voluptez sales & des-honnestes. Sa chair, nourrie de la chair & du sang de son Sauueur, abomine l'impureté de tous les delices dont les pecheurs vont s'abbreuans en la coupe des diables; Ausquels ils consacrent leurs thresors, & leur en font hommage, dessus leurs tables, & dans leurs couches luxurieuses. Ainsi par la nourriture assidue de la chair & du Sang du Seigneur, au Sainct Sacrement de l'Eucharistie, le fidele accroist, entretient, & accomplit en soy l'habitude de parfaite iustice & sainteté qu'il a receuë au S. Sacrement du Baptême, & de la Cōfirmation en la grace de Iesus Christ. Pour demeurer en luy, & pour se presenter deuant Dieu à la fin de sa course & de son combat, & comparoistre en son iugement saint, sans tache, & sans macule, & irreprehensible deuant luy en charité, selon la loy de l'Esprit de vie, qui a, de la sorte, impré-

mé dans son cœur l'amour de Dieu sur toutes choses, & la dilection fraternelle. Pour recompense de laquelle il receura de la main du Seigneur, iuste iuge, la couronne de gloire éternelle en l'immortalité bien-heureuse.

Mais d'autant que les fideles nouvellement nez & engendrez de Dieu, par la foy en Iesus-Christ, & par le Sacrement du Baptesme, & de l'Onction qui les confirme en la grace à laquelle ils sont appelez, ne reçoivent pas tout d'un coup cette forme entiere de la nouvelle creature, qui de charnels les rend hommes spirituels. Et qu'il est nécessaire que par degrez ils soient amenez de l'enfance à l'age & à la stature d'homme parfait à la mesure de la parfaite stature de Christ. Pour l'effect dequoy ils doivent estre continuellement nourris en l'Eglise de la viâde & du breuvage de leur Seigneur, comme ie viens de dire. Et doivent chaque iour estre consacrez & sanctifiez par la participation de l'oblation sainte, & du sacrifice du Corps & Sang du Seigneur. Aussi, dans la continuité

de la course & du cōbat, par les exercices duquel le nouuel hōme est fortifié en nous, dans la destruction du vieil homme; il arriue que tandis que nous sommes encore charnels, encores enfans, encores foibles en Christ, nous venons à rebucher, & à tomber en peccé, à contrister l'esprit qui nous a esté donné pour arrhe de nostre heritage par des affections & des actions qui viennent de l'amour ou du desir de ces choses corruptibles. Il est donc besoin de nous releuer de nostre cheute, de nous redresser en la voye dont nous nous egarons, de nous remettre sur les bisees de nostre course, & de nous faire perdre la veuë, la pensee, & l'affection des choses qui sont en arriere, vers lesquelles nous retournons la face par nos pechez, contre la protestation par laquelle nous y auons renoucié au Baptisme où nous'auons reueu Christ. Pour cette cause, le Seigneur a aussi institué en son Eglise le Sacrement de Penitence, afin que nous confessions nos pechez, & que par vne franche, ingenuë, humble, & verita-

ble Confession de nos fautes, nous nous soumettons à la penitence nécessaire, inditte & prescrite suivant l'ordre establi en l'Eglise: De telle sorte que nous gemissions à bon eschient dans le marriissement d'auoir dōné sur nous cet aduantage à l'ennemi de nostre salut, de nous estre laissez amorer aux delices de peché, par l'affectiō ies biens de la chair & du monde, qui sont la portion des meschans, qui courent à l'abādō de dissolutiō par l'impetuosiē de l'esprit de rebellion, qui opere avec efficace en eux. Et que de ce marriissement nous paruenions à l'entiere contrition & componction de cœur, qui engendre en nostre conscience le sentiment de la iuste condamnation que nous auons encouruē d'estre separez de la portion des iustes, & de la communion qui leur est donnée en l'Eglise, à la Chair & au Sang de Iesus-Christ pour estre abbreuuez de l'esprit, qui est l'arrhe de nostre heritage celeste. Car ainsi dans ce marriissement, & dans cette contrition, le fidele penitent, & separe de la participation du fruiſt fa-

lutaire de vie en l'Eglise du Seigneur, mortifie ce qu'il y auoit en luy de la chair. Tellement qu'ayant accompli le temps necessaire pour sa mortification competente, il est derechef restitué en la grace du Seigneur & en la paix de l'Eglise, par la communion qui luy est rendue du Corps & du Sang de son Sauueur, en la coupe duquel il est abreuué de son Esprit, qui est l'arrhe de l'heritage celeste. Lequel le console, le resioüit, & le fortifie, pour courir deormais de force en force, avec constance & courage, vers le but de sa vocation supernelle, iusques à ce qu'il ait apprehendé la vie eternelle, & le prix qui est proposé au bout de sa course. Car c'est ainsi que nous sommes releuez quand nous tombons. C'est ainsi qu'en confessant nos pechez, Dieu, qui est fidele & iuste, nous les pardonne & nous nettoye de toute iniquité. Pour l'effect de quoy le Seigneur a institué par ses Apostres ce Sacrement de penitence en son Eglise. Afin que rien ne puisse manquer à l'ouvrage necessaire pour la perfection du nouuel homme, crée, selon Iesus Christ,

en iustice & vraye saincteté. L'habitude de laquelle doit estre ainsi parfaicte en nous durant cette vie. Et l'est veritablement en tous ceux, lesquels mangeans & beuuans dignemēt la viande & le breu- uage du Seigneur en l'Eglise, demeurent en luy, & luy en eux. Car tous ceux qui sont tels ne pechent point & ne peuuent pecher, pource que leur foy surmonte le monde, & que l'Esprit qui est en eux est plus grand que le monde. Et neantmoins pource qu'ils ont tousiours à combattre, & que l'exercice de leur iustice & saincteté, n'est autre chose que le combat mesme & la victoire qu'ils en remportent: nul fidele ne peut presumer de foy qu'il soit accompli, iusqu'à ce qu'en la fin de sa course il ait paracheué, en sa mort, sa mortification en la communion du Seigneur. Car il faut demeurer en Christ iusqu'à ce iour là. Il faut mourir en luy. C'est en ce dernier acte que tout est accompli, comme le Seigneur, operant nostre salut, la prononce luy mesme en rendant, en sa croix l'Esprit à Dieu son Pere. Pour cette cause l'heure de la mort est la plus

chere heure des Chrestiens. En elle se produit la verité de nostre foy, la verité de nostre Baptisme, la verité de nostre confirmation, la verité de nostre communion au Corps & au Sang du Seigneur, & de la participation à son Sacrifice, la verité de nostre confession, de nos fautes, & de nostre penitence. Voir bien souuent le Chrestien est demeuré foible & enfant tout le cours de sa vie, encore charnel & peu aduancé en la parfaicte stature de Christ, que Dieu, qui est riche en misericorde, luy enuoye vne heure si opportune de sa mort, qu'en elle & par elle est accompli tout ce qui luy auoit defailli, iusques à l'heure, du parfait amour de Dieu sur toutes choses. Lequel se consomme lors au fidele par le sentimēt de l'abondante grace du Seigneur en luy. Mesme bien souuent, au regard de tel, qui aura esté toute sa vie rebelle à la vocation celeste, qui n'aura cheminé autrement, que selon le train de ce monde, à l'abandon de dissolution, en laquelle courent effrenement les peruers selon les cōuoitises du siecle, & tous ceux qui ne cognoissent

point la grace de nostre Seigneur Iesus Christ: il arriuera que la parole de l'Euangile, qui declare cette grace, luy eust anoncee, & cette vertu de l'Esprit de Dieu qui est en elle, estant doucement instillee en sa conscience, engendre lors la foy en son entendement, à laquelle il auroit esté rebelle iusques à lors, & l'auroit mesprisee. Et lors, selonc cette foy, il soumet toutes les affections de son ame à la croix du Seigneur, en laquelle la mort des fideles a esté consacree pour estre en eux l'acte de patience & d'obeissance souueraine à la volonté de Dieu, par l'esperance de la resurrection, en laquelle Christ leur a establi la possession de l'heritage de gloire avec luy aux cieus. Ainsi tel qui en toute sa vie n'auoit point cognu la grace de Iesus Christ, & n'auoit point ressenti le fruit sauoureux d'icelle, pour aimer Dieu sur toutes choses, est rendu parfait & accompli en cet amour saint par la mort. Il est fait membre de Christ, os de ses os, & chair de sa chair, pource qu'il se rencontre lors en l'estat, où la communion de la chair & du Sang de son Sau-

leur, produit plus promptement & plus  
 efficacement son fruit salutaire en  
 l'ame du fidele. C'est pourquoy aussi  
 rien n'a esté plus salutairement, ny plus  
 necessairement institué en l'Eglise, que  
 de donner aux malades la communion  
 precieuse du Corps & du Sang du Sei-  
 gneur. Car c'est à lors principalement  
 que le fidele, pour estre quitte du peché  
 par la mort, pour estre accompli & par-  
 fait, doit communiquer à l'oblation  
 du Corps & du Sang du Seigneur, par  
 laquelle il est sanctifié. C'est à lors qu'il  
 doit surmonter le dernier effort du der-  
 nier ennemi à vaincre qui est la mort.  
 C'est alors qu'il doit arracher entiere-  
 ment de son cœur l'aiguillon de la mort,  
 qui est le peché. C'est alors que par l'en-  
 tiere destruction de sa chair doit estre  
 tout à fait rompuë en son ame la puissan-  
 ce du peché qui est la loy, & l'usage or-  
 donné pour la vie de la chair en toutes  
 les choses de ce monde. Pour cette cau-  
 se le fidele, afin d'estre fortifié en ce  
 dernier acte de sa victoire contre le  
 diable, contre le monde, contre le pe-  
 ché, contre la chair, contre la mort, doit

principalement estre muni du saint & précieux viatique, & doit manger & boire le Corps & le Sang de son Seigneur. Comme ainsi soit que c'est en la communion du Corps de Christ rompu, & de son Sang espendu pour nous, en sa mort, que le fidele est rempli de l'esperance de sa conformité future au Corps glorieux de son Sauueur. Par où son ame estant comblee de ioye & de paix, remet en toute patience, obeissance, & allegresse, son depest entre les mains de Dieu, estant assuree qu'il le ressuscitera en gloire. Et qu'il fera lors, que ce qui a esté ici bas premierement par la nature serf de peché, & puis par la grace affranchi à iustice, sera eternellement organe de sainteté, de gloire, & de puissance eternelle. Car aussi pour confirmer le fidele en cette assurance & en cette ioye, le dernier Sacrement a esté institué pour l'extremité du combat, en laquelle son corps est oinct de l'huile sainte, en toutes les parties lesquelles ont esté conuerties en luy d'organes de peché en instruments de iustice, afin de sceller en luy cette ferme esperance,

Que l'Esprit sainct de Christ, qui a sanctifié son corps mortel, & qui l'a fait son temple, le resuscitera aussi en gloire. Ainsi la mort du fidele, en laquelle il est consommé & parfaict, est vraiment precieuse deuant les yeux de Dieu, vraiment agreable, vraiment digne, vraiment meritoire de la couronne que le iuste Iuge a promise, & qu'il reserve à tous ceux, lesquels attendans en patience l'apparition de leur Redempteur, souffrent & meurent avec luy, pour viure & regner avec luy.

C'est ainsi, Monsieur, qu'en ce present siecle, en cette vie, depuis le iour qu'il plaist à Dieu nous appeller à la grace de son Fils, iusques au iour de la mort, l'œuure de cette sienne grace, qui est nostre iustice & saincteté, est parfaicte & accomplie en nous, par l'vsage & par la vertu de tous les Sacremens qu'il a instituez en son Eglise, communs & necessaires pour tous les fideles. Et ne faut plus que vous vous alliez imaginant, que la saincteté sans laquelle nul ne verra Dieu, se parfaict en l'ame du fidele, (afin qu'il voye Dieu) à l'instant qu'il

Le est separee de son corps, comme vous  
 raisonnez cy dessus. Vous sçavez que  
 toute nostre iustice & saincteté vient de  
 la grace de Iesus Christ, & de la vertu de  
 son Esprit. La parole de l'Euangile & les  
 Sacremens, sont instrumens de la grace.  
 Pour paracheuer donc en l'autre vie la  
 saincteté commencee en celle ci, il fau-  
 droit aussi que vous entreprissiez d'in-  
 stituer encore des Predicateurs, & d'in-  
 troduire l'vsage des Sacremens en l'au-  
 tre vie. Mais vous sçavez que celui qui se  
 figureroit, entre autre chose, des Sacre-  
 mens en la vie future, & mesme à l'en-  
 droit des ames separees du corps, igno-  
 reroit totalement l'vsage & la raison des  
 Sacremens. Esquels Iesus Christ, es  
 choses sensibles, nous a donné la vertu  
 & l'effect de sa grace intelligible. Afin  
 que nos corps, qui ont esté organes du  
 peché à nos ames, soient, par la partici-  
 pation des Sacremens, rendus instru-  
 mens de iustice, estans faits le temple  
 du S. Esprit, duquel nous sommes seel-  
 lez pour le iour de la redemption. Tenez  
 donc pour resolu, & n'en disputez plus,  
 que la iustice & la saincteté des fideles,  
 selon

ſelon laquelle ils doiuent comparoiſtre  
deuant Dieu iuſtes, ſaincts, ſans tache,  
& irreprehenſibles, & comme tels ſou-  
ſtenir, par conſequent, le feu de ſa face &  
de ſon Iugement, eſt accomplie ici  
bas.

Mais ie preuoy encore vn ſerupule  
qui vous peut, reſter touchant la diffe-  
rence de la iuſtice & de la ſaincteté des  
fideles en cette vie, d'avec la ſaincteté  
des fideles en la vie future. Car ſi, en  
cette vie, les fideles ſont rendus parfaits,  
la gloire, à laquelle ils ſeront appelez en  
l'autre, n'adiouſtera-t'elle donc rien à  
la perfection de ſaincteté qu'ils auront  
obtenue ici bas ? Si elle n'y adiouſte  
rien, que deuiendra ce que nous dit  
l'Apoſtre, *que nous cognoiſſons en partie,*  
*& prophetiſons en partie, mais quand la per-*  
*fection ſera venue, lors ce qui eſt en partie*  
*ſera aboli.* 1. Cor. 13. 9. 10. Sur cela il y a  
deux choſes à obſeruer, pour reſponſe à  
la queſtion preſente, & pour l'intelligen-  
ce des paroles del'Apoſtre. La premie-  
re, eſt, qu'en effect il y a difference en-  
tre la iuſtice & la ſaincteté des fideles,  
c'eſt à dire la charité accomplie en eux

ou l'amour qu'ils auront enuers Dieu  
 en la vie future. Mais cette difference  
 n'est pas vne difference de degrez,  
 comme est la difference de l'amour de  
 ceux qui sont encore foibles en Christ,  
 d'auec l'amour de ceux qui sont homes  
 faiçts en luy. Selon laquelle difference  
 l'estat de l'vn est imparfaict, & en soy,  
 & au regard de l'autre. Mais cette diffe-  
 rence est comme la difference qui pour-  
 roit estre consideree entre l'immortali-  
 té du premier homme, lors de la crea-  
 tion en l'estat d'integrité, & entre l'im-  
 mortalité que nous obtiendrôs en la vie  
 future. Car Adam en l'estat d'integrité  
 estoit immortel, mais son immortalité  
 auoit tousiours besoin d'entretien, &  
 dependoit de l'vsage du fruiçt de vie,  
 & de l'abstinence du fruiçt defendu.  
 Mais l'immortalité, que nous obtien-  
 drons en la vie future, n'aura plus besoin  
 d'aucune chose externe, & ne depen-  
 dra plus d'aucune conditiõ. Ainsi quoy  
 que l'estat de vie, en Adam entier, au re-  
 gard de son estre immortel, fust parfait  
 en soy: toutesfois comparé à l'immor-  
 talité des enfans de Dieu en la vie futu-

re, il peut fort bien & veritablement estre appelle imparfait. Tout de mesme est-il de la saincteté presente des fideles & regenerez par la grace de Iesus Christ. Lesquels, par la vertu de son esprit (qui respand en leur cœur la charité & l'amour de Dieu sur toutes choses,) paruiennent à vne habitude de iustice & de saincteté parfaite. Mais leur saincteté a tousiours besoin d'entretien tandis qu'ils sont ici bas. Il faut qu'elle soit continuellement nourrie de la chair & du Sang du Seigneur, qui est le fruit de vie, afin que la vigueur de son esprit s'entretienne en nous. Il faut que viuās sous la Croix, & estans de iour en iour mortifiez à ce monde, à la chair, & au peché, la cognoissance de l'esperance de nostre vocation, face vne cōtinuelle impressiō en nos ames, par les exhortations & par la meditation de la parole de l'Euangile, & que nos cœurs en soient journellement remplis. Mais lors que nous serons paruenus en la maison de Dieu, où Iesus Christ nous a preparé place, nostre saincteté, l'amour de Dieu en nous, n'aura plus besoin de ces aides.

Pour ce que Dieu fera tout en tous. Pource que nous verrons ce que nous croyons, & que nous possederons ce nous esperons. Pourtant nostre saincteté est bien maintenant parfaicte, mais elle a besoin d'estre soustenuë & entretenue. Et pour mesme raison, elle est muable & sujette à defaillir, au regard de la condition de son sujet : encorés qu'elle soit immuable & sans defect, au regard des causes de son estre. Le fidele est icy dans la course & dans le combat. Il chemine & combat par foy & par esperance. Sa foy appuyee sur la Croix de Christ, & son esperance qui embrasse la promesse de la gloire, le portent au trauers de toutes les difficultez qui se rencontrent en la course, & le rendent victorieux de tous les assaus qui luy sont liurez. Mais cependant il est en vn perpetuel cours, & en vn continuel combat. Et pour cette cause, l'estat de nostre saincteté ici bas est parfaict en foy, à cause que nous courons parfaictement, en laissant les choses qui sont en arriere, & en nous auançant vers celles qui sont en auant, courās vers le but de nostre super-

nelle vocation. Et à cause que nous combattons parfaitement. Pource que nous combattons, non point comme battans l'air, mais comme bataillans vaillamment contre les principautez & les puissances des tenebres de ce siecle, & les surmontant. Toutesfois si on compare cet estat de nostre saincteté victorieuse, avec l'estat futur de nostre saincteté triomphante: lors que l'amour de Dieu en nous adherera au sujet apprehendé & possédé, apres lequel nous courons maintenant, & qu'il triomphera, en actions de graces, pour la domination que nous aurons sur les puissances ennemies qui nous font maintenant la guerre: en ce cas l'amour de Dieu en nous, la charité & la saincteté que nous auons à present, est certainement imparfaite.

La seconde chose à obseruer, & qui appartient à la vaine intelligence des paroles de l'Apostre, est, qu'il dit bien *que nous cognoissons en partie, & que nous prophetisons en partie*. Mais il ne dit pas, *que nous aimons en partie*, Nostre cognoissance & l'intelligence des mysteres dont nous attendons l'accomplisse-

sement, ne sont ici bas qu'en partie. Mais nostre charité n'est pas en partie. Nous ne sommes appelez qu'à vne cognoissance imparfaicte, mais nous ne sommes pas appelez à vne charité imparfaicte, Car, comme dit saint Iehan. *La charité est accomplie avec nous, d'autant que tel qu'il est, tels sommes nous en ce monde.* C'est à dire, comme Iesus-Christ est Fils, nous aussi sommes fils. Or c'est par la charité respandue par l'esprit de Dieu la en nos cœurs, que nous sommes faits enfans. Car la charité est la raison formelle de nostre regeneration. Or nostre cognoissance est imparfaicte ici bas, pour ce quel'obiet de nostre cognoissance estant Iesus Christ nostre Seigneur, nous ne le cognoissons maintenant qu'en partie. Car Iesus Christ a deux parties, l'une est son humanité, l'autre est sa diuinité. Et en son humanité il y a encore l'estat de son humiliation & de sa Croix, & l'estat de son exaltation & de sa gloire. Iesus Christ s'est donné à cognoistre ici bas selon son humanité visiblement, & en son humanité selon l'estat de son humiliation &

de la Croix. C'est ce que les Apostres ont veu de leurs propres yeux, & ce que leurs mains ont touché de la parole de vie. Comme nous dit le mesme Disciple bien aimé. Et cette mesme condition de Christ est aussi visiblement & sensiblement accomplie en nous ici bas. Mais au regard de la resurrection de Christ, & de la gloire qu'il a obtenue là haut à la dextre du Pere: les Apostres l'ont seulement contemplé & touché apres qu'il a esté resuscité, & l'ont veu enleuer aux Cieux, cōme ils nous l'ont aussi déclaré: mais ils ne l'ont point veu assis dans les Cieux. Car ce que S. Paul nous dit de son ravissement en Paradis, n'a pas esté vne veuë ny vne contemplation oculaire, mais vne vision, ou vne extase. Et il ne dit pas qu'il a veu choses inenarrables, mais qu'il les a ouyes. Et encore il adioust, qu'il n'est loisible à personne de les dire. Tellement qu'au regard de la gloire de Christ, nous n'en auons qu'une cognoissance imparfaite. Comme aussi au regard de sa Diuinité. Nous sçauons qu'il est assis à la dextre de Dieu, & qu'il possède en son huma-

nité la gloire qu'il a possédée auant que  
 le monde fust faict. Nous sçauons qu'il  
 est Dieu égal & vn avec le Pere. Mais  
 nous ne sçaurions dire ny exprimer  
 quelle est la condition & la magnificen-  
 ce de cette gloire. Nous ne sçaurions  
 aussi dire, ny exprimer, l'essence & la  
 Diuinité éternelle, selon laquelle le Fils  
 est vn avec le Pere, & égal à luy. Ce sont  
 choses auxquelles nous ne deuons point  
 nous ingerer de former des disputes &  
 des questions, & des definitions auda-  
 cieuses & temeraires, quand elles exce-  
 dent ce qui nous en a esté reuelé, qui  
 n'est qu'en partie. Nous sçauons que la  
 chose est. Mais nous n'en sçauons pas les  
 raisons. Mais quant à l'estat de la Croix  
 & de l'humiliation de Christ, nous en  
 cognoissons toutes les raisons. Au re-  
 gard de sa mortification, & de la com-  
 munion de ses afflictions, nous en co-  
 gnoissons icy bas la chose, & l'experi-  
 mentons en nous mesmes. Mais au re-  
 gard de sa Resurrection & de sa gloire,  
 nous n'en cognoissons que la vertu, par  
 l'esperance qui nous est donnée d'en  
 estre rendus participans. Car ce que nous

sommes sauuez c'est par esperance. Or l'e-  
 sperance qu'on voit n'est point esperance.  
 Car pourquoy mesmes espereroit quelqu'un  
 ce qu'il voit. Mais si nous esperons ce que  
 nous ne voyons point, c'est que nous l'atten-  
 dons par patience. Car nostre esperance  
 est bastie sur nostre patience. Entant  
 que nous souffrons avec luy, afin que nous  
 soyons glorifiez avec luy. Pour ces raisons  
 nous ne cognoissons pleincmēt de Iesus  
 Christ, que la partie à laquelle nous  
 participons icy bas. Celle, à laquelle  
 nous participerons là hault, nous est en-  
 core incogneuē. Car nostre vie est cachee  
 avec Iesus Christ en Dieu, quand Christ qui  
 est nostre vie apparoiſtra, lors nous apparoi-  
 strons avec luy en gloire. La cognoissance,  
 que nous auons de la gloire, nous est ici  
 donnee, comme en un miroir, & en enig-  
 me, Ainsi que parle ailleurs le mesme  
 Apostre. L'enigme & le mirouer sont  
 l'image que nous portons de Christ icy  
 bas. Selon laquelle nous argumentons,  
 Que si l'Esprit de Christ, qui nous est donné  
 par l'esperance de la gloire que nous atten-  
 dons, habite ici en nos corps mortels, Dieu  
 resuscitera aussi nos corps mortels par son

*esprit habitant en nous.* Et que, selon cette  
 mesme vertu, par l'efficace de laquelle il  
 a soumis nos ames à son obeissance en la  
 Croix de son Fils, sous laquelle nous  
 sommes maintenant humiliez. Il trans-  
 formera aussi le corps de nostre humiliation,  
 pour estre conforme au corps de sa gloire.  
 Tellement que si nous auons porte, en la  
 communion de Iesus Christ, l'image de l'hom-  
 me terrestre, nous porterons aussi l'image du  
 celeste. L'un nous est maintenant le mi-  
 rouër & l'enigme de l'autre. Mais si nous  
 comparons la cognoissance, que nous a-  
 uons maintenant sous l'Euangile, des  
 biens celestes qui nous sont promis en  
 Iesus Christ, à la cognoissance qui sous  
 la loy estoit donnee aux fideles de l'es-  
 perance à laquelle ils estoient appelez, no-  
 stre cognoissance presente, qui est le mi-  
 rouër & l'enigme où nous contéplons la  
 gloire promise en la face de I. C. est  
 pleine d'une lumiere tres-claire, au prix  
 des ombres & de l'obscurité, sous la-  
 quelle la loy cachoit nostre esperance.  
 Pource que le mesme Iesus Christ, qui  
 est apparu vne fois en humiliation pour  
 oster le peché, & pour faire regner la iu-

itice en nous par son esprit: est le mesme  
 qui apparoitra pour la derniere fois en  
 gloire, pour ceux qui l'attendent à salut.  
 Et c'est la raison pour laquelle l'Apostre  
 comparant le ministere charnel de con-  
 damnation & de seruitude, au ministere  
 de l'esprit, de iustice & de liberté, dit,  
*que nous tous qui sommes sous la grace*  
*de Iesus Christ, contemplant comme en un*  
*mirouer à face descouuerte la gloire du Sei-*  
*gneur, sommes transformez en la mesme*  
*image de gloire en gloire, comme de par l'e-*  
*sprit du Seigneur.* Et la raison de ce mi-  
 rouer, de cet enigme, de cette image, que  
 nous auons en la communion presente  
 de Christ, est la raison mesme pour la-  
 quelle les Sacremens sont aussi appel-  
 lez figures & images. Car estans les in-  
 strumens de la grace, & les sceaux de no-  
 stre communion, c'est par leur moyen  
 & suivant l'usage qu'ils ont, au regard  
 de nos corps, pour l'impression, en iceux,  
 du caractere de la semblance de Christ,  
 que se forme, par son esprit, en nostre  
 ame, la nouvelle vie de l'homme inte-  
 rieur, cree en iustice & vraye saincteté.  
 C'est pourquoy ils sont appelez, en l'E-

glise, figures, signes, images, types & symboles. Ce qui n'exclud nullement, en eux, la verité de la chose dont ils portent le nom. Car s'ils n'estoient ce qu'ils sont dits, & ce que nostre foy, qui seule en iuge, les recognoist: ils ne produiroient nullement l'effect, par lequel l'image du nouuel homme est formee en nous. Or nostre cognoissance est donc maintenant comme est vn miroir, en enigme, en image, en figure, & par consequent imparfaicte. Et à cette cause il est necessaire, que nostre cognoissance & nostre foy, & l'instruction par laquelle nous sommes conduits à l'explication & à l'intelligence des mysteres de nostre salut, soit aydee & soustenuë de l'usage & de la pratique des Sacremens, à ceste fin instituez par le Seigneur en son Eglise. Pourrant il faut que la cognoissance presente soit abolie, comme l'usage de tous les Sacraments sera aboli en la vie future, lors que ce corruptible aura reuestu l'incorruption, quand ce corps, qui est maintenant corps sensuel, sera rendu corps spirituel. Car tous les Sacraments, à la raison desquels

est proportionnée nostre cognoissance  
 presente, sont instituez afin que, par l'v-  
 sage d'iceux, ce corps qui est encore de  
 sa nature, & de sa condition presente,  
 corps insuel (ayant besoin pour l'en-  
 tretien de sa vie, d'estre nourri, & sou-  
 tenu par le moyen des choses sensibles  
 & visibles) soit adressé en l'exercice  
 de tous ses membres, & de ses facultez,  
 à l'obeissance de la Croix de Christ, afin  
 d'estre Temple du S. Esprit; lequel crée,  
 en nostre ame, l'image du nouuel hom-  
 me en iustice & vraye sainteté. Pour  
 cette cause Tertullian, au liure de la Re-  
 surrection de la chair ch. 8 parle excel-  
 lement, & selon le vray & naïf sens de  
 l'Eglise Catholique, touchant la raison  
 & l'usage des Sacremens. Il dit donc, *Que*  
*1* *2* *3* *4* *5* *6* *7* *8* *9* *10* *11* *12* *13* *14* *15* *16* *17* *18* *19* *20*  
 nulle ame ne peut obtenir le salut, si elle n'a  
 creu, tandis qu'elle est en la chair. De sorte  
 que la chair est le puiot du salut, par le moyē  
 de laquelle quand l'ame est adiointe à Dieu,  
 c'est elle qui fait qu'elle y est adiointe. Car  
 aussi la chair est lavée, afin que l'ame soit net-  
 toyée. la chair est ointe afin que l'ame soit co-  
 sacrée. La chair reçoit le signe de la croix, afin  
 que l'ame soit munie d'un rāpart. La chair

*mise sous l'ombre & sous la protection de la  
 l'imposition des mains, afin que l'ame soit  
 illuminee de l'esprit. La chair est repeue du  
 corps & du sang de Iesus Christ, afin que  
 l'ame soit engraissee de Dieu. Tous les-  
 quels rapports entre nostre chair & no-  
 stre ame, en l'usage & par l'effect des  
 Sacrements, ne peuuent estre entendus  
 que par ceux qui comprennent la raison  
 de la Croix de Christ, qui fait son effect  
 en nostre chair, afin que son esprit pro-  
 duise la vertu en nostre ame. Et qui  
 comprennent, à mesme temps, que la rai-  
 son des Sacrements dépend toute de la  
 raison de la Croix de Christ, en laquel-  
 le son corps a esté crucifié, & son sang  
 respandu, afin qu'ils nous fussent don-  
 nez en viande & breuuage de vie spiri-  
 tuelle. Et par faute d'en entendre ainsi  
 la raison, nos reformateurs ont tres-mal  
 à propos debattu, en la doctrine des Ca-  
 tholiques, la verité de nostre participa-  
 tion réelle & corporelle au corps & au  
 Sang du Seigneur, au S. Sacrement de  
 l'Eucharistie, que Tertullian exprime  
 ici si disertement. Car en vain taschez-  
 vous vous & vos collegues, d'eluder la  
 necessité de l'argument, que les Catho-*

liques tirent de ces paroles, pour mon-  
 strer, par le sentiment de Tertullia, que  
 c'est nostre corps qui reçoit le corps &  
 le Sâg de christ au Sacremēt, cōme c'est  
 nostre ame qui reçoit la vertu de son es-  
 prit. Car l'argument est inuincible. A l'e-  
 spirit de Dieu (qui est appellé en ces pa-  
 roles de Tertullian vne fois l'esprit, &  
 l'autre fois Dieu) est opposé, par luy, le  
 corps & le Sang de Christ. Donc, par le  
 corps & le Sang de Christ, ne peut estre  
 entendu le pain & le vin materiels, qui  
 ne peuvent estre opposez à l'esprit de  
 Dieu. Et si par le corps & le Sang de  
 Christ n'estoit entendu autre chose que  
 le pain & le vin, le corps & le sang de  
 Christ ne seroient point pris des fideles  
 au Sacrement, selon Tertullian. Car ils  
 n'y seroient receus, ny du corps, ny  
 de l'ame. Non du corps, si ce que le corps  
 reçoit n'est autre chose que le pain & le  
 vin. Non de l'ame, car Tertullian dit ex-  
 pressément que ce que l'ame reçoit est  
 l'esprit de Dieu. L'eschappatoire que  
 M. Aubertin a pensé trouuer est friuole,  
 alleguât qu'en ces mots *est engraissee de*  
*Dieu*, il faut entendre, par ce terme de  
*Dieu*, le corps & le Sâg de Iesus Christ, "

„La diuinité de Christ estât mise pour  
 „son humanité. Glose tât absurde, qu'elle  
 n'est bonne que pour esmouuoir la ri-  
 secou la compassion des Lecteurs. Ou,  
 qui pis est, leur indignation, quand il la  
 veut autoriser de ce que quelques Pe-  
 res, disputans contre les Eutychiens, qui  
 confondoient les deux natures, disent,  
*Que quand on parle du Verbe de Dieu, la*  
*chair, laquelle il a esté fait, est ensemble en-*  
*tendue, & quand on fait mention de la*  
*chair, la diuinité est demonstree.* Car quel  
 enfant se laisseroit ainsi bander les yeux  
 à credit? Lors que Tertullian dit, *Que*  
*nostre ame est engraissee de Dieu,* il entend  
 manifestement la vertu de l'esprit de  
 Dieu qui luy est communiquée, comme  
 il a dit auparauant, *Qu'elle est illuminée de*  
*l'esprit.* Or la vertu de l'esprit que reçoit  
 nostre ame, n'est pas la nature diuine de  
 Iesus Christ, pour entendre sous ce nom,  
 son humanité, à cause de l'vnion hypo-  
 statique. C'est vne caption & vne defai-  
 te trop manifeste. Ioinct que les Peres  
 qui disent, à ce suiet, que quand on fait  
 mention de l'vne, on entend aussi l'autre,  
 ne disent pas pourtant que par le terme  
 de l'vne

del'vne soit entenduë l'autre, comme elle est faicte distinctement, & par opposition. Mais que voulez vous? l'amour de nos opinions nous fait trouuer beau tout ce qui en cache la laideur, & qui trompe nos yeux. Neantmoins quand l'auteur se seroit persuadé ce qu'il dit, il a eu mauuaise opinion de son lecteur, s'il a creu luy persuader la mesme chose. Je touche ceci à dessein, pour vous faire cognoistre que nos reformateurs, sur le suiet des Sacrements, où la cognoissance de la verité nous est donnée entiere icy bas, ne font eux mesmes cogneue qu'à partie. Or pour ce que nostre cognoissâce proportionnée à la raisõ des Sacremens, telle que nous l'auons en cete vie, est imparfaicte, elle sera abolie, quand nostre vieil homme aura esté totalement aboli, & le nouuel homme totalement formé par la resurrection des morts en la gloire du Seigneur. Car alors nous ne cognoistrõs plus par enigme. Mais d'autant que la cognoissance, & l'vsage des Sacremens, sont des moies de la vocation à laquelle nous sommes appelez; & que la fin de nostre vocatiõ,

Ecc

à laquelle seruent ces moyens, est nostre sanctification en charité : quand l'Apostre nous dit que les moyens seront abolis, il ne dit pas que la fin sera abolie. Quand il dit, que les propheties, & la cognoissance, & la foy seront abolies, il ne dit pas que la charité & la saincteté seront abolies. Afin que vous n'argumentiez, ny ne vous figuriez de là, que nostre saincteté soit tousiours imparfaicte en cette vie. Et qu'elle doieue estre rendue parfaicte, au moment apres que l'ame est separee du corps, ou dans quelque autre interualle qu'il vous plairoit apres la separation. Car la perfection dont parle l'Apostre ne sera qu'en la gloire apres la resurrection. Et par ce moyen si nostre saincteté est imparfaicte ici, elle demeureroit imparfaicte iusques au iour de la resurrection. Ce que vous ne croyez pas vous-mesme.

C'est ce que i'auois à vous remon-  
 strer sommairement touchant la raison  
 de la parfaicte iustice qui rend le fide-  
 le irreprehensible deuant Dieu. Par où  
 ie pense vous auoir osté la cause de l'es-  
 tonnement & de l'horreur que vous

auez de la proposition que i'en auois  
 couchee en mon amiable esclaireisse-  
 ment, aux propres termes où l'Apostre  
 nous l'a luy mesme conſignée en di-  
 uers lieux de ſes eſcrits. Par là co-  
 gnoiſtrez vous que les ombrages que  
 vous vous formez cōtre la verité, ſont  
 du tout vains, quand vous dites, *Que*  
*quant à vous, vous eſtimez qu'il n'y a*  
*Chreſtien que la conſcience ne redargue*  
*de diuers deſauts, & n'oblige de dire*  
*auec Dauid, Eternel n'entre point en com-*  
*pte auec ton ſeruiteur. Car nul viuant ne*  
*ſera iuſtificé en ta preſence. Et qu'il n'y a*  
*aucun qui n'ait beſoin (euſt-il atteint*  
*une ſaincteté Apoſtolique) de dire tous*  
*les iours & iuſqu'au dernier ſouſpir de ſa*  
*vie à Dieu, ce que porte la priere que Ieſus*  
*Chriſt a enſignée à ſes Apoſtres & à*  
*tous ſes Diſciples, Seigneur pardonne nous*  
*nos pechez.* Celuy qui cognoiſt les rai-  
 ſons de la iuſtice de Dieu qui eſt par la  
 foy, & de la ſaincteté du fidele, com-  
 me elle s'engendre, s'accroïſt, s'entre-  
 tient, & s'accomplit en ſon ame, par la  
 grace du Seigneur: celuy là ſçait que  
 le fidele a toujours & continuellement

besoin de la grace de Dieu, voire à tout  
 moment & pour toutes les actions de  
 sa vie. Comme S. Augustin le remon-  
 stre & le presche soigneusement contre  
 le dogme des Pelagiens ennemis de la  
 grace de Dieu. Or nul ne sent le be-  
 soin qu'il a de la grace, qu'il ne reco-  
 gnoisse en soy la cause de ce besoin.  
 Laquelle cause de ce besoin, comme il  
 a esté dit, est en sa chair, pour la mortifi-  
 cation de laquelle, tant qu'elle soit  
 destruite par la mort, il a continuelle-  
 ment besoin de la communion de la  
 croix & de l'Esprit du Seigneur. Car  
 en l'efficace de tous les deux consiste la  
 vertu de la grace viuifiante. Cette rai-  
 son de la necessité de la grace est en  
 tous les fideles, en quelque degré que  
 l'estat de leur saincteté soit paruen-  
 u. Eust elle atteint, comme vous parlez,  
 la perfection d'une saincteté Aposto-  
 lique. Mais dans le progrez de la re-  
 generation, la chair des fideles se trou-  
 ue diuersement mortifiée. Aux vns  
 de telle sorte, qu'ils sont encores en-  
 fans & charnels, foibles & chancelans.  
 Aux autres, en telle maniere, qu'ils

font hommes parfaicts à la mesure de la parfaite stature de Christ, puissamment fortifiez par son Esprit en l'homme interieur, enracinez & fondez en charité, pource que la parole de Christ habite plantureusement en eux, & qu'ainsi par l'Esprit de sapience & de reuelation ils ont les yeux de leur entendement tellement illuminez, qu'ils comprennent avec tous les Saints, la largeur & la longueur, la profondeur & la hauteur de la dilection de Christ, & scauent quelle est l'esperance de la vocation, & quelles sont les richesses de la gloire de son heritage es saints. En sorte qu'ils sont remplis en toute plénitude de Dieu. Telle est la sainteté que vous nommez Apostolique. Or les defauts que vous dites se rencontrer en tous fideles, se doiuent aussi considerer diuersement, selon la diuersité de cet estat different de la mortification de leur chair. Car aux premiers il n'y a point de doute qu'il n'y ait des defauts qui sont pechez, que l'Eglise appelle mortels. En ce qu'ils conuersent encore selon la chair, ils vacillent.

En ce qu'ils retiennent le fondement qui est Christ, ils subsistent. Mais quoy qu'il leur arriue de vaciller & de tomber, pource que Christ habite en eux, Dieu qui les a appelez par sa grace les releue & les fortifie. Car il est puissant & fidele pour les affermir iusques à la fin, & pour paracheuer le bon œuvre qu'il a commencé en eux. Et pourtant ils ont certes besoin de demander continuellement à Dieu cette grace, & de luy demander au nom de Christ ce qu'il nous a enseigné de dire, *Seigneur par donne nous nos offenses.* Mais non au sens seulement que vous l'interpretez, pour vn simple acte de l'intelligence de Dieu, qui les repete iustes encore qu'ils ne le soient pas. Mais pour l'effect de sa vertu procedante de cette grace qui gist en l'efficace du Sang de Christ par l'effusion duquel nos pechez nous sont remis. A fin que la remission des pechez, qu'ils demandent à Dieu, soit en eux la deliurance entiere de la puissance de satan & du monde sur leurs affections, en sorte qu'ils deuiennent vrayment spirituels, saints, & irreprehensibles de-

uot Dieu en charité. Et quand mes-  
 mes ils sont deuenus tels, ils n'ont pas  
 moins besoin, pour leur perseuerance  
 en cette grace en laquelle ils chemi-  
 nent, d'implorer la mesme vertu que  
 Dieu a desployee pour la remission de  
 nos pechez; en l'effusion du Sang de  
 son Fils. Toutesfois obseruez, que  
 quand vous voulez que le fidele, sous  
 l'Euangile, parle comme Dauid sous la  
 loy, vous vous abusez, comme ie vous  
 l'ay remonstré ailleurs. Les fideles sous  
 la loy apprehendoient le iugement de  
 Dieu selon la loy, l'ire & la malediction  
 denoncee en icelle, qui consistoit aux  
 maux & aux aduersitez de cette vie.  
 Quand ils en estoient frappez, ils es-  
 toient espouuantez de la face de Dieu.  
 Ainsi pour requerer à Dieu misericor-  
 de & pardon de leurs fautes, ils luy de-  
 mandoient qu'il n'entraist point en iu-  
 gement avec eux. Qu'il ne les visitast  
 point des verges dont ils estoient bat-  
 tus. Autrement ils ne pouuoient res-  
 sentir en eux le témoignage de la grace  
 de Dieu, de sa faueur & bienveillance.  
 C'estoit pource que Christ n'estoit pas

encore venu subir en nostre place le iugement de Dieu selon la loy. Il n'auoit pas encore osté, par sa croix, l'ire & la malediction de Dieu qui estoit en l'exercice de tous les maux & de toutes les peines de la vie presente, & principalement en la mort. Auioird'huy que nous voyons, en la face de Iesus Christ, Dieu appaisé enuers nous, & la benediction celeste qui est l'esperance de nostre vocation en la gloire du Seigneur, nous ne sommes plus dans cette crainte. Nous n'auons plus l'esprit de seruitude. Mais, au milieu des plus grandes tribulations, la vertu de la croix de Christ ouure nos cœurs à l'entree de son Esprit qui nous remplit de paix, de ioye & de liesse incenarrable. Tellemēt que le mouuement des prieres que cet Esprit saint forme à present au cœur des fideles, est bien different de celuy par lequel les fideles prioient Dieu sous la loy. Cette obseruation est vne des plus necessaires pour l'exercice du ministere auquel Dieu vous a appellé. Car la lumiere vous descouure la voye du Seigneur, en laquelle vous deuez conduire les peu-

ples auxquels vous preschez; autrement que vous & vos semblables ne l'auez apperceuë iusques ici.

L'esclaircissement precedent vous leuera encore l'ombrage que vous cause le nuage de l'obiection que vous me faites pour la fin, *Que mesme le Cardinal Bellarmin & les autres Docteurs de l'Eglise Romaine ne nient pas que la sainteté des plus regenez n'ait des defauts & pechez, mais ils disent que ce sont pechez veniels. Or cela me suffit. Car peché veniel est peché pardonnable. Or celuy qui a besoin de pardon, ne peut subsister deuant Dieu par la perfection de sa iustice. Outre que nous parlons ici de subsister non par indulgence paternelle, qui pardonne & supporte les defauts. Mais par la rigueur de la iustice de Dieu, en soustenant, comme vous dites, le feu de sa face. Or au regard de cette iustice rigoureuse, il n'y a point de peché veniel. Veu que si c'est vn peché, c'est vne transgression de la loy. Or la loy condamne tout transgresseur. Voire avec telle seuerité, que si quelqu'un peche en vn point, elle le tient coupable de tous. En tout ce discours vous vous intriquez en des difficultez, qui ne procedent que de ce que*

vous n'entendez pas la doctrine des Catholiques, ny les raisons de leur doctrine, qui sont les raisons de l'Evangile. Cela paroist par les termes equivoques dont vostre raisonnement est composé. Car premierement, quand vous dittes, que la saincteté des plus regenez a des defauts & pechez, selon la confession des Docteurs Catholiques : si par la saincteté vous entendez les œuvres de saincteté qui procedent des regenez, soit d'humilité, soit de patience, soit de continence, soit de charité, &c. Et si vous voulez dire, que ces œuvres là mesmes des regenez soient defectueuses & soient tachees de vice & de peché; ie vous nie qu'aucun des Catholiques parle ainsi, ou enseigne telle doctrine. Tous la combattent au contraire contre le sentiment de nos premiers reformateurs qui l'ont les premiers introduitte. Mais si par la saincteté des regenez vous entendez le cours de leur vie depuis l'heure qu'ils ont esté appelez à l'estat de regeneration & de sanctification, dans le cours duquel ils vont laissant les choses qui sont en arrie-

re, & s'auançant vers celles qui sont en auant: il est certain que tous les Docteurs Catholiques sont d'accord que la saincteté des plus regenez a encores des defauts, qui sont pechez non seulement veniels, mais qu'il peut arriuer qu'ils tombent aussi en pechez mortels, & que leur vie en soit souillée. Mais pour cela tous les Docteurs Catholiques vous nieront la consequence de vostre dogme, que la saincteté des regenez ne se parface en cette vie pour estre merite de la gloire en l'autre. Car ils vous diront que les regenez ainsi tombez sont aussi renouuellez par repentance, & confirmez en la grace par laquelle leur saincteté se paracheue auant leur fin, comme ie vous l'ay expliqué cy-dessus.

Ce que vous dittes encores touchant la distinction des pechez veniels & des pechez mortels en la doctrine des Catholiques, est vn article que vous n'entendez gueres, comme vous le monstrez par ce que vous dittes, *qu'au regard de la iustice rigoureuse il n'y a point de peché veniel, veu que si c'est vn peché, c'est vne transgression de la loy. Or la loy condamne*

*tout transgresseur.* Vous me sçaurez gré, Monsieur, que sur ce sujet ie vous redresse en l'intelligence d'une des principales observations que vous devez faire en la doctrine de l'Evangile. Autre est la iustice de Dieu selon la loy. Autre est la iustice de Dieu selon l'Evangile. Mais leur difference n'est pas que l'une soit plus ou moins rigoureuse que l'autre. Elles sont également rigoureuses, pource qu'elles sont également iustes. Aussi rigoureusement punira Dieu en son iugement tous les rebelles qui ont reieté sa grace : comme il a puni tous les hommes qui ont transgressé sa loy. La difference de l'une & de l'autre iustice dépend de la difference qui est en la raison formelle du commandement de la loy, & du commandement de l'Evangile. Et de la difference de la peine establie à celuy qui transgresse l'un ou l'autre. Ce qui vous a esté assez expliqué ailleurs. Selon la loy Dieu punit l'idolatre, le perjure, l'homicide, l'adultere, &c. Et la loy n'admet aucune repentance. Car elle prononce,

Quiconque aura peché mourra. Ainsi selon la loy il n'y a aucun peché qui ne soit mortel & punissable. Selon l'E-uangile Dieu punit l'impenitent & le rebelle à sa grace. Mais par le mesme Euagile, Dieu, pour l'amour de Christ, remet tous les pechez commis contre la loy. Il les remet en la croix de son Fils, pour amener à repentance & à renouvellement de vie tous ceux qui par obeissance de foy embrassent sa croix. Or comme l'exécution du iugement de Dieu selon la loy concerne precisement cette vie presente : & comme Iesus Christ l'a subi pour nous en la vie presente : & comme sa croix qu'il nous a laissée a aussi son vsage en la vie presente : aussi la remission des pechez & nostre renouvellement à iustice a aussi lieu en la vie presente. Tellement que la iustice de Dieu qui est selon l'Euangile ne considerera point en ceux qui auront obeï à la vocation celeste, qui auront esté renouvellez par repentance, qui auront cheminé selon l'Esprit, aucun de tous les pechez qu'ils auront commis contre la loy, soit au-

parauant leur vocation à la grace, soit  
 pendant le cours de leur sanctifica-  
 tion par la grace. Mais considerant  
 lors en eux la conformité à son Fils en  
 iustice & vraye saincteté, que son Es-  
 prit y aura formée, il la couronnera,  
 selon sa iustice, de la gloire promise.  
 Mais quant à ceux qui auront esté re-  
 belles & impenitens, la mort qu'ils au-  
 ront encourue par la iustice qui est se-  
 lon la loy, sera renduë eternelle en la  
 priuation de toutes les choses qu'ils  
 ont mieux aimees en ce monde que  
 Dieu, & au resentiment des peines que  
 Dieu a preparées à leur corps & à leur  
 ame dans l'estang de feu & de soulfre  
 avec le diable & ses Anges. Ainsi vous  
 voyez & comprenez, que, selon la iu-  
 stice de Dieu par l'Euangile, il n'y a  
 aucun peché du fidele qui soit mortel  
 & punissable. Il n'y a aucune condam-  
 nation à ceux qui sont en Iesus Christ.  
 Pource que Christ a subi nostre peine,  
 & a porté nostre condamnation. Et  
 par la mesme iustice il n'y a aucun pe-  
 ché de l'impenitent qui ne soit mortel  
 & punissable.

Mais ce n'est pas de là que vous devez chercher la raison de la distinction que les Docteurs Catholiques font entre les pechez veniels & les pechez mortels. Car en ce regard telle distinction ne pourroit avoir lieu. Et c'est la cause qui a ombragé nos Docteurs contre cette distinction, côme si elle estoit illusoire ou impertinente. Pour ce qu'ils n'en ont pas compris la raison. La raison de cette distinction est descenduë principalement & proprement de la raison de l'autorité de l'Eglise. Au ministere de laquelle appartient la fonction de remettre les pechez, selon la puissance que Iesus Christ en a donnée à ses Apostres, quand il leur dit, *A quiconque vous remettrez les pechez ils seront remis.* Or cette autorité s'exerce par l'Eglise en l'administration du Sacrement de penitence. Auquel il s'agit de remettre le fidele, tombé en peché, dans la paix de l'Eglise, de la communion de laquelle il s'est rendu indigne par son peché. De peur qu'autrement en prenant indignement le Corps & le Sang

du Seigneur, il ne le prenne à sa condamnation. Or les pechez qui priuent le fidele de la paix & de la communion de l'Eglise, sont pechez qui violent la charité, par quelque acte qui donne lieu au diable en l'ame du fidele, & qui contriste le S. Esprit. L'Eglise ne fait iamais remission de cette nature de pechez, & n'en donne iamais absolution, & ne restituë iamais le delinquant à la communion, qu'elle ne luy ait enioint d'en faire penitence prealable, & qu'il ne l'ait accomplie. Pour cette cause ces pechez sont appelez, pechez non remis-sibles & non veniels. Et pource que les fideles, qui tombent en tels pechez, sont *ipso facto* priuez de la communion, en l'usage de laquelle consiste l'usage du droict de la vie qui est en Iesus Christ, & sont par consequent en la mort : ces pechez sont appelez mortels. Mais il y a d'autres pechez qui ne violent point pourtant la charité. C'est à dire l'amour que nous deuons à la gloire de Dieu, & le deuoir de la dilection fraternelle. Tels sont les mouuemens qui naissent en l'ame de l'homme, de desir, de crainte,

de crainte, ou de colere, qui ne passent en aucun acte de volonte, qui transgresse le commandement, qui donne lieu au diable, & qui contriste le S. Esprit. Pour tels pechez l'Eglise ne priue point le fidele de la communion. Et pourtant elle les remet sans inionction de penitence. C'est pourquoy ils sont appelez pechez veniels, c'est à dire pechez remissibles sans satisfaction. Estant ainsi deueloppé de tous equiuoques, ie pense que vous voyez la lumiere, comme en plein midi, qui vous fait cognoistre que tous vos argumens ne concluent rien contre la parfaite iustice & saincteté des fideles. Par laquelle ils comparoistront deuant Dieu sans macule & irreprehensibles, & soustien-  
dront le feu de sa face & de son iugement.

Ddd

## CHAP. XIII.

*De la doctrine de Sainct Augustin, touchant la perfection de la sainteté des fideles en cette vie.*

**S** V R ce mesme argument, vous auez creu pouuoir donner de l'ombre à l'opinion de nos reformateurs que vous defendez , par quelques fueilles que vous auez remplies de passages de saint Augustin, de saint Bernard , & mesme de quelque discours de Docteurs modernes Catholiques. C'est pourquoy ie les examineray maintenant. Et par la lumiere de la verité de leur sens, ie vous feray voir sa conformité avec la doctrine Catholique que ie defen, & la contrariété si formelle à vostre opiniõ, qu'il ne vous restera plus rien qui vous laisse

empeschemēt ou pretexte de me dōner  
 les mains au consentement de la doctri-  
 ne Catholique en cette matiere. Pour  
 fonder les raisons de l'esclaircissement  
 de la vraye intention de saint Augu-  
 stin, en ce que nous lisons sur ce suiet  
 dans ses escrits, il faut observer deux  
 choses. La premiere, c'est l'occasion des  
 disputes, où il en traicte, qui sont celles  
 de la grace de Dieu, contre l'heresie de  
 Pelagius. lequel donnoit à la nature & au  
 franc arbitre de l'homme, ce qui n'ap-  
 partient qu'à la grace & à l'esprit de  
 Iesus Christ, en l'œuvre de la iustice &  
 de la sainteté. Or cōme la raison des me-  
 rires, & la raison de la perfectiō de iu-  
 stice, ont vne mesme consideration: aussi  
 le mesme erreur, qui attribue le merite  
 à la nature & au franc arbitre de l'hom-  
 me, fait encore descendre de ce mesme  
 principe la perfection de iustice. Or  
 quiconque attribue à la nature de l'hō-  
 me, la faculté de produire vne iustice  
 parfaicte, celuy là pose necessairement  
 ces deux maximes, qui sont toutes deux  
 inseparables. L'vne que l'homme peut  
 estre sans peché, voire que celuy, qui

par la nature a produit vne iustice parfaite, est necessairement sans peché.

L'autre, quel'homme qui a cette faculté par sa nature, & qui en produit vn tel effect, n'a point besoin de la grace & de la misericorde de Dieu. Tel estoit le dogme de Pelagius & ses consequences. C'est en la refutation de ce pernicieux dogme, que saint Augustin traitte de la perfection de iustice.

La seconde chose à obseruer dans les disputes de S. Augustin, est, qu'en combattant le dogme de Pelagius par l'autorité de l'escriture, & voulant oster à son aduersaire les couleurs de quelques passages de la mesme Escriture, dont il falloit donner quelque lustre à son opinion : il luy est arriué quelque fois ce que la chaleur de la dispute apporte aisément dans les controuerses. Car comme la roideur d'vne course dérobe facilement les objets de costé & d'autre à nos yeux, tandis que nous les tenons ficez & attentifs au but proposé, ainsi l'attention de nostre iugement, toute attachée à la verité que nous voulons confirmer, nous fait perdre, sans y

penser, en l'induction des passages des-  
 quels elle resulte, la consideration des  
 circonstances d'où se recueille la naïue-  
 té de leur sens. Et par cette omission  
 nous mettons souuent quelque ombre  
 d'erreur dans la lumiere de la verité, par  
 où nous affoiblissions d'autant la cause.  
 Cela est arriué à S. Augustin en cette  
 dispute sur le suiet de quelques passages  
 notables. Comme est entre autres ce que  
 l'Apostre escrit au 7. aux Romains, de  
 celuy qu'il dit estre charnel vendu sous  
 peché, qui prend plaisir à la loy de Dieu  
 quant à l'homme de dedans, & qui sent  
 vne loy en ses membres qui le rend es-  
 claué de peché. Car auant le dogme de  
 Pelagius, saint Augustin, comme tous  
 les autres Docteurs de l'Eglise aupara-  
 uant luy, auoit interpreté ce que dit  
 l'Apostre cōme appartenant à vn hom-  
 me qui n'est point encore sous la grace  
 de Iesus Christ, mais sous la loy. Qui est  
 le veritable sens de l'Apostre. Il luy est  
 depuis arriué de changer d'auis. Et il a  
 mieux aimé l'interpréter d'vn fidele  
 sous la grace. Estimant qu'ainsi l'impui-  
 sance de la nature au bien, demeure

roit d'autāt plus cōuaincuē, que mesme l'homme estant sous la grace paroistroit encore si debile, qu'il ne trouueroit point le moyen de parfaire le bien. Comme ce sens est tout à fait esloigné de la verité & de l'intention de l'Apostre: aussi en le suiuant, il est aduenü à ce saint Docteur de mesler quelques-fois, en ses escrits, quelques ombres qui obscurcissent la naïueté de la raison de la iustice parfaicte, que l'esprit de Dieu forme aux fideles sous la grace de l'Euangile. Mais qui n'a rien pourtant de la contradiction que nos Reformateurs y ont faicte. Ny de l'imagination d'une iustice impute, necessaire à couvrir les defauts & les manquemens de la vraye iustice & sainteté que l'Euangile requiert de nous.

De la mesme intétion est encore procédé ce que nous lisons, en diuers lieux de ses escrits, les mesmes passages que vous alleguez du vieil Testament, employez pour mōstrer la necessité de la grace: par les gemissemens des fideles, pressez du sentiment de l'ire de Dieu pour leurs pechez. Par où certainement se demon-

estre inuinciblement, que la nature de l'homme est de soy totalement impuissante de se releuer & de faire aucū bien. Mais où il s'agiroyt de monstrier la vertu de la grace de nostre Seigneur Iesus Christ, sous l'Euangile, à produire le bien en nous : si on n'observe precisement la difference de l'œconomie ancienne à la nouvelle, ou si on mesure l'effect de la grace, sous celle-cy, à l'effect de la grace sous celle-la, on confond de necessité deux choses grandement differentes. Et, en ce faisant, on se dérobe à soy-mesme la lumiere de la verité, touchant l'estat de la iustice & sainteté où l'Euangile nous appelle en la communion du Seigneur Iesus. Mais, comme i'ay dit, tout cela est arriué à saint Augustin, pource qu'il n'auoit à combattre que l'orgueil & la presumption des forces de la nature, que Pelagius resuscitoit du tombeau des Pharisieus & des Philosophes. Que s'il auoit eu à combattre ceux qui auroient dénié le merite que la grace de Iesus Christ forme aux fideles, de la doctrine duquel tous les escripts sont pleins. Et si,

pour mesme fin, il auoit eu à demonstrez la raison de ce vray merite, par la condition de la iustice & sainteté parfaite que l'esprit de Iesus Christ engendre en l'ame des fideles, pour arrhe de l'heritage celeste: alors il auroit recherché, & produit en veüe, les causes & les raisons que les escrits des Apostres nous fournissent, pour entendre qu'elle est l'admirable vertu de l'Esprit du Seigneur, à parfaire cet oeuvre en ceux, auxquels il agit, selon le bon plaisir de celui qui par sa puissance accomplit toutes choses en tous. Changeant d'aduersaires, il auroit aussi changé & la matiere & la maniere de ses arguments. Et certes nous voyons cela mesme en son propre exemple. Car en disputant pour le franc-arbitre cõtre les Manicheës, il en a estably les raisons de telle sorte, que Pelagius mesme pretendoit autoriser les forces du franc-arbitre contre la grace, par les raisonnemens de S. August. pour la necessité du franc-arbitre en la nature. Quoy qu'à vray dire, comme il s'en defend tres-bien, il n'y ait rien, en ce qu'il a escrit lors, qui puisse ser-

uir, estant pris naïuement, à la peruersité de ce dogme. Ainsi en est-il de ce que vous pretendez tirer aduantage de quelques lieux de S. Augustin, comme s'ils faisoient preiudice à la raison du merite de la iustice & de la saincteté parfaite des fideles, que la gñace de I. C. forme en eux. Où il dispute contre l'orgueil du merite d'une iustice & saincteté pretenduë parfaite & accomplie par les forces de la nature. C'est ce qu'il vous faut faire entendre sans déguisement, par les propres paroles de ce sainct Docteur.

Entre les escrits qu'il a composez, dans lesquels cette matiere est espanduë, il y en a deux principaux desquels vous rapportez quelques passages. Ce sont le second liure de *Pecator. meriti. & remissione*. Et le liure de *perfectione iustitiæ aduersus Cælestium*. L'argument de l'un & de l'autre verifie ce que ie di, & vous a deu faire iuger, en sincerité, que la verité, qu'il soustient contre ses aduersaires, ne fauorise en rien vostre sentiment. Voicy le suiet de la dispute, & l'opinion qu'il prend à tasche de refuter

au liure second de pecc. merit. Il y en a  
 quelques uns, dit il, qui presument tant du  
 Franc arbitre de la volonté humaine, qu'ils  
 ont opinion, que pour ne point pecher nous  
 n'auons pas mesmes besoin de l'aide de  
 Dieu, puis qu'une fois l'arbitre d'une vo-  
 lonté libre a esté octroyé à nostre nature. D'où  
 il s'ensuit que nous ne deuons pas mesmes  
 prier, que nous n'entrions en tentation. C'est  
 à dire, que nous ne soyons vaincus de la  
 tentation, soit qu'elle nous trompe & nous  
 surprenne sans y penser : soit qu'estans  
 foibles, elle vienne à nous presser & serrer  
 de près. Or nous ne scaurions expliquer de  
 paroles, combien c'est chose nuisible & dan-  
 gereuse, & contraire à nostre salut, qui est en  
 Iesus Christ, & combien grandement enne-  
 mie de la Religion dont nous sommes im-  
 bus, & de la pieté selon laquelle nous seruons  
 Dieu, que nous ne le priions pas pour les bene-  
 fices que nous voulons recevoir de luy. Et que  
 nous estimions, que c'est en vain qu'il y a  
 sans la priere Dominicale, Ne nous induy  
 point en tentation. Dittes moy, en con-  
 science, la raison du merite, que Dieu  
 forme en nous, par la grace de son Es-  
 prit, en la communion de son Fils, sous

la Croix duquel, & par la vertu de son esprit, il nous rend victorieux de la tentation, & fait que le peché n'a point de domination sur nous, & que iustice y habite & regne, par l'effusion de sa dilection en nos cœurs: a-t'elle quelque chose de semblable à la presumption de ceux, qui estiment que le franc-arbitre de nostre volonté n'a point besoin de l'aide de Dieu pour ne pecher point? Direz-vous donc, que les tenebres soient lumiere, ou que la lumiere soit tenebres? Le reiette tous merites fondez en la presumption du franc-arbitre, qui attribue à ses forces, sans l'assistance de Dieu, l'excellence de ne pecher point. Vous n'ignorez pas, que les Catholiques reiettent aussi tels merites Et que telle opinion a tousiours esté condamnée en l'Eglise, comme la plus dangereuse qui puisse estre en la Religion. Et la plus formellement opposée aux fondemens de la Religion Chrestienne. C'est celle à laquelle S. Augustin a fait vne si heurcuse & si sainte guerre. Qu'il a combattuë & abbatuë en tant de rencontres & de

Volumes, contre Pelagius & Celestius & leurs sectateurs, par le glaive de l'Evangile. Nous traitons vous & moyvne question, qui est diametrallement opposée à celle sur laquelle S. Augustin dispute. Nostre question destruit ce que l'autre establit. Elle establit ce que l'autre destruit. En la question que nous traitons ensemble, ie di, que sans la grace de Iesus Christ nous ne pouuons rien. Qu'avec la grace de Iesus Christ, & la vertu de son Esprit, nous pouuons toutes choses. Ie di, que les œuvres faites sans la grace; qui sont les œuvres de la loy, nepeuvent plaire à Dieu, qu'elles sont toutes peché, pource qu'elles sont faites sans foy, & qu'elles meritent toutes condamnation deuant Dieu. Ie di, que les œuvres faites par la grace sont toutes agreables à Dieu. Toutes bonnes & saintes, pource qu'elles procedent de la foy operante par charité. Que toutes meritent la recompense & la Couronne que Dieu leur a promise. Ie di, par consequent, que tous les hommes ont necessaire-

ment besoin de la grace, parce que de leur nature ils sont tous morts en leurs pechez, dont, par la seule grace de Iesus Christ, leur est donnee la remissiõ. Et qu'en toutes leurs œuures ils ont besoin de la grace pour resister à la tentation, & pour vaincre les affections de la chair, soit en aduersité, soit en prosperité, pour cheminer selon patience & selon charité en l'obéissance de la volonté de Dieu. Vous, qui avez entrepris de disputer contre mon sentiment, & de vous opposer à la doctrine du merite, que la grace de Dieu donne au fidele, osez-vous bien choisir S. Augustin pour parrein de vostre opinion, & entreprendre de me combattre desmesmes armes, dõt il combat mes propres & plus formels aduersaires? Voyon donc, comme cette entreprise vous réussira encore.

Ceux qui exaltent les forces du franc arbitre, afin de monstrier sa puissance, soustiennent principalement cette hypothese *Que l'homme peut estre, en cette vie, sans aucun peché.* Ceux qui remonstrent au contraire l'im-

puissance du franc-arbitre, & la nécessité de la grace, soustiennent principalement, *Que nul homme, ne peut estre en cette vie, sans peché.* Ces deux hypotheses contraires sont consequences necessaires des theses premieres opposees. Car si le franc arbitre peut quelque chose, il faut qu'il puisse faire le bien, & eviter le mal. Et qu'ainsi l'homme puisse estre sans aucū peché. Si le franc arbitre ne le peut, & que l'homme ait besoin de la grace, il faut que nul homme ne puisse estre sans peché. Et qu'en tous ceux qui font quelque chose bonne, la grace ait surmonté le peché. S. Augustin donc, en ce traité, defendant la cause de la grace contre la puissance pretendue du franc arbitre, traite cette question, *Si l'homme peut estre sans peché, en cette vie.* Surquoy il dit, *Que ce seroit temerité de le nier absolument.* Et adionste, que si nous nions que l'homme le puisse, nous dérogeons au franc-arbitre, qui en le voulāt le desirer, & a la vertu & misericorde de Dieu, qui le fait en l'aidant, là dessus pour resoudre ce qu'il en faut tenir, il par-

rage la question en quatre. La première,  
*re, Si cela peut estre. La seconde, s'il est.*  
 La troisieme, *s'il n'est pas, puis qu'il peut*  
*estre, pourquoy il n'est pas.* La quatrieme,  
*non seulement s'il y a quelqu'un, mais aus-*  
*si, s'il ya peu iamaïs auoir personne, qui n'ait*  
*iamaïs eu aucun peché.* A la premiere, il  
 respond, qu'il confesse que par le moyen de  
 la grace de Dieu & du franc arbitre,  
 l'homme peut estre sans peché. Sur la se-  
 conde, il respond, qu'il ne croit pas, que ce  
 qui peut estre soit pourtant. Sur la troisieme,  
 il respond, que ce qui n'est pas, vient de  
 ce que les hommes ne veulent pas. Et qu'ils  
 ne veulent pas, pource qu'ils ne cognoissent  
 pas ce qui est iuste, ou qui ne s'y plaisent pas.  
 Sur la quatrieme, il respond, qu'il n'y  
 eut, ny aura iamaïs personne, qui n'ait eu  
 aucun peché, qu'un seul Iesus-Christ hom-  
 me mediateur de Dieu & des hommes. Or  
 il faut remarquer sur ces responses de  
 S. Augustin, qu'il n'a pas obserué vne  
 chose qui estoit principalement digne  
 d'estre obseruée. C'est qu'en la questiō,  
 dōt il s'agit pouoir estre, & estre, ne sont  
 qu'une mesme chose. Car lors qu'on  
 parle du peché & de la iustice, qui sont

actes internes de la volonté, il n'en est pas comme de toutes les actions externes de l'homme, lesquelles dependent de quelque autre faculté, outre la volonté. Car aux actes externes, afin qu'ils soient produits, & qu'ils viennent en estre, il faut que quelque faculté concoure avec la volonté. Pour exemple, s'il s'agit d'escrire, ou de marcher, il faut que la faculté de la main, ou du pied, soit libre. Il faut, que pour escrire & pour marcher actuellement, l'homme le puisse & le vueille. Si tous les deux concourent, l'homme escrit, ou marche. Car s'il ne le fait, la cause n'en peut estre, qu'en ce qu'il ne le peut, ou qu'il ne le veut pas. Le pouuoir & le vouloir sont donc differens l'un de l'autre en toutes les actiōs externes. Et partāt *pouuoir estre*, en ce regard, est differēt *d'estre*. Mais en l'actiō interne, qui est celle du vice ou de la vertu, de l'amour du bien ou du mal, de la haine de l'un ou de l'autre, la volonté fait tout. Le vouloir, est le pouuoir mesme. Si quelqu'un dit, ie ne puis aimer Dieu, il dit qu'il ne le veut pas aimer.

& parmesme raison qu'il ne l'aime pas.  
 Car l'amour estât vn acte de la seule vo-  
 lonté: qui veut, peut; & qui veut aime.  
 Celuy qui ne peut aimer Dieu, ne le  
 peut, pour ce que sa volôté est enclinée  
 à l'amour de soy-mesme & du monde,  
 qui est contraire à l'amour de Dieu.  
 Neantmoins vray est que la cognoissan-  
 ce du deuoir fait quelque impression  
 dans la volonté, par les promesses ou les  
 menaces qui en accompagnent le com-  
 mandement, sans toutesfois la démon-  
 uoir de l'inclination qu'elle a à l'amour  
 du cōtraire qui la delecte. Or dans cette  
 espece de repugnance, où la volonté  
 semble estre en vn tel estat, l'homme re-  
 sent en soy ce que dit l'Apostre, sous la  
 personne de tous ceux qui sont sous la  
 loy, *le ne fay point le bien que ie veux*. At-  
 tribuant à vn acte de la volonté, cette  
 legere impression que le sentiment du  
 deuoir luy donne. Encore que ce ne soit  
 pas au vray vn acte formé de la volonté.  
 Mais seulement celuy que les Philoso-  
 phes appellent *violente*, qui est vn desir  
 foible, qui n'epesche pas vne inclinatio  
 plus forte, qui tient la volonté en acte.

Au regard duquel elle veut ce qu'elle peut, & peut ce qu'elle veut. Car son vouloir, comme j'ay dit, est son pou-  
voir & son acte mesme.

Puis donc que *pouvoir estre* est la mesme chose qu'*estre*, où il s'agit des actes formels de la volonté: les questions que S. Augustin propose, *Si l'homme par la grace peut estre sans peché*, & *si l'homme par l'aide de la grace est de faict sans peché*, ne sont en rien differentes l'une de l'autre. Pouvoir estre sans peché, & estre sans peché, sont vne mesme chose. Si la grace fait que l'homme puisse estre sans peché, elle fait à mesme temps qu'il est sans peché. Car que fait la grace pour donner à l'homme la faculté d'estre sans peché? Il faut que pour ce faire, elle luy oste l'inclination actuelle, qui par la nature faisoit qu'il ne pouvoit estre sans peché. Or en luy ostant cette inclinatio<sup>n</sup> actuelle, elle luy oste le peché mesme. Car cette inclination actuelle n'est autre chose que le peché. Et le peché n'est autre chose que cette inclinatio<sup>n</sup> actuelle. La grace ne luy peut donc donner le pouvoir, qu'elle ne luy donne le vou-

loir. Car le pouuoir en ce genre est le  
 vouloir mesme, & le vouloir est l'acte.  
 Cela estant euidēt, chacun void qu'ayāt  
 respondū sur la premiere question, *que*  
*par le moyen de la grace l'homme peut estre*  
*sans peché*, il estoit necessaire de respon-  
 dre encore sur la seconde : *Que par le*  
*moyen de la grace le fidele est aussi rendu*  
*sans peché*. Mais en la response à l'un &  
 à l'autre, il y auoit encore cette obser-  
 uation à faire. C'est, que l'effect de la  
 grace, qui donne à la volonté la puis-  
 sance de faire le bien, n'est autre chose  
 que de la reduire en acte, en la determi-  
 nant vers son obiet present, soit de pa-  
 tience, soit de charité, par les moyens,  
 & suiuant la fin, d'où depend l'opera-  
 tion de la grace, qui sont la foy qui em-  
 brasse la Croix, & l'esperance qui re-  
 garde la gloire de Iesus Christ. Or il est  
 certain que tant que l'homme est assisté  
 de cette grace, il est puisāt, de ne pecher  
 point, il ne peche point en effect, & ne  
 peut pecher. Mais il luy est necessaire,  
 que sa volonté soit assistee de cette gra-  
 ce, en toutes ses actions. Et pourtant  
 toutes les bonnes œuures du fidele sont

effets de la grace en luy. Ainsi tout ce  
 que le fidele fait de bien, tout ce qu'il  
 peut faire de bien, il le doit entierement  
 à la grace. Or l'effect de la grace est de  
 destruire le peché, en faisant que la vo-  
 lonté, pour s'attacher à son obiet pre-  
 sent (pour exemple la volonté du riche,  
 en l'usage de ses richesses, & la volonté  
 du pauvre en l'exercice de sa calami-  
 té) se deslourne de la fin de cete vie, &  
 des moyens de la prudence mondaine,  
 qui en considere l'aïse & le plaisir. Et  
 qu'elle se determine au contraire, sui-  
 vant la fin de la vie eternelle, & par les  
 moyens de la foy, qui embrasse la Croix  
 de Iesus Christ. Pour ces raisons, celuy  
 là mesme que la grace fortifie, & qu'elle  
 rend puissant & victorieux sur le pe-  
 ché, & qu'elle en deliure, ne peut se dire  
 estre sans peché. Car il est manifeste,  
 par la raison de l'operation de la grace,  
 qu'il est naturellement pecheur, & qu'il  
 a esté tel durant tout le temps que la  
 grace n'a point operé en luy, & qu'il  
 peche encore tout autant de fois que sa  
 volonté agit sans que la grace opere en  
 elle. Le suiet de la question proposee

estant donc ainsi éclairci, c'est chose constante que nul homme ne peut estre en cette vie sans peché, puis que sans la grace tout homme est en peché. Et que la grace n'opere en aucun que pour en corriger le peché. Selon ces observations on doit donc respōdre à la premiere question, comme a fait S. Augustin: *Que par le moyen de la grace l'homme peut estre sans peché.* A la seconde, autrement qu'il n'a fait, c'est à sçavoir, *que par le moyen de la grace l'homme est aussi sans peché.* La troisieme n'a plus de lieu, pource qu'elle n'a fondement qu'en la supposition, qu'ez actes de la volonté, le pouuoir, & le vouloir soient choses diuerses. A la troisieme determinement & absolument, comme S. Augustin respond: *Qu'il n'y eut, ny n'y aura iamaïs homme, en cette vie, sans aucun peché, que le seul fils de Dieu Iesus Christ homme, Mediateur de Dieu & des hommes.*

Ayant deuant les yeux cette lumiere que ie vous presente, vous relirez, si bon vous semble ( & vous le relirez si vous m'en croyez) ce traitté de S. Au-  
Eee ij

gustin. Dans lequel vous verrez, que l'endroit où il s'est le plus pené, est sur l'explication des difficultez, & la solution des obiections, qui naissent des seconde & troisieme questions, & de ses responses à icelles. Car ayant dit sur la seconde, qu'il ne croit pas qu'il y ait aucun homme, lequel, par l'aide de la grace, soit neantmoins sans peché: pource qu'il auoit respondu sur la premiere, que par l'aide de la grace l'homme peut estre sans peché: Il s'est trauaillé, sur le sujet de la troisieme, à rendre raison pourquoy ce qui se peut par l'aide de la grace, ne s'accomplit pas par l'aide d'elle-mesme. Dequoy certes vous ne sçauriez iamais rendre de raison valable. Pource qu'ayant accordé l'un, il faut aussi accorder l'autre. Et en mesme façon que l'un est vray, aussi est l'autre. Mais d'autant que le dō de la grace & la recepciō d'icelle en nous, a ses mesures & ses degrez differēs, & que son operatiō & son assistance est necessaire au fidele en tous les actes qu'il fait, afin qu'ils soiēt bons & agreables à Dieu: pour cette raison

Le pouuoir qui est donné à l'hōme, par l'ayde de la grace, de ne pecher point, ou d'estre sans peché, est aussi proportionné à la maniere de sa dispensatiō & de son operation en nous. Si le don de la grace, & sa reception en nous, n'est pleine & parfaicte & son assistāce cōtinuē: le pouuoir qu'elle no<sup>r</sup> depart de ne pecher point, ou d'estre sans peché, n'est pas nō plus ni plein, ni parfait ny continu. Et pour ce que le pouuoir, comme ie l'ay dit, est, en ce genre, l'acte mesme & l'execution: aussi ne sommes nous point sans peché pleinement ny parfaictement, ny continuellement, que nous ne soyons paruenus à la mesure de la parfaicte stature de Christ en homme parfaict. Et qu'en cette mesure nous n'ayons paracheué nostre course & nostre combat, par l'apprehension du prix, & par la victoire. Mais estant ainsi que nous ne paruenons à cette mesure de grace que par degrez, deux conclusions en resultent necessairement. L'vne, qu'autant que l'homme s'aduançe par degrez en sa regeneration, autant est-il rendu certain, par

le propre sentiment de sa conscience, qu'il n'est point sans peché. L'autre, que la raison de cette differente & successive dispensation de la grace en nous, est vn argument du peché qui est en l'homme. Comme ainsi soit que la seule cause qui fait que les differents degrez de la grace rendent son operation diuerse, est en l'habitude du peché, & en ses mouuements, qui ne peuvent estre surmontez par la grace, qu'autant que sa lumiere & sa vertu est plus puissante de le faire. Ces choses estans telles, la response à la premiere question estant tres-vraye, *Que par le moyen de la grace l'homme peut estre sans peché.* La response à la troisieme n'est pas moins indubitable, *Qu'il n'y eut, ny n'y aura iamais aucun homme en cette vie sans aucun peché, que le seul Fils de Dieu Iesus Christ homme, Mediateur de Dieu & des hommes.*

Or comme cette proposition contiēt vne verité suffisante pour redarguer la presumption des defenseurs de la puissance du franc arbitre, sans l'ayde de la grace: aussi est-ce en sa demon-

stration, que se reduit la fin de tout le discours, & de tous les arguments de saint Augustin, en cette matiere. Surquoy vous devez recognoistre que tout ce qu'il dit, pour la defense de la necessité de la grace, & pour rabattre l'orgueil de la volonté humaine, qui se glorifie de pouuoir quelque chose sans la grace, consent vnanimement avec tous les fondemens de mes hypotheses, & des definitions des Catholiques, d'ot ie soustien la verité. Pourtāt vous ne pouuez, sans déguiser l'estat de la question, employer ses paroles contre le sentiment de l'Eglise Catholique. La question entre les Catholiques & nos reformateurs, est de sçauoir ce que la grace fait en nous, en nostre volonté, en nostre franc-arbitre. La question entre S. Augustin & son aduersaire est de sçauoir, Si ce que fait en nous nostre volonté & nostre franc-arbitre, c'est à dire, Si les œuures qu'elle produit sans la grace sont bonnes & saintes, agreables à Dieu, merites de la vie eternelle. La question entre les Catholiques & nous, est de sçauoir, Si

les œuvres que la grace produit en nous, si les habitudes & les actions qu'elle forme en nostre volonté, sont iustes & saintes, agreables à Dieu, dignes & meritañts d'estre recompensées de la vie & de la gloire eternelle. S. Augustin, cōtre ses aduersaires, soustient absolument la negative. Maintient que nous ne pouuons rien faire sans la grace, que sans elle toutes nos œuvres sont souillées de peché, odieuses & maudites deuant Dieu. C'est la mesme cause que S. Paul debattoit cōtre les Iuifs. C'est ce que l'Euangile establit contre la sapience de la chair. En cette question la fin de l'Euangile est d'abbattre entierement l'orgueil & la presumption que l'homme a de foy, en luy faisant cognoistre son impuissance & son indignité. A fin de l'amener à la recognoissance de la necessité qu'il a de recourir à la grace de Dieu en Iesus Christ nostre Seigneur.

Mais disputant ainsi saint Augustin n'auoit pas affaire à des aduersaires avec lesquels il fust d'accord de la necessité de la grace & de l'impuif-

fance naturelle de l'homme à tout bien. Ce que nos Reformateurs ont bien entendu & bien défini. Encore que sur la maniere de l'operation de la grace, ils n'ayent pas compris diuerses obseruations, en la simplicité de l'Euangile. Ce qui fait qu'ils en alterēt aussi la naïueté par les controuerses, desquelles ils s'entrefont eux-mesmes laguerre. Representez-vous, donc, que si S. Augustin eust eu affaire à des gens, lesquels estans d'accord de ce principe, neantmoins eussent dénié, comme vous faites, les merites que la grace de Dieu forme en nous. Qui pour oster aux œuvres de sainteté, produictes par l'esprit de Dieu en nous, leur dignité, & la qualité de merites, les eussent accusez d'estre toutes souillées & pleines de defauts & d'imperfections; & qui, à mesme fin, eussent nié que les fideles puissent paruenir en cette vie à aucune perfection, pour raison de laquelle ils puissent esperer la recompense de la gloire eternelle. En conscience, vous, qui auez leu saint Augustin, doutez-vous qu'il n'eust opposé, à cette opinion, le mesme esprit, par

lequel il a combattu pour la necessité de la grace, & pour la defence de son excellence & de la dignité de son effect en nous? & qu'alors il fut proposé le danger qu'il y a de laisser tomber les fideles en la nonchalance de leur deuoir, & de l'estude de iustice & de sainteté, par l'opinion que nul ne peut paruenir à aucune sainteté parfaite. Et qu'encore qu'il n'y paruienne pas, il ne laissera pas d'heriter le Royaume, comme n'estant point donné aux merites que la grace fait en nous, mais à la seule iustice de Christ, imputée à tous ceux qui croient, quoy qu'ils n'ayent qu'une sainteté imparfaite, pourueu qu'ils en ayent. Je voudrois que ce saint Docteur eust eu à examiner telles opinions, & nous produire au cōtraire les raisons de l'Euangile, pour nous expliquer l'efficace de la grace salutaire qui nous est donnée en Iesus Christ, afin de nous rendre saints, sans tache & irreprehensibles, & faire que nous soyons capables de la gloire, & dignes du Royaume, pour lequel nous souffrons.

Vous auriez veu, en cet argumēt, les  
 textes de l'Euangile, qui seruent à la  
 confirmation de cette verité, sortir de  
 deffous sa plume, avec vn autre soin  
 d'en examiner & d'en presser les con-  
 sequences, que la defense de l'autre  
 chef de verité, qu'il soustenoit contre  
 ses aduersaires, ne luy donnoit lieu  
 ny occasion de faire. Car au lieu qu'il  
 ne se propose en ses disputes, que de  
 monstrier quelle est, en toute sorte,  
 l'impuissance de l'homme: il auroit  
 eu lors à faire voir quelle est la puis-  
 sance de l'Esprit de Dieu en l'hom-  
 me. Et quelles sont les raisons de cer-  
 te puissance, dependantes de l'ef-  
 ficace de la Croix, & de la gloire de  
 Christ, c'est à dire des causes de nostre  
 foy, & de nostre esperance. Or com-  
 me l'impuissance de l'homme, & la  
 foiblesse de la chair, ne se manifeste  
 mieux que par l'operation de la loy en  
 elle: aussi S. Augustin, traittant avec les  
 aduersaires qu'il auoit en resie, enfliez  
 del'orgueil d'vne iustice qu'ils attri-  
 buoient à leur propres forces, se sert  
 ordinairement des lieux du vieil Te-

flament, où les fideles accusent leurs  
 propres defauts au iugement de Dieu.  
 Et tous les autres endroiçts de l'Escri-  
 ture, où les fideles se redarguent eux-  
 mesmes de peché. Et pour cela mesme,  
 S. Augustin, comme ie l'ay desia re-  
 marqué, a mieux aimé interpreter la  
 prosopopee que S. Paul nous a donnée  
 de l'homme sous la loy, au 7. des Ro-  
 mains, pour le discours d'un fidele,  
 sous la grace. Pource qu'è cette impuis-  
 sance de bien faire, qui est represen-  
 tée en vn tel homme, il a estimé que  
 le vice naturel de l'homme, & la ne-  
 cessite de la grace de Dieu pour le  
 surmonter, estoient d'autant plus ma-  
 nifestes, qu'ils apparoiſſent tels en la  
 condition d'un homme mesme rege-  
 neré. Quoy que neantmoins les lieux  
 de l'Eſcriture ainsi employez obscur-  
 cissent, sans point de doute, la naïue-  
 té de l'Evangile, en ce qui regarde l'in-  
 telligence de l'operation de la grace  
 que nous obtenons en Iesus Christ,  
 pour estre tirez hors de la seruitude du  
 peché, sous laquelle gémissoient mes-  
 me tous les fideles, sous l'enfance & la

pedagogie de la loy. Et c'est de là, d'où vousprenez occasion de presumer, que S. August. a fauorisé, en quelques lieux l'opiniõ de l'imperfectiõ dela iustice & de la saincteté des fideles. Encor qu'en effect sur toutes les maximes & definitions de la iustification & du merite, il soit formellement cõtraire à toutes vos assertiõs, comme vous l'avez veu cy dessus. Et comme vous le verrez encore sur l'examen des propres passages que vous alleguez de luy sur cet article de l'imperfection des fideles.

Or afin de vous faire voir, par vn exemple, remarquable entre autres, que ce bon & pieux Docteur, n'a pas consideré les circonstances de diuers lieux del'Escripture, en les rapportât au seul but qu'il se proposoit: Je ne vous veux représenter que les paroles de l'Apostre 2. Cor. 12. 7. Vous sçauiez que ce lieu, où l'Apostre dit, *Qu'il luy a esté mis vne escharde en la chair*, comme nos Interpretes l'ont traduit, est souuent allegué par S. Augustin en cet argument. Mesme aux liures d'où vous avez extrait vos passages. Ce que nous

auons traduit *escharde en la chair*, il l'appelle *stimulus carnis*, l'aiguillon de la chair, comme la vieille version l'a traduit. Par où il entend, l'allumette de peché, la conuoitise, & l'inclination de l'appetit qui pousse nostre chair au mal, dont l'Apostre se seroit senti piqué. Ce qu'il interprete par ces autres paroles de l'Apostre. Rom, 7. *Je sen vne loy en mes membres, bataillant contre la loy de mon entendement, & me rendant assuietti à la loy de peché.* Car ce qui a plus confirmé S. Augustin au sentiment que le lieu Rom. 7. appartient à la personne de l'Apostre regeneré, c'est l'opinion que luy ont donnée ces autres paroles du present passage que *stimulus carnis*, l'aiguillon de la chair, deuit estre pris pour la conuoitise & l'inclination au peché, que l'Apostre sentoiten luy. En quoy nos interpretes, pour la plus grand part, & notamment les premiers, se sont cōformez, en l'un comme en l'autre, à l'opinion de Sainct Augustin. Estimans que cette *escharde* ou cet *aiguillon de la chair*, estoit, non l'inclination à la paillardise, comme quelques

quelques-vns ont pensé, mais la propension à l'orgueil. Monsieur Camellon plus clair-voyant qu'aucun autre de nos Docteurs, a apperceu le vice de cette opinion; Et en a touché quelques raisons principales pour la refutation d'iceluy: Car en se departant de toutes les autres interpretatiōs, il propose son opinion, par laquelle il estime qu'il faut entendre le dire de l'Apostre sans aucune figure ny allegorie, mais tout simplement, c'est à sçauoir, qu'un malin esprit estoit enuoyé à S. Paul, qui le battoit & luy donnoit des soufflets. En quoy il supportoit vne croix de grande humiliation. Selon mon aduis, il a atteint le sens de la chose. Il a fort bien veu que cette infirmité, dont parle l'Apostre, n'estoit pas un vice, mais vne peine. Toutefois au genre de peine, ie ne suis pas de son opiniō. Ce qui importe peu neantmoins pour la naïueté, du sens du passage. Or que tous ceux qui ont interpreté ces paroles, de quelque vice de l'ame, dont S. Paul s'accuse, soit d'inclination à l'orgueil, ou à quelque

autre espee de conuoitise mauuaise, se  
 soient grandement abusez, ie vous en  
 feray ici vne demonstration si euidete,  
 que nul n'en doutera plus, cōme i'esti-  
 me. Ou du moins n'en refutera iamais  
 pertinemment les raisons. La premiere  
 est, quel'Apōstre dit, *Qu'il ne se glorifie*  
*point en ses reuelations, mais bien en ses*  
*infirmitez* vers. 5. Or si l'infirmite laquel-  
 le il s'attribuē en suite, estoit vn vice,  
 l'Apōstre ne diroit pas qu'il s'en glori-  
 fieroit. Car à Dieu ne plaise que les fi-  
 dcles se glorifient en leurs vices, ou que  
 l'Apōstre les ait enseignez des'y glori-  
 fier par son exemple. Nous nous glori-  
 fiōs en nos angōisses & afflictions. Rom 5.  
 vers. 3. En la Croix de Christ. Gal. 6. vers.  
 14. qui sont les moyens par où Dieu  
 guerit nos vices. La seconde raison est  
 que ces paroles vers. 7. *Ὁρα μὴ ὑψηλο-  
 ναίῃς, Ne extollar, de peur que ie ne sois ele-  
 ué outre mesure, ne se rapportent pas à*  
 l'affection, ou à l'opinion propre que  
 l'Apōstre eust de soy : mais à celle  
 que les autres auroient peu conceuoir  
 de luy. Et pourtant il ne faut pas tradui-  
 re, *de peur que ie m'eleuasse outre mesure,*

comme ont fait nos Interpretes : mais de peur que ie ne soie exalté outre mesure. Ce qui est euident par les paroles du verset precedent *De peur que quelqu'un n'estime de moy par dessus ce qu'il voit, ou ce qu'il entend de moy.* Car c'est pour euitier le danger de l'opinion d'autrui, & pour empescher que les fideles, qui estoient adressez en la voye de Dieu par le ministere de S. Paul, ne tombassent en idolatrie, par trop de deference à sa personne, au lieu de donner, comme il faut, toute la gloire à Dieu, par Iesus Christ seul. Pour raison dequoy nous voyons que S. Pierre, ayant fait cet insigne miracle en la guerison du boiteux, dit aux troupes qui l'admiroient, *Qu'admirez vous? ou pourquoy auez vous les yeux fichez sur nous, comme si par nostre propre puissance ou pieté nous auions fait que cetuy-cy chemine?* Act. 3. 12. C'est la cause pour laquelle Dieu a voulu que la puissance & la sapience qu'il a donnée aux Apostres, fust en eux, comme un thresor en des vaisseaux de terre, afin que l'excellence de la puissance fust de Dieu, & non point d'eux. 2.

Cor. 4. 7. C'est la raison pour laquelle S.<sup>r</sup> Paul n'a point voulu prédre aduantage, en l'autorité de son apostolat, par l'excellence des reuelations qui luy auoient esté faictes, desquelles à ce sujet il ne se vouloit point glorifier. Et afin mesme, que ce qui se voyoit de diuin en la sapience de son sçauoir, & en la vertu de ses miracles, n'arrestast les yeux des hommes à quelque estime déreglée, & qui passast mesure Dieu l'auoit voulu humilier d'une affliction qui rendoit mesme sa personne contemptible. De peur qu'il ne fust exalté outre mesure. De peur qu'on ne pensast de luy outre ce qu'on voyoit, & qu'on oyait en luy. C'estoit donc pour obuier au vice de ses spectateurs ou auditeurs, mais non pas de luy-mesme. Car, certe, ceux que l'Esprit du Seigneur Iesus gouerne, ont en eux le principe d'humilité. Car ils ont appris du Seigneur en sa Croix, qu'il est debonnaire & humble de cœur. Si ceux qui ont interpreté l'escharde de saint Paul en sa chair, pour la conuoitise d'orgueil, eussent ainsi considéré ces paroles, ils y eussent trouué tout le contraire

de ce qui leur en a fait conceuoir cette opinion. La troisieme raison est, que l'Apostre dit, *ἐδόθη μοι σχόλος*, *il m'a esté donné*, ce qu'ils appellent *une escharde*. Or si c'estoit vn vice, il ne diroit pas, *il m'a esté donné*. Car Dieu ne nous dōne pas les vices. Il n'est pas auteur de peché. Le vice ne nous est dōné, ny n'est infus en nostre chair. Il y croist de soy-mesme. Il y est attaché & inherent dès nostre origine. Cette seule raison doit faire retomber les armes aux contredisans. La quatrieme raison est, *Qu'il a prié Dieu par trois fois*, c'est à dire tres-souuent, *que cela se departit de luy*. Ce que le Seigneur ne luy auoit pas accordé. Or la volonté de Dieu est nostre sanctification. Dieu nous deliure de tout mal de peché, quand nous luy demandons, au nom de son Fils, & il le fait par la vertu du sang d'iceluy, qui nous nettoye de tout peché. Ce refus contrediroit donc manifestement à la volonté de Dieu, & à la dispensation de sa grace. Si ce dont Sainct Paul demandoit à estre deliuré estoit vice ou peché? La cinquiesme raison est, que Dieu luy res-

pond, *Ma grace te suffit.* Or puis que la  
 grace de Dieu luy estoit donnée, & e-  
 stoit avec luy, & qu'elle ne luy ostoit  
 pas ce dont il demandoit d'estre deliuré,  
 ce n'estoit ny peché ny vice. Car le  
 propre de la grace est d'oster le peché  
 & le vice, de nous regenerer, de nous  
 sanctifier. Posé donc que S. Paul eust  
 esté encore suiet à ce vice d'orgueil, ou  
 à tel autre qu'ils voudront, si la grace de  
 Dieu luy suffit, c'est pour luy oster. Ain-  
 si il auroit esté exaucé de sa priere. Il  
 ne l'auroit plus eu. Si elle ne l'eust pas  
 osté, elle ne luy suffiroit pas. Car le pro-  
 pre effect de la grace est d'oster le vice.  
 Si la grace donc estoit suffisante, il au-  
 roit fallu que le seul orgueil de S. Paul  
 en eust empêché l'efficace. Qui n'est  
 autre chose que de mettre saint Paul au  
 rang des reprouvez. La sixiesme rai-  
 son est, que l'oracle adioust en sa re-  
 sponse, *Car ma vertu se parfait en infir-  
 mité.* Or la vertu de Dieu, c'est à dire,  
 l'effect qu'elle produit en nous, ne se  
 parfait pas par le vice. C'est la plus grā-  
 de inaduertance de tous ceux qui ont  
 choppé en ce lieu, & de S. Augustin luy

mesme. Quand ils ont rapporté à vn  
 sens si absurde, les paroles de l'Apostre.  
 Comme si Dieu laissoit le peché aux  
 hommes, afin de monstrier sa vertu  
 en eux. Comme s'il permettoit qu'ils  
 demeurassent en peché, afin que la gra-  
 ce y eust lieu. C'est l'opinion, ou pour  
 mieux dire la calomnie, des aduersai-  
 res del'Euangile, refutée ailleurs par  
 l'Apostre, *Quoy donc, demeurons-nous en  
 peché, afin que grace abonde? Ainsi n'ad-  
 uienne! Rom. 6.1.* Et quipis est, les au-  
 teurs ou fauteurs de cette opinion ne  
 voyent pas l'absurdité dont ils l'enue-  
 loppent contre leur propre aduis. Car  
 quand ils veulent que la vertu de Dieu  
 se parface en infirmité, c'est à dire, se-  
 lon eux, dans le vice, & dans le peché,  
 qui se trouue encore en l'homme: ils  
 veulent au moins qu'elle s'y parface en  
 la destruisant. Ainsi, suiuant leur pro-  
 pre intention, la responce de l'oracle  
 ne sera pas veritable. Car le vice qu'ils  
 se figurent en S. Paul, y estoit demeuré  
 après sa priere, & après la responce qu'il  
 auoit receuë. La vertu de Dieu ne l'y  
 seroit donc pas parfaicte. Car, pour cela

il n'y auroit rien eu, à ce compte, de plus parfait en luy. La septiesme raison est, que S. Paul explique luy-mesme nettement, ce qu'il entend par le mot d'infirmité, où il montre qu'elle est fort bien coniointe avec l'habitation de la vertu de l'Esprit de Christ en luy. Quand il adioust, *Je me glorifieray donc plus volontiers en mes infirmitiez, afin que la vertu de Christ habite en moy. C'est pourquoy ie pren plaisir en infirmitiez, en iniures, en neceßitez, en persecutions, en angoisses pour Christ. Car quand ie suis infirme, alors suis-je fort.* Il n'y a personne qui ne voye, que par infirmitiez sont ici entēduës les afflictions diuerfes, dōt les fideles, sont visitez, & non pas leurs vices. Car quelle contradiction autant profane qu'absurde, seroit ce, si *infirme* signifioit vicieux, 'comme *fort* signifie l'effect de la grace à l'encourager à l'amour de Dieu? Veu qu'ainsi tout, notoirement on feroit dire à l'Apostre, quand ie suis vicieux, j'ay l'amour de Dieu habitant en moy. Ou, plus ie suis vicieux, & plus l'amour de Dieu est grād en moy. La huietieme & derniere raison est,

que tous ceux qui ont traduit ici σκόλοψ, *aculeus, stimulus, surculus, aiguillon, escharde*, n'ont point rendu le sens naïf de l'Apostre, ny la propriété du mot, lequel signifie la mesme chose que σταυρος *une Croix*. Car σκολοπίρειν & ἀνασκολοπίρειν ont le mesme sens que σταυρουῦ & ἀνασταυρουῦ. Et Lucian en quelque lieu (c'est, si bien m'en souuient, en l'histoire du Peregrin) appelle nostre Seigneur. τὸν ἀνεσκολοπισμένον le pendu, ou l'empa-  
lé. Car σκόλοψ est vn pieu, auquel on pendoit le crucifié, les deux mains jointes ensemble, au dessus de la teste, & non estenduës sur le bois de trauerse, qui estoit aux autres formes de Croix. Il faut donc traduire, *Il m'a esté donné une croix en ma chair*. Et puis, pour nous expliquer que c'est que cette Croix en sa chair, il adioute, *Un Ange de Satan, pour me donner des soufflets*. S. Chrysostome rapporte cette affliction à la persecution qu'Alexandre; dit le Forgeron ὁ χαλκῶς. (Je croy qu'il faut traduire *Alexandre de Chalcide*, ville de Macedone) faisoit à S. Paul, avec Hymence. Mais comme nos propres re-

sentimens nous induisent aisément, dans l'occasion, à prendre des opinions d'autrui, qui soient conformes à nostre exemple: je croy que ce qui a donné suiet à Chrysostome de se plaire en cette opinion, a esté la ressemblance qu'il y voyoit, avec la persecution que Theophile d'Alexandrie & Epiphane luy faisoient, qui par les factions de leurs Conciles le firent enuoyer en exil. Au reste il n'y a rien de solide en ce iugement, non plus qu'aux raisons que ce mesme auteur apporte contre l'opinion de ceux qu'il refute, estimans que l'Apollre entendoit ici, par cette Croix, *τὴν κεφαλalλγίαν*, *une douleur de teste*. Contre quoy il allegue, que S. Paul qui guerissoit tant de maladies, s'en seroit deliuré facilement. Mais il ne voyoit pas que cétte raison estoit encore plus facile à retorquer contre luy mesme. Car il estoit aussi aisé à S. Paul de liurer à Satan Alexandre, comme il auoit fait Hymenee, qu'il luy adioint, & Philette. Et ce pour la destruction de la chair, comme il auoit fait l'incestueux de Corinthe, & l'enchanteur de Cypre, frap-

péd'aveuglement. Mais S. Chrysostome  
 a peu considéré, que iamais les Apo-  
 stres n'vsoient de la puissance & de la  
 vertu qui leur estoit donnée, en telle  
 sorte qu'ils en appliquassent l'usage à  
 leur interest, ou à leur commodité par-  
 ticuliere. Ils ne conuertissoient pas la  
 faculté de faire des miracles, à leur pro-  
 fit, soulagement, ou deliurance pour  
 eux. Ainsi lisons-nous, que quand les  
 Apostres ont esté mis en prison, ils  
 n'ont iamais fait ouvrir les portes de  
 la prison par leur puissance. Mais quand  
 il a plu à Dieu monstrier, en ces occa-  
 sions, la magnificence de sa force à les  
 deliurer, il a enuoyé son Ange, & a fait  
 tomber les chaines de leurs pieds, & a  
 décroüillé les verrouils des portes: eux-  
 mesmes ne le sçachans, ny ne le co-  
 gnoissans, & n'y contribuans autre cho-  
 se, que l'exercice de leurs saintes prie-  
 res, par lesquelles ils se remettoient à la  
 sauuegarde du Tout-puissant. Ainsi  
 quand leurs plus chers Disciples ont  
 esté malades, ils n'ont iamais employé  
 pour eux le don de guerisons qui estoient  
 en leur main. Et n'ont fait autre chose

que compatir à leurs infirmités. Ainsi voyons nous que S. Paul, en l'extreme maladie d'Epaphrodite proche de la mort, en a esté saisi de tristesse, & ne l'a pas deliuré par miracle, mais qu'il a attendu, & sollicité, par ses prieres, la sage prouidence de Dieu, lequel eut, comme il parle, *pitié de tous les deux, afin qu'il n'eust en sa mort tristesse sur tristesse*, Philip. 2. 27. Et luy-mesme ne guerit pas, par la faculté que Dieu luy auoit donnée, le mal d'estomach de son cher Disciple Timothee. Mais il se contente de luy ordonner vn regime naturel & ordinaire pour se fortifier. La raison generale de tout cela est, que les miracles n'ont pas esté instituez, ny la faculté d'iceux mise dans la main des Apostres, pour conseruer la vie & la santé des fideles, lesquels, au contraire, sont appelez à la tollerance de la Croix. Mais leur vsage a esté donné pour la conuersion des infideles, & pour la confirmation des nouueaux venus à la cognoissance de l'Euangile, & encore foibles, lors qu'ils estoient appelez de la scruitude de la loy, à la liberté de l'Euangile, se-

lon que nous dit l'Apostre du miracle des langues, *Qu'il n'a point esté donné pour les croyans, mais pour les infideles.* 1. Cor. 14. 22. C'est pourquoy l'Evangile ayant esté establi, & la foy ayât esté fôdce par les Apostres, & par les hommes Apostoliques leurs coadiuteurs, Euangelistes & Prophetes; les miracles ont cessé; Et l'efficace de l'Esprit de Dieu en l'Eglise s'est reduite à la vertu de la parole de l'Evangile, & des Sacrements en nos ames, pour nostre sanctificatiō, iusqu'à ce qu'il parface sa grand' œeuve du miracle des miracles, en la resurrection de tous nos corps, & en la gloire de leur restablissement. Qui est cē que nous attendons maintenant par patience. Ainsi la raison de S. Chrysostome est sans fondement, quand refutant ceux qui interpretoient cette Croix del'Apostre, pour vne douleur de teste, il leur oppose la faculté de l'Apostre à se guerir soy-mesme. Certes, il n'y a point de doute que cette infirmité de l'Apostre n'ait esté vne griēue maladie, dont il a esté tourmenté. Ce que Monsieur Cameron estime, que ses paroles doiuent estre pri-

les sans figure, & qu'il faut entendre  
 simplement, par l'Ange de Satan qui le  
 soufflettoit, vn malin esprit qui le ve-  
 noit battre & luy donner des soufflets,  
 n'a nulle necessité, ny mesme, comme ie  
 croy, de vray-semblance. Car ce qu'il  
 dit, que parlât d'une chose auenue il n'a  
 point vsé d'allegorie, n'a pas grand fon-  
 demēt. Veü que le mesme Apostre, par-  
 lant de ce que Dieu l'auoit preserué du  
 danger de mort, quand il comparut  
 pour estre iugé, nous dit, *qu'il a esté*  
*deliuré de la gueule du Lion.* 2. Tim. 4. 17.  
 Ce qui ne peut estre pris pour le sup-  
 plice auquel il est bien notoire qu'on  
 exposoit l'innocence des Chrestiens.  
 Selon le mot familier qui estoit en la  
 bouche de leurs aduersaires, *Christianos*  
*ad Leonem.* Car les loix Romaines em-  
 peschoient que S. Paul, Citoyen Ro-  
 main, encourust autre supplice que d'a-  
 uoir la teste tranchée. Comme aussi il  
 eut à la fin. Ainsi ces mots, *I'ay esté deli-*  
*uré de la gueule du Lion*, où il raconte  
 notoirement le faict du succès de sa  
 premiere apologie, sont allegoriques.  
 Et quasi tous les Interpretes, par le

Lion, entendent Neron. Quel est donc cet Ange de Satan, qui soufflettoit l'Apostre ? Et quelle est cette Croix dont il parle icy ? Si on doit asscoir sa coniecture sur les circonstances qui nous la peuvent rendre plus certaine, je diray premierement, que le nom d'Ange de Satan est mis metonymiquemēt, la cause pour l'effect. Pource que tous les maux sont les effects de la punition dont le diable est l'executeur, par l'ordre de la iustice diuine. A quoy il s'applique avec plaisir, comme exerçant en cela vne bonne partie de son regne. Mais lequel Iesus Christ a destruit par sa Croix, ayant par elle consacré les maux des fideles pour l'vsage de leur sanctification, qui est le contraire de l'œuure du diable. S. Paul appelle donc ainsi sa maladie, regardant à l'origine de sa nature, & à la cause de son estre. Et il la nomme ainsi particulièrement, pour designer la condition d'un mal grief & extraordinaire. Pource que c'est en cette sorte de maux, que Satan cherche d'establir la puissance de son empire sur les mortels. Comme nous le voyons en l'effect de

ces malins esprits, dont nostre Seigneur guerissoit tant de malades dans l'Euan-  
gile. Tel, entr'autres, estoit celuy que les  
Disciples ne peurent guerir, que le dia-  
ble iettoit par terre, tantost dans l'eau,  
& tantost dans le feu, qu'il dérompoit,  
& faisoit escumer. Or l'Apostre nous  
designe, par ces termes qui sont confi-  
derables, *Vn Ange de Satan pour me don-  
ner des soufflets* vne espece de mal, qui  
semble auoir eue les conditions du mal  
caduque, l'un des symptomes duquel  
est, que ceux qui en sont affligez se frap-  
pent & se donnent des soufflets dans le  
visage. Car il n'y a point de doute qu'il  
a voulu représenter en parlant ainsi, la  
principale remarque du mal qui le tra-  
uailloit, & qui estoit exposée à la veüe  
de tous. Ce qui estoit capable de le ren-  
dre fort contemptible. Dont est que  
parlant de ce mesme mal, escriuant aux  
Galates, il l'appelle τὸν πικρασμὸν μου τὸν  
ἐν τῇ σαρκί μου. *Mon espreuue que j'ay  
en ma chair.* Car traittant, en cette epi-  
stre, contre ceux qui denigroient son  
autorité, pour faire la guerre à sa do-  
ctrine,

Strine, & qui par cette voye auoient fait grande impressiõ en l'esprit des Galates pour les reduire à l'obseruatiõ de la Loy de Moyse: il leur represente, pour les retenir en l'obeissance de la verité qu'il leur auoit enseignée, quel cas ils auoient fait de luy au commencement, quand ils receurent l'Euangile de sa bouche, nonobstant cette mesme infirmité qu'ils auoient veüe en lui. Et à cet effect il leur dit: *Vous scauez qu'au commencement ie vous ay euangelisé dans l'infirmité de ma chair. Et vous ne mesprisastes ny n'abhorrastes point l'espreuue que i'ay en ma chair. Mais vous me receustes comme un Ange de Dieu, comme Iesus Christ. Car comme cette fiene espreuue luy auoit esté donnée d'une part, afin que la gloire de la puissance de Dieu ne fust transformée, en luy, en la gloire de la vertu de l'homme, par ceux qui admiroient sa sapience & ses oeures: aussi d'autre costé ceste humiliation ne deuoit pas preiudicier, par le iugement des hommes, à l'honneur & à l'obeissance de l'autorité qui accompagnoit en luy la parole de l'Euangile.*

Il estoit humilié, afin qu'en luy la vertu de Dieu fust exaltee. Mais la vertu de Dieu se manifestoit en sa predication, afin que la Croix qu'il portoit fust adorée, comme l'image du Sauveur Iesus. Ainsi la Croix auoit double visage, d'un costé celuy d'un Ange de Satan, pour le mespris & pour l'horreur qu'elle cau-  
soit aux yeux de la chair, afin que ces mesmes yeux n'idolatrassent en luy la nature humaine. D'un autre costé, cette Croix auoit le visage d'un Ange de Dieu, de Iesus Christ mesme, pour l'admiration & pour la ioye qu'elle cau-  
soit aux yeux de l'esprit, afin que ces mesmes yeux adorassent en luy l'image du Seigneur Iesus, & en embrassassent la communion. Et pourtant, comme il nomme ce mal qu'il souffroit, *Ange de Satan*: aussi fait-il opposition à l'horreur de son aspect, en qualifiant le respect que les Galates auoient rendu à sa per-  
sonne, à cause de sa predication, comme rendu à *un Ange de Dieu, ou à Iesus Christ mesme*. Et ces mots, *Vous n'avez point mesprisé, ny eu en horreur l'espreuue que j'ay en ma chair*, sont veritablemēt

considerables, pour entendre la qualité du mal, & pour asseoir le fondement de la coniecture. Car c'est chose cogneue que chacuna ce mal en horreur, & en auersion. Dont les Romains le nommoient *morbis comitialis*, pource qu'il caufoit la separation des assemblees du peuple les plus importâtes, si quelqu'un s'y rencontroit surpris de sa cheute. Or comme ce mal rendoit l'apparence del'Apostre contemptible, il semble encore que c'est à cela mesme que se rapporte le reproche de ses aduersaires, dont il fait mention 2. Cor. 10. 10. *Les epistres (dit-on) sont graues & fortes, mais la presence du Corps est infirme, & la parole contemptible.* Car ce mal peut aussi causer aisément quelque empeschement à la parole à cause de l'affectation du cerueau. Et finalement pour clorre la dernière circonstance de la coniecture que l'on peut auoir de cette maladie del'Apostre, quand il dit: *Il m'a esté donné*, il designe que c'est vn mal qui luy estoit aduenu extraordinairement, & par vn coup speciel de la main de Dieu. De sorte que la cause & l'origine en pour:

roit bien estre rapportee à l'espouuante-  
 ment dont l'Apostre fut rempli,  
 quand Iesus Christle frappa des Cieux,  
 & qu'il cheut à terre. Tellement qu'un  
 si subit & si estrange estonnement de  
 cerueau l'auroit affecté de là en auât, &  
 l'auroit réduit sujet à ce mal, cōme il fut  
 aussi frappé d'aveuglement. Dieu, qui le  
 voulut guerir tost apres de ce dernier  
 symptome, ayant iugé à propos, selon  
 les raisons de sa sagesse, de laisser en son  
 corps cette autre impression de son  
 doigt pour l'exercice d'une humiliation  
 contibuelle, & pour le sentiment per-  
 petuel de la Croix de son Fils en luy.  
 Afin que la vertu de sa grace parache-  
 uast son œuvre en cette infirmité. Ainsi  
 il luy fut donné tout ensemble & de  
 croire, & de souffrir, afin qu'en sa souf-  
 france sa foy fust accomplie, & conti-  
 nuellement fortifiée, selon que luy-mes-  
 me se glorifie, que lors qu'il est en in-  
 firmité c'est lors qu'il est fort. A quoy  
 ont esté adioustées toutes les tribula-  
 tions & persecutions qu'il a receuës en  
 la predication de l'Euangile, iusques au  
 couronnement de son martyre. Selon

*cet oracle de la vocation : Je luy apprendray combien il faut souffrir pour mon nom.*

Tel estant le sens naïf du lieu de l'Apostre, il est manifeste qu'il n'y a rien plus esloigné de son intention, que d'attribuer cette infirmité à quelque vice ou relique de peché en luy. Pour recueillir de là, que Dieu dispense ainsi l'estat de l'imperfection de la iustice des siens, afin de les humilier. Et pour conclurre, que la sainteté des plus regenez est tousiours accompagnée de beaucoup de defauts. Comme si nul ne pouuoit paruenir à la mesure de l'homme parfaict en Iesus Christ. Car toutes ces hypotheses sont aussi contraires à la verité de l'Euangile, comme l'exemple de S. Paul est mal à propos employé pour les confirmer. Il estoit sans doute paruenu à la mesure de l'homme parfaict en Iesus Christ. Et en cette qualité il se propose luy-mesme en exemple d'imitation, comme il suiuiot celui du Seigneur, cheminant sous la croix & par son Esprit. Je confesse bien que S. Augustin disputant pour la nécessité de la grace en tous les hommes,

( qui est vne assertion tres-veritable & fondamentale de l'Euangile ) a creu qu'elle estoit mieux confirmée par les exemples des regenez, en qui le peché fait encore des siénes : Car si ceux-là en ont besoin, combien plus ceux qui ne sont pas encore regenez. Et iusques là la consequence est bonne, & la maxime vraye. C'est la raison pour laquelle nous trouuons, en ses escrits, diuers lieux, qui tendent à la confirmation de cet argument. Mais comme sa these est toute differente de celle, sur laquelle nos reformateurs ont formé controuerse avec les Catholiques, touchant la iustification : aussi vos inductions ont vn rapport du tout esloigné de son intention. Et partât encore, qu'il ait pris & employé certains passages de l'Ecriture au mesme sens que vous faites, & qu'en cela il se soit en effect mespris, comme vous apres luy : si est-ce qu'en la question que nous traittons, & au but que vous vous proposez, vous n'auéz rien de commun ensemble, comme vous le verrez par les propres lieux que vous alleguez de luy.

Le 1. lieu que vous rapportez de S. Aug. 32. est du 19. liure de la Cité de Dieu chap. 27. que ie représenteray ici tout au long, sans les &c. dont vous l'avez abrégé. Afin que par la considération de ce qu'il y dit, vous & tout autre iugiez qu'il ne vous fauorise en rien, ny ne s'esloigne, en façon aucune, du sentiment de la doctrine Catholique des merites du fidele, contre laquelle vo<sup>r</sup> disputez. *Nostre iustice mesme* (dit-il) *combien qu'elle soit vraye, à cause de la fin du vray bien, auquel elle se rapporte.* Remarquez desia la raison de la vraye iustice, qui est la raison pour laquelle elle est appelée merite. Car pour ce qu'elle a le vray bien pour sa fin, elle l'a aussi pour sa recompense. *Toutesfois elle est si grande en cette vie, qu'elle consiste plus en la remission des pechez, qu'en la perfection des vertus.* Ce qui vous abuse, est que par la remission des pechez vous n'entendez autre chose que le pardon de l'offense. Au lieu que S. Augustin, selon le stile de l'Apostre, entend la deliurancede la seruitude de peché, cōtre lequel pource que nous auons tousiours à com-

battre, l'effect de la grace est de nous faire obtenir la victoire, qui est nostre iustice, consistant plustost en la remission des pechez, qu'en la perfection des vertus. Telle que S. Aug. l'entend, cōparee à celle que nous obtiendrons dans le triomphe. *Tesmoïn est la priere de toute la Cite de Dieu.* Vous avez obmis les mots qui suivent, *laquelle est voyagee icy bas.* Pource que vous voulez que celle qui est recueillie au Ciel, ait aussi besoin de dire au dernier iour, pardonne nous nos offenses, comme la iustice estant defectueuse, & ne pouuant par consequent estre reputée pour merite de la couronne. Mais c'est vostre sentiment, & nullement celuy de saint Augustin. Il adiouste, *Comme ainsi soit qu'en tous ses membrés elle crie à Dieu, Pardonne-nous nos offenses, cōme nous pardonnons à ceux qui nous ont offensé.* Or ie sçay que vous rapportez l'effect de ce pardon à la non-imputation du peché. Et vous n'entendez point, ou ne voulez point entendre, qu'en ces paroles les fideles sont appris de demander l'effect de la grace, qui a changé en la Croix de Christ, le su-

iet de la malediction des pecheurs, en instrument de la benediction des fideles, pour les rendre superieurs du peche & des conuoitises qui guerroiēt contre l'ame, afin qu'ils paruiennent à la vraye iustice de foy operāte par charité. Pourtant, vous auez ecclipsé, en vostre citation, les paroles suiuanes de Sainct Augustin, qui expriment excellemmēt la naïueté de ces sens. Or ceste priere n'est point effeaciense pour ceux desquels la foy est morte sans œures, mais pour ceux de qui la foy opere par charite. Car pource que la raison, qui est bien assuiettie à Dieu, & toutesfois en cette condition mortelle, & en ce corps corruptible qui aggrave l'ame, elle ne commande pas parfaitement aux vices: pourtant telle oraison est necessaire aux iustes. Car certainement encore qu'elle commande, elle ne commande pas pourtant aux vices sans combat. Et à vray dire quelque infirmité se glisse encore insensiblement, en ce lieu-ci, mesme dans celuy qui combat brauement, ou qui se rend maistre de tels ennemis qu'il a vaincus & assuiettis. D'oū il arriue qu'o vit à pecher, si ce n'est par œures, au moins par quelque parole qui eschappe, ou quelque pensee qui vole. Et pourtant du-

rant le temps que nous cōmandons à nos vices  
 nous n'avons pas une pleine paix. Pource  
 que ny les vices qui résistent ne sont de belles  
 que par un combat perilleux, & sur ceux-là  
 mesme qui sont vaincus, nous ne triomphons  
 pas avec un repos assuré, mais nous les te-  
 nons au dessus de nous, avec un empire plein  
 de sollicitude. Donc en ces tentations, de  
 toutes lesquelles les divins oracles ont bre-  
 vement dit, La vie de l'homme n'est-elle  
 pas une tentation sur la terre? Icy vous  
 reprenez le fil du discours de S. Augu-  
 stin, que vous avez interrōpu à dessein,  
 pour cacher à vostre Lecteur, que la  
 iustice du fidele ici bas, selon luy, n'est  
 dite imparfaicte, qu'à cause de ce qu'elle  
 est accompagnée de combat & de  
 sollicitude, & qu'elle ne consiste qu'en  
 la victoire, & non au triomphe, au quel  
 consiste la perfection, lors que nous se-  
 rons recueillis en paix. Et pourtant que  
 nous avons toujours besoin pour estre  
 rendus vainqueurs, d'impetier la grace  
 que nous demandons, en disant, Par-  
 donne nous nos offenses, Mais nullemēt  
 que l'imperfection de la iustice des fi-  
 dèles soit (comme vous voulez) telle,

que pour ses defauts & manquemens, elle ait au dernier iour (comparant pour estre examinee deuant Dieu) plus besoin de pardon, & par consequent d'une couuerture d'une autre iustice estrange, qu'elle nesoit digne du nom de merite. Car tout le discours de sainct Augustin se rapporte au besoin continuel que les fideles ont de la grace ici bas pour vaincre, mais nullement pour estre couronnez, quand ils comparoistront au dernier iour. En quoy consiste la mesprise de nos reformateurs, quand ils ont defini que toute nostre iustice est fondee en la remission des pechez. N'entendans pas mesmes ce qu'emporte la remission des pechez. Pourtant S. Augustin adioust ce que vous continuez de citer, mais contre vous-mesmes. *Qui est-ce qui presume viure de sorte qu'il n'ait besoin de dire à Dieu, Remets nous nos debtes, si ce n'est un homme superbe? mais non un qui soit grand, ains enflé & bouffi, auquel resiste iustement celuy qui donne sa grace aux humbles. Pour raison dequoy il est escrit, Dieu resiste aux superbes, & donne grace*

aux humbles. En chacun donc ici la iustice consiste à ce que Dieu commande à l'homme, & qu'il luy obeisse, que l'esprit obeisse au corps, & la raison commande aux vices, quoy que repugnans soit en se les assuiettissant, soit en leur résistant. Voyez vous quelle iustice S. August. recognoist aux fideles? Non quelque iustice defectueuse, cōme la vostre, que vous voulez couvrir d'une iustice imputee. Mais vne iustice victorieuse du vice. Vne telle iustice qu'elle puisse estre à bon droit nommee merite que la grace forme en nous. Comme S. Augustin la qualifie aux paroles suiuanes, que vous n'avez peu alleguer, ce me semble, qu'à la confusion de l'opinion contraire que vous voulez authoriser par son tesmoignage. Car voicy comme il parle formellement contre vous, qui avez entrepris de disputer contre les merites de grace. Tellement qu'on demande à Dieu, & la grace des merites, & le pardon des offenses, & qu'on luy rende les actions de graces pour les biens receus. Et s'il vous eust plu instruire encore vostre lecteur, que, par la doctrine de S. Augustin, certemefme

iustice, que le fidele obtient en cette vie, est la cause du repos eternel, qui luy sera communiqué au dernier iour, & qu'elle n'est appelée imparfaicte, en comparaison de l'estat de iustice que les Saints auront en la gloire, qu'à cause qu'ici nostre obeissance à Dieu consiste en combat & en victoire, & que là nostre iustice triomphera, sans que rien luy repugne: vous eussiez encore adiousté à vostre citation les paroles qui finissent ainsi son discours. *Mais en cette paix finale, où doit estre rapportee cette iustice que nous devons auoir comme cause d'obtenir cette paix: d'autant que la nature, estant guérie par l'immortalité & l'incorruption, n'aura plus de vices, & que chacun de nous n'aura plus de debat, ny avec autrui, ny avec soy-mesme: il ne sera plus besoin, que la raison commande aux vices qui ne seront plus. Mais Dieu obtiendra l'empire sur l'homme & l'esprit, sur le corps, & il aura là autant de douceur & de facilité d'obeir, que la felicité de la vie & du regne sera grande. Et cela sera lors eternel en tous les hommes, & en chacun d'eux. Et on sera certain qu'il doit estre eternel. Et pourtant*

tes de la grace. (Qui est d'en confirmer  
 plustost la necessité, que d'en expliquer  
 la vertu & l'efficace.) Ce qu'il est be-  
 soin de représenter en disputant con-  
 tre vous. Et pourtant, lors qu'il repre-  
 sentel'estat de nostre obeissance ici bas,  
 il luy oppose *suauitatem & facilitatem*  
*obediendi: la douceur & la facilité d'obeir,*  
 laquelle doit estre en l'autre vie. En  
 quoy il ne regardoit point assez à la rai-  
 son du dire de nostre Seigneur; Qui,  
 pour nous rendre nostre obeissance  
 douce & facile, nous a mis la teste sous  
 le ioug de sa Croix, lequel nous est  
 maintenant réduit doux & léger, à cause  
 de l'esperance de sa gloire, laquelle ill'a  
 attachée à sa Croix. Pour raison de quoy  
 il nous dit, *mon ioug est aisé, & mon far-*  
*deau léger.* Ce qui ne seroit pas verita-  
 ble, si ce ioug ne nous apportoit *suauita-*  
*tem & facilitatem obediendi.* A cause  
 qu'en ceux qui le portent, qui embras-  
 sent la Croix du Seigneur Iesus, son S.  
 Esprit répand en leurs cœurs sa charité,  
 qui les encline avec toute facilité & dou-  
 ceur, à l'obeissance des Commande-  
 mens. Au lieu que la Loy le faisoit avec

*zélés, deuotieux, misericordieux, souffrans avec patience, pour iustice, tous les maux de cete vie. Cesont ceux-là mesme de qui ie maintien la iustice parfaite, par la victoite qu'ils remportent dans le combat, & aux merites desquels ie di que la Couronne sera renduë. Comme vous l'avez ouy cy-dessus de la bouche de S. Augustin luy mesme. Mais cette iustice parfaite, & ces merites ne sont en eux, que par la grace qui les y forme iusques à la fin, selon la priere par laquelle ils sont enseignez de la demander à Dieu continuellement, & d'en recognoistre le besoin en eux. Et pourtant S. Augustin adiouste, mais s'il est vray, voire pource qu'il est vray, que si nous disons que nous n'auons point de peché, nous-nous seduisons nous-mesmes, & que nul viuant ne sera iustificié en la presence de Dieu, ils ne sont point sans peché. Et aucun n'est si arrogamment hors du sens qu'il estime qu'il n'ait pas besoin pour ses pechez, quels qu'ils soient, de la priere Dominicale. Cela est dit, contre ceux qui attribuant à la nature & au franc-arbitre la faculté de ne pecher point, ne*

recoïnoissent en eux aucun peché, pour raison duquel ils ayent besoin de la grace. Ce qui est esloigné de nostre question, comme la terre du ciel. En quoy vous abusez vos lecteurs volontairement. Or pour ce que les Pelagiens alleguoient l'exemple de Zacharie & d'Elizabeth, auxquels l'Escripture rend tesmoignage, qu'ils cheminoiét en tous les commandemens, & en toutes les iustifications du Seigneur, sans reproche: S Augustin, comme il est adroit à repousser les traicts du mensonge, remonstre aussi pertinemment que subtilement, qu'il ne s'ensuit pas pour cela qu'ils ayent esté sans peché. Et pour le confirmer inuinciblement, il employe le texte de l'Apostre aux Hebricux, qui dit, *Que Iesus Christ est le seul souverain Sacrificateur, qui n'a pas nécessité d'offrir tous les iours sacrifices comme les autres Sacrificateurs, Premièrement, pour leurs pechez, puis après pour le peuple.* Or, dit il, Zacharie estoit sacrificateur, donc il auoit nécessité d'offrir pour ses pechez. C'est excellemment rembarrer ses aduersaires. Il adiouste encore yne autre consideration, que la iustice en laquelle

Zacharie & Elizabeth che minoient sans reproche, estoit la mesme iustice de laquelle S. Paul disoit de soy, que selon la iustice qui est par la Loy, il auoit esté sans reproche, auant qu'il creust en Iesus Christ. Et neantmoins l'Apostre dit, qu'il a reputé cette sienne iustice pour honte & dommage, pour l'eminente cognoissance au Seigneur. D'où il inferre que la iustice de Zacharie & d'Elizabeth ne les constituoit pas pourtant sans peché. En quoy certes l'affection de maintenir sa these, quoy que veritable, a dérobé à saint Augustin la veüe de la verité pour ce regard. Car saint Paul infidele, en sa iustice qui est par la loy, estoit superbe, blasphemateur, & persecuteur. Cè que n'estoient ny Zacharie ny Elizabeth. Il cheminoit en la iustice des cōmandemens singuliers de la loy sans reproche, mais tout ce qu'il en faisoit, procedoit d'un superbe amour de soy-mesmes. Zacharie & Elizabeth rapportoient leurs œuures, conformes aux cōmandemens & aux iustifications du Seigneur, à la fin de son amour, & de sa gloire, selon la foy qu'ils auoient en

H h h. j

l'attente de la redemption d'Israël. Mais combien que l'un & l'autre de ces deux cheminaissent iustement, selon la foy de la promesse lors reuelée, il restoit toujours deux choses à répondre à l'obiection des aduersaires de saint August. L'une, que la iustice qui estoit en eux prouenoit de la grace, qui auoit changé la peruersité de leur nature. Et partant qu'ils n'estoient point sans péché. L'autre, que leur iustice, en la voye de laquelle ils estoient conduits par la pedagogie de la loy, estoit encore basse & foible, au prix de celle qu'obtiennent les fideles sous la grace de Iesus Christ. Car S. Iean Baptiste, qui nasquit d'eux, fut plus grand qu'eux, & fut le plus grand homme né de femme. Et toutesfois le moindre au Royaume des Cieux, c'est à dire, en l'Eglise de Iesus Christ, en sa cōmunion, & lequel mangeant maintenant sa chair, & beuuant son sang, est abreuué de son Esprit, est plus grand que luy. Et pourtant la iustice, qu'auoient Zacharie & Elizabeth, estoit bien peu de chose, au prix de celle qui est par la foy de Iesus Christ, la iustice de Dieu par la foy, qui procede

de la cognoissance du Seigneur, de la vertu de sa Resurrectiõ, & de la Communion de ses afflictions. Comme nous l'a décrit le mesme Apostre, & S. Aug. par ses paroles. Mais vous auez retranché tout ce discours de la citation du lieu de S. Augustin. Pource que vous y voyez la condamnation de vostre iustice, que nos Reformateurs se sont imaginée pour celle que l'Apostre appelle la iustice de Dieu, qui est par la foy. Par où il entend par tout vne iustice inherente. Comme saint August. vous le monstre ici au doigt. Et pour mesme raison aux paroles qui suivent de luy, dont vous reprenez la citation, vous en auez ecclipsé les plus notables, qui representoient cela mesme. *Tant s'en faut donc, dit-il, que nous croyons pour ces paroles que Zacharie & Elizabeth ayent eu vne iustice parfaite sans aucun peché.* Vous auez obmis ces mots, *sans aucun peché*, pour cacher à vostre Lecteur l'estat de la question, qui regarde la iustice du franc-arbitre, en laquelle l'homme ne peut estre appelé parfait, qu'il ne soit dit sans aucun peché. Et non la iustice par la gra-

ce, dōt la perfection consiste en la destruction du peché qui est en l'homme.

*Que nous n'estimons pas (adiouste S. Augustin) que l'Apostre ait esté parfaict à la hauteur de cete mesme regle, (c'est à dire, d'estre sans peché) non seulement en la iustice de la loy, qu'il auoit semblable à ceux-là, laquelle il repute dommage & fiente en comparaison de l'eminetissime iustice, qui est par la foy de Iesus Christ. Ce sont ces derniers mots, que vous auez obmis, pource que la cōparaison de la iustice qui est par la loy, avec la iustice qui est par la foy, dont celle-ci, au regard de l'autre, est appelée eminetissime, est vn inuincible argument que l'vne & l'autre est inherente. Car sans cela elles ne pourroient estre comparees en degré. Mais aussi, continuë S. Augustin en l'Euangile mesme, on il a obtenu la principauté d'un si grand Apostolat.*

Voyez en passant que la principauté, dans l'Apostolat n'est pas incompatible avec la condition de la charge. Et pource que vous vous estes naguères battu à la perche, sur

la cōparaifon de S. Pierre & de faincte Paul, touchant cette principauté, en l'explication des paroles de l'Apostre aux Galates, que vous, ny tous nos Reformatours, n'ont jamais entendues; apprenez, s'il vous plaist, Que faincte Pierre & S. Paul ont eu tous deux la principauté de l'Apostolat. Selon que toute l'Eglise l'a tousiours enseigné. S. Pierre originellement & radicalement, par l'institution du Seigneur en la compagnie des douze. Par laquelle a deu estre fondée & administree l'Eglise entre les Iuifs; Et S. Paul subsidiairement, & par dispensation, pour l'aggregation des Gentils à la nouuelle Ierusalem déjà fondée par les douze, dōt S. Pierre estoit Chef. Qui est le sens naïf, auquel se rapportent ces paroles de l'Apostre, Gal. 2. 7. *L'Evangile du preputé m'a esté commis, comme à Paul celui de la Circōcision.* Oū vous ne voyez goutte, quand vous les euidez employer cōtre la principauté de S. Pierre. Car si vous ouurez tant soit peu les yeux, vous verrez qu'il n'y a rien au monde plus euident que la preuue

qui en résulte pour elle. Attēdu que l'Apostre ne peut dire, que l'Euangile de la Circoncision ait esté cōmis singulièrement à Pierre, qu'il n'exclpē tous les autres de l'Apostolat. Ou qu'il ne l'attribuē à Pierre par eminence & par surintendance sur les autres. Or il est certain que tous les onze auoient aussi receu leur part de cette administration. S'enfuit donc, que ce que S. Paul l'attribuē à S. Pierre seul, ne peut estre entendu qu'au regard de l'eminence, de la surintendance, & de la principauté, qu'il auoit en l'Apostolat entre les douze. Comme aussi S. Paul n'estoit pas seul Apostre entre les Gentils. Barnabas l'estoit aussi bien queluy. Et il n'auoit pas seul la commission de l'Euangile, Silas, Marc, Syluain, Timothée, Tite & diuers autres, qui estoient Prophe-tes & Euangelistes, l'auoient avec luy. Mais il auoit la principauté entre eux, pour l'Euangile des Gentils, comme S. Pierre entre les douze, pour l'Euangile de la Circoncision. Et pourtant, apres que l'Eglise a esté ainsi fondée en tout le mode, suivant la dispensation de la

commission donnee par eminence à ces  
 deux Apostres: il a esté question de lais-  
 ser l'establissement de la forme perpe-  
 tuelle de son regime, que Iesus-Christ  
 auoit instituée en la preminence de S.  
 Pierre, pour en estre le modele immua-  
 ble. C'est pourquoy, d'autāt que S. Paul,  
 par dispensation & subsidiairement, a-  
 uoit obtenu vne semblable principauté  
 de l'Apostolat, il a fallu, lors que l'Eglise  
 a esté receuillie des deux peuples vnīs  
 par le ministere de ces deux Apostres:  
 que tous deux, en mourant, se despouil-  
 lassent de leur principauté, & reuestis-  
 sent, de sa succession, l'Euesque de Ro-  
 me, pour en exercer l'autorité, comme  
 ils auoient fait en l'Eglise vniuerselle.  
 Dont est que l'Euesque de Rome est  
 appelle, par tous les anciens, successeur  
 des bien-heureux Apostres S. Pierre  
 & S. Paul. Et neantmoins ordinaire-  
 ment & communement, successeur de  
 S. Pierre. Pour ce que S. Pierre auoit  
 obtenu originellement & radicalement  
 la principauté de l'Apostolat. C'est ce  
 que vous n'auiez pas apperceu. Pour ce  
 que la chaleur des controuerses vous de-

robela veuë de la verité. Je vous en feray bien voir d'autres, Dieu ay dant, en cette matiere. Reprenon maintenant le fil du discours de S. Augustin pour rentrer dans la nostre.

Il adioust donc, *ce que ie n'oserois dire, si ie n'estimois qu'il n'est pas loisible de ne luy pas adiuster foy.* Là dessus il cite les paroles de l'Apostre Philip. 3. 12. 13. 14. Et puis il en recueille, *que l'Apostre cōfesse luy-mesme, qu'il n'auoit point encore apprehendé, qu'il n'estoit point encore parfait en la plenitude de Iustice, qu'il a desiré d'obtenir en Iesus-Christ. Mais qu'il pou-  
suiuoit de tout son pouuoir, oubliant les choses passées, & s'estendant vers celles qui sont en auant. Afin que nous scachions, qu'à luy aussi apparienoit ce qu'il dit. Si nostre homme exterieur se corrompt l'in-  
terieur est renouuellé de iour en iour.* Comment employés vous ce raisonnement de S. Augustin, contre la perfection de la iustice qui est par la grace? Attendu que la perfection n'est autre chose que la course, que l'Apostre represente en luy. Et que le metire du

fidele auquel sera renduë la couronne, n'est autre chose que l'accomplissement de cette course. Car c'est de là que ie prouue contre vous la perfection de iustice & le merite du fidele. Et en cela S. Augustin est tout à fait pour moy, tout à fait contre vous, aux paroles qui suivent, dont vous avez encore obmis les principales. Il y a au latin, *quamuis iam esset perfectus viator, etsi nondum erat ipsius itineris perfectione peruentor*. Vous avez traduit bien qu'il fust parfait comme voyageur, si ne l'estoit il pas encore, quant à auoir obtenu la perfection du chemin. Vous deuiez traduire, pour représenter l'intention naïue de S. Augustin. *Combien qu'il fust desia parfait voyageur, quoy qu'il ne fust pas encore paruenue au bout par l'accomplissement du chemin*. Car S. Augustin ne dit pas, comme vous luy faictes dire, que S. Paul fust parfait voyageur, & ne le fust pas tout ensemble. Il dit qu'il marchoit parfaitement en la iustice. Mais qu'il n'auoit pas encore acheué la carrière de iustice. C'est ce qu'il exprime par ces autres paroles que vous avez aussi obmises en vostre

& en demander continuellement à Dieu pardon, pour l'assistance de sa grace) qu'en tout cela il n'y a vn seul mot qui fauorise vostre sentiment, contre le merite des fideles & leur vraye iustice inherente, à laquelle est renduë la couronne. Ou qui serapporte à limagination qu'ont eu nos reformateurs, & que vous defendés ici, que la iustice & la saincteté des fideles soit tellement imparfaicte en cette vie, & pleine de tant de defauts, que, pour comparoistre & subsister au iugement de Dieu, il faille estre couuerts d'vne iustice imputée. S. Augustin vous apprend, que le fidele doit estre ici bas parfait voyageur en la iustice, pour en estre là haut parfait possesseur. Car au reste sa distinction rouchant la perfection attribuée par l'Apostre aux fideles ici bas ( par où il veut qu'ils soient tellemēt entendus parfaits en vne chose, qu'ils ne le soyent pas pourtant en l'autre ) est hors de contredit, comme hors de nostre controuerse. Car il est constant, que le nouuel homme se forme de telle sorte en nous, qu'il se va renouuellant, croissant, & fortifiant de

iour à autre. Mais cela n'empesche p'as, que ce nouuel homme, qui doit estre couronné, ne doiue aussi, pour l'estre, paracheuer la course, vaincre dans le combat, persueuer iusques à la fin, & ainsi paruenir à la mesure de la parfaite stature de Christ. Ce que l'Apostre entend indubitablement par le tiltre de *parfait* qu'il attribuë aux fideles. Car tous ceux là sont appellés parfaits selon l'Euangile, lesquels ayans chargé la croix du Seigneur Iesus, cheminent ici bas sous icelle par son esprit, par lequel ils vont de iour en iour mortifiant les fais du corps. Ce que ie confesse, que S. Augustin, dans la distinction du nom de *parfait*, sur laquelle il se trauaille, n'auoit point assez considéré, quand il dit, *que l'Apostre n'estoit pas parfait en la iustice qu'il desiroit*. Car il estoit parfait en cette iustice quant à l'habitude. Pour raison dequoy tous les fideles regenerés par l'Esprit de Christ, sous la croix, sont appelez parfaits. Mais il n'estoit pas parfait quant à la consommation de la course, qu'il luy falloit acheuer en cette habitude. Et en ce sens tout

fidele n'est parfait, qu'il n'ait perseueré iusques à la fin. Et c'est pour cela, que l'Apostre dit en celieu, sur lequel S. Augustin fait ces obseruations, *Nous tous qui sommes parfaits ayons ce sentiment. Au reste qu'en ce à quoy nous sommes paruenus nous cheminons dans le mesme departement.* Car *καὶ ὁ* signifie vn departement. C'est à dire, que nous suiuiens la vocation à laquelle Iesus-Christ nous appelle sous sa croix, pour y cheminer par son esprit. Car c'est le departement que l'Euangile a baillé à tous fideles. Et certes si l'Apostre ne se fust recogneu parfait en cette sorte, iamais il ne se seroit proposé en exemple d'imitation, comme il fait au verset suiuant. *Soyez ensemble mes imitateurs, freres, & prenez garde à ceux qui cheminent ainsi que vous nous auez pour exemple.*

Je vien maintenant au traitté que le mesme pere a composé de la perfection de iustice contre Celestius, le compagnon de Pelagius. Je ne puis assez m'estonner que vous ayez osé escrire, que *S. Augustin en ce traitté refute de point en*

des mesmes causes de son estre, si la iustice de l'homme en procedoit, l'homme pourroit estre absolument sans peché, estre immaculé & exempt de tout vice dès son origine iusques à la fin. Ce qui n'appartiët qu'à Iesus-Christ homme, mediateur de Dieu & des hommes. Si l'homme pouuoit estre iuste par son franc-arbitre, il auroit vne iustice originelle. Il seroit exempt de tout vice. Et n'auroit aucun besoin de la grace. S. Augustin donc soustient contre Celestius, Que nul homme ne peut estre sans peché, si ce n'est par la grace de Iesus-Christ. Et que par la grace il ne peut estre, quand la grace a gueri le vice qui est originellement en luy. En conscience, osez vous dire que ce soyent là les questions d'entre les Catholiques & nos reformateurs. Oyez maintenant les propres paroles de l'vn & de l'autre. La premiere instance de Celestius, est *Auant toutes choses il faut demander à celuy qui nie que l'homme puisse estre sans peché, que c'est que le peche? si c'est ce qu'on peut euitier, ou ce qu'on ne peut euitier? si c'est ce qu'on peut euitier, l'homme peut estre*

sans peché, qu'il peut euitier: si ce qu'on ne  
 peut euitier, ce n'est pas peché. Car nulle  
 raison ny iustice ne souffre qu'on puisse, en  
 tout cas, appeller peché, ce qu'on ne peut  
 euitier. S. Augustin respond. Nous res-  
 pondons que le peché se peut euitier, si la  
 nature corrompue est guerrie par la grace de  
 Dieu par Iesus-Christ nostre Seigneur. La  
 seconde instance de Celestius est, Il  
 faut demander encore, si le peché est de vo-  
 lonté ou de nécessité, s'il est de nécessité, ce  
 n'est pas peché, s'il est de volonté il se peut  
 euitier. S. Augustin, Nous respondons  
 comme dessus. Nous inuouons pour estre  
 guerri celuy a qui on dit au Pseaume, tire  
 moy de mes nécessités. La troisieme in-  
 stance. Il faut demander si le peché est  
 naturel ou accident, si naturel il n'est pas  
 peché, si accident il peut s'eloigner, & par-  
 tant s'euitier. S. Augustin. On respond que  
 le peché n'est pas naturel. Mais bien  
 qu'il est, entre autre choses, de la nature cor-  
 rompue. D'où nous sommes faits de natu-  
 re enfans dire. Et que l'arbitre de nostre  
 volonté est peu de chose pour ne pecher point,  
 si elle n'est aidée de la grace de nostre Sei-  
 gneur Iesus-Christ, qui la guerisse. La

quatriesme instance, Le peché est ce une chose, ou un acte? Si c'est une chose, ou Dieu en est auteur, ou il y a un autre auteur de quelque chose que Dieu. Ce qui est blasphématoire. Ou si c'est un acte il se peut couter. S. Augustin respond, que le peché n'est pas une chose, mais un acte, comme le boitement n'est pas le pied, mais l'action du pied; laquelle ne se peut couter si le pied n'est guéri. Ce qui se fait aussi en l'homme interieur, mais par la grace de Dieu par Iesus-Christ nostre Seigneur. Car en l'homme interieur, le cœur est la chose, le l'arrecin est l'acte, l'avarice est le vice. C'est à dire la qualité par laquelle le cœur est meschant, mesmes quand il n'agit point. D'où vient qu'il sert ou à l'avarice ou au larcin, mesmes quand il oit dire une conuoiteras point. Et se blasmant luy-mesme, toutefois demeure auare. Mais il est renouvelé, par la foy, c'est à dire, guéri de jour en iour, mais non autrement, que par la grace de Iesus-Christ nostre Seigneur. La cinquieme instance. L'homme doit-il estre sans peché, ou non? S'il le doit, ce n'est donc pas peché. Or si c'est chose absurde, & s'il faut confesser qu'il le doit, il est

aussi constant qu'il le peut. S. Augustin  
 respond, Qu'il le doit & le peut, comme  
 le boiteux peut estre gueri. Mais lors que  
 par l'application du remede, il aura esté ré-  
 du sain, & que la medecine aura aydé sa vo-  
 lonté. Ce qui se saict en l'homme interieur  
 pour ce qui regarde le peché, comme son  
 boitement. Mais par la grace de celuy qui  
 n'est point venu appeller les iustes : mais  
 les pecheurs. Pour ce que les sains n'ont  
 point besoin de medecin, mais ceux qui  
 sont malades. La sixiesme instance. S'il  
 est commandé à l'homme d'estre sans pe-  
 ché? Car ou il ne le peut, & il ne luy est  
 point commandé. Ou pour ce qu'il luy est  
 commandé, il le peut. Car pourquoy com-  
 manderoit on ce qui ne se peut du tout fai-  
 re? S. Augustin respond. Il est bien à  
 propos commandé à l'homme de marcher  
 d'un droit pied. Afin que voyant qu'il ne  
 le peut, il recherche la medecine, laquel-  
 le en l'homme interieur, pour guerir le  
 boitement de son peché, est la grace de  
 Dieu par Iesus-Christ nostre Seigneur.  
 La septiesme instance. Si Dieu veut que  
 l'homme soit sans peché? Sans doute il le  
 veut, & sans doute il le peut. Car qui

est si hors du sens qui doute pouuoir estre ce qu'il ne doute point que Dieu veuille. S. Augustin respond. Si Dieu ne vouloit pas que l'homme fust sans peché, il n'auroit pas enuoyé son fils sans peché, pour guerir les hommes de leurs pechez, Ce qui se fait en ceux qui croient, & qui profitent par le renouvellement de l'homme interieur de iour en iour, iusques à tant que leur iustice deuient parfaite, comme la pleine santé. En conscience, Monsieur, sont-celà les obiections qui vous sont faictes de la part des Catholiques? Sont-celà des responses conformes aux definitions de nos Reformateurs? Qui disent, qu'encore que Dieu nous donne son saint Esprit par la grace de Iesus Christ, nous ne pouuons pourtant, ce que S. Augustin maintient ici par tout, que nous le pouuons. Faites vous pas vne manifeste illusion, & à vous-mesmes, & à vos lecteurs, quand vous-vous faites croire, & à eux, que saint Augustin est de vostre sentiment, & contraire à la doctrine des Catholiques en cette partie?

Ce qui vous trompe, c'est que vous ne distinguez pas avec S. Augustin, la perfection de nostre iustice en cettē vie, qui est le merite de la recompense que nous obtiendrons en l'autre, d'auec la perfection de iustice, qui sera en nous en l'autre vie. Pource que celle-ci est dans le combat, dans le peril, & par là victoire. Celle-là sera dans le triomphe, hors de tout peril de combat, & par la possession de la Couronne. Qui est ce que saint Augustin appelle la pleine iustice, & la pleine charité, en la huitiesme responce que vous avez rapportée de luy, sur l'obiection de Celestius, qui continuant & repetant sa mesme argutie, accuse de blasphemē & d'impieté ceux qui diroient, *Que Dieu ait creé l'homme, pour pouuoir estre ce que Dieu ne veut pas, & ne pouuoir estre ce qu'il veut, c'est à dire sans peché.* A quoy S. Augustin employe pour responce, sa precedente solution, à laquelle il adioute, *Que nous sommes sauuez en esperance.* Or l'esp. qui se void n'est point esperance. Car pourquoy espereroit-on ce qu'on void. *Que si nous esperons ce que nous ne voyons pas, nous l'attendons par*

*patience, Alors donc sera la iustice pleine, quand la santé sera pleine, Alors la santé sera pleine, quand la charité sera pleine. Car l'accomplissement de la loy c'est charité. Et lors la charité sera pleine, quand nous le verrons tel qu'il est. Car il n'y aura plus rien à adiouster à la dilection, quand la foy sera paruenue à la venue. Qui sont les paroles que vous auez alleguées. Mais où trouuez-vous, ie vous prie, en ces paroles, que la difference d'une perfection de iustice à l'autre soit telle: que la iustice que nous auons en cette vie soit tellement imparfaicte, qu'elle ne puisse estre meritee de la recompense que nous attendons en l'autre vie. Voulez-vous ouyr S. Augustin, en ce mesme liure, & sur le 16. raisonnement de Celestius? De la responce auquel vous rapportez aussi quelques paroles, autant inutiles pour vostre cause que les precedentes. Voulez-vous, di je, l'ouyr prononcer formellement contre vos maximes. Apres cette vie, dit-il, la recompense de perfection sera rendue, mais à ceux-là seulement qui auront acquis en cette vie, le MERITE de la mesme recompense; Car qui-*

conque à sortir d'ici, ne parviendra point  
 au rassasiement de iustice, si cependant qu'il  
 est ici, il ne court à elle par la faim & par la  
 soif qu'il en a. Il veut, comme vous  
 voyez, que l'affection ardente, que le  
 fidele aicy bas vers la iustice, soit la  
 perfection à laquelle nous paruenons.  
 Et que cette perfection soit le merite de  
 la recompense, que nous obtiendrons  
 là haut. Sont-ce là vos maximes? vous  
 qui déniez tout merite au fidele, toute  
 perfection de iustice. Cependant, pour  
 vous faire comprendre la naïueté & la  
 necessité, des raisons de la doctrine Ca-  
 tholique, ie ne craindray point de vous  
 dire, que S. Augustin n'a pas représenté  
 le vray sens des paroles de nostre Sei-  
 gneur, quand il veut qu'en cette promes-  
 se B, ien-heureux sont ceux qui ont faim &  
 soif de iustice, car ils seront rassasiez, ce  
 rassasiement soit differé en l'autre vie.  
 Car nostre Seigneur parle de l'accom-  
 plissement du Royaume des Cieux. Le-  
 quel a lieu icy bas dans tous les fideles &  
 Saints, comme dit l'Apostre, *Que le*  
*Royaume de Dieu est iustice, paix, & ioye*  
*par le S. Esprit.* Car cette paix & cette

ioye sont le rassasiement de iustice. Ceux qui ont faim & soif de iustice sont tous les fideles sous le sentiment de la Croix, entant que ce sentiment produit en eux des gemissemens innarrables. Ceux qui sont rassasiez ce sont les mesmes qui sont remplis des consolations de son saint Esprit, entant que ces consolations forment cette ioye & cette paix, qui, eleuent toutes les affections de leurs ames vers l'amour de Dieu, en l'attente de l'apparition de nostre Sauueur. C'est ainsi que la iustice, dont nous sommes rassasiez & remplis, procede de la Foy. D'où elle est appelée iustice de Foy, Et par consequent a lieu où la foy a lieu. C'est à dire, en cette vie, où nous cheminons par Foy. Ce que saint Augustin n'a pas assez considéré, disputant contre vn aduersaire, qui ne l'obligeoit pas precisément à cette meditation, comme auroit bié fait la controuerse, que nous auons vous & moy ensemble. Neantmoins ce qu'il dit, de la perfection de iustice que nous obtenons, ici n'establit pas moins la raison du merite, qu'il affirme & que vous

déniés. Car il definit ainsi la perfection de nostre iustice, en cette vie. *Nostre iustice*, dit-il, *en cette peregrination*, cōsiste en ce que maintenant d'une droiture & perfection de nostre course, nous tendions à la perfection & plenitude de iustice, où la charité sera parfaite en la veüe de sa beauté presëte. Chastiant maintenāt nostre corps, & le reduisant en seruitude. Faisant ioyeusement & de cœur des aumosnes, par les biens que nous donnons, & par le pardon des offenses qui ont esté commises contre nous, perseuerant sans cesse en oraison, & faisant toutes les choses suiuant la sainte doctrine, par laquelle une droite foy, une ferme esperance, & une charité pure sont edifiees. Telle est maintenant nostre iustice, en laquelle nous courons affamez & alterés, à la perfection & à la plenitude de iustice, afin d'en estre rassasiés. Est celà vostre iustice imputée? Est ce denier la perfection de la iustice inherente en cette vie, sous ombre qu'il la distingue d'auec la perfection de la iustice en la vie future. Il veut que celle-cy soit du combat & de la victoire. L'autre du triomphe & de la possession.

En ce conflict, dit-il, nous sommes reue-  
 nus de la iustice de laquelle on vit ici par  
 la foy, & nous en sommes en quelque sor-  
 te remparez. Nous prenons aussi sur nous  
 le iugement lequel nous faisons contre nous  
 mesmes en nostre faueur, lors qu'accusant  
 nos pechez, nous nous condamnons. D'où  
 il est escrit, le iuste s'accuse soy mesme lors  
 qu'il commence de parer. Et c'est de là aussi  
 qu'il dit, i'estoy vestu de iustice, & ie  
 me suis environné de iugement, comme  
 d'une cotte d'armes. Car cét habillement  
 a de coustume d'estre plus de guerre que de  
 paix. Où il s'agit de vaincre la conuolti-  
 ze, & non au lieu ou la iustice, sans  
 aucun ennemi, sera accomplie. Lors que  
 la mort, qui est le dernier ennemi à vain-  
 cre, fera destruite. Vous voyez que,  
 selon S. Augustin l'accusation que  
 nous faisons de nous mesmes, n'est pas  
 pour rechercher à nos pechez vne cou-  
 uerture de quelque iustice imputée. Et  
 que le pardon que nous demandons à  
 Dieu, en tout le cours de cette vie, n'est  
 pas pour estre au dernier iour reputez  
 iustes ne l'estans pas. Mais c'est pour  
 combattre ici contre le peché, & pour  
 estre rendus iustes en bien faisant, afin

d'estre trouuez iustes en ce iour là.  
*En ce iugement là, dit-il, tous ceux là  
 seront trouuez iustes, qui disent, sans men-  
 songe, remets nous nos debtes cōme nous les  
 remettons à nos debtors. Car, par cette re-  
 mise, ils seront trouvez iustes en ce qu'ils  
 ont ici effacé par aumosnes les pechez  
 qu'ils auoient. Dont est que le Seigneur  
 dit, donnez l'aumosne, & toutes choses  
 vous seront nettes. Et finalement il sera  
 dit aux iustes, qui doiuent entrer au  
 royaume promis, i'ay eu faim & vous m'a-  
 uez donné a manger, & ce qui sensuit.  
 Est ce la vostre iustice imputée? Est ce  
 la cause que vous defendez? Je reco-  
 gnoy bien certes, que, suiuant la distin-  
 ction que S. Augustin donne entre la  
 iustice parfaite & la course, en la iu-  
 stice parfaicte sous la couronne, il a par-  
 tout interpreté ce que l'Apostre dit de  
 l'Eglise sans tache ny ride, en sorte qu'il  
 doie estre pris non comme si elle estoit  
 telle, mais pour ce qu'elle est preparée a  
 l'esire, quand elle apparoitra glorieuse.  
 Comme vous le rapportez de luy du  
 chap. 18. du 2. liure des Retractat.  
 Mais vous auez omis ce qui interpre-*

te la raison de son sentiment opposé au vostre. Car maintenant, dit-il, pour quelques ignorances & infirmités de ses membres, elle a dequoy dire tous les iours, pardonne nous nos offenses. Certes il est ainsi. Car nous deuõs tous les iours implorer la grace de Dieu, afin que nous cheminions en iustice. Mais ceci se fait en cette vie. Afin que, par la mesme, grace ayant combattu & vaincu nous comparoissions en l'autre vie sans tache ny ride & irreprehensibles en charité. Et pourtant le besoin, que les membres de l'Eglise ont du secours continuel de la grace, n'empesche point que, par la mesme grace, elle ne soit renduë en cette vie (comme l'Apôstre parle) sans tache ny ride & irreprehensible en charité. Car tel est aussi le sens del'Apôstre. Mais S. Augustin dispuoit contre les Donatistes, lesquels sous vne fausse pretention de pureté (qui n'estoit, en effect, qu'une couuerture à l'ambition, qui, par la contention de Maiorin contre Cesi-lian, auoit diuisé les Eglises d'Afrique) s'attribuoient de là en auant a eux

seuls le tiltre d'Eglise. Et à ce suiet, ils emploient ce passage de l'Apostre, comme l'enseigne de leur victoire. Argumentans que Cecilian, & ceux qui auoient communion avec luy, estoient souillez, pour ce qu'ils pretendoient qu'il auoit liuré, dans la persecution, pour s'en garentir, les saincts liures pour estre bruslez. D'où ils cōcluoient, qu'ils ne pouuoient donc estre l'Eglise, puis qu'elle doit estre sans macule & sans ride. Mais cēt argument est vn sophisme, qui se iouē des paroles del'Apostre en vn sens contraire, combien que la sainteté de l'Eglise sans tache & sans ride doieue estre entendue de l'estat present de cette vie. Voici donc la raison qui refute la consequence de leur sophisme. La forme de l'Eglise a deux parties. L'exterieure & l'intendence. Qui toutes deux sont inseparables de la condition de l'Eglise en terre. Au regard de la partie exterieure de sa forme, plusieurs meschans, hypocrites, infideles, & prophanes, ont communion à l'Eglise. Au regard de la partie interieure de sa forme, les

seuls fideles, & sanctifiez sans tache & irreprehensibles en charité, ont communion à l'Eglise. Or quand Cecilian Euesque de Cartage, auroit esté tel que les Donatistes le pretendoient, quand il auroit esté le plus scelerat du monde, tous les fideles, iustes, saincts, & irreprehensibles deuant Dieu en charité, pouuoient bien auoir communion avec luy, au regard de la partie exterieure de la forme del'Eglise, & luy avec eux, sans qu'ils fussent pour cela souilleez. & sans que, pour cela, cét eloge que l'Apostre donne à l'Eglise, luy conuint moins. Pour ce que cét eloge appartient à l'Eglise, au regard de la partie interieure de sa fumee. Cette distinction apportée contre le Sophisme des Donatistes le reduisoit en fumee. Mais S. Augustin n'en ayant pas obserué la necessité, s'est contenté de leur respondre, que cette qualité, donnee à l'Eglise par l'Apostre, s'entendoit de l'estat que l'Eglise deuoit auoir en la vie future. Ce qui n'a nul inconuenient en disputant contre les Donatistes. Mais les consequences en sont fort dange-

reuses, où il s'agit de sçauoir la raison formelle de la iustification du fidele. Car si on nie, comme vous faictes, que la sainteté & la iustice inherente de l'Eglise soit la raison formelle de la iustification de l'Eglise deuant Dieu, il est lors fort dangereux de donner, à ce passage del'Apostre, le sens que S. Augustin luy donne. De peur qu'on en infere l'erreur, où nos reformateurs se sont precipitez, d'une iustice imputée, qui rend iustes deuant Dieu, ceux qui ne le sont pas en eux-mesmes, sous ombre que l'Eglise ne seroit point appelée ici bas à vne parfaite iustice.

Le sentiment de S. Augustin vous estant représenté de la sorte, que vous semble à vous-mesmes du discours où vous dites, *Que nette si recte, si expresse, & si forte créace de S. Augustin, nous monstre, que s'il a pris le mot de iustifier selon l'etimologie & grammaire, pour faire juste, & l'a employé pour regenerer : au lieu que selon le stile de S. Paul, iustifier est absurde, il n'y a pourtant entre luy & nous que difference du mot, & que quant à la chose*  
*sa*

sa creance & la vostre est mesme, puis  
 qu'il tient que nul fidele ne peut subsister  
 deuant le tribunal de Dieu par la perfe-  
 ction de sa iustice & de ses œuvres. Mais  
 obligé de recourir à la grace de misericor-  
 de de Dieu pour obtenir pardon de ses pe-  
 chez à cause de Christ. Vous confessez  
 donc que S. Augustin a pris le mot de  
*iustifier* pour faire iuste actuellement  
 d'une vraye iustice inherente, & non  
 pas pour absoudre & pour reputer iu-  
 stes ceux qui ne le sont pas. Vous en  
 auez le les lieux si exprés que ie vous  
 en ay rapportez au iugement de  
 Monsieur Testart. De là s'ensuit qu'en  
 tous les lieux, où l'Apostre parle de  
*iustifier*, S. Augustin n'a iamais entendu  
 vostre iustice imputee, s'il n'a iamais  
 creu, ny entendu que l'Apostre l'ait  
 enseignee. Ces consequences sont sans  
 replique. Comment dittes vous donc  
 qu'il ne differe avec vous que du mot,  
 & que quant à la chose vostre creance  
 est semblable à la sienne. Il differe avec  
 vous, par vostre confession propre, sur  
 la signification du mot. Or qu'est ce  
 que la chose, sinon ce que le mot signi-

que vous ayez rapporté de luy. Tout le contraire se void en ceux que ie vous enay representez. *Mais il enseigne dites-vous que le fidele est obligé de recourir à la grace & misericorde de Dieu, pour obtenir pardõ de ses pechez à cause de Christ.* Ouy en cette vie, afin que par le pardõ que Dieu luy en fait, & par la grace qu'il luy donne, le fidele soit renouvelé de iour en iour, en l'homme interieur, pour obtenir, en sa course, la perfection de iustice, qui soit le merite de la récompense qu'il obtiendra, sçavoir la iustice parfaicte sous la couronne. Mais ie vous défie de me produire vn seul mot de S. Augustin, qui fauorise l'imagination de nos reformateurs qu'apres cette vie, & au iour du iugement, le fidele, destitué des merites que la grace de Dieu forme en nous, obtiendra la Couronne, par la seule misericorde de Dieu, qui le reputera iuste par la iustice de Christ imputee, encore qu'il ne le soit pas en soy-mesme, & qu'il n'ait aucuns bons merites. Produisez moy S. Augustin ainsi parlant. Et vous pourrez vous vanter hardiment

que sa creance & a vostre sont pareil-  
 les en la chose. Certes, quant est de  
 moy & des Catholiques, vous dittes  
 tres-vray, que nostre sentiment differe  
 du vostre en la chose, & non aux  
 termes seulement. Mais vous vous  
 abusez grandement, & m'imposez  
 chose directement contraire à mon  
 intention & à ma profession, quand  
 vous m'attribuez d'auoir dit en mes  
 premiers escrits, que cette difference  
 n'estoit qu'aux termes, & non en la  
 chose. Je vous ay remonstré vostre  
 mesprise, & le mal entendu de nos  
 reformateurs, en la doctrine Catholi-  
 que, de ce qu'en la question de la ius-  
 tification & des merites, ils n'ont peu  
 discerner la raison de la vraye ius-  
 tice inherente, que l'Esprit de Dieu  
 forme dans les fideles pour estre le  
 vray merite de l'humilité, d'auec la  
 iustice de la loy par les forces de la  
 nature, qui est le seul merite d'or-  
 gueil. Contre quoy l'Apostre dispu-  
 te, en refutant la presomption de la  
 iustice Pharisaïque.

Les lieux que vous rapponiez de  
 S. Bern. en la page 34. & 35. ne font rié

dauantage pour vous. Vosire iustice imputee n'y comparoist point. L'exclusion des merites que Dieu nous donne, ne s'y trouue point. Ils y sont au contraire formellement establis. Mais i'aduouë que si on violentoit, ce qu'il dit, hors les termes de son intention, pour l'accommoder à la vostre, vous en pourriez induire les mesmes hypotheses contre le sens naïf de la verité de l'Euangile. Tel est ce qu'il dit, *Que les merites des hommes ne sont point tels que la vie eternelle leur soit deuë de droit, que Dieu fist à quelqu'un du tort, s'il ne la luy bailloit pas.* Le droit de la recompense attenduë est fondé en la promesse de Dieu, lequel, selon sa sagesse & sa bonté, a establi la proportion entre la gloire de Christ, & sa souffrance, pour y donner pareille raison au regard des membres que du chef. Afin que tous ceux qui mourront avec luy, vivent avec luy, & que tous ceux qui souffriront avec luy, regnent avec luy. Or selon cette loy la vie eternelle est deuë de droit à tous ceux qui souffrent & meurent avec

Iesus Christ. Quiconque nieroit cette verité, nieroit formellement l'Euangile. Et renuerseroit non seulement la raison de nostre Foy, de nostre esperance, & de nostre confiance aux promesses de Dieu: mais aussi de sa verité & de sa iustice, selon laquelle Dieu a promis de rendre à chacun selon ses œuvres. Quiconque diroit quel'Apostre S. Paul, & tous autres fideles avec luy, qui ont combattu le mesme combat, qui ont paracheué leur course, en gardant la foy & les œuvres du Fils de Dieu, peuuent estre priuez de la vie éternelle, sans qu'on leur fasse tort: Celuy-là cracheroit contre le Ciel, & dementiroit ouvertement cette parole du mesme Apostre, *Que Dieu est fidele & iuste, qui ne mettra point en oub'y le travail de nostre patience.* Il arracheroit de l'ame des fideles la raison pour laquelle ils attendent, avec ioye, l'apparition de la gloire de leur Sauueur, ayans esgard à la remuneration. Mais S. Bernard n'auoit rien de tel en la pensee. Ce qu'il dit à la verité, estant rapporté, non à la cause formelle du mérite que la grace de Dieu

forme en nous, mais à la cause matérielle dont elle le forme. Car le mérite, c'est à dire, la charité, l'amour de Dieu & du prochain, la iustice & la sainteté, au regard de leur cause formelle, sont l'oeuvre du S. Esprit. En ce regard ils sont proportionnez à la gloire qui leur est preparée. Car ils sont l'image du Fils de Dieu sous la Croix, correspondante à l'image, du Fils de Dieu dans la gloire. Mais au regard de leur matiere il n'y a nulle proportion. Car pour cette vie, & pour les biens de cette vie, que nous despoüillons pour l'amour de Dieu, nous sommes reuestus de la gloire, & sommes rendus participans du Royaume de son Fils eternal, Cela excede sans doute, toute proportion. En ce regard, si Dieu ne donnoit point au fidele pour sa recompense vn prix si excellent, il ne luy feroit point de tort. En ce sens ce que dit S. Bernard est fort veritable. Mais cela ne fait rien à la questiō d'entre nous. Tous les Catholiques en sont d'accord. Et la raison qu'il en adioust est l'expression naïue de la doctrine Catholique. *Car afin que ie ne die pas que*

*tous les merites sont dons de Dieu, & qu'ain-  
 si l'homme est plus redevable à Dieu pour  
 eux, que Dieu à l'homme, que sont tous les  
 merites eu esgard à vne si grande gloire.*  
 Certes si nous en considerons la ma-  
 tiere, ils ne sont rien. Mais si nous en  
 considerons la forme: c'est à dire, que  
 d'ennemis de Dieu, en mauuaises œu-  
 ures, il nous a fait ses amis en bon-  
 nes œuures, de pecheurs & addonnez  
 à toutes sortes de vices, il nous a sancti-  
 fiez & rendus iustes: c'est vn don &  
 vn benefice inenarrable. C'est le fon-  
 dement du benefice de sa gloire, de  
 laquelle, en ce faisant, il nous rend  
 dignes. Or pour ce que l'vn & l'au-  
 tre benefice est le don de Dieu, nous  
 sommes entierement redevables à  
 Dieu de tous les deux. Voire plus du  
 premier que du second, Pource qu'au  
 premier la seule grace de Dieu se con-  
 sidere. Au second, la iustice se confide-  
 re avec sa grace. Ce que S. Bernard ad-  
 iouste des paroles de Dauid, qui a eu  
 besoin de dire à Dieu: *Seigneur, n'entre  
 point en iugement avec ton seruiteur,  
 n'appartient point (comme ie vous ay  
 remonstré suffisamment) au iugement*

final, auquel Dieu rendra à chacun selon ses œuvres. Mais au iugement que Dieu exerce en cette vie. Que les fideles refuyoient sous la loy, à cause de la malediction, avant que la Croix de Christ fust manifestee. Sous laquelle les fideles maintenant se resioüissent, & se glorifient, pour le renouuellemēt de l'homme interieur, à mesure que le vieil homme se dechet en eux.

Ce que vous rapportez encore du mesme auteur du 61. Sermon sur le Cantique des Cantiques à son double sens. L'un dont vous abusez, selon le préiugé de vostre opinion. L'autre le veritable, selon l'intention de S. Bernard. *Mon merite c'est la misericorde de Dieu.* Cela est vray au regard de la cause & de l'origine du merite. Mais ce n'est pas que la misericorde de Dieu soit la raison formelle de nostre merite. Les merites qui sont en nous, qui sommes coupables de beaucoup de pechez en toute nostre vie, viennent tous de ce que là où le peché a abondé, la grace a abondé par dessus. Non en nous faisant reputed iustes, sans que nous le

ſoyons, mais en nous rendant de pe-  
cheurs iuſtes.

---

CHAP. XIV.

*Reſponſe aux obiections tirées  
des autoritez de quelques  
Docteurs modernes Catho-  
liques.*

**V**Oſtre dernier rempart, & que  
vous eſtimés, ſans doute, le plus  
fauorable pour voſtre cauſe, eſt le ſou-  
ſtien, que vous en auez recherché dans  
les paroles de quelques Docteurs Ca-  
tholiques. Vous rapportez à ce ſuiet  
du Cardinal Bellarmin liu. 5. de la iu-  
ſtifi. ch. 7. qu'il recognoiſt, qu'à cau-  
ſe de l'incertitude de noſtre propre iuſtice,  
& du peril qu'il y a d'une vaine gloire,  
le plus ſeur eſt de mettre toute ſa fiance en  
la ſeule miſericorde & benignité de Dieu.

A mesme fin vous auez compulsé les tables du Testament du Cardinal Hosius, qui sans point de doute doit estre de grande autorité en cette cause, puis qu'il presidoit au concile de Trente. Et ie m'estonne, que pour donner plus de lustre à vostre argument, vous n'y ayés adiousté l'observation de cette circonstance. Je rapporteray dōc ici, apres vous, la cōfession pour vous y respōdre. *Je confesse, dit-il, parlant à Dieu, que les pechez par lesquels i'ay attiré ton ire sont grieux : mais à la mienne volonté que tu les peses en balance avec les peines que ton innocent Fils a endurées pour moy, & celles-cy peseront beaucoup plus, & se trouueront plus dignes de te faire espandre ta misericorde sur moy, que ceux la de te faire retenir par courroux tes compassions. Je suis indigne d'estre regardé des yeux de ta Maiesté, mais cependant ton fils est tres digne, que non seulement tu me regardes, mais aussi que tu me couronnes à cause du merite de sa passion & de sa mort. Pourtant ie vien à toy, pere tres clement, ie vien à toy, sans aucuns miens merites, mais chargé de l'abondance des*

merites de ton fils , mon seigneur & redempteur Iesus - Christ. Lequel t'ayant par sa mort precieuse satisfait non seulement pour mes pechez , mais aussi pour ceux de tout le monde , ie te presente le merite de cette mort, auquel seul i'ay mis toute mon esperance & confiance. Voici ma iustice, ma satisfaction, ma redemption, ma propitiation, mon merite, c'est la mort de mon Seigneur. Je n'ay pas faute de merite, tandis que le Seigneur des misericordes ne defaudra point. Et si les misericordes de mon Seigneur sont abondantes, mes merites abonderont. Plus il a de vertu pour sauuer, plus ie suis assure. Tu vois donc, pere tres clement, de quels merites estant charge, ie vien à toy, à scauoir de ceux ausquels tu ne peux rien refuser. Et pour fortifier d'auantage la consideration de cete cōfession, vousaez tiré, des œuures du mesme Cardinal, ce qu'il rapporte au cha. 73. de son traitté intitule, *confession Catholique de la foy Chrestienne*, touchant les interrogations & responses faites aux malades en l'extremité, composees par Anselme Euesque de Cantorbery, dont

la dernière estoit. Crois tu que tu ne peux  
estre sauue que par la mort de Iesus Christ.  
Resp. ouy. Alors on luy dit, or sus donc,  
pendant que ton ame est encore au corps,  
mets ta fiance en cette seule mort, n'aye  
fiance en aucune autre chose, remets toy à  
cette mort, courre toy tout d'elle seule.  
Mets toy tout en elle, & t'en enveloppe tout.  
Et si Dieu te veut iuger, di, Seigneur ie  
mets la mort de ton fils nostre Seigneur Ie-  
sus-Christ, entre moy & ton iugement, au-  
trement ie ne débats point avec toy. Et s'il  
te dit que tu es pecheur, di, Seigneur ie  
mets la mort de Iesus-Christ entre toy &  
mes pechez. S'il te dit, que tu as meritè  
la damnation, di, Seigneur i'oppose entre  
toy & mes demerites, la mort de ton fi's, &  
te presente son merite pour celuy que ie de-  
uoy auoir & que ie n'ay pas. S'il te dit qu'il  
est courroucé contre toy, di, Seigneur i'op-  
pose entre ton ire, & moy, la mort de ton fils,  
nostre Seigneur Iesus-Christ.

Sur cela, Monsieur, vous triomphez  
comme d'une cause gagnée, estimant  
me faire voir par là, que vostre creance  
est d'une verité si euidente & si puissante  
dans les consciences, qu'elle se fait aduouer

à ceux là mesmes des docteurs de l'Eglise Romaine, qui auoient entrepris de la combattre. Et que telle est la maniere dont la conscience oblige de chercher à subsister deuant Dieu. Veu que ie ne puis dire qu'il s'agisse en ces lieux de la premiere partie du salut, & du commencement de la conuersiō, en laquelle i'aduoue qu'il n'y a que grace & point d'œuvres & de merites. Il s'agit des fr̃s̃eles mourans & considerans tout le cours de leur sanctification. Pour me dire que la doctrine de nos Eglises, touchant la maniere de la iustification, est d'une lumiere si belle, si euidente, & si necessaire, qu'on ne peut auoir repos à l'heure de la mort qu'en y recourant. Et à cette cause vous estimés que pour proposer la reunion de l'Eglise, il seroit bien plus raisonnable que ie trouuasse à amener à nostre cr̃ance l'Eglise Romaine, que nous à la sienne.

Pour vous satisfaire sur ceci, i'ay trois choses à vous dire, que ie vous représenteray par ordre. La premiere, que c'est bien mal conclu à vous, d'inférer que vostre doctrine soit d'une euidente verité, pource qu'elle se trou-

ueroit conforme au sentiment de la conscience de ceux, qui parlent en mourant, selon les termes des discours cy dessus transcrits. La seconde, que vous employez ce langage contre l'intention des Docteurs, des escrits desquels vous l'auez tiré. La troisieme que la doctrine de l'Euangile, qui est la seule regle de la verité en cette matiere, nous enseigne que le langage des fideles mourans, lesquels se presentent deuant Dieu, pour obtenir la couronne & la recompense de leur trauail, doit estre en autres termes que ceux-ci, que vous auoüés estre conformes à vostre doctrine. Et que le sentiment de la conscience des fideles, qui en leur vie ont cheminé selon l'esprit de Iesus-Christ, sous l'exercice de sa croix; selon la vocation de l'Euangile, est fort different de celuy que ces discours expriment.

Pour le premier, qui vous a dit, que le sentiment de la conscience des hommes soit la regle de la verité. Quand ie vous accorderois, que la conscience du Cardinal Bellarmin luy auroit fait

dire, à cause de l'incertitude de sa propre iustice, qu'il est plus seur de mettre toute sa fiance en la misericorde de Dieu, pour l'attente de la couronne: seroit-ce à dire, pourtant, que ceste maxime fust veritable? Quand ie vous accorderois, que la conscience du Cardinal Hosius, confessant qu'il venoit à Dieu sans aucuns merites, & que les pechez par lesquels il auoit attiré l'ire de Dieu estoient griefs, luy auroit fait cōclure, que Dieu le couronneroit (quoy qu'indigne d'estre regardé de luy) à cause du merite de la passion de son Fils: seroit ce à dire, pourtant que ceste creance fust veritable? Pour ce que tel aura esté le sentiment de leur conscience, dois-je le prendre pour vne loy de l'Euangile? Raisonnant ainsi vous entendez mal quels sont les motifs qui forment en l'homme le sentiment de sa conscience. Le desir d'estre bien-heureux est en la conscience de tout homme. Tout homme encore, par la cognoissance de la loy, quand il se voit miserable, recognoist aussi qu'il est pecheur. Pour mesme raison, le  
besoin

besoin de la misericorde de Dieu, &  
 du pardon des pechez, est du senti-  
 ment commun de la conscience des  
 hommes. C'est delà que procedent  
 toutes les religions que les hommes se  
 forment à eux mesmes, par le senti-  
 ment commun de leur conscience. Il  
 n'y a point d'homme, qui ait quelque  
 sentiment de religion, qui ne recoure  
 à la misericorde de Dieu pardonnant  
 les pechez, afin d'estre bien heureux.  
 C'est delà qu'est prouenuë la cause des  
 sacrifices en toutes religions. Mais la  
 raison de la misericorde de Dieu est  
 comprise bien diuersement par le sen-  
 timent commun de la conscience des  
 hommes: d'auec ce que la lumiere de  
 l'esprit de Dieu nous en a manifesté  
 en l'Euangile de Iesus-Christ nostre  
 Seigneur. Car comme l'homme ne co-  
 gnoist point naturellement la iustice  
 de Dieu, que l'Euangile seul nous a ma-  
 nifestée, qui est d'aimer Dieu plus  
 que soy mesme, & plus que toutes  
 choses, en renonçant à soy mesme, &  
 à toutes choses: aussi veut-il estre bien-  
 heureux sans renoncer à soy mesme

& à toutes choses. Et pourtant il recourt à la miséricorde de Dieu, pour auoir pardon de ses pechez, & pour estre bien-heureux, sans auoir, en la conscience, aucun ressentiment du renoncement à soy mesme, & de la iustice de Dieu. Mais le fidele, instruit en l'Euangile, & qui cōnoist les vrayes raisons de la miséricorde de Dieu, cōme il nous les a manifestées en la Croix de son Fils, recourt à la miséricorde de Dieu, pour estre rendu iuste de la iustice de Dieu, sous l'exercice de la Croix de son Fils par la vertu de son Esprit, suiuant l'esperance de la gloire, & de la felicité eternelle qu'il se propose pour fin, en la vocation à laquelle il est appellé en Iesus Christ. Par là vous entendez, qu'un homme, qui aura vescu toute sa vie dans les delices de peché, selon l'usage de ce monde, & les desirs de la chair: & qui n'aura sceu que c'est de renoncer à soy mesme & au monde, pour aimer Dieu plus que toutes choses, & plus que soy mesme: ne lairra pas de desirer, suiuant le sentiment de sa conscience,

d'estre rendu bien heureux. par la misericorde de Dieu, qui luy pardonne ses pechez. Ce sentiment est veritablement en la conscience de tous les hommes, qui se recognoissent pecheurs & miserables: mais qui ne cognoissent point, & qui n'ont point compris la raison que Dieu nous a manifestée en la Croix de son Fils, pour nous rendre, dans l'exercice d'icelle, iustes & saints par son Esprit, afin qu'en la participation de sa gloire nous soyons eternellement bien-heureux. Vous n'avez donc pas obtenu grand avantage, pour l'autorité de vostre opinion, de ce qu'elle se trouue, en ceste sorte, conforme au sentiment de la conscience des hommes. C'est vn sentiment qui s'accorde fort bien avec la conscience de ceux qui ont vescu toute leur vie selon la chair. Ce sentiment est de la chair, non de l'Esprit de Dieu. C'est la chair qui fait croire à l'homme, ( lequel se sent vuide du merite, & destitué de la iustice que l'Esprit de Dieu forme en l'ame des fideles, qui ont cheminé selon l'Esprit,

sous la Croix de leur Sauueur) que par la misericorde de Dieu il paruiendra à la gloire sans nuls merites. La chair, qui ne comprend point les choses qui sont de Dieu, transfigure aisément, en cette opinion; ce que l'Euangile nous dit de la misericorde de Dieu, & du merite de la mort de Iesus Christ, qui nous a obtenu la remission de nos pechez. Elle fait croire à l'homme, qui vit selon la chair, que l'effet de la misericorde de Dieu en Iesus Christ, est d'imputer son merite à l'homme, pour le reputer iuste, encore qu'il ne le soit pas. Il n'y a mauuais riche qui ne veuille bien volontiers que cette doctrine soit veritable. Elle est puissante veritablement en la conscience de ceux qui sont tels. Mais sa puissance n'est qu'une efficace de seduction. Ceux, que la cōscience oblige de chercher à subsister deuant Dieu en cette maniere, sont en mauuais estat. Si ceux que vous appelez fideles, mourans de la sorte, & considerans tout le cours de leur vie, se trouuent tellemens depourueuz de bonnesœures & de me-

rites : que la misericorde & la grace, que Dieu leur a offerte en la Croix de son Fils, n'ait point produit en eux la premiere partie du salut : l'opinion qu'ils ont, que la misericorde de Dieu, nonobstant leur donnera part à la gloire de Christ, sans auoir communiqué à sa Croix, en patience & en charité, est vne illusion de Satan, qui deçoit miserablement leur conscience. Et vous osez dire apres cela, *Que cette doctrine est d'une lumiere si belle, si euidente, & si necessaire, qu'on ne peut auoir repos, à l'heure de la mort, qu'en y recourant.* le m'assure, qu'ayant maintenant mieux appris, par la lecture de cet es- crit, le sçauoir de Iesus-Christ, & iceluy crucifié, vostre bonne conscience cherchera son repos en la confiance de l'oeuvre du S. Esprit. En la sainteté & en la iustice de l'homme nouveau, créé selon l'Image de I. C. Qui est l'arrhe de l'heritage, & le seau de l'adoption des fideles imprimé en l'ame de tous ceux qui viuans selon l'Esprit sont remplis de iustice, de paix, & de ioye, qui est le Royuume de Dieu.

en eux, lesquels apres s'estre resiouis & glorifiez de la communion des afflictions de Christ & de sa mort, estans dans la mort se glorifient en Dieu, comme en celuy, de la main duquel, iuste iuge, ils attendent la Couronne de iustice.

Ce que i'ay à vous remonstrer, en second lieu, est, que vous employez les discours cy dessus transcrits contre l'intention de leurs auteurs, pour donner autorité à vostre doctrine. Quand le Cardinal Bellarmin escrit, *que pour l'incertitude de nostre propre iustice, & du peril qu'il y a d'une vaine gloire, le plus seur est de mettre toute sa fiance en la seule misericorde & benignté de Dieu*, il considere l'estat imparfait de la regeneration de plusieurs, lesquels il aduertit de prendre garde à ne presumer pas de l'aduancement de leur iustice encore foible, & d'une subsistance incertaine. De peur que telle securité ne les face tomber au peril d'une vaine gloire. Et pourtant il leur donne vn enseignement tres-salutaire, qu'ils n'ayent autre confiance de pouoir

croistre, ou demeurer fermes en ce à quoy ils sont paruenus, que par la seule misericorde de Dieu. Or comme nous auons besoin continuellement de la grace de Dieu, & de recourir, necessairement, au throne de sa misericorde, afin qu'il accomplisse iusques à la fin, le bon œuure qu'il a commencé en nous, pour nostre sanctification: aussi, en quelque estat & en quelque tēps que nous soyons, nous deuons tousiours auoir confiance, que Dieu est puissant de ce faire. Et pourtant, quelque defaut que nous sentions en nous, nous ne deuons iamais desister, par desespoir. de recourir à sa grace, afin d'estre deliurez de la seruitude du peché, sous le fardeau duquel nous nous sentons pressez & gemissons. Car, en cette confiance, recourans, par obeissance de foy, à la Croix du Seigneur, il est indubitable que son Esprit formera lors en nous cette parfaicte iustice & saincteté de l'amour de Dieu sur toutes choses, que nous sentions defaillir en nous. Voire fussions nous au dernier periode de nostre vie, & en l'extremité de l'agonie de

la mort. Qui est le temps & la condition, où la grace salutaire de l'esprit de Christ, rencontrant le fidele dans le sentiment le plus vif de la croix, produit aussi plus abondamment l'effet de sa vertu. Or comme le fidele doit toujours avoir cette confiance en la grace & misericorde de Dieu : aussi pour quelque aduancement ou perfection de sa course, en laquelle il soit parvenu, par l'experience que Dieu luy ait donnee de la victoire de sa foy : il ne doit iamais desister de recourir à la mesme source de grace, pour la perseuerance, affermissement, & accomplissement de sa course, & de son combat. Tant qu'il soit parvenu à la station, en laquelle ayant depose, entre les mains de Dieu, son deposit, il attendra en repos, en paix, & en ioye, la couronne d'immortalité qui luy est reservee. C'est le sens auquel doit estre rapportee la raison de ce qu'a voulu dire le Cardinal Bellarmin, que nostre seureté consiste au recours que nous devons auoir à la misericorde de Dieu, pour l'incertitude de nostre propre iustice, & pour euiuer le peril de la securité & de

la vaine confiance. Cela, dis-je, doit estre entendu au regard de l'effect que produit en nous la grace, en cette vie, mais nō pour la recompēse du prix que nous deuons attendre en l'autre. Car si ses paroles estoient rapportees à la confiance de la remuneration, en sorte qu'il eust voulu par là induire le fidele à se confier, nonobstāt le defect & l'incertitude de sa iustice, d'obtenir la couronne: j'aduouē, que ce seroit vostre doctrine pour ce regard. Et que par ce moyen Bellarmin auroit donné lieu de renuerfer par cette hypothese, tout ce qu'il a establi de plus ferme pour la iustification par la iustice inherente. Mais quand cela seroit, vous n'en recueilliez autre chose, sinō qu'il auroit meslé, en ce faisant, vne contradiction entre ses maximes. Ce qui ne seroit rien pour autoriser vostre creance contre la doctrine Catholique, qu'il a fort amplement defendue. Ioint, qu'en la consideration de ces paroles, vous omettez encore vne des principales obseruations pour l'intention de leur auteur. Car il est certain, que luy & plusieurs

autres Docteurs de l'eschole, defendans bien & veritablement la doctrine Catholique, touchant la iustification par la vraye iustice inherente, n'en ont pas pourtant representé les raisons les plus certaines & essentielles, lesquelles consistent en la declaration des causes de la vraye iustice, qui sont l'efficace de la Croix, & de l'esprit de Iesus Christ, ainsi que ie vous les ay representees en tout ce traitté. Par faute de considerer ainsi les causes de la vraye iustice, que nous obtenons en la communion de Iesus Christ, il arriue, qu'on ne reconnoist pas l'vniformité de l'habitude de iustice, qui est de necessité, par ce moyen, en tous les vrais fideles, encore que les actes en soient differens, selon la differente vocation à laquelle ils sont appelez, par où leur lumiere est aussi differente en l'Eglise. Establissant donc vne differente habitude de iustice entre les fideles, & supposant, par ce moyen, que les vns parviennent à la parfaite habitude de iustice, à laquelle Dieu a promis la recompense de la couronne, & que d'autres n'y parviennent pas: ils tombent, en ce faisant, dans la

necessite de recourir au regard de ceux  
 qui se trouuent coulpables de ce man-  
 quement, à les confirmer en l'esper de  
 la vie eternelle, par l'interuention de la  
 seule misericorde de Dieu. Et toutes-  
 fois, cela n'establit pas, selon le sen-  
 timent de ces Docteurs, vne confor-  
 mité d'opinion avec la vostre. Pour  
 ce que ces mesmes Docteurs rele-  
 guent ceux, qui se trouuent ainsi defe-  
 ctueux, aux peines de Purgatoire, dans  
 lesquelles leurs pechez seront expiez,  
 par l'aide des suffrages de l'Eglise, in-  
 tercedant enuers la misericorde de  
 Dieu, pour la remission de leurs pé-  
 chez. Mais tous les Chrestiens, qui  
 chemineront ici bas, sous la Croix du  
 Seigneur Iesus par son Esprit, & qui  
 mortifians, par iceluy, les faits du corps  
 aurôt acquis l'habitude de vraye iustice  
 & sainteté c. à. d. l'amour de Dieu sur  
 toutes choses, & la dilection frater-  
 nelle: pourront s'asseurer, (par l'adueu  
 de tous les Catholiques) que, comme  
 Dieu a fait ce bon ceuvre en eux par sa  
 grace, il le couronnera aussi, en la vie fu-  
 ture, de la gloire immortelle. Sans qu'ils  
 experimentent autres peines, ny autre

purgatoire que celuy du sang de Iesus Christ, par lequel toutes les peines de la vie presente nous ont esté consacrees en sa Croix, & y ont receu la vertu de mortifier le peché en tous ceux qui l'embrassent avec vraye obeissance de foy. Car tous ceux qui passent ici bas par ce Purgatoire, n'en trouuent plus d'autre, & n'en ont pas besoin. Et reciproquement, tous ceux qui n'esprouuent point en eux la vertu de la Croix de Iesus Christ, en cette vie, à mortifier le peché, & qui auront foulé aux pieds cette S. Croix, dans la bouë des delices de ce monde, n'auront point de part à sa gloire, & ne trouueront point de Purgatoire apres cette vie, qui les laue, & les en rende dignes.

Ce que vous rapportez du Cardinal Hosius, soit de son testament, soit des interrogations des malades, n'est pas moins employé contre l'intention de son auteur. Et certes, celuy qui presidoit au Concile de Trente, qui non seulement a signé de sa main, mais vray semblablement mesme a composé le decret, & les definitions par

où la doctrine Catholique de la iustification a esté confirmée & expliquée, l'aura-il renuersée par ses escrits ? Si vous les auez leus, vous deuez sçauoir le contraire. Car en ce mesme traitté de la confession Catholique de la foy Chrestienne, vous sçauetz, si vous l'auetz leu, qu'il a traitté cette doctrine, & refuté celle de nos reformateurs de propos deliberé, & bien pertinemment, depuis le chap. 61. Et en ce mesme chapitre 73. d'où vous auez extrait ce qu'il rapporte d'Anselme des interrogations faites aux malades, il refute expressement les lieux que nos Docteurs employent de l'Ecriture, pour arguments contre les merites des bonnes ceuures faites par la grace de Iesus Christ donnee aux fideles, soit quand il est dit: *que les souffrances du temps present ne sont pas dignes d'estre pesees avec la gloire, qui doit estre reuelez en nous. Ou, que les iustices de l'homme sont comme les drappeaux souilleez des fleurs des femmes, & qu'il n'y a nul qui face bien. Ou, que nul uiuant ne sera iustifié en la presence de Dieu.* Car apres auoir representé l'opi-

nion de l'Eglise naïuement, touchant les merites des fideles: il respond en suite aux argumens tirez de ces lieux, & en donne la solution. Premièrement, quant aux merites de nos œuures, il vous dit sommairement qu'il dépend de deux causes. L'une de la promesse liberale de Dieu, de qui la bonté a esté si grande, qu'il a voulu reputed dignes du prix de la beatitude eternelle les œuures qui n'en sont pas dignes en elles-mêmes. L'autre de la dignité que Dieu nous donne, quand par sa grace nous reueſtons Christ, que nous sommes faicts ses enfans, que Christ opere en nous par son Esprit, que Christ merite en nous. Apres auoir expliqué & confirmé suffisamment ceste verité, il respond aux argumens induits des lieux alleguez de l'Eſcriture. Et premierement sur le passage de l'Apostre, il dit, que nos souffrances ne sont pas à comparer avec la gloire, au regard de leur substance & de leur matiere. Au regard des choses que nous perdons, & auxquelles nous renonçons. Mais au regard de ce que l'esprit de Dieu forme en nos cœurs

où la patience, où la charité, qui est en nos œuvres (ce qui fait que nostre volonté au bien, par ce moyen, est immuable & éternelle) en ce regard nos œuvres peuvent estre comparées avec le prix de la beatitude qui est éternelle. Aux paroles des Prophètes, qui accusent l'injustice des hommes, il respond, qu'elles sont veritables, & s'entendent de ce que les hommes sont en eux mesmes de leur nature : mais non de ceux que Dieu, par la grace de son fils, a regénérés & sanctifiés. Quant à ce que dit David, que nul vivant ne sera justifié devant Dieu, c'est l'endroit en la solution duquel il rapporte ces interrogations d'Anselme par vous alleguées. Et par sa response, il apparoitra combien vous les employez contre son intention, en les induisant contre les merites des bonnes œuvres des fideles, & pour les exclure. Car, sur ce lieu, il respond notamment par vne distinction de Gerson, qu'autre est la maniere, dont le fidele respond à Satan, qui tâche de raualler l'estime des œuvres que Dieu fait en nous, & de leur oster

tout merite, pour nous rendre lasches  
 à bien faire. Et qu'autre est la maniere  
 dont nous traittons avec Dieu, lors que  
 nous deuons comparoir en la presence  
 de sa diuine Maieité. Car alors, dit-il,  
 avec le S. Abraham, nous nous reco-  
 gnoissons poudre & cendre, & faisons  
 profession d'estre pecheurs tres misera-  
 bles & dignes de toute sorte de sup-  
 plices, & avec la plus grande sommis-  
 sion d'esprit qu'il nous est possible,  
 nous luy demandons pardon. C'est à  
 ce propos; qu'il rapporte les interroga-  
 tions qui sont attribuées à Anselme.  
 Mais neantmoins, outre cette maniere,  
 dont il represente les fideles compa-  
 roissans en la presence de Dieu, pour  
 demander pardon de leurs fautes, il  
 adioust, qu'on peut aussi rapporter les  
 exemples d'autres saincts, lesquels,  
 estans proches de la mort, ont tesmoi-  
 gné qu'ils ne se desioient point de  
 leurs oeures. Et il rapporte là dessus  
 l'exemple du Roy Ezechias, qui prie  
 Dieu de se souuenir qu'il a cheminé  
 deuant luy en verité, d'un cœur par-  
 fait, & qu'il a fait ce qui estoit bon de-  
 uant

uant les yeux. Et que S. Paul encore, avec vne plus grande confiance, estant sur le point de son depart, dit, *J'ay combattu le bon combat; j'ay paracheué la course, j'ay gardé la foy, au surplus la couronne de iustice m'est reseruee, laquelle me rendra le Seigneur le iuste iuge.* Par où vous voyez, quelé Cardinal Hosius n'a nullemēt creu, ny eu intention de faire croire, que ce que les fideles moutans doiuent auoir recours au Throne de la misericorde de Dieu, & à la confession de leurs fautes, soit pour destruire la raison de la confiance qu'ils doiuent auoir aux bonnes œuures, & aux bons merites, que la grace de Dieu a formés en eux. Et ausquels il attendent, suiuant l'immuable verité des promesses de Dieu, la retribution de la gloire. Et encores moins pour faire croire, comme vous dittes, que la maniere dont la conscience oblige le fidele à subsister deuant Dieu, soit la iustice imputée de Iesus-Christ, ou la seule remission des pechez, sans nulles œuures & sans nuls merites.

Mais ce qui vous auroit deu mieux

Mmm

faire comprendre l'intention du Cardinal Hosius, est digne de vous estre remonstré; & d'estre transcript ici de ses paroles. Par où vous verrez quel est ce mouuement de conscience, en ceux, qui, sans nuls merites, recourent à la fiance de la seule misericorde de Dieu, pour obtenir la felicité eternelle, & d'où procede en eux vn tel mouuement. Car apres auoir remonstré, par les exéples des saincts par luy mentionnez, que les fideles mourans peuuent se confier deuant Dieu sur les bonnes œuures, que sa grace a fait en eux, il adiouste, pour raison d'en excepter ceux qui ne peuuent auoir vne telle cōfiance. *Mais on est celuy d'entre tous les hommes, qu'on puisse trouver, sur tout en ce temps, où l'iniquité a abondé, & où la charité de plusieurs est refroidie, qui ait passé sa vie en telle sorte, qu'il puisse parler aussi confidemment que ceux-là, lors qu'il sortira de l'hostellerie de ce corps pour entrer en la maison eternelle? Certes, telle est la cause pour laquelle la vraye iustice, la vraye saincteté, & les œuures qui en dependent, sont mesconneuës en qua-*

lité de merites, ausquels la recompense de la gloire doive estre renduë. C'est pour ce que la iustice, qui s'engendre, & qui s'exerce sous la Croix du Seigneur & par son esprit, c'est à dire la vie vraiment Chrestienne selon pieté, en humilité, en patience, en charité, en pureté, est comme incogneuë, & ses raisons moins entendues & moins pratiquées, depuis la corruption que l'avarice & l'ambition ont introduites en l'Eglise. Mais, ie vous prie, si ceux qui ne cheminent point selon l'esprit, & qui par consequent ne peuuent auoir, enuers Dieu, ce sentiment de conscience, que l'escriture appelle τὴν πεποίθησιν, τὴν παρρησίαν, τὸ χάρισμα ἡμῶν, *nostre confiance, nostre assurance, nostre gloire*, telle qu'ont eu les Apostres, & leurs disciples, & tous les vrais Chrestiens, qui ont mené vne vie vraiment Euangelique; si ceux, di ie, qui ne sont point tels, cherchent d'autres raisons mieux accommodées au sentiment de leur conscience, pour se promettre la vie eternelle sans nul merites, sans auoir vaincu, & sans auoir gar-

de les œuvres de Christ : est ce à dire que le sentiment de leur conscience soit la regle de l'Euangile? Quoy donc, la corruption des hommes, & la peruersité du siècle, auront elles chagé le decret de Dieu, & la loy de l'Eglise? Non, non Iesus Christ est hier, & aujour d'huy, & à tousiours le mesme. Il n'y a salut qu'en sa communion, que pour ceux, qui, sous sa Croix, cheminent selon son esprit en iustice & vraye sainteté. Ceux là seuls, qui auront gardé la foy operante par charité, & les œuvres de Christ, ceux là seuls, qui auront vaincu, dans le bon combat, le monde, la chair, le peché, & le diable, seront couronnés. Pour tous ceux, qui, par leur dureté, n'auront point ici bas receu en eux mesmes ce fruit de la misericorde, & de la grace de Dieu en Iesus Christ, il n'y a plus de misericorde, ny de grace à attēdre en la vie future. Toute confiance en est vaine & trompeuse.

*Si nostre cœur nous condamne, Dieu certes est plus grand que nostre cœur, Et cognoist toutes choses. Si nostre cœur ne nous condamne point, nous auons assurance en*

uers Dieu. 1. Ioh. 2. 20. 21. Il n'y a point d'autre veritable assurance. Et pourtant toute vostre doctrine, qui foment, en la conscience des hommes, viuās encore selon la chair, & non selon l'esprit, cette vaine confiance de la misericorde de Dieu, qui doieue, en la retribution, leur imputer, pour couuerture de leurs defauts, la iustice de Christ, est vne doctrine de la chair, & non de l'Esprit de Dieu. Et ie vous confesse franchement, que le Cardinal Hosius, semble auoir voulu accommoder, avec vous, les maximes de la religion Chrestienne, en cette partie, à l'estat de la conscience des hommes, selon la maniere de laquelle on vit aujourd'huy dans la Chrestienté, où à grand peine peut on recognoistre, en la plus part, vne trace de l'ancienne charité, patience, de bonnairété, & vertu Chrestienne. Et à cesuiet, il dit en suite, que le plus seur est d'auoir peur de nos oeures, & que ce n'est pas sans cause qu'on a tousiours veu observer en l'Eglise Catholique que ceux qui sont proches de la mort soient diligemment admonestés, mesme ayant de-

uant leurs yeux l'image de Christ crucifié, que se desiant de leur propre iustice, ils colloquent toute leur esperance & confiance en la seule iustice de Christ, qu'ils la representent au Pere celeste, & qu'ils s'appuyent sur elle seule. Mais ie vous di, que si, en ces paroles, le Cardinal Hosius a entendu, par la iustice de Christ, celle que Iesus-Christ a eüe en luy-mesme, & non celle que les fideles ont par son esprit en sa communion: c'est à dire, qu'il ait entendu la propre iustice de Christ imputée, & non la communication de la iustice inherente, de laquelle nous luy sommes rendus conformes par son esprit: il n'a point compris, ny exprimé selon verité, l'intention de l'Eglise Catholique. Car l'institution d'admonester ceux qui meürét, avec la presence du crucifix, de mettre leur fiance en la seule iustice de Christ, est pour les instruire, & pour leur rememorer, que la seule iustice que Dieu a agreable & qu'il couronnera de sa gloire, est celle que nous auons obtenüe, & que nous obtenons, en la communion des souffrances, & de la

mort de son fils. En renonçant tellement à nous mesmes, & à ce present monde, & à tous les desirs de la chair, que tout nostre plaisir soit de viure & de mourir au Seigneur, souffrans & mourans avec luy. Et pourtant, les Chrestiens ont esté de tout temps enseignez en l'Eglise, de se munir de la Croix de leur Seigneur, non seulement en mourant, mais chaque iour, en toutes les actions qu'ils faisoient en la vie, comme nous l'apprenons, entre autres, du tesmoignage de Tertull. Ce qui se faisoit, afin que les fideles fussent sans cesse aduertis de ne rien faire qui ne se rapportast à la fin de leur mortification, à laquelle ils sont appelez en la communion de Iesus-Christ? En sorte que viuans selon l'esprit, dans le crucifiement de leur chair, la vraye iustice & saincteté agreable à Dieu, qui est appelée la iustice de Christ, à cause qu'il nous la donne, reluisist en toutes leurs œuures. Or c'est en cette seule iustice de Christ, que tous les fideles, & viuans & mourans, doiuent auoir leur confiance, & particulièrement

en la mort. Afin que comme, c'est le temps, où se doit consommer en eux la course, & le combat de la foy, pour mourir constamment au Seigneur: si iusques alors ils n'auoient acquis la pleine habitude de iustice, de ceux qui viuans comme morts au monde, aiment mieux Dieu qu'eux mesmes & toutes choses, ils y paruiennent en ce dernier acte. Or cette vraye iustice est tres-bien opposée à nostre propre iustice, pour discerner les œuvres qui sont faites selon le mouuement de la chair, de celles qui sont faites par l'esprit, en la mortification du Seigneur Iesus, qui sont les vrayes œuvres d'humilité, de patience, & de charité, desquelles nous ne nous glorifions point en nous mesmes, mais en Dieu seul, qui en est autheur en nous par son esprit. A quoy aussi il semble bien que le Cardinal Hosius reuient en suite, & que c'est à ce sens qu'il rapporte la iustice de Christ dont il parle, opposée à nostre propre iustice, quand il adioust, *Car ainsi il aduiendra que nous fuirons toute vaine*

gloire, lors que nous recognoistrions, par nostre profession, que Iesus Christ est le principal auteur & consommateur de nostre iustice, & que nous requerrons que ses merites nous soient d'abondant appliquez, pour surmonter les tentations qui se presentent. Et pourtant tout ce qu'il rapporte, en suite du liure intitulé *Hortulus animæ*, & du Sacérdotal Romain, conforme aux interrogations d'Anselme (& qu'il vous souuient que Monsieur le Faucheur, il n'y a pas long temps, rapporta dans vn de ses Presches, avec vn grand esclat, comme vne victoire gaignee contre la doctrine des merites) n'est veritable; qu'estant entendu au sens auquel ie vous remonstre qu'on le doit prendre. Car l'interrogation est, *Crois-tu paruenir à la gloire, non par tes propres merites, mais par la vertu & par le merite de Iesus Christ?* Le malade respond, *Ie le croy.* Derechef, *Crois-tu pas que nostre Seigneur Iesus Christ soit mort pour nostre salut, & que nul ne peut estre sauué par ses propres merites, ou par autre moyen que par la passion d'iceluy?* Le malade respond, *Ie le croy.* Tout cela est tres-

vray, & fondamental de la Foy Chrestienne, mais en telle sorte que l'opposition de nos propres merites à la vertu & au merite de la passion de Iesus Christ, qui nous sauue, & nous fait paruenir à la gloire, soit entendue au sens que *nos propres merites* sont ainsi appelez, comme procedans de nous-mesmes, & des forces de nostre nature. Et que la vertu de la mort de Christ soit entendue, comme celle qui, par sa communion, forme en nous la vraye iustice de patience & de charité, qui nous rend capables & dignes de la gloire. Mais certainement les dernieres admonitions de ce formulaire, ne sont point conformes aux vrayes, naïues, & efficaceuses consolations, qui doiuent estre donnees & suggerees à la conscience des fideles, mourans en la Communion du Seigneur. Car premierement quand le Prestre propose au fidele, *Si le Seigneur Dieu te veut iuger selon tes pechez.* Certe parole n'est point conforme à la cognoissance qui doit estre dōnee au fidele de la grace de Dieu en Iesus Christ. Veu que la premiere parole de la grace

est, que Dieu ne iugera, selon ses pechez, aucuns de ceux, lesquels ayans creu au nom de Iesus, & par l'obeissance de cette foy, ayans embrassé la communion de sa mort, auront par son esprit mortifié les faicts du corps. Car la parole de l'Euangile nous dit expressement, *qu'il n'y a nulle condamnation pour ceux qui en cette sorte sont en Iesus Christ, qui ne cheminent point selon la chair, mais selon l'esprit.* Aussi ne s'accorde non plus avec les raisons de l'Euangile, ce que le Prestre met en la bouche du malade, s'il n'est commodement interpreté, quand il luy fait dire, *Seigneur Dieu, ie mets la mort de nostre Seigneur Iesus Christ entre moy & ton iugement.* Car ce n'est pas le fidele qui l'y met. C'est Dieu luy-mesme qui l'y a mise, quand il a donné son fils à la mort pour nous, lors que nous estions mesmes ses ennemis en nos entendemens en mauuaises œuures, afin de nous faire ses amis, & ses enfans, en la communion de son Fils. Que si le fidele peut estre dit mettre la mort de Christ entre foy-mesme & le iugement de Dieu, c'est lors qu'il embrasse la Communion de

cette mort, pour mourir volontairement avec luy. C'est lors, comme parlent les interrogations d'Anselme, que le fidele, & en sa vie & en sa mort, se couvre tout de la mort de Christ, se met tout en elle, s'en enveloppe tout, non pour luy servir seulement de couverture à ses pechez precedens: mais pour le reuestrir du nouuel homme, creé en iustice & vraye sainteté. Car c'est ainsi, & pour cette fin, que nous nous enveloppons, en mourant, de la mort de Christ, en laquelle nous auons esté enseuelis avec luy au Baptisme, pour mortifier le péché en nous. Ce qui est pleinement accompli quand le fidele meurt au Seigneur. Or tous ceux qui meurent ainsi, ont en eux le vray merite, la vraye iustice, le vray amour de Dieu espandu en leurs cœurs par le S. Esprit. C'est pourquoy cette dernière clause, que le formulaire fait dire au malade, est selon vostre sens, incompatible avec le sentiment de la conscience du fidele, rempli de l'amour de Dieu en Iesus Christ. *Et combien que j'aye mérité la mort éternelle pour mes pechez, j'interpose tou-*

















faict, par sa mort, pour les pechez de ce pecheur, & pour ceux de tout le monde. Et luy mesme a offert sa mort à Dieu son Pere pour eux, & nul ne la luy peut offrir, en satisfaction & propitiation, que luy seul. Mais quād les fideles presentent à Dieu cette mesme mort, au sacrifice de l'Eglise, c'est pour l'effect de la communion qu'ils ont à icelle, & pour le fruit de sa propitiation, afin que leur ame soit sanctifiée par son esprit. Quiconque presente autrement à Dieu la mort de son fils, & sans cōmunier à icelle, ne sçait que c'est de l'Evangile, ny à quoy se rapporte l'application faite aux fideles de la mort de Christ, au sacrifice de l'Eglise. Ainsi quand l'Auther de ce testament dit, *que la mort de Christ est sa satisfaction, sa redemption, & sa propitiation*, il dit vray simplement & absolument. Car elle l'est de tous les pecheurs du monde. Mais quand il dit, *qu'elle est sa iustice & son merite*, si ce n'est qu'il entende qu'elle est la cause de la iustice, & du merite, que l'esprit de Christ

a mis en luy, il n'entend pas mesme ce  
 qu'il veut dire. Et de fait ils s'abuse tout  
 à plein, quand il dit, qu'il n'a pas faute  
 de merite, tandis que la misericorde de  
 Dieu ne defaut point, & que si la miseri-  
 corde de Dieu abonde ses merites abonde-  
 ront. Si ce n'est qu'on entende que la  
 misericorde de Dieu & sa grace abon-  
 dât où le peché a abondé, elle y forme-  
 ra la iustice & le merite. Mais ce n'est  
 pas ainsi que vous le voulez entendre.  
 En somme, au sens auquel vous prenez  
 toutes ces paroles, & selon la fin pour  
 laquelle vous les alleguez, celuy qui  
 parle ainsi à Dieu se feint vn Euangile  
 tout autre que celuy de Iesus Christ.  
 De qui la grace n'est apparüe qu'afin  
 que ceux qui sont appellés à sa com-  
 munion, pour estre coheritiers de sa  
 gloire, renoncent à toutes mauuaises  
 conuoitises, & viuent, en ce siecle, so-  
 brement, iustement & religieusement.  
 Mais que nul ne presume, qu'ayant  
 mesprisé cette sainte vocation, il  
 puisse venir à Dieu sans nuls merites,  
 & se faire accroire neantmoins, qu'il  
 y vient chargé des merites de Christ.

ausquels Dieu ne peut rien refuser. Car nul n'aura part à la gloire que les merites de Christ ont acquise, qui n'aura eu communion à ses merites, & qui, par patience à bien faire, n'aura cherché la gloire, l'honneur & l'immortalité.

Or puis qu'il vous a semblé bon de defendre ainsi vostre cause, par l'autorité du Testament du Cardinal Hosius, interpreté mesme contre l'intention de son Auteur. Et que de là vous auez creu vous élever vn notable trophée, ie croy maintenant que l'espreu-  
 tie du feu de la verité, par où ie vien de l'examiner, ne vous y laisse à voir que les funerailles de vostre opinion, d'une iustice imputée qui face rep-  
 ter iustes deuant Dieu, ceux qui ne le sont point en eux mesmes. Mais ie vous veux bien représenter vne au-  
 tre maniere, selon laquelle les fide-  
 les, lauez, sanctifiés, & iustificés par le sang de Iesus-Christ & par son esprit comparoistront avec assurance de-  
 uant Dieu, sur la confiance des vrais merites que sa grace a formez en eux.

I'opposeray, pour cét effect, à vostre Testament & à toutes vos interrogations & formulaires, lestables de la dernière & eternelle disposition de l'Apostre S. Paul. Où vous verrez vn instrument autentique du veritable sentiment de la conscience des fideles & vray Chrestiens, regenez par l'esprit du Seigneur Iesus. Vous verrez, comme il y confesse, auant toutes choses, son indignité, sa misere, sa peruersité & sa perdition naturelle. Comme il y celebre la misericorde de Dieu en Iesus Christ, pour la seule cause de son salut. Comme il y magnifie la vertu de sa grace, & l'excellence de l'effect qu'elle a produit en luy, en le regenerant & sanctifiant. Comme il y publie l'abondance de ses bonnes œuures, & des fruits de iustice, que Iesus Christ a fait en luy, en l'exercice de sa vocation, en laquelle il a esté appelé. Comme il se resioiit en la confiance de la remuneration, qu'il espere deuoir estre renduë aux traualx & aux combats, & à tous les exercices de sa foy, de sa patience, & de sa charité. Et

finalement comme il encourage tous ceux qu'il enseigne à l'imiter & à courir la mesme carriere, pour obtenir la mesme couronne. Voici donc comme il parle.

Paul Apostre, non point de par les hommes, ny par homme, mais par Iesus Christ, & par Dieu le pere, qui l'a resuscité des morts. Separé pour annoncer son Euangile entre les gentils. Je flechi les genouils deuant nostre Dieu & pere de Iesus Christ nostre Seigneur (de qui procede toute raison d'appeller Dieu nostre Pere au Ciel & en terre.) Et ie luy ren graces, en toutes mes prieres & supplications, de ce qu'ayant esté enfant d'ire de ma nature, comme les autres, mort en mes fautes & pechez, ausquels i'ay conuersé iadis selon les conuoitises de ma chair, faisant les desirs de la chair & de ses pensées, estant auparauât vn blasphemateur, persecuteur & oppresseur, & le premier des pecheurs, comme vn auorton, indigne d'estre appelé Apostre, qui ay persecuté l'Egli-

de Dieu. Neantmoins, Dieu, qui est  
 riche en misericorde, & Iesus Christ  
 son fils, qui est venu au monde pour  
 sauuer les pecheurs, voulant monstrier  
 en moy sa toute patience, afin que ie  
 seruisse d'exemplaire à ceux qui croi-  
 roient en luy, pour auoir vie eternelle,  
 m'a sauué, & m'a transporté au royaume  
 de sa merueilleuse lumiere, non  
 point par aucunes ceuures de iustice  
 que i'eusse faittes, mais par le lauement  
 de regeneration & par le renouelle-  
 ment du S. Esprit, de qui il a fait abon-  
 der en moy la grace, avec la foy, & la  
 charité qui est en Iesus Christ. Tel-  
 lement que par la grace, qui n'à point  
 esté vaine en moy, ie suis ce que ie  
 suis. Ayant esté fait ministre de cette  
 grace selon la dispensation de Dieu, qui  
 m'a esté donnée pour faire l'accomplis-  
 sement du mystere, lequel ayant esté  
 caché en tous les siecles & aages, a esté  
 maintenant manifesté à ses saincts.  
 L'excelléce de la cognoissance duquel  
 est si grande, que i'ay reputé pour elle,  
 & pour l'amour de Christ, tous les ad-  
 uantages que j'auois selon la chair, & la

iustice mesme, en laquelle ie uiuois  
 sans reproche selō la loy, m'estre dom-  
 mage, & ie les ay tenus comme rien-  
 te, afin de gagner Christ. Et afin d'estre  
 trouuē en luy, ayant, non point ma iu-  
 stice qui est par la loy, mais la iustice de  
 Dieu, qui est par la foy de Iesus Chr. en  
 tous ceux, qui cognoissans la vertu de  
 sa resurrection en la communion de  
 ses souffrances, sont faits conformes à  
 sa mort. Qui est la voye par où ie che-  
 mine, afin de paruenir à la resurre-  
 ction des morts, poursuuiuant conti-  
 nuellement pour apprehender le prix,  
 & pour estre rendu accompli, en met-  
 tant hors de ma veue les choses qui  
 sont en arriere, & en m'estendant de  
 toute ma roideur vers celles qui sont  
 en auant, pour atteindre le but & le  
 prix de la supernelle vocation de Dieu  
 en Iesus Christ. Le cour de la sorte,  
 non sans sçauoir comment, afin d'ob-  
 tenir vne couronne incorruptible. Et  
 ie luitte, non seulement contre la chair  
 & contre le sang, mais contre les prin-  
 cipautez & les puissances de ce siecle,  
 non point comme battant l'air, mais

en telle sorte, que ie ne fois point trou-  
 ué moy mesme reprouué, apres auoir  
 presché aux autres. Et pourtāt, ie mor-  
 tifie mon corps, & le reduy en serui-  
 tude sous la croix de Iesus Christ mon  
 Sauueur, par laquelle le monde m'est  
 crucifié & moy au monde. Et en la-  
 quelle seule ie me glorifie parmy tou-  
 tes les infirmités dont ie suis conti-  
 nuellement exercé, en travaux abon-  
 damment, en playes excessiuelement, en  
 prisons tant & plus, en morts souuen-  
 tesfois, par cinq fois fouetté par les  
 Iuifs, trois fois par les Magistrats Ro-  
 mains, vne fois lapidé, trois fois en  
 naufrage, en voyages souuent, en dan-  
 gers de toutes sortes, en peine, & en  
 fatigue, en veilles, en faim, en soif,  
 en ieusnes, en froidures, & en nudité.  
 Aimant mieux me subuenir par le tra-  
 uail de mes propres mains, & à ceux  
 qui sont avec moy, que d'vser de la  
 puissance que i'aurois d'eriger ma sub-  
 uention des Eglises, afin de donner  
 exemple à ceux qui viendront apres  
 moy de faire le semblable, & de ne  
 prescher iamais l'Euangile pour pre-

texte de flatterie, ou d'avarice, me-  
 moratif du dire du Seigneur, que c'est  
 chose plus heureuse de donner que de  
 recevoir. Ainsi ie parachene ce qui me  
 reste à endurer des souffrances de  
 Christ pour son corps qui est l'Eglise.  
 Et maintenant ie voy, que le temps  
 de mon delogement approche. Or  
 comme Christ, & l'accomplissement  
 de son regne, a esté le seul sujet de me  
 faire trouver la vie bonne: la mort  
 m'est aujourdhuy beaucoup plus pro-  
 fitable & meilleure, pour estre avec  
 Christ. Je me resioüy d'oc & me cōioüy  
 avec tous les saints, qui s'en doiuent  
 resioüir avec moy, de ce que ie n'ay  
 point couru en vain, ny travaillé en  
 vain, mais i'ay tout sujet de me glo-  
 rifier en Christ enuers Dieu, de ce qu'à  
 peine oserois-je dire ce qu'il a fait par  
 moy par parole, & par œuvre, pour  
 l'obeyssance des gentils, par la vertu  
 des signes & des miracles, & par la ver-  
 tu de l'Esprit de Dieu. Si bien que i'ay  
 fait abonder l'Euangile, depuis Ierusa-  
 lem iusques en Illyrie, sans auoir edifié  
 sur le fondement d'autrui, & mesmes

„ en fin iusques dans Rome. Où estant à  
 „ present apres que mes liens y ont esté  
 „ rendus celebres pour l'auancement de  
 „ l'Euangile, & qu'ils en ont affermy plu-  
 „ sieurs, & les ont enhardis d'en faire sâs  
 „ crainte profession ouuerte, & de l'an-  
 „ noncer: voyât accôplie de la sorte l'es-  
 „ perâce en laquelle ie me suis tousiours  
 „ confié, que Christ seroit magnifié en  
 „ mon corps, soit par la vie, soit par la  
 „ mort: ie me resiouy à present d'une  
 „ joye inenarrable & glorieuse, de ce  
 „ que ie m'en vay seruir d'aspercion sur  
 „ l'immolation, & sur le sacrifice de la  
 „ foy des gentils, desquels Dieu a voulu  
 „ que ie sois le ministre, vaquant à l'œu-  
 „ ure sainte de l'Euangile, afin que l'o-  
 „ blation, que les gentils luy offrent  
 „ maintenant en Iesus Christ, luy fust  
 „ agreable estant sanctifiée par l'Esprit.  
 „ Or ayant de la sorte combattu le bon  
 „ combat, paracheué ma course, & gar-  
 „ dé la foy, ie suis certain au surplus,  
 „ que la couronne de iustice m'est reser-  
 „ uée, laquelle me rendra le Seigneur le  
 „ iuste iuge en cette iournée-là. Et non  
 „ seulement à moy, mais à tous ceux qui

auront aimé son apparition ; en la-  
 quelle il rendra à chacun selon ses œu-  
 ures. A ceux qui par patience à bien  
 faire cherchent gloire, honneur, & in-  
 corruption, la vie éternelle. Et à ceux  
 qui sont rebelles, & qui obeyssent à  
 iniustice, vengeance, ire, oppression,  
 & angoisse sur toute ame d'homme qui  
 fait mal. Et gloire, honneur, & paix à  
 quiconque fait bien. Et pour tant ie dé-  
 nonce à tous mes disciples, & à tous  
 les hommes de Dieu, qui veulent viare  
 selon pieté (laquelle est vn grand gain  
 & vne grande cheuance au fidele, puis  
 qu'elle le rend content de ce qu'il a)  
 qu'ils soient mes imitateurs, comme  
 ie le suis de Christ, & que cheminans  
 comme aussi Christ a cheminé, & com-  
 me ils nous ont eus pour exemple, ils  
 soient parfaits & accomplis à toute  
 bonne œuvre, simples & sans achop-  
 pement iusques à la iournée de Iesus-  
 Christ. Et pour cét effet, que premie-  
 rement ils se gardent d'estre enfléz  
 d'vn vain sçauoir, & de se rompre la  
 teste de la maladie des disputes, & des  
 controuerses, qui engendrent enuie,

„ contention, medifances, mauuais sou-  
 „ pçons, exercices d'efprit renuerfé,  
 „ d'hommes qui ont l'entendement cor-  
 „ rompu, & qui font priuez de toute co-  
 „ gnoiffance de la verité, eftimans que  
 „ la pieté foit vn trafic & marchandife.  
 „ Mais qu'ils recognoiffent, que ceux, qui  
 „ veulent fuiure Iefus Christ, n'ont à fai-  
 „ re en ce monde que de la nourriture  
 „ & du veftement, & partant qu'ils fe  
 „ gardent de s'enfermer dans la tenta-  
 „ tion, & au piege du diable, fuyans tou-  
 „ tes conuoirifes folles & dommagea-  
 „ bles, qui iettent les hommes dans l'a-  
 „ byfme de perdition. Et fur tout l'aua-  
 „ rice qui eft la racine de tous maux, la-  
 „ quelle efgare hors du chemin de la foy  
 „ ceux qui courent apres elle. Qu'au con-  
 „ traire, ils pourfuiuent iuftice, pieté,  
 „ foy, charité, patience, douceur, com-  
 „ batans durant toute leur courfe le bon  
 „ combat de la foy, empoignans la vie  
 „ eternelle, à laquelle ils font appellez.  
 „ Ce que ie denonce à tous deuant Dieu,  
 „ qui viuifie toutes chofes, & deuant Je-  
 „ fus Christ, qui a rendu le tefmoinage  
 „ de cefte belle cōfession deuant Ponce  
 Pilate

Pilate. A ce qu'ils ayent à garder, sans  
 tache & sans reprehension, le comman-  
 dement qu'il nous a donné, iusques à  
 son apparition. A fin qu'estant aggre-  
 ables à Dieu en toutes choses, & abon-  
 dans en toutes bonnes œuures, l'espreu-  
 ue de leur foy plus precieuse que l'or,  
 qui perit en l'espreuue du feu, produi-  
 sant tous fruits de iustice & de saincte-  
 té, leur tourne à loüange, honneur, &  
 gloire en la manifestation de Iesus Chr.  
 Laquelle sera monstrée en son propre  
 temps par le bien-heureux, & seul puis-  
 sant le Roy des Rois, & le Seigneur des  
 Seigneurs, qui seul possède l'immor-  
 talité, qui habite vne lumiere inaccessible,  
 que nul des hommes n'a veu, ny ne  
 peut voir. A luy, Roy des siecles, im-  
 mortel, inuisible, à Dieu seul sage soit  
 honneur & gloire, és siecles des siecles,  
 Amen.

Vous voyez icy le vray testament de  
 l'Apostre saint Paul, comme il nous l'a  
 conigné dans ses Epistres, extrait fide-  
 lement, & sans alteration, des tables où  
 le saint Esprit l'a graué luy-mesme.  
 Vous y voyez le tesmoignage naïf du

sentiment de la conscience. Sur quoy ie  
 demande à vous qui scauez que ce  
 grand Apôtre a esté fidele & pensif pour  
 du secret de Christ. A vous avec qui ie  
 veux bien volontiers admettre que le  
 Cardinal Hosius, de qui vous m'avez  
 produit le testament, a esté aussi en son  
 temps & en son ordre, ministre de la  
 même grace en l'Eglise de Dieu. A vous  
 finalement que ie reconnais appelle de  
 Dieu au ministère du même Eua-  
 ngile. Que vous me disiez, s'il vous plaît, dans  
 la différence que vous voyez entre le  
 testament que vous m'avez proposé, &  
 celui que ie vous presente, auquel vous  
 aimerez mieux que doit conformer le  
 sentiment de votre conscience. Car,  
 pour n'en mentir point, vous voyez  
 une grande différence entre l'un & l'autre.  
 Quand vostre témoin se presente  
 sans aucuns merites, & se propose la  
 miséricorde de Dieu, & la grace de Je-  
 sus Christ, pour le seul merite de la con-  
 science qu'il pretend recevoir sans auoir  
 rien mérité & combattu. Et quand le mien  
 se glorifie en ses travaux, en ses com-  
 bats, & aux exercices de la foy de la pr-

science, & de la charité, que la miséricorde de Dieu, & la grâce de Jesus Christ. ont fait abonder en luy. Et qu'il se confie la-dessus, que la couronne luy sera donnée par celuy qui juge chacun justement selon les oeuvres. Sans point de doute, le compte del'un & del'autre est fort différent. Mais dîtes-moy, quand vous aurez à rendre le compte à Dieu de vostre administration, pour estre agregé au nombre des fideles & loyals seruiteurs en la Roye de vostre Seigneur, auquel des deux vostre conscience vous dicte-t-elle maintenant, que vostre compte doive estre conforme? Sous la forme duquel voulez-vous que l'estat du vostre se trouue? C'est icy vostre conscience que j'interroge. Je n'attens que elle a maintenant autre sentiment. Et qu'au lieu que vous vous figurez, pour avoir trouue, comme vous estimez, vostre doctrine dans le testament du Cardinal Hosius, qu'elle est d'une lumiere si belle, si euidente, & si necessaire, qu'on ne peut auoir repos à l'heure de la mort, qu'en y reconuant.

vous voyez maintenant qu'elle n'est rien  
qu'une épaisse fumée, sortie de l'imagi-  
nation de ceux qui n'ont jamais compris  
comme il faut la doctrine de l'Evangile,  
& la vraie science de la Croix de Jesus  
Christ, sous laquelle se forme icy bas le  
salut en nous par son Esprit, qui par  
l'esperance de sa gloire espand la cha-  
rite au coeur des fideles, en les regene-  
rant a l'image de Christ en ceste vie  
pour les couronner reciproquement de  
sa gloire en l'autre.

Dieu regarde, du haut du ciel, de  
vostre priere pour avoir de la grace, &  
pour la grace de l'Esprit de Dieu.

Je respondray donc maintenant a  
l'Epilogue de vostre lute, auquel vous  
priez Dieu, que ce que vous m'avez re-  
presente ne me soit pas instructueux, &  
telmoignez que vous estes mari, come  
tous mesmeilleurs amis, de me voir elor-  
gne de la saine doctrine, & de la commu-  
nion de nos Eglises. Pour raison de quoy  
vous ne cesserez de prier Dieu qu'il  
m'y ramene, comme m'affectionnat au-  
tant, dites vous, que le peut permettre  
ce que vous devez a Dieu, & a vostre


conscience. Je vous diray, Monsieur,  
 que vostre priere & vostre douleur,  
 procedant, sans doute, d'une bonne af-  
 fection enuers moy, me fait d'autre re-  
 ciproquement le ressentiment que le  
 dois à l'obligation que l'en recueille.  
 Et pour ce que ie scay, que ce que ie  
 dois à Dieu, & à ma conscience, ne  
 me permet pas seulement, mais me  
 commande, de vous aimer sans res-  
 triction, & autant que moy-mesme.  
 ie vous di d'un cœur ouuert & que  
 Dieu regarde, qu'autant que la fin de  
 vostre priere peut auoir de succez, au-  
 tant la grace de l'Esprit de Dieu a mis  
 en ma conscience le fruit de la benedi-  
 ction que vous implorez pour mon fu-  
 jet. Et vous en ferez vous-mesme d'o-  
 renauant iuge plus expert, que vous  
 n'en auez esté aduocat bien instruit  
 dans vostre priere. Car vous verrez &  
 auquerez, comme ie me le persua-  
 de, qu'au lieu de m'estre éloigné de la  
 saine doctrine, Dieu me l'a donnée  
 pleinement a cognoistre & a verifié das  
 mon esprit, par la saine grace la vraye  
 & claire intelligence de l'Euangile

de son Fils, & du mystere de sa Croix,  
 par laquelle son esprit a introduit au  
 monde la iustice des siecles, & la sain-  
 tere veritable, qui est celle dont il  
 vous remontre la voye, en laquelle  
 tous les hommes de Dieu ont chemi-  
 né dans l'Eglise, depuis qu'elle a esté  
 edifiée par les mains des Apostres. Et  
 combien que ie vous exhorte, comme  
 ie le doy, & autant que ie puis, de ren-  
 trer par cette même voye, dans la  
 reunion avec les Catholiques: nean-  
 moins, faisant le mouuement de ce  
 même esprit, qui est l'Auteur de toute  
 charité, ie n'ay la mais eu la pensée,  
 ny ne l'ay ny ne la puis, ny ne le dois  
 auoir, de me separer de la communion  
 de nos Eglises. Estant chose manifeste-  
 ment contraire à ma proposition de  
 rompre l'union avec vous, moy qui  
 vous suis auteur d'union avec les  
 Catholiques. Car ce n'est point chose  
 conuenable ny compatible, que la ve-  
 rité qui est avec charité, soit la garde  
 de mon dessein, pour induire tous les  
 nostres à n'vallon & à la concorde  
 avec ceux dont nous sommes separés.



en la communion du Seigneur Iesus, non seulement ne se s'alterera en rien par les veritez à l'intelligence desquelles ie vous ramene : mais, qui plus est, il abondera d'autant plus que nous le porterons tout entier, & necessairement avec nous, dans la communion des Catholiques, en nous reünissant avec eux, pour repurger les peuples de toute superstition & de tout vice, dont la semence introduite & fomentée de temps en temps par la main de l'homme ennemi, a defiguré miserablement la face de l'Eglise, de la beauté, & de la naïveté dont elle reluisoit aux premiers siecles. En cette sainte & Chrestienne intention, j'espere que Dieu exaucera la priere que ie luy fay pour vous, au nom de son fils, & pour tous ceux qui ont la conduite des troupeaux qui vous sont commis, qu'il touche vos cœurs, pour cognoistre & pour iuger, en sincerité, de la lumiere qu'il vous presente par mon organe. A luy soit gloire aux siecles des siecles. Amen.

F I N.



84038